



*J. Johnson*



UNIVERSITEITSBIBLIOTHEEK GENT



900000042125



2-5

Hist 1519



ANTONII MARIÆ  
GRATIANI  
A BURGO S. SEPULCHRI  
EPISCOPI AMERINI  
*DE VITA*  
JOANNIS FRANCISCI  
COMMENDONI  
CARDINALIS  
LIBRI QUATUOR.



PARISIIS,  
Apud SEBASTIANUM MABRE-CRAMOISY,  
Regis Typographum, viâ Jacobzâ sub Ciconiis.  
M. DC. LXIX.  
CUM PRIVILEGIO REGIS.



THE NEW YORK PUBLIC LIBRARY  
ASTOR LENOX TILDEN FOUNDATION  
1215 BROADWAY

THE NEW YORK PUBLIC LIBRARY  
ASTOR LENOX TILDEN FOUNDATION  
1215 BROADWAY

THE NEW YORK PUBLIC LIBRARY  
ASTOR LENOX TILDEN FOUNDATION  
1215 BROADWAY  
NEW YORK



THE NEW YORK PUBLIC LIBRARY  
ASTOR LENOX TILDEN FOUNDATION  
1215 BROADWAY  
NEW YORK



ILLUSTRISS. ET AMPLISS. VIRO  
 IOANNI IACÔBO  
**MEMMIO**  
 COMITI AVAUXIO  
 CONSILIARIO REGIO  
 LIBELLORUM SUPPLICUM EXMAGISTRO  
 MAJORI PRÆSIDI DESIGNATO.



*I quis vel ignotissimus  
 Tibi, VIR ILLUSTRIS-  
 SIME, egregio huic ope-  
 ri patrocinium à tuo no-  
 mine quæreretur; na ille baud absur-*

â ij

## EPISTOLA

*dè fecisse videretur. Litterarium nempe munus litteratissimo nomini; vitam hominis in rebus agendis exercitatissimi, ingenio ex Gentis tuæ peculiari dote, ad summa quaque negotia tractanda nato commodum offerret. Ego verò, si aliunde huic libro fidei meæ ad editionem concredito, tutelam arcefferem, non modò inconsultò egisse, verùm etiam ingratißimi animi crimen incurrisse meritò viderer. Educatus enim ac penè innutritus, in sinu magni illius Claudii Memmii Comitæ Avauxii, cujus fama orbem Christianum pervagatur; cui nutritia persolvam quàm tibi tanti nominis, tantarum virtutum ex asse heredi?*

# EPISTOLA:

*Ex alieno scilicet ; cum ex meo vix possim aliud quàm gratum animum prestare , ac memoriam benevolentiae , qua me Illustrissimus Patruus tuus ab eo tempore , quo illi magno meo bono addictus fui , prosecutus est , sanctissimè colere. Obversatur profectò animo penè cottidie hominis humanitas , cum me inter familiares quos sibi tam acri & anxio delectu comparabat , licèt aliis atate & meritis imparem adlegit ; sacris legationum adhibuit , exscribendis videlicet epistolis , quas è conventu illo celeberrimo Monasteriensi , in omnes ferè Europæ partes emittebat. Quæ ibi imperiorum arcana jam non mihi videbar intue-*

## EPISTOLA.

*ri? Principum certè varia pro cuiusque eorum ingenio ac utilitate consilia ; Legatorum in rebus agendis , aliorum prudentiam , candorem , fidem ; aliorum astutiam , temeritatem , fallaciam introspicere licuit. Cum verò ea recogito qua in tam felici rerum Gallicarum cursu suadenda paci ad Regni Administros scribebat , ne scilicet hoc gaudium fortuna agridudine aliqua corrumpere ; tum verò non consilia dedisse , sed oracula fuisse affirmare non dubitaverim. Enimverò ea tempora sunt secuta , qua hominis miram in prospiciendis rerum eventis sollertiam ; profundam in rebus gerendis prudentiam , ni-*

# EPISTOLA.

*mis quàm verè , magno tamen Rei-  
publicæ damno probaverunt.*

*Ego igitur , cùm in tali ludo ti-  
rocinium posuissem civilis doctrina;  
fatendum quod res est , nonnullam  
rerum gerendarum habilitatem ac  
notitiam contraxi ; quo nomine in  
Poloniam sum ablegatus , ut nego-  
tiorum quæ nunc feruent maximè  
fundamenta ponerem. Quàm feli-  
citer cesserit dicent alii , mihi haud  
decorum est. Omnem certè movi la-  
pidem , omne studium consumpsi , ut  
res è sententia Regis mei Christia-  
nissimi succederet. Statum ac regi-  
men Polonia introspexi ; ingenia,  
mores , affectus & studia Procerum  
qui maximè in eo Regno possunt ,*

# EPISTOLA.

quàm potui sagaciter, odoratus sum; celeberrimas de summa Republica tractationes pervolvi; antiquas cum novis comparavi, eas potissimum quæ aut negotiorum similitudine, aut tractandi ratione, aut aliquo denique nexu, ad rem præsentem pertinere videbantur. Hic libentissimo animo in laudes Patroni mei, Patruï tui, revolvor; cui consortem, ac tanquam ejusdem aræ Paredrum, me arcessere Cardinalem Commendonum profectò non dedignaberis. Hos eximios viros, ne dixeris tantùm pares; prorsus similes fuere. Mitto majore stilo ac Chæroneo quodam ore, celebranda virtutis, pietatis, candoris, sapien-

tiæ,



## EPISTOLA.

*ria, eloquentia parallela. In rebus  
certè Polonicis paria & similia ges-  
serunt, qua in memoria hujus gen-  
tis nunquam sunt intermoritura.*

*Alter sancta Sedis Legatus, ne la-  
tius subnascentes hareses in eo Re-  
gno serperent, indefesso labore ac  
mira industria prohibuit; Rempu-  
blicam consiliis salutaribus juvit;  
electioni Henrici nostri prudentissi-  
mè praesedit, ac comitiorum astus  
compescuit, in mutuam perniciem e-  
rupturos. Quid verò in Germania  
& alibi dexterè feliciterque gesserit,  
malo Te ex eleganti & copiosa quam  
damus historia cognoscere, quam ex  
jejuna mea oratione. Alter verò,  
Claudius scilicet Memmius Regis  
Christianissimi in omnes penè Euro-*

## EPISTOLA

pauperes Legatus, quos quanta quae  
 res in celeberrimis concionibus Ro-  
 ma, et ceteris, in Dania, Suecia, Ger-  
 mania gesserim, multi locuti sunt,  
 plures loquuntur. Mibi circumque per-  
 treantur Polonia, in sola Polonia  
 congestenda est. Proh Dei hominum  
 quo scdem quam grata, sua vis, bo-  
 nificia, apud huius Regni Proceres  
 totam ibi supra omnem expectatio-  
 nem gestarum ab Illustriss. Legato  
 recordatio. Cum a Suecis fortuna sua  
 inestentibus, et Polonis repugnan-  
 tibus genere, inducias illas viginti  
 sex annorum, mihi prudentia ac elo-  
 quentia artibus, exproffit & penè  
 extorsit. Istud vero pietatis specimen  
 tubens bene praeferimus, etiam so-  
 lus de quo agimus, iam iam pactam,

# EPISTOLA

in discrimen adduxit, ac tandem non  
abrupit, ni Litteras Catholici profes-  
sore religionis publicam libertatem  
adversus opacis hominibus obtine-  
rent, Quacirca nullus mixari debet,  
se Agens in rebus Politicis, ejusma-  
di Harum Cras in de Regno Reges  
assidue in mente, in oculis habuerit;  
et si, cum ex veteri Sapientum dicto,  
Deus simile semper adducat ad si-  
mile; historiam vite Commendani,  
Iustitiae Auxilii hominis ei simili-  
mi Turke commendavit, ut commen-  
datione in publicam lucem praebeat,  
- ob hoc non nemo regeret continuo, me  
longe aberrare a proposito, vel Tibi  
velle illudere, qui prestigiosa qua-  
dam arte, Patrum pro nepote sup-  
ponam, absque tanto crimine me,

Vnde REVERENDISSIME, non impune  
 Tibi, quod mihi imposuit mihi. Quam  
 navigasse res habeo. Quoties intueor in-  
 genti rui doctores egregias, mores compo-  
 sitos, animam ad magna erectum,  
 perfectum omni et superiorum et am-  
 maram litterarum genere subactum,  
 quodque cupit est, genium illum re-  
 bus gerendis, negotiis tractandis  
 nullum fuisse unquam. Excelsiss.  
 Barham iam mihi videre video. Vi-  
 vens spirantem. Quod mihi ego. Cum  
 Rex noster Christianiss. inter ceteras  
 divinae mentis opes ingenti suorum  
 perspicacissimus indagator, idem ju-  
 diciu[m] tulerit: cum te jamdudum per  
 vestigia tanti Legati passibus equis  
 ingredientem, ad Septentrionis Re-  
 ges Oratorem ante plures annos desi-

## EPISTOLA

quare cum te pactis suis nuptialit  
 bus, quibus pax Christiana sancita  
 est, testem adhibuit, cum te denique  
 sacri Muneri participem esse iussit.  
 Habet igitur Rediviva ANAXI, iu-  
 re merito quod Excellentiſſo Patrio  
 tuo tot nominibus debitum, ſenexent  
 fata, perſolverem; quod tibi tot be-  
 nevolentia, humanitatis ac bene affe-  
 cti erga me animi teſtimoniis adſcri-  
 ctus, debea; alias etiam, vel ſola  
 virtutum tuarum reſpectu, lubens ex-  
 valens ultro oblata. Kal. id.  
 Eid. April. CIOIC. LXIX

Tibi addiſſimus ROGERIUS AKAKIA.

Romae in Museo Illustris ac Erud. Viri.

LECTORI S.

**C**ODEX manuscriptus ex quo editio  
hæc nostra expressa est, paratissimus  
erat ab omnibus quæ desiderari possunt,  
ut quis bonæ notæ liber faustis avibus in  
lucem prodiret. Viri scilicet eruditissimi &  
diligentissimi, a quibus manumissionem  
expectabat, nil prætermiserunt, quo orna-  
tiori cultu se daret in publicum. Præfationem  
elegantissimam, elogium ipsius scriptoris  
è selectissima Nicii Erythræi Pinacotheca  
præmisere; indicem denique copiosissimum  
addiderunt; ad id ut totus ex se aptus Typo-  
graphos ad amorem sui pellicere videretur.  
Verum ejusmodi artificum hodie in Italia  
talis aut penuria, aut negligentia est, ut a-  
liunde querendi fuerint, qui optimum fœ-  
rum tollere, & sibi vindicare velent; quod  
 tandem feliciter factum est, auctore ac fr-  
de iussore locupletissimo V. C. Petro Se-  
guino Regiæ insignis Ecclesiæ S. Germani  
Paris. Decano. Is cum Italiam perambula-  
ret, in qua, cum humanitate tum doctrina,  
sibi similes complures amicos conciliavit,

Romæ in Museo Illustriss. ac Erud. Viri,  
opus istud egregium nactus est. Ægrè tu-  
lit profecto vir acerrimi iudicii in dijudi-  
candis ejusmodi lucubrationibus, eximium  
scriptorem diutius in ea custodia tanquam  
captivum latere ac detineri: Alapas ei à li-  
bri Domino facile impetravit, libertatem &  
lucem Gallicam promisit; illam in hoc  
splendidissimo Academiæ Paris. sole præstat.

Fructu isto doctissimi Segurini dono, LE-  
CTOR, quodque ingenium animi est, cu-  
jani multum debeas, perge plura libenter  
ei debere velle. Non pòtes ignorare, nisi  
fis omnino amœniorum litterarum expers,  
& reconditoris antiquitatis incuriosus,  
quantum debeamus scrutatoribus & inter-  
pretibus priscorum numismatum, quan-  
tumque ad historiam Græcam Latinamque  
intelligendam, ac temporum seriem dige-  
rendam conferant: At ille noster instructis-  
simus ejusmodi Cimeliorum Museum pos-  
sidet; sed non tantum sibi: studiosis late  
pater, quos si quid vel abstrusissimum ab eo  
illustrari velint, quâ est affabilitate ac sol-  
ertia, promptè ac egregiè doctos dimittit.  
Novissime verò, invisas hactenus aliquot  
Deorum, Heroum, ac Regum effigies, aut

non intellectas earum inscriptiones, mirā  
 Latini sermonis puritate ac interpretationis  
 felicitate, plaudentibus artis peritis edidit.  
 Verumenimverò, pace illius dixerim, in-  
 ter illas imagines licet raritate & pretio e-  
 ximias, eminet imago vitæ Commendoni,  
 quam ejus beneficio tibi exhibemus, unde  
 viri Ecclesiastici, religionis & pietatis amo-  
 rem; Politici rerum agendarum peritiam  
 hauriant; Tu quisquis es, LECTOR, vi-  
 tutum omnium exempla depromere possis



AMICO



AMICO LECTORI

B. R.

**H**istoria superiorum temporum  
tamen si non ita hospites eramus,  
neque adeo rerum ignari, quin  
Joannem Franciscum Commendonum Cardinalem & vixisse, &  
virum fuisse magnâ virtute, & sapientiâ sci-  
remus; minimeque nos prateribat, Antonii  
Maria Gratiani librum de bello Cyprio à  
doctis hominibus legi, & laudari: nihil ta-  
men ampliùs de his à nobis querendum existi-  
mabamus. Cùm ecce tibi ab Amico aliud mi-  
hi ejusdem Gratiani scriptum de vita Com-  
mendoni, egregium, ut aiebat, legendum tra-  
ditur. Quod cùm vix a limine salutâsem, statim  
Heracliti celebre illud occurrit, Introite. In-  
gressus igitur non priùs abstiti, quàm ad ex-  
tremum pervenirem, ea cum admiratione pra-  
stantissimi operis, ut exinde palàm indignarer,  
adeoque stomacharer, libris omne genus hac tem-  
pestate sine modo, ac discrimine prodeuntibus, ja-  
cere hunc in obscuro, eique lucem, & immortali-

tatem, quam merito posceret, invideri. Accepit  
hæc generosus quidam juvenis, librumque nocturnis  
etiam perlegisset, & quæ est eruditio, & iudicio  
vehementer probasset, illico animum induxit,  
occasione arripere, laudemque ipse præcipere  
et hæc editione, non modo de præstantissimo scri-  
ptore, sed universa etiam de Republica bene  
merendi. Quamobrem diuturno tamquam car-  
cere liberatum, eo quem vides nunc, & orna-  
tu prodire iussit in publicum, idque nostræ  
ipsum curæ, & diligentia. Sed ne forte quod  
titulum vita præferi, in præjudicium ipse ver-  
tat, & fraudem perinde quasi inane quod-  
dam sit opus angustis finibus, rerumque mi-  
nutarum sterili narratione conclusum: contra,  
prædicimus in huiusmodi vita Christianæ Rei-  
publicæ, ac totius ferme Europæ multorum an-  
norum vitam (ut ita loquar) comprehendit,  
rerumque maximarum consilia, administra-  
tiones, eventus dilucide, copioseque narrari.  
Neque enim vir ille, quo de agitur, intra do-  
mesticos parietes privatus suis, aut civitatis  
tantum suæ publicæ curis occupatus, confectus,  
sed difficillimis temporibus, gravissimorum  
Christianæ rei negotiorum pondus, & molem  
non solum animo subiit, sed & nobilissimas le-  
gationibus in regiones, & Regna longè divisa,

ultra, citroque incredibili celeritate commean-  
 admirabili tum prudentia, solertiique, tum au-  
 thoritate, et eloquentia sustinuit, atque in his  
 Gratianum hunc ipsum perpetuo comitem, et  
 consiliorum participem habuit, rerumque ge-  
 rendarum fidelissimum, et solertissimum ad-  
 ministrum. Is autem quae vidit, et quibus  
 interfuit in historiam ita congegit, ut disci-  
 plina sapientissimi Heri sui alumnorum facile  
 agnoscas, quem ut prudentia, et doctrina,  
 ceterisque expressit virtutibus, ita eminentissi-  
 ma dignitate, ad quam per ejus vestigia viam  
 sibi muniverat, expressisset; sed mors manum  
 iniecit. Caterum orationis munditiam, nitore-  
 rem, et elegantiam, rebusque aptum, et ac-  
 commodatum dicendi genus, quo utitur, ju-  
 dicio ipse suo, et industria precipue debet.  
 nonnihil etiam fortuna, cum in ea tempora  
 incidere, quibus scribendi recte, et Latine  
 loquendi leges, atque praecepta religiosius ali-  
 quanto observabantur. Quae quidem omnia,  
 ERADITE LECTOR, tunc optime intelliges,  
 praestatumque scriptum non modo secum gaude-  
 bis, sed cum omnibus etiam doctrina, et ju-  
 dicio praeditis, gratulaberis tandem aliquando  
 communicatum.

ANTONII MARIÆ  
GRATIANI

VITA



Quam multa sepe ac summa ingenia  
in occulto latent, quæ, si amicis cuius  
piam opera in apertum proferrentur;  
maximum sibi, familiar, patriæque suæ;  
atque cædæ orbi terrarum, splendo-  
rem & ornamentum possent afferre.  
Nunc autem, cum, tanquam ferrum in  
humis desolatum, in tenebris jaceat, suæ desiderii tamquam  
rubiginis exeduntur, & illorum usus nequior efficitur.  
Atque ne longius abiret oratio, nisi Antonius Mariæ  
de Gratianis, Borgia, nobili imprimis loco natus, bi  
in Cardinalem Commendatum incidisset, quicum  
Aloysio fratri magnus usus, & amicitia intercedebat, ut  
vel in castris, vel militiam didicisset, Julii patris exco-  
plo, qui sepe in ea ordines duxerat, vel probul à Re-  
publica sine litteris, sine aliquo verum usu, ingenium ad  
parte relictum, coluisset, vel per inertiâ, desiderium. V I  
que, morti similem vitam exegisset. Commendatus igitur  
tor, qui, forsasse, quæserat, summi sagacitate, & adolescentis  
tis ingenium odoratus fuerat. Aloysio fratri suib; austro-  
suasor, impulsor, ut liberalibus suum disciplinâ erudiendus  
dum, instigandumque curaret. Itaque, annos natus

AUCTORIS VITA.

num & vicini, missus est in quoddam Forolivi op-  
pident, ubi cum quidam magistris foret, ac nova ra-  
tione perant, doceret, quibus omne quodlibet ad  
ad humanitatem folet. At ipse parentum, in ipso eru-  
dendo, negligentiam discendi celebrare compenavit.  
Nam cum eo esset profectus, omnium rerum rudis, pau-  
cis post annis in mensibus reverfus est, latini sermonis  
adeo peritus, ac doctus, ut diligentiam admirarentur  
omnes, ingenium agnoscerent: ac Commendonus adeo  
amplexus est hominem, ut eum nunquam à se dimise-  
rit, sed in filii loco dilexerit, ac magistri partes sumens,  
in libris Aristotelis de Rhetorica, de Republica, ac de  
moribus, erudierit, cum semper ad manus haberet,  
ejusque & fide, & industria cognita, omnium consiliorum  
eum esse participem voluerit, in illis octo nobilissimis  
legationibus, quibus fungus est, quarumque immorta-  
lis erit memoria. Quibus legationibus diligenter obeun-  
dis, ac fideliter administrandis, Commendonus ita se  
præbuit, ut eum omnes, tamquam & se laudantem,  
intuerentur. Nam, si repperit momentum temporum, sta-  
ceat, jam inde, si que ab inimicis nati essent, Eock, & me-  
niamus, nullum unquam fuisse tempus Republicæ  
Christianæ atrox, atque difficile, quam eodem tempore  
divinitus excitatus sit aliquis, qui ingenio, auctoritate,  
sapientia, parvis illis rebus, ac dubiis posset occurrere.  
Idque cum coheret, cum ex antiquis tum ex recentibus  
nostri primum monumentis, ac libris, non est necesse  
pluribus verbis offendere. Atque in Commendoni glo-  
riam incidere, hæc omnia maxima atque gravissi-  
ma Concilium Tridentinum, cuius convocandi gratia  
bis missus est ad Ferdinandum Cæsarem, semel à Pio  
I. V. Pontifice Maximo, iterum à Cardinalibus, qui sa-  
cro sancto illi conventui præerant, tum tres in Polonia  
consecutus sunt, implicata, atque difficiles, unde ma-  
gnus periculorum metus portendebatur, sed etiam profe-  
sus, restitit, semel, atque iterum, primò Pio I. V. iussu, &

# AUGUSTONIS VITA

Nuncii ordinarii provinciam administraret, quod munus cum ceteris atque sapienter obiret, antequam inde discederet, creatus est, ab eodem Pontifice Cardinalis, deinde coactus est rursus illud iter arripere, missus à Pio V. Legatus ad Regem Augustum, ut uxori Catharinae punctionem remittere cogitantem, de sententia dimoveret, & ad bellum Turcis inferendum impelleret, ubi etiam, cum Rex, ille diem obisset, supremum, omnes conatus adhibuit, ut in eius locum succederet aliquis, qui Catholicae religionis cultor existeret, & eandem auctoritate potuit, valuitque eloquentia, ut Henricus Galliarum Rex frater, Rex Poloniae, omnium suffragus, eligeretur. Quibus actis, cum Pontifex fecisset illi potestatem redeundi in urbem, rebus bonum planè in tranquillo collocatis, & haereticis quaecumque fors obruisset, rerum novarum occasionem paratis arripere, Antonium Mariam, de quo est sermo reliquit, ut, ex Pontificis auctoritate, Episcopos, & Catholicos Regni confirmaret, novoque Regi adessen, Quem cum advenire, jamque in Saxoniâ pervenisset, comperisset, sexcentis ferme milibus passuum obviam illi processit, & quo loco Regni res essent, exposuisset rationes, quibus aliud ex sententia administrari, & Catholica hâc promoveri posset, ostendit. Quae ita Regi gratâ fuerunt, ut ea sibi scripta, tradi mandaverit, neque deinceps quidquam, nisi ex eius auctoritate, atque sententia, gesserit. Inciderunt etiam in Commendoni remissa, alia quatuor, maxima, atque gravissima, fides Catholica, tota Germania, labefactata, ac penè convulsa, comitia Augustae habenda, meruerunt, Augustana confesso in summam Germaniae religionis perniciem, Austriae civitatum populis, permitteretur, foedus advenus Turcam, inter Christianos Principes incundum. De his omnibus, quatenus intra paucos annos, missus est in Germaniam Legatus ad Maximilianum Caesarem, qui etiam fuerat placandus, quod iniquo animo tulisset, Cosmo Mediceo à Pio V. Magni Ducis cognomen fuisse

## AUCTORIS VITA

inductum, quod ejusmodi cognomentis, & appellatio-  
nibus quoniam afficere, & imperitorem, non autem  
ad Romanum Pontificem pertineret, contenderet. In  
his omnibus adfuit Antonius Maria, neque quidquam  
sine ejus consilio gestum est. Sciebat enim Commen-  
datus, quantæ sibi ejus opera esset utilitati, ut muni-  
eribus. Neque id Regem Henricum fugi, qui magnis  
ad se illum sollicitationibus, semel, iterum, ac sæpius,  
invitavit, ut ejus opera, quemadmodum expertus fue-  
rat, egregiè, atque fidei videretur. Sed nulla tam lue-  
lenta conditio inventa est, quæ illum potuisset à Car-  
dinali Commendone divellere; cui soli, neque alteri  
cupiam, quod viveret, suas opera debere existima-  
bat. Qui Cardinalis cum de referenda eorum, tantique il-  
lius in se meritis gratia cogitaret, si non par, gratio-  
rum aliquo munere, die quodam ad se vocatum dona-  
vi syngrapho, in quo erat perscriptum, ut ab Argenta-  
rio, quatuor centorum millia, numerata peteret, quæ  
vellet esse, quasi mercedem laborum, quos pro ipso sus-  
cepisset, simulque petebat ab eo, ne hanc, quamvis  
exiguam, sive in ipsum voluntatis significationem asper-  
naretur, sed illud, quidquid esset, equè, bonique con-  
sulere. Cui Antonius Maria respondisse fertur, quid,  
quid fecisset, se honoris sui gratia facisse, verum, si res ad  
calculum revocaretur, bene inter, subdistingue ratione,  
non par inveniretur ratio acceptorum, atque datorum;  
nam, se multo illi plura debere proutebatur, quam ipse  
ab illo accepisset. Illius verbò dolorem se non posse dis-  
simulare, quod cerneret, eorum se liberos, ac numero ha-  
bere, qui mercenariam ipsi operam darent, se enim, di-  
luctu antea hominem, ejus opera, atque labore, factum  
esse alioj præci, ipsique Republicæ inventum esse  
ut illis, probiorem, ac, petita ab eo demissa, & humi-  
litate venia, syngrapham conficeret. Admittit Cardi-  
nalis magnitudinem animi, sperantis id, eius an-  
cipitare, ab ipso, fidem jurjurandi, pensionem, ali-  
quam, bonam famam, existimare nemque contemnunt,

## AUCTORIS VITA.

non ita multò post locupletem Saxiferrati Abbatiam, ex qua bis mille scuta quotannis redibant, sibi detractam, est illi, quamvis invito, ac repugnanti, largitus. Mortuo Cardinali, Sixtus V. usus eo est in Latinis literis scribendis. Quo in munere perquam diligentem, ac laudabilem illi operam dedit. Post cujus mortem, eodem gradu fuit apud Alexandrum Cardinalem Montaltum, eique in quatuor illis conclavibus, quæ deinceps consecuta sunt, affuit; in ejusque opera, Clementi VIII. ad Pontificatum Maximum adipiscendum, longè maximus usus fuit. Id quod Clemens non dissimulavit, sed sæpè, multis audientibus, dixit se Antonii Mariæ in agendo dexteritati, prudentiæ, diligentique Pontificatum referre acceptum. Quapropter ornabat eum officiis, beneficiisque pluribus: nam & Episcopum Amerinæ creavit, quod superiori Episcopo mortuo esset alter in illius locum subrogandus; & Nuncium ad omnes primùm Christianos Principes, sceleris causâ feriendi contra Turcas, deinde ad Rempublicam Veneram misit. Ubi, maximè duabus in rebus gravissimis, ejus virtus eluxit. Etenim cum de jure, imperioque quæreretur, quod Veneti in Adriatico mari exercerent, pro Sede Apostolica libellum elegantissimum scripsit, qui etiam nunc in Tabulario Vaticanæ Palatii continetur: neque tamen eo offensi sunt Veneti, cumque Alphonso, Ferrariæ Duce, vitâ functo, Cæsar Estensis, cognatione illi proximus, Ferrariam sibi debori contenderet, auctoritate, consilioque perfecit, ne Senatus ille Cæsaris causam susciperet, eamque armis tueretur; imò ab eodem obrinuit, ut Sedi Apostolicæ, plura armorum genera ad illius belli usum suppeditarentur. Atque constat Clementem habuisse in animo in Cardinalium Collegium eum cooprare, ac non semel, sed quoties Cardinalium comitia essent habenda, descriptum in illis habuisse, qui eo essent honore cohortandi; sed semper sententiâ destitisse, deterritum à Petto Cardinali Aldobrandino, fratris filio, cui cum

Magno



# AUCTORIS VITA.

Magnus Etrurix Dux, penitus illo in imperio; ac ditione  
 nob. (sunt Bilingia; ordinisque) ortus, quæ Magna  
 Etruria. Dum paret imperio, cum primis illius  
 civitatis numerabatur, varis inquam, discordiarum cau-  
 sas intercedebant. Verum, cum jam ætate confectus, &  
 podagra, pechaciter obnoxius, re ipsa experiretur,  
 Venerum Calum sibi minus esse salubre, petiit opere  
 maximo à Summo Pontifice, ut ab ea provincia remo-  
 veretur, ac, vniâ impetratâ, Amerinam se contulit.  
 Quam Ecclesiam usque ad extremum vitæ spiritum,  
 integritatis, prudentiæ, ac sanctitatis famâ administra-  
 vit, quæ sit nunquam interitura, sed deinceps omni-  
 bus, qui in eundem locum, ac numerum venerint, ad fi-  
 miliam virtutum exemplum, imitationemque victura.  
 Nemini erat molestus, nemini gravis, sed contrâ, om-  
 nibus iucundus, omnibus comis, numquam animos ex-  
 tulit, sed, demisso humiliterque se gessit, nemini pe-  
 tenti, aditus conveniendi non dabat, sed omnes ad  
 ipsam aditus cunctis, qui vellent, quibusvis erant ho-  
 stis, sporta, nemo se ab eo despectum, nemo contra rem  
 suam, injuriâ, aliquid decretum fuisse questus est, vi-  
 quam, sed omnibus jus suum tribuebat, omnes ample-  
 ctabatur, omnibus se dabat, cum magna conversatio-  
 ne, cum utilibus se verè, cum remissis iucunde vivebat,  
 atque, ad Apostoli exemplum, ad easque ingentem, quo  
 omnes iustificaret, versabat suam naturam, huc, & illuc  
 torquens, ac floctens. Nullum honesti sermonis genus à  
 se unquam alienum duxit, sed de omnibus rebus, quæ  
 in sermonem, disceptationemque cadunt, copiose, ele-  
 gantèrque diserebat, cum militaribus hominibus de  
 officio Imperatoris, ac de omni re militari, cum eru-  
 ditis de omni elegantia litterarum, cum philosophis de  
 rerum natura, cum Theologis de Deo immortali,  
 divinisque mysteriis loquebatur. Denique homo erat  
 omnium, ut dicitur, horarum, temporum, & homi-  
 num. Multa reliquit egregia, quæ referuntur homi-  
 num manibus; Synodum Ecclesiæ Amerinæ, de bel-

## AUCTORIS VITA:

Io Cyprio, de casibus adversis illustrium virorum sui ævi, Cardinalis Commendoni Vitam; quo libro omnes ab eo legationes obitæ, omnesque res magnæ suæ auctoritate, consilioque gestæ narrantur. Obiit Americæ, annos natus quinque & septuaginta, cxcxcxi.



---

### ANTONII Mariæ GRATIANI in Cardinalatum Joannis Francisci Commendoni.

**Q**UI tibi purpureos meritò mandavit honores,  
Ipse quidem magno est auctus honore Pater.  
Nam virtute tuâ magnum capit incrementum  
Ipse honor, et pulchra est purpura facta magis.  
Mox ubi tergemino fulgens radiaverit auro  
Frons sacer ipse, omnis aureus Orbis erit.





# INDEX CAPITVM.

## IN LIBRUM PRIMUM.

- CAP. I. **D**E origine, familia, & parentibus Jo. Francisci Commendoni.  
pag. 1
- CAP. II. De iis, quæ infanti acciderunt, & de periculis ejus in navigando. 6
- CAP. III. De prima ejus institutione. 8
- CAP. IV. De profectione ejus ad visendam Urbem, & quo auctore suscepit. 13
- CAP. V. De primo ejus ad Rempublicam accessu, & de ratione, quam primum habuit.  
18
- CAP. VI. Brevis transitus rerum, & honorum ejus. 23
- CAP. VII. De prædictionibus futura dignitatis ejus.  
25
- CAP. VIII. Quæ prima commendatio ejus ad Julium Pontificem. 29
- CAP. IX. Quò primum publicè missus sit. 31
- CAP. X. De profectione ejus ad Belgas. 33
- CAP. XI. De ejus in Britanniam adventu, & actis ibi per eum. 37
- CAP. XII. De reditu ejus in Urbem. 43

## INDEX CAPITUM.

|             |   |    |
|-------------|---|----|
| CAP. XIII.  | <i>De profectione ejus in Lusitaniam.</i>                             | 47 |
| CAP. XIV.   | <i>De Marcelli, &amp; Pauli Pontificum<br/>Maxx. studio erga eum.</i> | 50 |
| CAP. XV.    | <i>De novo ejus itinere ad Belgas.</i>                                | 53 |
| CAP. XVI.   | <i>Ad Venetos, &amp; alios Italiae Principes<br/>mittitur.</i>        | 58 |
| CAP. XVII.  | <i>Quomodo è Pauli gratia decidit.</i>                                | 61 |
| CAP. XVIII. | <i>De Carrafa, fratribusque Urbe pulsis,</i>                          | 64 |

## IN LIBRUM II.

|            |   |     |
|------------|---|-----|
| CAP. I.    | <b>A</b> d Casarem, & Germaniae Prin-<br>cipes de Concilio mittitur.                                  | 70  |
| CAP. II.   | <i>Acta per eum in conventu Germanorum.</i>   | 76  |
| CAP. III.  | <i>Principum Germaniae contumeliosa ora-<br/>tio, &amp; Commendoni responsio.</i>                     | 82  |
| CAP. IV.   | <i>De reliquo ejus per Germaniam itinere.</i>   | 95  |
| CAP. V.    | <i>Nova ejus ad Casarem profectio.</i>  | 105 |
| CAP. VI.   | <i>In Poloniam Nuncius Apostolicus ad<br/>Regem mittitur.</i>   | 108 |
| CAP. VII.  | <i>De sacrorum disciplina in Polonia de-<br/>pravata.</i>   | 110 |
| CAP. VIII. | <i>De dissensione inter Episcopos, &amp; quo-<br/>rundam consiliis à Commendono re-<br/>pudiatis.</i> | 116 |
| CAP. IX.   | <i>De Bernardino Ochino, aliisque per eum<br/>è Polonia pulsis.</i>                                   | 123 |

## INDEX CAPITUM.

|            |   |     |
|------------|---|-----|
| CAP. X.    | <i>De nationali Concilio per Commendonum rejecto.</i>                               | 134 |
| CAP. XI.   | <i>De Concilii Tridentini decretis à Rege, Senatûque acceptis.</i>                  | 139 |
| CAP. XII.  | <i>De studio ejus peragrandæ Polonia.</i>   | 150 |
| CAP. XIII. | <i>De Prussia feris.</i>  | 158 |
| CAP. XIV.  | <i>De Succino.</i>  | 163 |
| CAP. XV.   | <i>De Russia.</i>   | 166 |
| CAP. XVI.  | <i>De Podolia, deque ejus frequentandæ consilio Regi allato.</i>                    | 171 |
| CAP. XVII. | <i>De Rege cupiente divortium cum uxore facere, &amp; per Commendonum dissuaso.</i> | 179 |

---

## IN LIBRUM III.

|            |  |       |
|------------|--|-------|
| CAP. I.    | <b>D</b> E eo in Cardinalium collegio cooptato.                  | 211   |
| CAP. II.   | <i>De discessu ejus à Polonia, &amp; legatione ad Germanos.</i>  | 228   |
| CAP. III.  | <i>De reditu ejus ad Urbem.</i>                                  | 241   |
| CAP. IV.   | <i>Secunda legatio ejus ad Casarem.</i>                          | 246   |
| CAP. V.    | <i>De negotio illi dato ordinandi rem Ecclesiasticam.</i>        | 262   |
| CAP. VI.   | <i>De fœdere per Pontificem adversus Turcas icto ejus operâ.</i> | 266   |
| CAP. VII.  | <i>De nova ejus ad Casarem, &amp; Polonos legatione.</i>         | 271   |
| CAP. VIII. | <i>Causa magni Ducis Hetruriae per eum</i>                       | ô iij |

## INDEX CAPITUM.

|          |  |     |
|----------|--|-----|
|          | <i>apud Casarem acta.</i>                                    | 278 |
| CAP. IX. | <i>De nova legatione, &amp; profectioe ejus in Poloniam.</i> | 289 |
| CAP. X.  | <i>Actio cum Rege, &amp; Polonis de fœdere.</i>              | 293 |

---

## IN LIBRUM IV.

|            |   |     |
|------------|---|-----|
| CAP. I.    | <b>D</b> E Sigismundi Augusti Regis ultimi Jagelloniae familia morte.           | 314 |
| CAP. II.   | <i>De preparatis ab eo pro Regis Catholici electione.</i>                       | 317 |
| CAP. III.  | <i>De consiliis ejus Regnum uni è Casaris filiis conciliandi.</i>               | 325 |
| CAP. IV.   | <i>De legatione ad eum ab hæreticis missa, ut egrederetur Poloniâ.</i>          | 333 |
| CAP. V.    | <i>Quomodo Casar petitionis suæ rationem omnem everterit.</i>                   | 337 |
| CAP. VI.   | <i>De competitoribus Regni.</i>   | 344 |
| CAP. VII.  | <i>De impia hæreticorum fraude, quam confæderationem ipsi appellarunt.</i>      | 354 |
| CAP. VIII. | <i>De adventu Commendoni Varsaviam, &amp; de consilio illi in Castris dato.</i> | 362 |
| CAP. IX.   | <i>De comitiis habitis, &amp; Henrico Rege creato.</i>                          | 369 |
| CAP. X.    | <i>De discessu Commendoni Poloniâ, &amp; de mora adventus Regis.</i>            | 380 |
| CAP. XI.   | <i>De quibusdam quæ adventantem Regem</i>                                       |     |

# INDEX CAPITUM.

|             |  |     |
|-------------|--|-----|
|             | auctor edocuit.  | 391 |
| CAP. XII.   | De adventu Regis, & de coronatione,<br>& fuga ejus.                  | 401 |
| CAP. XIII.  | De eodem Commendono.   | 411 |
| CAP. XIV.   | De quibusdam moribus ejus.   | 415 |
| CAP. XV.    | De constantia ejus adversus potentiores.                             | 419 |
| CAP. XVI.   | De more ejus numquam se purgandi, de<br>quo conscius sibi non esset. | 428 |
| CAP. XVII.  | De abstinentia ejus.   | 432 |
| CAP. XVIII. | De habitu corporis, valetudine, & mor-<br>te ejus.                   | 436 |



## Errata sic corrige.

|   |   |
|---|---|
| PAG. 26. percolvit, <i>lege</i> , percoluit                         | sum   |
| Pag. 31. haberetur, <i>leg.</i> laberetur                           | Pag. 181. ac Polonos, <i>leg.</i> ac Polonus  |
| Pag. 40. ministro, <i>leg.</i> ministros                            | Pag. 212. & cum hæc, <i>videtur deesse a-</i>   |
| Pag. 67. Florentium, <i>leg.</i> Florentium                         | <i>liquid</i>   |
| Pag. 73. peragratur, <i>leg.</i> peragrat                           | Pag. 165. affectantes, <i>leg.</i> affectantes  |
| Pag. 100. Namburgium, <i>leg.</i> Ham-<br>burgium                   | Pag. 294. Jagellonis, <i>leg.</i> Jagellonis  |
| Pag. 107. eminet. Trecenti, <i>leg.</i> emi-<br>neret, trecenti     | Pag. 306. formandis, <i>leg.</i> firmandis  |
| Pag. 119. injiciebant, <i>leg.</i> injiciebat                       | Pag. 321. deduxerat, <i>leg.</i> diduxerat  |
| Pag. 121. populi, <i>leg.</i> populi                                | <i>Ibid.</i> haud, <i>leg.</i> aut  |
| Pag. 133. cuiquam. <i>distingue &amp; lege.</i><br>cui quamplurimos | Pag. 345. videbantur, <i>deest verbum</i><br><i>aliquid, ut recusaturi, rejecturi</i> |
| Pag. 135. cum Eticio, <i>leg.</i> Eticio, is est<br>Modrevis        | Pag. 353. & quid, <i>leg.</i> Ecquid  |
| Pag. 137. hominum, <i>leg.</i> hominem                              | Pag. 356. frequentiam, <i>leg.</i> infrequen-<br>tiam                                 |
| Pag. 141. quod, <i>leg.</i> quod                                    | Pag. 387. objicere, <i>leg.</i> abjicere  |
| Pag. 173. multum efficiunt, <i>leg.</i> mul-                        | Pag. 417. tumque, <i>leg.</i> cumque  |
|   | Pag. 430. Ductio, <i>leg.</i> Ductio.   |



*Campman fecit.*





ANTONII MARIÆ  
GRATIANI  
*DE VITA*  
JOANNIS FRANCISCI  
COMMENDONI  
CARDINALIS  
LIBER PRIMUS.

---

*De Origine, Familia, & Parentibus ejus.*

CAPUT PRIMUM.

**G**ENS Commendona apud Bergomum, nobilem Cifalpinæ Galliæ urbem, honestæ in primis, ac vetustæ originis habetur. Ipsi stirpem suam ad Germanos referunt. Inde virum quemdam domi nobilem nomine

A

Dogaldum, patriâ profugum, Bergomum venisse, & hospitaliter primò à Bergomatibus habitum, mox etiam in civitatem, publicumque Consilium receptum translatis omnibus fortunis apud eos confedisse memorant. Post multos deinde annos, fortunæ proventu aucti, gentili amisso, cognomen ab dominatu oppidi Bergomatum agri, cui Commendonæ est nomen, accepere. Et hodie eorum quidam non alio cognomento, quàm Dominorum, vtuntur, vocitanturque. Potentiæ, ac divitiarum familiæ multa, nec pauca sunt argumenta. Præter Commendonum oppidum, Albinum quoque vicum in ditione habuere. Et Bergomatium Episcopatus, quod non liberalitatis solum, sed pietatis etiam documentum est, ab iis auctus, ac latifundiis donatus est, in quibus insignia Gentis lapidibus incisa, quo monumentum munificentiae ad posterorum memoriam extat, in hodiernum diem manent. Joannes Galeatius Vicecomes Mediolanensium Dux, cuius tantæ fuere opes, vt ad Italiæ Regnum aspirasse dicatur, Bergamo in potestatem redacto, Commendonam gentem in primis afflixit, penitusque evertit, quia pertinacius pro Veneta Republica adversus Galeatii partes steterisset. Concinus tum familiæ Princeps erat, quem patriâ, fortunisque pulsum Veneti benignè excepere, stipendia ei posterisque ejus, ac filiabus dorem de publico statuere, cuius rei in tabulariis Venetorum extant Senatusconsulta

honorificis in Concinum, majoresque ejus scripta verbis, quos insignes viros magnis clientelis, & affinitatibus, magnis item opibus, & summa apud Montanos homines auctoritate præditos appellant; hisque omnibus ob eximiam in Venetam Rempubicam fidem, atque studium bello Mediolanensi spoliatos restantur. Ab hac communi familiæ ruina, pars in vicinis vrbibus, quas sibi quisque exilii sedes delegerat, mansere; pars Bergomum rediit, vbi hodie quoque inter honestos, ac locupletes cives habentur. Ex his, qui solo patrio ejecti, reverti Bergomum neglexerunt, proavus Joannis Francisci, cujus nos vitam scribere instituimus, Venetias se, resque suas transtulit, atque ibi vxore ductâ Josephum filium reliquit, atque hic Antonium procreavit: Qui ingenuè à patre educatus vir evasit in Philosophiæ, ac Medicinæ studiis non mediocriter eruditus. Quam quidem ipse artem haud paulò liberaliùs, quàm pro more medicorum, exercuit, non pretium, sed doctrinæ ac benevolentia officii fructum ex ea petens; fuitque ob id magna in civitate gratia, qua inde Patriciæ nobilissimæ virginis conjugium meruit: Quamquam id quidem non tam gratia assecutum tradunt, quàm quia vxoris frater, cum ob sordes animi grandem jam natu virginem, & parentibus amissis, quintum, ac vigesimum transgressam annum domi in ancillaribus penè ministeriis nullâ ætatis, aut dignitatis ejus curâ habere porro perge-

ret, atque eam locare pari, ne dotem adnumeraret, prorsus negligeret, ipsam sibi, ne in illa miseria senesceret, consuluisse, & Antonio, qui fortè ægram accersitu fratris, curabat, ultro nupsisse. Hoc igitur Antonius fortunæ suæ modo contentus honesto in otio consenuit. Atque hæc gens, & is pater Joanni Francisco fuit. Maternum autem genus splendidius, illustriusque. Mater Laura Barbadica summo Veneriis loco nata, per quam nobilissimas Patriciorum familias propinquâ affinitate Joannes Franciscus contingebat; Materna Avia Clara Bolania, cujus dote Barbadicorum ditata est Domus, in quam aureorum numûm supra 70000. intulisse dicitur. Proavus Marcus Antonius Barbadicus, cujus duo fratres natu majores, Marcus, & Augustinus, alius post alium Principes Reipublicæ sunt creati. Marcus modestiâ, atque innocentîâ vitæ, & gloriâ ablati à paucis familiis, quæ se vetustate originis aliis præferebant, principatus, & ad numero plures penes quas hodie manet, translati celebris. Prudentiæ laude, & rebus gestis Augustinus major, clariorque, cujus Principis auctoritas in civitate tanta fuit, ut in potentiam verteret, majorem, quàm tutum communi libertati fore videretur, ni fides illi, & amor Reipublicæ sanctior, potiorque omni regno fuisset. Augustinus enim majestatem Regis sibi, quàm potestatem apud cives suos esse maluit. Quin eos moriens monuisse dicitur, ut ne posthac quicquam vni

tantum juris esse in Republica paterentur. Quod & Veneti secuti consilium sunt, circumcisâ, ac severis legibus coërcitâ Ducum potestate. Ex Laura Antonius quatuor liberos suscepit, Joannem Franciscum, qui natus est Venetiis anno 1524. xv. Kalend. Aprilis hora circiter sexta diei; Josephum, qui penè infans decessit, Clementiam, & Lucretiam. Hæc adultâ ætate aspernata nuptias Patavii in contubernio sacrarum Virginum, quo vîâ à primis annis fuerat, decessit anno 1564. quo tempore Joannes Franciscus legatione apud Polonos fungebatur. Clementia Venetiis nupsit Baldasari Caveo patricii generis juveni, quas nuptias, absente Joanne Francisco, Philippus Mocenigus is qui postea Archiepiscopus Cypri fuit, quicum Joannes Franciscus à condiscipulatu conjunctissimè vixerat, conciliavit. E Clementia tres nati filii: Joannes Franciscus, Antonius, & Laura. Hanc virginem viginti jam annos natam, cum Commendonus jam Cardinalis homini nobilissimo Silvio Gonzagæ despondisset, ante nuptias pestilentia intercepit. Qua quidem pestilentia ipsi quoque parentes ejus, & Joannes Franciscus frater Patavii anno 1576. continuatis funeribus alius super alio interiëre. Quem casum, itragémque Domus suæ Commendonus sicuti summo cum dolore accepit, ita eximiâ animi constantiâ pertulit. Antonius natu minimus suis omnibus superstes fuit, atque hic postea à Commendono vnicus hæres relictus, & aliquot diti-

bus sacerdotiis auctus, ultimus stirpis fuit, cùm sacris addictus prolem non propagavit.

---

*De his qua infanti acciderunt, ac de periculis ejus in navigando.*

## CAPUT II.

**E**DITUS primùm in lucem, cùm de more ab obstetrice lavaretur, ipso in alveolo sua sponte genibus stetisse., junctasque in cælum manus terendisse dicitur. Item quo die initiandus Christianis sacris, solemni que ritu sacratæ infusu aquæ abluendus erat, ad templum cùm deferretur, nebuloso admodum cælo repente è mediis nubibus emissio solis radio infans clarissimâ est luce perfusus. Quæ seu casu acciderint, sive quod sæpè evenisse constat; futuram pueri magnitudinem portenderint, constanter quidem tum de eo memorabantur. Vixdum quadrimus summum vitæ discrimen navigans adiit. Cùm mater è Clodia Venetias parvâ cymbâ tranaret, puer, nihil advertente matre ad latus navigii obrepfit, & manu aquam contingere adnicens in mare decidit, & cymba velo, secundaque aura ferebatur: exterrita ad filii casum præcipitatura se illa in vndas fuit, ni conantem, ac propè amentem exceperint famulæ. At puer admirabili audaciâ, & celeritate nautæ servatus est, qui cla-

vum regens, animadverso casu, relaxato subitò fune, quo velum pandebatur, in mare profiluit, ac suscepto puero incolumem ad navigium, quod dejecto velo constiterat, nando retulit, matrique propemodum jam dolore exanimatæ restituit. Futura pueri dignitas fecit, ut non frustra tam evidenti Dei numine tanto periculo ereptus videretur. Nec ferè vnquam ille sine periculo navigavit. Romam petens, cum Clodiarum ut Ancoram traiceret, conscendisset, fractâ per noctem ad Senogalliam navi, vadosum eiectus in litus, trecentos amplius passus nandi ignarus, vndantibus supra pectus fluctibus, confecit pedibus; atque ægrè per tenebras in siccum evasit, cum eorum aliqui, qui eodem navigio vehebantur, aquis obruti perierint. In Belgis Oceani sinum transmissurum ab Amstelodamo cælo sereno, ac secundo provectum vento, tanta eadem nocte tempestas adorta est, ut obfusis vndique densissimis tenebris, cælo crebris, atque ingentibus tonitribus, fulgoribusque omnium mentes pavore perstringente, ac non vectoribus modò aliis, & comitibus ejus, sed ipsis etiam territis navigulario, nautisque, non longè abfuerit, quin magnitudine fluctuum navis hauriretur; sed salutis omnibus ipse tum vnus fuit. Nam cæteris horrore, nausæaque jacentibus, animoque, & corpore abjectis, quorum in numero ipse fui, qui hæc postea scripsi, ille quamquam adedò solutus ær in imbrem erat, ut completurus navim vide-

retur, ad officiâque discurrentes in os incidens impediret, tamen nullâ territus re, vno adjuvante cubiculario ejus Dionysio Viterbio Paravino, qui solus experts nausæ fuit, ad omnia navarum munia occurrens, eosque despondentes jam animum, nunc oratione, nunc ultro subeundo opera eorum confirmans navem servavit, cum sequenti die luce ortâ desævisset tempestas, & reddita mari tranquillitas esset. Ne fluminibus quidem vnquam sine adversis casibus navigavit. Vitandam omnem navigationem, mari, aquisque abstinendum, quòd fatale inde periculum immineret, prædicentes quosdam, & monentes amicos, risit semper, nec quoties res, atque oportunitas tulit, propterea committere se mari, navibusque est veritus.

---

*De prima ejus institutione.*

CAPUT III.

**S**UMMA Patris cura institutus est; nam penè infans specimina ingenii dederat, & ab Astrologis ingentia, atque summa portendi, talium haud incurioso Patri responsum erat. Vix decimum annum agens Latina carmina non scriptitabat solum, sed etiam de re proposita ex tempore edebat, eratque propterea in amoribus Principum civitatis, quorum amicitia florebat Pater,



Pater, ut multi ad ludum, ubi cum æqualibus instituebatur, ventitarent, quo pueri ingenium in ejus ætatis exercitationibus spectarent, cognoscerentque an famæ, quæ de eo inter aliorum parentes puerorum erat, responderet, nec alio ferè cohortandi, aut increpandi liberos loco vterentur, quàm ut ejus ad imitandum exemplum proponerent. Magister illi erat Bernardus Felicianus, vir quidem eruditus, ac diligens, sed quod fateri ipse, ac præ se ferre soleret, Commendoni ingenio, quàm suo majorem in civitate famam adeptus. Unde cum multi ad eum è Patritiis primorum filii ducerentur, ipse tamen unius excellenti indole, atque acumine gloriaretur, eoque studiosius, & majori curâ omnibus doctrinis informabat, instituebátque, quas puerilis illa capere ætas potest. Ab hoc ad Antonium Ariam Hispanum nobilem Grammaticum se contulit, eodémque tempore Antonio quoque Eparcho ab Zacyntho Græcarum litterarum Doctore est usus, & ipse puer ad omnem disciplinam cum mirè docilis, tum quod paucis admodum usu venit, memoria summa ad ea, quæ doctus esset retinenda erat; nam à quibus celeriter res percipiuntur, iis etiam facile solere excidere, & contrà qui laboriosè discunt, firmiùs omnia aiunt retinere; veluti impressa difficiliùs, quàm quæ modò illita sunt, delentur. Magnopere autem videbatur animus ejus teneri commemoratione insignium Virorum, qui per virtutem ad magnam aliquam gloriam, ho-

norémque pervenissent, eorúmque egregia facinora adeò cupide audiebat, vt sæpè ab ore narrantium talia penderet, sæpè Patrem, Magistrúmque oraret, vt sibi de claro aliquo viro commemorarent: sive ea pueri natura, quod illi ætati accidere solet, curiosior fuit, sive animus ejus jam tum magnæ laudis spem affectans, narratione alienæ virtutis gestiebat. Quartum-decimum agens annum Patavium à patre discendi causâ est missus, vbi<sup>1</sup> plures annos in optimis disciplinis magnâ ingenii gloriâ est versatus, captus primò Poëtarum suavitatem, ita se Poëtices studiis, legendisque, ac scribendis carminibus dedit, vt inde vel præcipuam sibi famam comparaverit, tanto quidem majori immaturæ ætatis ejus admiratione, quanto non æqualibus modò suis in eo genere celeriter antecelleret, verùm etiã cum claris viris conferebatur, quæ Poëtices laude præstare tum existimabantur. Philosophiam deinde aggressus doctissimos homines audivit, aviditate ingenti Philosophorum præcepta hauriens, maxime Platonis sapientiã delectatus, propterea quòd illum diceret propius, quàm cæteros à Christianæ Philosophiæ institutis abesse. Multos ejus libros exercendi ingenii causâ è Græco in Latinum vertit, omnes ferè explicatione rerum, quæ obscuriores essent, illustravit. Hi postea commentarii ejus in manus nostras pervenerant, quos studiosè conservatos à nobis, cum fortè ipse multos post annos reperisset, conscidit, atque incendit,

sanè immerentes. Verùm dum his disciplinis adolescens cupidè animum imbuìt, & discendi dulcedine studiis nullà valetudinis curà vsque indulget, nullùmque sibi legendi, ac meditandi modum statuit, in periculosum, atque importunum incidit morbum oculorum, quo magnopere illi retardatus, ac pæne intercisus est omnis susceptæ laudis cursus. Ab succo nimio corporis vis magna sanguinis in oculos influens aciem obdlexerat, curatione adeò difficili, vt cum multa experto infeliciter omnia procederent, etiam ipsum quadriennium inclusus conclavi, atque impatiens lucis vim infesti humoris, neque exsiccare, neque aliò derivare ullis remediis præstantissimis adhibitis medicis valeret, desperatà valetudine, de illa ipsa Terentiana domo ad Vallis prata, quam Patavii conductam inhabitabat, emenda, omnique deinceps vitæ ibi agenda cogitaverit. Tandem Joannis Baptistæ Montani Veronensis Medicorum tum longè principis consilio, cauterium sinistro in cruce cum fecisset, sive id reperi- tum mali remedium, sive suâ sponte consumpta vis morbi esset, lumen ei est restitutum, ita integrâ acie, vt qui acutiùs, aut longiùs cerneret, qui celeriùs objecta oculis percurreret, fuerit postea nemo. Toto verò illo tempore, quo oculorum captus vsu in tenebris egit, quamquam omnis ejus fuerit studiorum ratio perturbata, non tamen ipse se desidiæ, aut languori dedit: Verùm aut dictandis carminibus, quâ re maximè adole-

ſcentis animus recreari videbatur, temporis ejus moleſtiam lenibat, aut legenti operam dabat, ſolatia mali inde petens, vnde contraxerat. Cùm maximè morbo vexaretur, patrem amiſit octo & ſeptuaginta annos natum, cùm eſſet ipſe decem & novem annorum; cujus morte magnam fecit familiaris rei jacturam, quæ illi tota comminuta, ac diſſipata eſt, cùm curare ipſe res domeſticas nec per ætatem, nec per valetudinem quiret, & Marcus Antonius Barbadicus avunculus ejus, qui tueri adoleſcentis rem debuit, homo effrenatæ avaritiæ etiam diripuit. Quæ tamen ipſe damna haudquaquam quanti erant æſtimavit, doctrinarum cupidine occupatus, & omnibus curis depellendo morbo intentus. Cùm convaluiſſet, conſilio eorum quibus à patre fuerat commendatus, ad cognoscendum Jus Civile animum nequaquam libenter traduxit. Quo ipſo in ſtudio ut pares ab eadem celeritate ingenii progreſſus faceret, eoque magnoperè lætarentur, quibus auctoribus eam doctrinæ viam ingreſſus erat, tamen Platonis, & Philoſophorum conſuetudinem ut abjiceret adduci cujuſquam auctoritate non potuit; & animus jam tunc geſtiens enitendi, & navandi aliquid ſtudio, in iis maximè virtutis præceptis conſtitit, quibus ad res gerendas, vitamque in hominum luce agitandam inſtituitur, fruſtra ſuſcipi putans rerum abditarum ſcientiam, niſi ea ad hominum uſum, utilitatēque compareretur. Eloquentiæ exercitationes omnes, ſine qua ipſa

vix ratio satis tueri munus suum posse videtur, ingenti labore est persecutus, scriptitando, declamando, colloquendo. Nam & juvenis æqualis sui ob eandem factam capitis arcessiti causam Patavii apud Prætozem egit, tenuitque. Et cum Patavinorum civitas Francisco Donato Republicæ principatu de more gratulatum misisset, orationem, quam Legati habuere, ipse composuit. Quo ex studio id sanè est adeptus, quod postea magno ei fructui, ac decori fuit, ut promptâ, & expeditâ dicendi facultate rem propositam seu patriâ, seu Latinâ oratione, vel continuatâ, & productâ, si res desideraret, ita explicare, ac peragere posset, ut cum nihil conquirendis verbis, aut jungendis hæsitaret, quod plerisque accidere solet, genus orationis minimè inquinatum, ac barbarum, & certè, quod difficillimum est, æquabile, & vnde-  
quaque sui simile teneret.

---

*De profectione ejus ad videndam urbem, &  
quo auctore eam suscepit.*

#### CAPUT IV.

**F**ACTIS per has maximè artes reliquæ vitæ fundamentis, motâque apud omnes magnâ sui expectatione ad vigesimum quintum ætatis annum pervenit, ut erecto ad res capeffendas animo ita haud satis certus quam vitæ rationem se-

B iij

queretur. Erat Patavii Aloyfius Cornelius insignis eâ tempestate senex ille, cujus in valetudine tuenda tanta cura, ac religio fuit, vt cùm optimis, & ad concoquendum facillimis vteretur cibis, tamen apposita libra, vt quidque edendum bibendûmque erat lancibus examinaret, & modum quem sibi ab intelligentia sui corporis ipse præstituerat, nihil excederet, vnde ei Sobrii cognomen accidit. Hunc colebant, observabantque fere Patavii quoscumque aut generis, aut ingenii præstantia nobilitaret; nam & splendide ipse semper, atque honorificè vixit, & ejus domus, quam ad Antonii ædificaverat, propter hortos & ædificii elegantiam vulgò visebatur, & ducebantur homines non literatissimi illius quidem, sed moderati, & maximè acuti, & jucundi senis sermonibus. Itaque nullius frequentior Patavii domus erat; ipseque mirificè in omnes humanitate, incredibiliter præclaris ingeniis delectabatur, iisque cùm opus esset, omnibus suis studiis aderat. Commendonum senex adolescentem summè dilexit, in quo clarissima industriæ lumina elucebant. Cùm igitur dubitantem quam potissimum vitæ viam insisteret, idque secum diu, multumque deliberantem Cornelius aggressus (senferat enim senex sollicitum adolescentis animum) hortari institit, vt se Romam conferret; in vna illa civitate virtuti cùm omnia paterent, tot instructo naturæ, ac doctrinæ adjumentis celeriter aditum ad res magnas futurum: denique eum sibi vnum tan-

tæ industriæ curriculum videri. Id consilium ab amantissimo sui homine profectum, ut non aspernatus est adolescentis animus, ita accipere, ac de se statuere tanta præsertim de re non audebat, eo minùs, quòd cum vnus ipse Venetiis Commendonæ familiæ reliquus esset, interiturum cum eo, si sacerdos fieret, gentis quoque nomen erat; & paterni amici, conjunctique omnes Venetiis eum retinebant. Cùm sæpe hac de re appellatus à Cornelio nihil statueret, rogare senex eum cœpit, ut saltem Romam ad visendam urbem, formamque Reipublicæ illius cognoscendam iret. Ad id quidem eo faciliùs perpulit, quòd is erat annus M. D. L. quo indicto à Julio III. Pontifice Maximo Jubileo, multi mortales, vel ab vltimis profecti terris Romam religionis causâ convenire solent; & vrbis templa, & Divorum sepulcra, Petri maximè & Pauli ossa eodem condita tumulo venerari. Sub finem ejus anni Commendonus Romam venit, comitibus Hieronymo Renaldo, & Antonio Altano, quorum amicitia Patavii plurimùm utebatur. Quatuor admodum menses Romæ est commoratus. Reversus Patavium de Romanis rebus, deque tota ratione Romanæ aulæ, & quibus quisque initiis, & quasi ostiis ad eam accedere, per quas artes, ad quem finem spectare, & tendere deberet, ita disseruit cum Cornelio, ut senex exclamaret, aut hunc summum Romæ virum fore, aut se rerum omnium imperitissimum esse. Audivi ego aliquot post annos, cùm adolescens Pa-

ravii literis operam darem, & Commendonus in  
 magno honorum cursu, maximâque hominum  
 spe, atque fama publicas legationes pro Roma-  
 na re obiret, sæpe hæc commemorantem Corne-  
 lium, qui nullâ re magis gloriari videbatur, quàm  
 quòd Commendono auctor Romanæ professionis  
 ipse fuisset. Singularis hujus viri exitit in Com-  
 mendonum benevolentia, quam à pueritia ejus  
 susceptam ad ultimum vitæ conservavit. Quam  
 quidem vitam in tantum produxit, vt eo anno  
 sit mortuus, quo Commendonus legatione apud  
 Polonos fungens Cardinalis est creatus. Quo qui-  
 dem anno cum ego ex Polonia rediens, quò cum  
 illo eram profectus, Patavii recreandæ valetudi-  
 nis causâ restitisssem, & Cornelium paucos ante-  
 quam moreretur dies adiiisssem, effusissimè senex  
 mihi Commendoni Cardinalatum est gratulatus,  
 ex quo tantam se lætitiâ cepisse aiebat, vt nihil  
 meminere sensisse in vita jucundius. Deinde quo  
 die est mortuus, cum instare sibi vitæ finem præ-  
 sentiret, deque ea re ita loqueretur, vt non de  
 omnium maximè horribili, sed veluti de migra-  
 tione quadam in aliam domum, sedens in lectu-  
 lo, quo perangusto & parvo utebatur, & Vero-  
 nica vxor adesset, anus ferè ejus æqualis, mihi  
 magno prorsus, & integro vocis sono, causas,  
 propter quas non invitus de vita discederet, com-  
 memoravit, ac longo piòque habito sermone, ad  
 postremum hoc, inquit, vno minùs libenter mi-  
 graturus è vita sum, quòd Commendonum vide-  
 re



re antè nequiverim, eo insignem honore, cui à me tantò antè confiso ejus virtute, præstantique natura spe destinatus fuit. Atque hoc loco multa ei, & summa cùm esset auguratus, epistolam ad eum scripsit sua manu, qua certiore mortis suæ instantis reddebat; hortabaturque eum, ut pergeret iisdem artibus, quibus virtutem suam in amplissimo gradu dignitatis collocasset, in dies magis de Christiana Republica, & Ecclesia Dei bene, ac fortiter mereri; temperantiam coleret virtutum omnium genitricem, qua & mentis acies acuitur, & valetudo, maximum in humanis rebus bonum, integra, vigensque conservatur. Hæc cùm scripsisset, & vix putare se bidui vitam superesse sibi diceret, nos discessimus. Ille paulò post abeuntem credo vitalem vim sentiens arcessi sacerdotes Jesuitas jussit, collocutusque cum iis de divinis rebus, cùm se antè Christianis sacris ritè procurasset, Crucifixi parvum simulacrum læva manu tenens, lætum se, ac bona spe fretum venire, simulacrum intuens proclamavit. Eo deinde posito, decorè sese in lectulo composuit, oculisque occlusis, tamquam obdormiturus leni efflatu animam egit, cùm vix horæ tres ab eo sermone, quem nobiscum habuerat, intercessissent. Nam ex illa victus moderatione, mente, sensibusque integris ad postremum vsque spiritum vixit, quem ad octavum & nonagesimum annum ætatis perduxit. Hæc pauca de Cornelio, viro ac sene clarissimo, libuit interscribere, quan-

do & memorabilis ipse vir fuit, & Commendonium in primis dilexisse est visus.

---

*De primo ejus ad Rempublicam accessu, & de ratione quam primum in vrbe habuit.*

## CAPUT V.

**V**ISA Româ, perceptâque civitatis ejus formâ, nihil vltrâ dubitavit, quin sibi immigrandum in eam urbem statueret, eorum spretis consiliis, qui ad eum domi retinendum, & honorifica illi conjugia, & accessum in scribarum Collegia offerebant, in quæ nonnisi honesti de plebe homines, vetustæque in civitate originis, si modò patritio genere orti non sint, admittuntur. Honores enim, & publicæ procuraciones, & jus suffragiorum Venetiis Patritio tantum parent: reliqui non in aliam Reipublicæ partem, quàm ministerii admittuntur. Sed Commendono major, atque elatior animus, naturâque erat, quàm vt se, aut in scribarum humilitatem demitteret, aut in ea civitate vivere sciret, in qua exors Reipublicæ, nec pari cum reliquis jure esset futurus. Nec magis alia res juvenem, vt Venetias, ac spem propagandæ familiæ relinqueret, compulisse creditur, quàm vt eò decederet, vbi nihil clausum sibi, nihil interdictum, nihil, quod, quominus virtute, atque industria niti posset, im-

pediret. Commodum hæc cogitantem senior propinquus ejus Ecclesiasticis beneficiis duobus in Patavino agro auxit, quorum ex vectigalibus ad trecenti numi aurei ad eum redibant, tantumdem ex patrimonii sui reliquiis capiebat, præter id quod in sororum dotem seposuerat. Hoc igitur fortunarum modo compositis domi rebus, Romam concessit anno M. D. L I. nec diù moratus, viam, qua sibi eundum esset, delegit. Plerique homines, qui Romam ad capeßendas res urbanas, quod quidem nemini, quantumvis longinquo, & alienigenæ non licet, quo potentis alicujus gratiâ, atque opibus adjuti faciliùs enitantur, in Principum, aut Cardinalium alicujus fidem conferre se consuevêre. Sed Commendonus, qui se ita alteri adjungerent ratus non suâ, sed alienâ fortunâ ferri, nemini vni se applicare, suus, non alienus Reipublicæ non partium ejus esse, statim ab initio decrevit; inque eo vsque ad ultimum vno vitæ, & consiliorum tenore permansit. Itaque nactus Romæ Nicolaum Pontium Venetorum Legatum, eum qui postea civitatis suæ Dux est creatus, per hunc Julio III. Pontifici Maximo commendatus in familiam ejus, Cubiculariorumque numerum, ut ascisceretur impetrat; qui tum ordo perhonorificus Romæ habebatur, neque in eum nisi magno cum delectu honoris causâ assumebantur probatissimi juvenes, & ingenii, & generis dignitate commendati. Hoc modo ille non tam in Julii familiam adscri-

prum se, quàm in jus civitatis, ac Reipublicæ receptum putavit. Nam Romana res, etsi vnus imperio habetur, tamen quia is eligitur liberis suffragiis, neque ob provectam ætatem diu rerum potitur, nec ejus ipsius vllum est in successore arbitrium, ac nemo spe, atque aditu honorum arceatur, inesse huic civitati, & aliæ species Reipublicæ videntur, vt cùm vnus summam potestatem, summumque jus omnium rerum obtineat, nonnullæ tamen esse, & principum, & multitudinis opes videri possint. Itaque Commendonus gratiæ, amicitisq; jungendis animum intendit, magno judicio, delectuque, cujusque enim ante omnia mores spectavit, studiæque, quarum rerum similitudine maximè familiaritas, & benevolentia confirmatur. Dedit igitur operam, vt qui essent in vrbe viri literarum, & doctrinæ nomine clari, eos haberet amore, & consuetudine conjunctos; nec gratiam solùm inter illos, sed ingenii quoque famam celeriter est assecutus. Quorum præter cæteros familiariter vsus est Hannibale Caro, propter morum, & doctrinæ elegantiam, & suavitatem, Gulielmo Sirleto, qui ei postea collega in Cardinalatu fuit, vir cùm innocentia summâ, tum memoriæ tantæ, vt cùm omnes omnium artium libros, omnia scripta Græcorum ac Latinorum vetera, recentiaque infatigabili labore perlegisset, eorum non singulas modò sententias, sed verba quoque memoriter recenseret, cùm bibliothecæ instar, vel de abstrusissimis re-

bus consuleretur. Quod nisi congestis in vnus  
notitiam tot rerum doctrinis ingenium impar  
fuiſſet, memorabiliorem virum ætas noſtra non  
tuliffet. Octavio præterea Pantagato, Jacobo  
Marmita, Baſilio Zanchio, Paulo Manutio, Ju-  
lio Pogiano, viris Romanæ eloquentiæ principi-  
bus, qui omnes cùm eum ætate anteirent, tamen  
gravitate, modeſtiâque morum, & peracri in ipſis  
quoque doctrinæ ſtudiis iudicio juvenis mirificè  
tenebantur. Nec minùs ſtudioſè è ſacerdotum  
ſocietatibus, maximè Jeſuitis, quorum (vt fla-  
grantiſſima ſunt omnium initia diſciplinarum)  
longè tum ſanctitas, atque auctoritas inter om-  
nes eminebat, qui ſcientiâ divinarum rerum, &  
morum, ac religionis laude commendarentur,  
amicitias coluit. Probaſiſſimo cuique & proſpe-  
ræ in civitate famæ diligi, carumque haberi ap-  
petens, quod ſibi exiſtimationi, atque laudi re-  
batur fore. Et quamquam amicos non numero,  
ſed genere diſtinguebat, & doctorum hominum,  
ac proborum conſuetudine maximè utebatur: ta-  
men quamplurimos ex omni genere benevolen-  
tiâ, atque officiis devinctos vti haberet, & quàm  
latiſſimè gratiam propagaret, operam dabat. Cæ-  
terùm è Cardinalium ordine ingentes viros, lon-  
gèque inter omnes pietatis, & ſapientiæ laudi-  
bus præſtantes, colendos ſibi, atque in vitæ, ac  
morum inſtitutis imitandos ſuſcepit. Horum ob-  
ſervavit maximè Joannem Petrum Carafam, qui  
tum Collegii princeps erat, & Marcellum Cer-

vinum, & Reginaldum Polum Britannum. Quorum Marcellus Julio, ei ipsi deinceps Joannes Petrus in Pontificatu Maximo successere: & Polus nihil propius fuit, quàm ut Pontifex renunciaretur iis comitiis, quibus Julius ipse creatus est. Proximos his habuit Jacobum Puteum, Rodolphum Pium, Joannem Salviatum, Federicum Cæsum, quibus omnibus adeò probatus est juvenis senibus, ut omnes sui perstudiosos, suisque faventes rebus semper habuerit. Innocentium Montium, quem Julius non humilibus modò, ac sordidis, sed vix satis certis parentibus ortum, ac ne ullius quidem artis specimine commendatum, inopia prolis adoptari à fratre jusserat, atque in summum inde cooptato ordinem, summum gratiæ, atque rerum propè omnium arbitrium, prava, insanæque indulgentia permiserat, cum vnum omnes appellarent, appeterent, ambirent, omnibus colerent officiis, Commendonus moribus originis suæ sordibus imbutis, non novâ fortunâ, atque amplitudine dignis viventem, nec propriè observavit umquam, & penitus se domo ejus abstinuit: qui enim intelligeret quale cujusque sit ingenium ex eorum maximè moribus æstimari solere, in quorum quis amicitiam se contulisset, maluit famæ ex gravissimorum virorum familiaritate, quàm ambitioni ex vnius inconfulti, ac dissoluti juvenis gratia inservire.

*Brevis transcursus rerum , & honorum ejus.*

## CAPUT VI.

**P**AULò pòst publicis rebus admotus est , atque honores velut impetu aggressus omnes contento propè cursu pervasit , & quod mirabilius , & , vt nos senes longo vsu vrbinarum rerum peritos sæpe narrantes de eo audivimus , prorsus singulare fuit , non suis , non cuiusquam potentis opibus nixo , non petenti , ac sæpe recusanti , minimèque ambitionis causâ alienis moribus servienti , vltro omnia delata , atque ingesta sunt. Anni quatuordecim à primo adventu ejus in vrbem ad Cardinalatum intercessere , quibus numquam ferè vacuus à publico munere egit. Eodem quo Romam venit anno M. D. LI. Urbinum est missus : anno insequenti in Belgas , atque inde in Britanniam. Inde regressus in Lusitaniâ est profectus , atque his itineribus Julii quinquennium est transactum. A Paulo IV. M. D. LV. scribendis epistolis ascitus , eodem anno Episcopus creatur ; destinatus & Urbanus Prætor ab eodem Paulo , sed mox Orator , sive , vt novo quamquam vſitato jam , ac trito Romæ vocabulo vtar , Nuntius ad Carolum Cæsarem commorandi causâ apud eum est missus , ad quem tamen bello inter ipsum , & Paulum exorto non pervenit. Reversus Romam ad concitandos ad bellum Principes Italiæ circummittitur ,

atque iis aditis, Venetiis, vt in eamdem societatem armorum Senarum adduceret, manere est iussus, atque his quoque obeundis muneribus, quatuor ferme consumpti anni, & Pauli Pontificatus exactus est. A Pio IV. quo anno Pontifex Maximus est creatus, qui fuit M. D. LX. Nuntius item ad Ferdinandum Cæsarem, Principisque Germaniæ est ire iussus, qua in peregrinatione annum & dimidium fuit. Post reditum inde à Cardinalibus Concilii præsidibus ad eundem Ferdinandum Cæsarem remittitur, eoque celeriter confecto itinere, in Poloniam, vt Nuntius apud Sigismundum Augustum Regem, gentemque esset, protinus legatur. Sic Pii IV. anno item quinto, quo anno Pontifex moritur, absens Cardinalis est creatus. Anno inde M. D. LXVI. à Pio V. legatus ad Maximilianum Cæsarem Germaniæ conventum Augustæ agentem ire iubetur. Ac biennio post ad eum à præcipiti consilio tribuendi Austriæ populis jus Lutheraniæ hæresis revocandum est missus; alióque item biennio post ad eundem Cæsarem, & ad Regem Poloniæ de fœdere jungendo adversus Turcas novâ legatione est perfunctus. His itineribus, quibus omnes propè Christianas provincias, quæ in Europa sunt, peragravit, numquam æger fuit, viæ difficultates, laborésque etiam voluptati habuit; non eum æstus, non imbres, non immania Septentrionis frigora fatigarunt. Proposito hoc veluti cursu rerum ipsius singula nunc ordine enarrare pergemus.

*De*



*De prædictionibus futurae dignitatis ejus.*

## CAPUT VII.

**I**MPUBERIS adhuc, & adolescentis tanta opinio, atque expectatio fuit, vt passim prædicarent homines cum ad summam aliquam laudem peruenturum. Cùm Romam venisset, statim eadem de illo orta spes. Hannibalem Carum, virum sanè optimum, & vrbunarum rerum diuturno vsu, atque obseruatione in primis peritum, adolescens ego sæpe audiui cùm diceret, duobus se æqualibus suis Nicolao Ardinghello, & Marcello Cervino primis diebus, quibus Romam venère, perspectâ eorum industriâ, Cardinalatum prædixisse, in neutro falsum se iudicio esse; vtrumque enim per varias mandatorum munerum functiones, suâ virtute Paulo III. Pontifici Maximo probatâ in summum ordinem pervenisse; quorum Ardinghellus decesserat, Marcellus in maxima hominum fama, atque spe supremi honoris tum erat. Quem postea honorem haud ita multis interjectis mensibus mortuo Julio est adeptus. Commendonum tertium esse Carus aiebat, quem magnis gerendis rebus factum eidem amplitudini ab pari ingenii æstimatione, destinavit. Ei certè tantum tribuit semper, vt nullius benevolentiam, atque amicitiam magis coluerit: illi fratris

D

filium in domesticorum munerum ministeria tradiderit, nec ullius fidei commendatam domum, suosque magis cupierit: cæterum comprobaram eventu conjecturam suam, ut impense, ita non diu lætatus est; iisdem enim diebus jam senex est mortuus, quibus Commendonus ad urbem Cardinalis venit anno 1566. Joannes Petrus Carafa Cardinalis, qui postea Paulus IV. est dictus, summæ vir gravitatis, & prudentiæ consuetudine juvenis mirè delectatus, sæpe inter suos parem eum omnibus honoribus, & brevi adepturum edixit, ipsumque identidem accendens, hortabatur, ut pergeret ire quibus cœpisset itineribus, ad magna & summa perventurum. Idem cum non multo post Pontifex Maximus eum Episcopum faceret, ferrèque multis laudibus, adjecit:

*Debile principium melior fortuna sequetur.*

Sed hæc ex moribus ejus conjectabant homines: Illa ex interpretatione astrorum. Quo tempore est natus responsum patri à Mathematicis est, magnum virum fore, summumque imperium ad eum perventurum. Romæ eadem seu verè, sive assentantes spei, quæ de illo erat, cecinere, & quidem constanter, nec multum variante judicio omnes. At in Lusitania cum eò à Pontifice ad Regem missus venisset; inter eos, à quibus observari, adiri que officii causâ solebat, exul Hispanus nomine Maldonatus, studiosius eum quam cæteri persolvit, homo Latinis, Græcisque litteris doctus, & in Astrorum scientia memoriæ ejus

facile princeps. Is in longo sermone variè per-  
cunctando à Commendono elicit non diem mo-  
dò, sed horam quoque ortus ejus. Tum positu  
cœli stellarumque notato, quo quæque in signo,  
quæve earum inter se conjunctiones, motuive,  
nascente illo fuissent, ad eum rediit manu ferens  
parvam schedam, quam Commendono tradidit.  
In ea Mathematicorum notis situs syderum, de-  
scriptioque dimensa, ac designata erat, & sub-  
scripta brevis epistola. Natalem à se horam mul-  
torum inspectam esse, quòque nati fato, quæve  
eventura iis ex astrorum observatione esse vide-  
rentur prædixisse: nullius ortum felicioribus signis  
conclusum animadvertisse. Pergeret porro, & quò  
Deus, & natura vocarent, sequeretur, imperium  
ei, ac principatum deberi illius Reipublicæ ad  
quancumque se contulisset, suam propè jam æta-  
tem exactam esse, neque ad illud tempus produce-  
re vitam posse, filio mandaturum, ut ei à se obsi-  
gnatas litteras afferret, orare ut memor à quo tan-  
tò antè hæc sibi prædicta fuissent, tum aliquam  
filio gratiam referret, cum prædictionem suam  
secuta res confirmasset. Tempus quoque definire  
non est veritus alterum & sexagesimum ætatis an-  
num, trigésimum tum agentis, in quem annum  
incidit mors Gregorii XII. Pontificis Maximi,  
cui ipse successor, & votis bonorum, & studiis  
Patrum destinabatur, nisi importuni morbi vis  
eum paucos ante dies, ut suo loco dicemus, præ-  
ripuisset. Hunc Maldonatum satis constabat mul-

ta ab eadem scientia multis, quæ evenère, præ-  
nunciassè. Ipse in exilium ierat, quòd cùm Hi-  
spaniæ civitates à Carolo V. defecissent, intercon-  
citatores popularium, vnus omnium acerrimè in  
illa versatus causa erat. Quamquam antè consu-  
lentibus amicis adversum seditionis eventum, &  
suam ipsius calamitatem prædixerat, testatus offi-  
cium nihilominus sibi, atque fidem erga patriam  
omnibus rebus antiquiorem fore, nec necessario  
tempori suorum civium defuturum. Cùm exula-  
rum in Lusitaniam venisset, Joannem Regem mo-  
nuerat, vt maturaret Emanueli filio nuptias, ne-  
gans eum adolescentiam evasurum, cuius dicto  
& pater paruit, & filius intra vigesimum annum æ-  
tatis extinctus fidem affirmavit. His conjectorum  
dictis ad amplissimas opes Commendonus incitari  
potuisset; sed ea ille haud ignarus vanitatis Mathe-  
maticorum, & quæ ipsa portendunt astra, fallacissi-  
mo ab iis sensu judicari, trahique plerumque quò-  
aut assentandi, aut obtrectandi libido rapit, per-  
risum, jocumque accepit, nullam fati vim, omnia  
cælesti numine contineri, ac regi existimans, quæ-  
que hominibus prospera, adversaque eveniant, ea  
Dei nutu, atque potestate, à quo singula provi-  
dentur, atque administrantur, non necessitate  
vlla fieri naturæ aiebat.



*Qua prima commendatio ejus ad Julium  
Pontificem.*

CAPUT VIII.

**H**ORTOS Julius extra Portam Flaminiam sumptu, atque opere sanè magno ædificabat, in eos nobilis, ac vetusti fontis aquam virginem duxerat. Antiqui operis statua eam virginis sopitæ somno, ac super urnam recumbentis effundebat. Hanc celebrari carminibus varii generis, prout spatia lapidum erant, quibus incidenda essent, & Julius jussit, & certatim non Romæ solùm, sed per Italiam quoque arrepta materia est decoris ingeniis. Commendonus summum illud studium suum, quo à pueritia fuerat incensus, deque animi ad eam rem impetu plurimùm remiserat; sed tum incitatus studio Pontificis, & contentione eruditissimorum hominum, & ipse epigrammata aliquot, & argumento, & intervallis apta composuit. Quæ cum Julius legisset, ( & habebatur talium peracutus æstimator ) non probavit modò, sed omnibus prælata insculpi protinus jussit. Vocato inde ad se Commendono variè percunctando juvenis animum exploravit, expenditque. Quo deinde dimisso ad adstantes conversus, Majorum, inquit, laudum semina huic juveni insunt, majusque ingenium, quàm

ut condendis versiculis occupetur. Et Commendonus, siue quòd satis inde fructus, famæque partum sibi, eâque decorari adolescentiam, virum alia decere existimavit, siue gravioribus intentus studiis; nam Theologiam tum magnâ vi aggressus erat, totam rem prorsus abiecit, desitque, nec postea per omnem vitam attigit ampliùs, quamquam & factos ab aliis versus legit libenter, & subtiliter æstimavit. Sed suorum adeò pœnituit, ut etiam ab amicis accuratè conquisitos, in quibus iusta aliquot volumina, & tragædiæ, & comædiæ erant, omnes incendit, non antea scribendis iis, quàm tum abolendis intentior. Cùm multa ab eo de studiis litterarum sciscitatus Julius, triennii operam cognoscendo Juri civili insumptram didicisset, collaudato instituto ejus reprehendit, quòd probari, & appellari Jurisconsultum neglexisset. Commendonus in id triginta dierum spatium impetrato Patavium excurrit, ut quo in loco eam hauserat scientiam, ibi potissimùm ejus ab se ratio redderetur. Atque ab Hieronymo Torniello, cui antea Doctore operam dederat, deductus, ut assolet, laudatusque summâ Collegii approbatione Jurisconsultus appellatus, Romam ad diem commeatus rediit.



*Quò primùm publicè missus sit.*

CAPUT IX.

**G**RATUM Julio, & obsequium juvenis, & celeritas fuit: itaque nihil jam non rectè committi industriæ ejus putans, paucos post dies eum ad Guidubaldum Urbinatum Ducem misit Urbinum. Mittendi causa hæc fuit. Contendebant armis Cæsar, Gallique; & cùm Sena nobilis Etruriæ civitas fatigata Didaci Mendotii importuno, superbòque imperio, Hispanis ejectis Gallorum præsidium in oppidum accepisset, ad vindicandam, tuendàmque eam magnâ vi bellum vtrique parabatur: vtrique Guidubaldum, cujus erat ditio, vel ipsâ propinquitate bello opportuna, trahere in suas partes, militiàmque propositis amplis stipendiis, optabant, Juliùmque Pontificem, cujus auctoritatem secuturus Guidubaldus videbatur, variè sollicitabant. Et Julius veritus, ne Guidubaldus cupiditate haberetur, atque in vtram ille sectam transisset, sibi ab aliis imputaretur, eum retinere, sibi que militare volebat. Qui igitur eum ab studio factionum averteret, conduceretque Commendonum misit. Et quia eodem tempore à Cæsaris Legatis missum ab urbe certum hominem ad transigendum cum Duce intellexerat, dare operam Commendonum jussit, ut diligentia & celeritate illum antecederet. Ex-

templò profectus, ac brevissimè confecto itinere mandata Pontificis Guidubaldo exposuit, planè jam ad accipiendas quas ei Cæsar conditiones offerebat inclinato, expectantique eum quo coram de omnibus rebus pacisceretur. Sed cum Commendonus ei, & voluntatem Pontificis, & anceps, nec ullam in partem tutum consilium se, resque suas duorum præpotentium Regum dissidio, armisque miscendi ostendisset, & auctoritate Julii, & Commendoni sermone permotus, in potestate Pontificis futurum se respondit. Ita stipendio, pactisque conventis in Pontificis militiam est adscriptus, eique urbis Præfectura tradita. His confectis cum paulò post à Gallis, Cæsarianisque missi supervenissent, comiter atque hospitaliter ab Duce accepti Romam sine effectu rediere. Mandaverat præterea Commendono Julius, ut si locus ei daretur, Guidubaldi animum de sororis matrimonio exploraret, verum ita ut nihil suis verbis cum illo ageret, æquum enim censebat priorem se de eo ab Duce appellari. Ea erat virgo per matrem Camertium Ducum hæres, cupiebátque Julius, ut Fabritio Montio fratris sui filio desponderetur. Commendonus cum sublati post cœnam mensis, longo ambitu variæ orationis, Guidubaldum in hunc sermonem de Pontificis affinitate traxisset, quàm multa commoda, quantasque ad omnia opportunitates ea res habitura esset, disse-ruit, suamque in id Duci operam, atque studium obtulit. Quod ille non aspernatus, postulavit à  
Commen-



Commendono, ut suo nomine optare siquidem id, atque pervelle Julio diceret. His actis, eâdem nocte conscensis, & crebrò mutatis equis, Romam rediit, cum Julius vixdum venisse cum Urbinum existimaret.

---

*De profectione ejus in Belgas.*

CAPUT X.

**D**ISSIDENTIBUS, ut dictum est, atrocibus inter se odiis Cæsare, atque Henrico Galliarum Rege, ac exitiabili bello Christianam Rempublicam dilacerantibus, Julius, quod sui in primis officii erat, de componendis Regum controversiis, reducendisque in gratiam eorum animis, Hieronymum Dandinum paulo antè à se in amplissimum Collegium coopratum, ac tam præcipuâ apud Pontificem gratiâ, atque auctoritate florentem, Legatum ad Cæsarem misit. Is Commendonum, cujus antè ingenium nonnullâ ejus consuetudine probatum, perspectumque habebat, secum ducere cupivit, impetravitque à Julio. Celeriter juvenis gravitate, & modestiâ morum, & omni officiorum humanitate cum cæteris carus, jucundusque, tum longè acceptissimus Legato haberi est cæptus, atque intimis quoque consiliis adhiberi: Itaque ad Cæsarem cum venisset, & nunciata paulo pòst Edoardi Britannorum Regis mors esset, in Britanniam ab eo est missus: de

E

qua professione priusquam dicamus, causam paulo altius ab origine repetere operapretium fuerit. Henricus Octavus cum duodetriginta annos Catherinam Ferdinandi Regis Hispaniæ filiam, Caroli Cæsaris materteram in matrimonio habuisset, filiosque ex ea suscepisset, seu deflorescentis ætatis ejus, vergentisque ad senium peractus, sive alterius amore ab illa alienatus, ad cupiditatem ejus repudiandæ impotenti animo incubuerat, effrenatæque libidini, quâ præceps ferebatur, causam prætexebat, quod Catherina antè Arturo fratri suo nupta fuisset, qui quartumdecimum annum agens intactam, puellam relinquens morbo decesserat; & virgo petentibus enixè Regibus patre, ac focero ex auctoritate Julii II. Pont. Max. tradita Henrico fuerat. Cum Romæ, ut matrimonium, quod sibi non justum cum Catherina esse aiebat, dirimeretur, impetrare nequisset, amens cupiditate, ac scelere, spreto Pontifice Maximo, abjectoque religionis, & sacrorum respectu, omni divinarum, atque humanarum legum jure contempto, exacta thoro, & conjugio suo Catherina, Annam Bolenam, quam perditè deperibat, uxorem duxit, & à Pontificum Maximorum fide desciscens, penitus se, regnumque à Catholicæ Ecclesiæ corpore præscidit, eundemque se summum in suo regno sacrorum Antistitem appellavit. Quo facto veluti perrupto aggere omnis ille pravissimarum opinionum, hæresumque oceanus Angliam inundavit. Unde

tanti, ac tam ſævi ſeditionis æſtus, tot monſtro-  
rum ſpecies prodierunt, fruftra obnitente, & acri-  
bus ſuppliciis auctores coërcente Henrico. Mo-  
riens inde Edoardum filium tertia vxore ſufce-  
ptum ſucceſſorem Regni reliquit, puerum indo-  
lis probæ, ſed adeò à tutoribus, rectoribúſque  
in ſacrorum diſciplina corruptum, vt vna illi re-  
ligio fuerit veræ religionis fundamenta evertere,  
funditúſque eruere. Verùm is ſeu morbo, ſeu frau-  
de ſuorum intra xvii. ætatis annum extinctus, Re-  
gnum, excluſa Mariâ ſorore, Joannæ conſobrinæ  
ſuæ filiæ teſtamento reliquit. Hanc Dudleus Nor-  
tumbriæ Dux ſummam ſub Edoardo potentiam  
adeptus, nulum ſibi adſciverat, inſtrumentum  
que tranſferendi in domum ſuam Regni habe-  
bat; ſed Maria, cognitâ fratris morte, haudqua-  
quam ſegniter ad vindicandum jus ſuum exurre-  
xerat, provectâque ingenti popularium favore,  
paucis diebus paternum Regnum recepit; & quod  
alterius Regni inſtar fuit, Nortumbrius ipſe, &  
Joannâ, & maritus Guilfordius in poteſtatem ejus  
venêre. Nam Nortumbrius palam factâ morte  
Edoardi, quam ipſe dum deſtinata diſponit, tri-  
dum occultaverat, cum teſtamentum Principi-  
bus coram aperuiſſet, ex eoque Joannam nulum  
Reginam nuncupaſſet, ac deductam in Londi-  
nenſem arcem, vt mos genti, in poſſeſſione Re-  
gni locaſſet; nuntiis mox de Maria allatis, de-  
promptâ Regiis theſauris pecuniâ, ac magnâ lar-  
gitione militibus ſibi, vt rebatur, firmatis, cele-

riter copias adversus Mariam eduxerat, vt ante eam opprimeret, quàm ad conualescendum spatium haberet. Sed tanta repentè ad Mariam animorum facta inclinatio est; vt non destituerint modò Nortumbrium milites, sed custodiâ circumdatum Reginæ tradiderint. Maria iusto, quamquam infelici Catherinæ, & Henrici matrimonio erat nata, ac primâ ætate, cùm frater eâdem matre gënitus intra infantiam mortem obiisset, non regio solùm cultu, rëgisque opibus innutrita fuerat, sed vnicè dilecta parentibus, etiam in non dubiam spem Regni educata, nuptiæque ejus maximis Europæ Regibus sunt appetitæ. Quâ fortunâ adèò post repudiatam matrem, prolapsûmq; ad flagitia, & scelera patrem decidit, vt ex auctoritate ejus, de sanctioris consilii sententia hæreditatis, ac successionis in paternum Regnum jure privata, ancillaribus ministeriis Henrici pellicibus famulari cogeretur. Nec post patris mortem honoratior apud Edoardum fratrem fuerat, abjecta, spretaque, ac procul Regia habita, magis divinâ ope, quàm cautione, & custodia sua Nortumbrii fraudes variè vitæ ejus insidiantis, vitaverat. Fuit enim innocentissima femina, & pari Catholicæ religionis constantiâ, & vitæ sanctitate, vt nihil adeptæ Regnum habuerit prius, quàm patris, fratrisque leges adversus jura sacrorum latas abrogare, ac pristinum pietatis cultum restituere, vique adèò in id intento studio, vt monenti Carolo Cæsari consilium ne ap-

properaret, neve tam immaturis rebus sese indicaret, responsum sanè memorabile reddiderit: Sè dum deserta, destitutaque in sua calamitate jaceret, non alterius spe, atque ope, quàm Dei sustentatam, ad Regnum inde provectam fuisse: Itaque statutum sibi, cui salutem, & dignitatem deberet, ei non cunctanter, aut obscure, sed statim, ac propalam gratiam profiteri. Nec quia ob id crebræ eam seditiones, tumultusque quorundam, qui omnium rerum licentiæ, ac impunitati assueti, ac propè omni religione soluti agrè sub jugum suave, ac salubre Christianæ disciplinæ redibant, exceperunt, destitit incepto; sed punitis fortiter auctoribus, ac multitudine ad sanctitatem reductâ, eximia cum gloria & Regnum pacavit, & colendæ pietatis rationem constituit.

---

*De ejus in Britanniam adventu, & actis  
ibi per eum.*

## C A P U T X I.

**V**ERUM, vt vnde transgressi paulum seriem rerum, temporisque sumus, eò revertamur in continentem post nuncium exincti Edoardi nihil nisi itum ad arma ab Nortumbrio, & gentem Mariæ studere incertis rumoribus afferebatur. Nam ardente inter Gallos, & Cæsarem bello omnia plena suspicionum erant, omnia littora,

E iij

ne quis ignavis præfectis, aut trajiceret in insulam, aut inde appelleret, custodiebantur. Postremò etiam desertum à militibus Nortumbrium, & prosperæ Mariæ res nunciabantur. Hieronymus Dandinus Legatus, cum Regni nobilissimi paulò antè vnius furore, atque amentia Regis à Catholica religione, & fide Pontificis Maximi avulsi salus ageretur, & Mariæ conatus aut adjuvandi à Pontifice, aut confirmandi esse viderentur, vehementer Britannicis nuntiis excubabat, qui ipsi cum nec certi, & secundi tamen venirent, aliquem in Angliam virum industrium, intentumque, qui explorata, & cetera omnia referret, mittere agitabat, cum ei à Julio litteræ id ipsum jubentes redduntur. Nam Julius Edoardi morte acceptâ, Reginaldum Polum, qui tum ad lacum Benaci haud satis firmâ valetudine locorum salubritates sectabatur, mittere in Angliam decreverat, idque per litteras Polum docuerat. Cui cum nihil properè agi, & certiora expectari placuisset, Dandinum de eo per celerem tabellarium monuerat. Tum ille Commendonum, quem gerendis rebus petacrem, cupidum navandæ operæ, & consilio promptum cognoverat, appellat, hortaturque, ut rem ejus ingenio, & solerti studio dignam suscipiat. Haud cunctanter Commendonus, quamquam magnæ, & in trajiciendo difficultates, & trajecto pericula proponerentur, operam profiretur. Collaudato juvene, rebusque communicatis Legatus ei propria nulla mandata de-

dit, nisi ut diligenter omnia cognosceret, quæ agerentur, quique aditus, quæque spes recipiendi ejus Regni ostenderentur. Si locus cum Maria agendi daretur, eam ad sananda religionis vulnera, suumque Deo reddendum cultum hortaretur, Pontificisque ad id non solum studium, sed etiam opes polliceretur. Denique omnia pro fide sua, & prudentia gubernaret. Ille cum per infestissimos Romano nomini hostes, & tum licentiâ, & futuri metu efferatos iter esset, ne se cujusque crederet fidei, sine comite, aut servo villo Bruxellis profectus Gravelingam vno die itinere confecto venit. Quo ex oppido commodissimus erat in Britanniam trajectus: ibi duos sibi corporis, ministros ignaros sui conduxit, utrumque Gallicæ, alterum etiam Anglicæ peritum linguæ. Cum his compositâ sibi causâ, quod avunculus mercaturam Londini fecisset, multaque negotia haud satis explicata decedens reliquisset, navem conscendit, ac nequaquam secundâ tempestate transvectus in insulam, Londinum contendit, quò profectam Mariam, receptamque in itinere cognoverat. Eò cum venisset, plena turbarum omnia, feroces adhuc licentiâ hæreticos, conantesque Mariam à pristina revocanda religione abstertere, & Reginam illam magis, quam Regni potentem invenit. Nam & ipse interfuit, cum ausus sacerdos in templo adversus novas concionari doctrinas, adeò iram insolentis jam talium multitudinis commovit (& genus est omne hæ-

reticorum audaciâ, & temeritate præceptis) vt non obstrepuerint modò dicenti, sed miles quidam è media concione nudatum pugionem in perseverantem orare conjecerit. Quo facinore Commendonus est admonitus quanto ipse in discrimine versaretur, si aut quis, aut à quo, aut quade causa venisset, rescirent. Nec tamen hoc metu, ac difficultate destitit; quin ad ipsam jam adire Reginam parabat, cùm fortè Joannes Lius nobilis Anglus ei occurrit, quem sub Edoardo ob religionem profugum in Italia familiariter noverat, nec parvis officiis devinctum habebat. Ac primò quidem perhumaniter amplexum offerenti ecquid eo tempore in Britannia quærenti; eadem avunculi negotia, pecuniâque sibi pluribus in nominibus relictam obtendere. Pòst vbi carum Reginæ eum, atque inter intimos ministro comperit, multâque amicè secum, ac fidenter ab illo de Republica, præsentique rerum statu, atque omnia pro pristina familiaritate, & benevolentia fieri satis antea, vel ex constantia avitæ pietatis probato, causam adventus sui aperit, celeritèrque ab eo ad Reginam deducitur. Quod tamen ipsum non sine difficultate fuit; omnia enim septa custodiis, omnes clausi aditus erant, ne quis externus cum Regina colloqui clam aliis posset: maximè Cæsar, & Pontifex suspecti habebantur; quorum cum altero de matrimonio senserant agi, alterum pollutæ religionis, honorûmque à templis direptorum ultorem timebant. Reginam

Commen-



Commendonus ad pristinas factorum ceremonias, fidemque restituendam, Regnum Catholicæ Ecclesiæ reconciliandum, ac referendam hanc statim gratiam Deo, qui eam devictis sine vulnere, sine civili sanguine perduellibus, atque hostibus suis, potestatisque ejus traditis, paterni Regni compotens fecisset, cum esset hortatus, atque omnes in id Pontificis Maximi facultates pollicitus, à Regina adventu ejus mirè lætata perbenignè est auditus; prolixè multa de se, deque fide, ac studio suo erga Pontificem Maximum, & Catholicam Ecclesiam professà, de ratione conficiendæ rei, consilioque suo cum eo communicavit, jussumque redire ad se dimisit; monitum prius etiam atque etiam, ut custodiam sui haberet, diligentissimèque caveret, ne; quid acturus venisset, à quoquam sentiretur, rebus enim tam turbidis periculum ejus præstare se vix posse. Interea pacandis rebus intendit, multitudinem armatorum, & quorum ægrè coerceri licentia poterat, qui Reginam in Regni possessionem reducere, adessèque initiis ejus etiam repugnante ipsa voluerant, in suam quemque domum dimisit, civitatèque illà turbà, & colluvione hominum exhaust, exoneravitque. Cum Cæsare matrimonium Philippi filii sui offerente, quo ipsa communitura sibi Regnum præpotentis, & propinqui Regis connubio videbatur, de fœderis, & affinitatis conditionibus occultè agebat, causamque Nortumbrii, quem in custodia habebat, cogno-

sci, perficique jufferat, ac in singulos dies magis convalescens, rerum, ac Regni potens efficiebatur. Commendono ad eam quoties vellet, atque opus esset, per eundem Lium adeundi facultas erat. Cum & fœdus cum Cæsare, & nuptias cum filio pepigisset, nec tamen id palam esset, arcessi Commendonum jubet, ei tum mentem, consiliūque suum omne patefecit, litterasque ei manu suā scriptas ad Julium Pontificem perferendas dedit, quibus se, Regnūque in fide, & auctoritate Pontificum Maximorum fore pro certo confirmans pollicebatur; addens de cæteris rebus mandata se Joanni Francisco Commendono dedisse, de ipso plura sciturum. Summa mandatorum fuerat, Reginam habito Britanniae sanctiori Consilio, ex ejus auctoritate patris, fratrisque scita, iussūque de religionibus abrogaturam, statimque Legatos Romam, qui Pontifici Maximo debitum fidei, & obedientiae officium persolverent, missuram: Interim postulare, ut Julius publice Anglis ignosceret, ne cui assensisse Henrico, Edoardoque divinum sibi jus arrogantibus, deservissēque à majorum pietate, & Romanae Ecclesiae fide, fraudi, noxæve esset; Reginaldum Polum Cardinalem cum summa potestate Legatum in Angliam mitteret, à quo hæc omnia ritè fierent, resque sacrae ad pristinae disciplinae normam per eum ordinarentur. Cum his mandatis extemplo proficisci parantem Regina biduum Londini retinuit, ut Northumbrii damnationem, poenā-

que præfens aspiceret. Is enim à Judicibus rerum capitalium majestatis damnatus fuerat, productusque in publicum capite pœnas luere est coactus, veniâ prius filiis, nuruque ab clementi Regina impetratâ, cum ipse ejuratâ hæresi, cui non errore mentis, sed cupidinæ potentia adhæsisse se confitebatur, ad Catholicæ religionis fidem rediisset, Catholicisque sacris sese ritè procurasset.

*De reditu ejus in urbem.*

## CAPUT XII.

**S**UPPLICIO de Nortumbrio sumpto, Regina Commendonum cum litteris, & mandatis, ut supra ostendimus, dimisit, jussu eum fide omnia ad Pontificem perferre: nec præterea cum villo mortalium, præterquàm cum Polo communicare. Ille cum triduo incontinentem transmississet Bruxellis à Legato Romam dimittitur, quò per equos, qui dispositi ad celeritatem sunt, continuato die, noctuque itinere, nona, postquam à Legato discesserat die, pervenit, milliariis amplius mille propè incredibili cursu confectis. Quamquam diverterat ex itinere ad Polum, ac mandata ad eum Reginae pertulerat, nunciaveratque Dandini verbis, ut protectionem suam tantisper differret, donec tranquillæ in Anglia res compositæque essent. Id Cæsarem magnopere cum rogare; nam Cæsar matrimonio Mariæ Re-

F ij

gnum Angliæ filii opibus, suisque adjungere maximè cupiens, cum satis abhorrere ab ea voluntate Anglorum animos intelligeret, intentâ curâ observabat, ne quid conatui suo impedimentum afferret. Et Polum ipsum esse in Angliâ, qui Reginæ maritum destinarent, intellexerat, ac ne ipsa quidem Regina initio eum aspernata dicebatur, quæ à Commendono quæsierat, an eum lege sacrorum, qua Polus adstrictus erat, Pontifex soluturus fuisset; erat enim Diaconus, cui ordini sæpe tributa legis venia est à Pontifice Maximo: sed postea Gallorum vim metuens, quos adversariis suis studuisse compererat, nec Anglis ipsis satis jam fidens, ad Philippum inclinavit. Ex eo Cæsar Polum ante peractas filii nuptias transire in Angliam volebat, non tam fidei ejus diffidens, quàm timens, ne adventu ejus territi hæretici ad res novas respicerent, studiâque ad Gallum verterent, ejusque adjuti viribus sua consilia disturberent. Romæ suspensa omnia, ac profectum modò in Britanniam Commendonum auditum erat, & Pontificem ingens cura, quis exitus rerum in Insula futurus esset, intentum, sollicitumque habebat. Itaque Commendonum non certas solum, sed perfectas res, & supra spem lætas afferrentem tanto gaudio accepit, ut lectis Reginæ litteris, quæque mandata ab ea, quæque gesta ad eam diem essent, totòque penitus illarum rerum statu percepto, cuncta ordine referente Commendono, tenere lacrymas nequiverit. Ac tu verò, inquit,

fili, non latus modò Nuncius mihi, sed vnus minister præclari operis, atque effector extitisti, plûsque nobis tua præstitit industria, quàm nos ausi voris, & optatis, nedum spe concipere simus; arctéque complexus juvenem, ac multis præterea laudibus, vt dignum erat, prosecutus, Deo summas gratias egit, quòd potissimùm in Pontificatu suo amissum nobile Regnum ad officium, fidémque Catholicæ Ecclesiæ redire voluisset. Sed tantum solus gaudium cùm non caperet, impatiensque moræ vellet extemplò suam felicitatem aliis impartiri, & Commendonum iuberet comparare sese, vt omnia sequenti die Senatui, quem ob id esset vocaturus, renunciaret, non est veritus ille admonere Pontificem Reginæ voluntatis, ne ea tum efferrentur, suæque in id obligatæ fidei. Quam ego verò, inquit, si per te liceat, pari religione, ac tua iussu apud Reginam sum executus præstitero. Admiratus constantiam juvenis Pontifex, quæque effanda, quæque reticenda essent cum eo constituit, seque ipsum ea Patribus expositurum ostendit. Verùm in Senatu recitatis Reginæ litteris, reliqua ipse, vt acceperat, enarrare orsus, medium sermonem, cui non satis, credo, moderari poterat, repente abruptit, ac vocari Commendonum, introductumque Patribus coram expromere quæ sibi pridie nunciaverat, iussit. Quemvis, vel exercitatissimum Patrum, & dicere, & audiri in eo loco assuetum tam subita res, nullo spatio ad meditandum dato, pertur-

turbasset, nedum juvenem, quem aspectus mō-  
dò Pontificis, & confessus summorum virorum,  
& majestas illius loci contrerrere, & confundere  
potuit, præsertim cū Latinè (peregrina nūc  
nobis lingua, neque enim aliter licet eo loco ver-  
ba facere) edisserenda illa essent. Commendono id  
fere in omni vita accidit, vt initio dicendi rubo-  
re quodam ingenuo perfunderetur, timidiúsque  
inciperet; sed vbi velut iter ingressus orationis e-  
rat, nemo illo solutior, liberiórque incessit, nam  
& sententiæ illi percerebræ, & verba apta rebus  
suppetebant. Tum quidem, vt semper, non ti-  
midè solū, ac dubitanter, sed penè tremens est  
orsus, quod ei in modēstia, ac verecundiæ laudem  
vertit. Nam sumens inde paulatim animum, eo  
ordine, eā copiā, & prudentiā orationis cuncta  
vt acta, vt sibi à Regina mandata erant, exposuit,  
atque de toto statu Britanniaē disseruit, vt omnes  
Patres in admirationem sui verterit, atque vnus  
eorum illud ex Evangelio dictum vsurpans: *Quis*  
*putas, inquit, puer iste erit?* Ejus certè diei glo-  
riā satis creditur aditum illi, viāmque ad reliquas  
res, honorésque, quos deinde cepit, gessitque,  
maximè munivisse. Nam & Pontifex perhonorifi-  
cis est eum verbis profecutus, & singuli postea  
Patrum accersitum ad se domum juvenem com-  
plexi, & gratulati ei sunt, & prolixè studium, at-  
que operam suam polliciti. Ante omnes Joanni  
Petro Carasæ Cardinali, qui in Britannia fuerat,  
ejúsque Insulæ magnam notitiām habebat, mi-

rè est ex eo conciliatus. Nec apud Patres solum, sed in vulgus quoque celebre esse inde nomen illius cœpit. Julius ex litteris Reginæ, atque oratione Commendoni tridui supplicationes indixit, solemnîaque sacra instituit, quibus ipse rem divinam fecit, ejusque nuncii lætitiâ omnibus rebus celebrari imperavit. Commendonum inde, quoties mentio rei incidisset, laudibus tulit, de mensa ad eum sæpe misit, magnoque in honore, ac pretio semper habuit. Quibus ille rebus nihilo elatior, cum ei ab omnibus magna gratulatio fieret, in sua se vitæ, morumque modestia diligentius etiam, quàm antea continuit.

*De profectione ejus in Lusitaniam.*

CAPUT XIII.

**J**OANNI Lusitanix Regi inter hæc Emanuel filius, quem vnicum Regni hæredem habebat, moritur. Eodémque die in afflictæ domus solatium Emanuelis conjux filium ehixa est. Ad hunc igitur consolandum Regem ægrum animi ex tam acerba morte filii, gratulandumque alterius ortum, Julius Commendonum in Lusitaniam misit. Eò cum Galliam omnem ab Alpibus ad Pyrenæos, Hispaniamque item quanta in longitudinem patet, pedibus transgressus venisset, honorificè ac-

ceptus, comitèrque habitus à Rege est; cujus ipse cum morum, atque ingenii dexteritate, tum de Britannis rebus, quarum recens adhuc fama erat, curiosè multa exquirentem facundè alloquendo, magnam sibi gratiam conciliavit. Unde cum Rex etiam legere in militem, qui Christi appellantur, societatem voluit, in quam Principes gentis pro magno dignitatis ornamento optari à Regibus solebant. Quod cum ipse alienum vitæ suæ institutis ferens recusasset, Joannes rubram ei crucem singulare societatis ejus insigne tradidit, potestatemque ei fecit, quem vellet, eo militiæ honore decorandi, dum ingenuis ortus parentibus, majoribusque esset, idque Legato suo Romæ solemniter ritu probaretur: quem ipse honorem in nobilissimum juvenem amicum suum postea contulit. Discedens à Rege ad visendum inclytum religionis templum Divi Jacobi in Galitiam proficiscitur, prosequente eum Joanne omnibus humanitatis, & benevolentiae officiis. Nec aliâ re libentius Lusitanicam illam protectionem, munusque susceperat Commendonus, quam quòd ei occasio videndi tot exterarum provincias futura esset, Galliam enim, Hispaniamque diversis iens, rediensque itineribus perlustravit. Et fuit sanè videndi, cognoscendique res externas singulari studio. Nam & situs regionum, & opportunitates earum, quæ maria, quæ portus, quæ flumina, quibus quæque rebus abundaret, egeretque, qui hominum mores, quæ studia, quæ regendæ publicæ rei



rei ratio, diligenter admodum inquirebat, eaque adeò tenaci memoriâ complectebatur omnia, vt barbara quoque nomina hominum, locorúmque retineret. Quæ res ei, cùm propè omnem inde Europam studio eodem, ac diligentia peragrasset, magno vsui, atque laudi postea fuit. Ex Lusitania Romam cùm rediisset, Julius octavum & sexagesimum agens annum, postremum vitæ diem obiit, vir ingenuæ, ac liberalis naturæ, planèque probus, & innoxius, ac ne litterarum quidem, & industriæ expers, sed negligens rerum, & in Pontificatu adeò curas omnes, laborésque refugiens, vt abditus hortis, quos immani sumptu ædificabat, hilaritatibúsque intentus suis, ne Senenses quidem, quos Cosmi Florentinorum Ducis, atque Hispanorum arma premebant, ad se urbem, agrum, suâque omnia in Romani Pontificis ditionem dedenda venientes audierit, quamquam & Galli, quorum ope illi defendebantur, huic deductioni annuerent, neque adversarentur Hispani. Iis temporibus ætatem degerat Julius, quibus gravitas, modestia, pudor pro tristitia, atque inertia ducebantur, cunctaque voluptas, & lætitia, & effusus in omnem jucunditatem animus habebat, nec aliàs Ecclesiastica disciplina solutior fuit. Beneficia & sacerdotia haud aliud, quàm alimenta luxuriæ haberi. Eorum plura, & quæ per leges non liceret capi: vt quidam tres Episcopatus vno tempore gesserint: passimque ea gratiæ, non meritis dari. Amictus sacerdotalis ad honorem,

& dignitatem institutus, omnibus sordere, sagulum, quàm toga magis placere. Neque liberius vivere, ac se prorsus hilaritati dedere. Denique convivii, ludis, spectaculis indulgere, cum mulieribus discumbere, cum iisdem vnà vèctari per urbem turpe, ne gravibus quidem, & honoratis viris habebatur: adeò licentia, & consuetudo mores, judiciâque corruerat. Hæc Julius eodem depravatus vsu, & fecerat juvenis, & fieri se Pontifice facilè est passus, virtutis cultor magis, quàm vindex vitiorum. Sed Commendono sponte honestis, & priscis moribus insistenti tot inquinata corruptelis tempora in gloriam cessère, cujus etiam fructum secuta mox severior ætas attulit.

---

*De Marcelli, & Pauli Pontificum Maximorum studio erga eum.*

#### CAPUT XIV.

**M**ARCELLUS Cervinus, qui secundus est appellatus, in Julii locum Pontifex creatur. Cujus tanta virtutis opinio fuit, tanta spes restituendi per eum antiquam disciplinam, pristinumque cultum, ac splendorem religionis, & Christianæ Reipublicæ, vt præclare actum cum illo videri possit, quòd intra vigesimum diem ostentatus terris, ereptusque fuerit. Neque enim erat mediocris sapientiæ, motæ de se tantæ expe-

stationi respondere. Et is quibus diebus Pontifex est renunciatus Commendonum ultro accitum inter familiares receperat. Et Joannes Petrus Carafa qui ei successit, cui Paulo IV. nomen est inditum, statim Pontificiis epistolis scribendis designavit. Cui muneri vnà cum illo Paulus insignes dignitate, & eruditione viros, partitis inter eos provinciis præposuit. Joannem Casam Archiepiscopum Beneventanum, Annibalem Borzutum Archiepiscopum Avenionensem, Antonium Ælium Episcopum Polensem, Angelum Massarellum item Episcopum, & Sylvestrum Aldobrandinum Jurisconsultum, ad quem postea ob excellentem industriad, atque fidem, aliorum senescente gratiâ, rerum propè omnium summa delata est. Paulus non solum dignitate princeps amplissimi ordinis, sed sacrarum rerum doctrinâ, eloquentiâ, magnitudine animi, innocentiam morum, & totius vitæ sanctitate; & ad hæc ætatis quoque honore longè inter omnes Patres eminebat. Itaque ei Commendonus in Cardinalatu præcipuam observantiam, cultumque tribuerat. Et ipse senex adeò juvenis ingenio est delectatus, ut multas sæpe horas cum eo, legendo, differendoque nunc de privatis, nunc de publicis rebus per familiariter, jucundèque consumeret, cumque haud ferme alio, quàm filii nomine appelleret. Pontificalibus comitiis prælato Marcello, cui ipse quoque Paulus, etsi quinque & viginti annos natu minori suffragatus erat, omnes de il-

lo spes omnibus deciderant , concurrentibusque ad Marcellum cunctis , desertum , destitutumque ab omnibus , quibus antea coli , frequentarique solebat , Commendonus tum maxime assiduus cum illo , majori , quam antea studio affectari , deducere , observare , & ad omnia præsto esse. Itaque ergo creatus Pontifex Commendonum ob modestiam adire ad eum differentem , ultro requisivit , habitationem in Palatio , sumptumque largè præberi jussit , Carolo , & Joanni fratris filius commendavit verbis , & pluribus , & amantissimis , ac filium ipsum , quoties mandaturus ei aliquid esset , appellare perseveravit. Arcanis & rebus , & sermonibus inter intimos ministrorum admittens. Nullius denique operâ libentius vi , ac ne consuetudine quidem , ac domestica collo- cutione cujusquam æquè delectari est visus. Pri- mis inde Pontificatus diebus , ignarum , non so- lum non petentem , Zacynthiorum Episcopum designavit , Venetorum Legato coram honorifi- câ oratione prosecutus. Abnuentem , seque im- parem ferentem Pontifex osculatus admonuit honores pari pudore recusaret , ac peteret ; quæ enim ei nullo ipsius ambitu , aut studio , sed ul- tro deferrentur ab eo , cui vis divinæ potestatis inesset , perinde accipienda , ac si manifesto Dei ipsius instinctu obvenirent. Cum Episcopatu Be- neficium ei in Veronensi agro dedit , cujus an- num vectigal erat quingentorum aureorum nummum.

*De novo ejus itinere in Belgas.*

## CAPUT XV.

**E**X his rebus non dubia opinio inceserat homines, juvenem nullis, aut pecuniz, aut voluptatum illecebris corruptum, & inquinatissimo sæculo ultro se majorum disciplinæ subjicientem, ætate, viribus, animo vigentem, & ab his artibus acceptum Pontifici ad Cardinalatum usque proferri. Quam ille opinionem oculere per modestiam, atque adeò obruere eam conabatur. Conterà quàm plerique faciunt, sanè ineptè, qui famâ, ac prædicatione sui haud minùs quàm ipsâ re effertur, monstrarique, ac celebrari spes suas gaudent, ac levi auditioni ipsi de se ante omnes credunt, ut quidam prædices, & maximè ambitiosus, cum suum nomen inter eos ferri, quos sermo vulgi proximis Comitibus Cardinales destinabat, accepisset, ipsum dicitur appellasse Pontificem, magnum memorans totâ vrbe rumorem esse de constituta ejus voluntate cooptandi se in Cardinalium numerum, ac sibi id multos affirmasse. Cui subridens Pontifex, At isti, inquit, falsa narrant, nec tu iis ullam fidem habueris. Longè ab hac vanitate aberat Commendonus, nec tamen vitare invidiam potuit, quæ eò acrior erupit, quo minùs loci ad obtrectandum inveniebat. Verùm ut artificiosa, & callida malitia est,

quem crimine non possunt, laudibus eum suis oppugnare aggrediuntur, extollere ingenium, vim animi, corporisque, & in gerendis rebus studium, & industriam, & per speciem honoris amandandum, habendumque procul à Pontificis oculis curant, ita rati opportuniorem fraudi fore. Ad procurandam igitur Rempubicam apud Carolum V. Cæsarem, revocato inde Archiepiscopo Constanorum, qui ei muneri à Julio præpositus fuerat, destinatur. Sed quia eo tempore suspensum induciis bellum inter Cæsarem, & Gallos erat, Pontifex è Cardinalium Collegio Legatum ad Cæsarem creavit Scipionem Rebibam, eumque in Belgas proficisci, Cæsaremque cohortari ad pacem ex induciis firmandam, jussit; misso eadem de re Carolo Carafa Cardinale ad Henricum Galliarum Regem. Commendonus iter cum Rebiba suscepit. Jam è Mediolano per Helvetiorum fines in Belgas egressi erant, cum Mastricum ad Mosam flumen, oppidum ditionis Caroli intrantem Legatum festinus tabellarius ab Urbe missus assequitur, eique à Joanne Carafa Pontificis fratris filio litteras reddidit, quibus jura fœderum à Cæsarianis violata, insidias Pontificis vitæ factas, bellumque exortum nunciabatur, ipseque, & Commendonus jubebantur, omisso itinere, quod instituerant, redire Romam, & incolumitati suæ, si possent, consulere; caveréque diligenter, ne in potestatem adversariorum venirent. Legatus eo nuncio vehementer perturbatus, quòd in me-

dia Germania, atque in Cæsaris ipsius Regno deprehensus, quò, aut quà elabi posset, ignorabat, tradere se hosti, & quemcumque fors cogeret casum subire parabat. Sed Commendonus ubi ea accepit, confusum novitate tam subitæ rei Legati animum confirmat, docet quanti ad omnia interfit non intercipi eos, & publicas litteras, & publicarum rerum ministros in hostium venire potestatem, ut carcer, & reliqua captivitatis mala negligentur. Posse si consilium, celeritâque adhibeatur, antequam adventus ejus vulgaretur, aut nunciaretur Cæsari, aliquò inde evadi. Sibi videri, ut Cardinalis cultus, insigniâque Legati deponerentur, & mutatis vestibus, relictoque omni comitatu, cum paucis, atque expeditis extemplo se in Galliam proriperent. Hac approbatâ sententiâ Rebiba regionum nescius, & consilii inops regendum se Commendono permittit. Deposito igitur sacerdotali ornatu, & familiarium sagis, palliisque assumptis, cum paucis oppido egrediuntur, dato mandato his, qui relinquebantur, ut si quis de Legato quæsisset, adventare eum, & mox adfuturum responderetur. Commendonus ex consuetudine sua omnia percunctandi, & nota loca, nominâque locorum, & qui circa fines, quæ proxima Gallorum oppida, præsidiaque antè inquirendo compererat. Nemo enim eo percunctator curiosior fuit, minutis teneri, quàm quid præterire quod scitu dignum esset malebat. Ad ea ducibus agrestibus homi-

nibus, quos subinde parvâ mercede comparabant, per devia itinera incolumes prius pervenire, quàm de fuga eorum resciri ab adversariis potuerit; qua quidem in fuga longè maximum discrimen Commendonus ipse adivit, tùm in densissimis Arduennæ saltibus, prægressis reliquis: solus ab via aberrasset, totam enim noctem per tenebras vagatus, ægrè posteriâ luce ad socios, de salute ejus vehementer sollicitos, se recepit, atque per Eburonum, seu Leodiensium fines in Galliam, atque Lugdunum transgressi, inde cum Carolo Carafa ab Henrico redeunte, classe Gallicâ Romam omnes trajecere.

---

*Ad Venetos, & alios Italia principes  
mittitur.*

## CAPUT XVI.

**I**NTEREA Romæ Marco Antonio Columnæ Ascanii filio, quòd occultos domi suæ cœtus adversus Pontificem habuisset, dies est dicta, cùmque citatus non adesset, majestatis damnatus oppida, quæ intra Romanæ Ecclesiæ fines obtinebat, amisit. Hinc exortum inter Pontificem, & Cæsarem bellum, cùm Cæsar non opprimi Columnam suarum rerum interesse diceret, Paulus impediri se in suo jure iniquissimum censeret. Commendonus igitur reversus Romam initio hujusce



jusce belli, statim vix tridui quiete concessâ, ad  
 Principes beneficiarios Romanæ Ecclesiæ conti-  
 nendos in officio, ne quis auctoritate, & pollici-  
 tationibus Cæsaris abductus de fide decederet,  
 est missus. Quorum Hercules Ferrariensium Dux,  
 etiam in societatem armorum venit, infestum-  
 que bellum in circumpadanis locis Cæsarianis fe-  
 cit. Sed cum maximè omnium cuperet Pontifex  
 Venetos sibi propter civitatis ejus opes, ac di-  
 gnitatem adjungere, tantum Commendoni in-  
 dustriæ, atque fidei tribuit, ut cum potissimum  
 Venetias mittendum censuerit. Quod quidem  
 Veneto civi ante ipsum contigit nemini, præter-  
 quam vni Petro Bembo, viro ætatis ejus famâ  
 eruditionis præstantissimo: quem Leo Pontifex  
 ab simili causâ Venetias ad Senatum misit. Eâ-  
 que res Commendono haud mediocri apud cives  
 suos gloriæ fuit, cum tantis de rebus vni com-  
 missum munus, vnus Principis latus tegens, cæ-  
 teris omnibus infra se positis conspiceretur. Quin  
 etiam accidit, ut illis fortè diebus Antonius Tri-  
 vultius Tolonensis Episcopus, vir apud Insu-  
 bres claræ nobilitatis, qui tum pari Nuncii munere  
 Venetiisungebatur, in Cardinalium Collegium  
 à Paulo sit lectus: cujus honoris ornamenta ab  
 Urbe ad eum missa, Commendonus illi ex autho-  
 ritate Pontificis tradidit solemnibus in sacris, qui-  
 bus Princeps, Senatúsque celebrandæ rei causâ  
 intererant, Antonisque ad genua accidentis ca-  
 piti purpurei galeri insigne imposuit; quod cum

faceret , succlamatum à quibusdam est ; Antoni hanc postmodum reddere operam Commendono memento. Ea enim ejus erat virtutis fama , ut passim summos illi honores homines augurarentur. Cæterùm Commendonus vsque fere ad exitum belli in ea civitate est retentus , vbi sæpe apud Venetos de iniquitate adversariorum , de injuriis , de insidiis Pontifici Maximo factis , de periculo in quo Romana res versaretur , ac de Hispanorum cupiditate Italiæ Regnum affectantium , gradúmque sibi ex subactò Romano Pontifice , populisque ejus imperio parentibus ad reliqua , & ad ipsos Venetos struentium , copiosis , crebrisque orationibus disseruit. Et quamquam Venetorum civitas pacis , & otii studiis dedita armorum motus reformidet , Senatúsque exactæ senectutis Pontifici haud fidens , temerè in bellum adversus præpotentem Regem non esse sibi descendendum statueret , tamen ne cadere quidem rem Romanam , & crescere supra modum Hispanorum , in Italia opes , non ad se magnopere pertinere existimabat. Commovebatúrque Commendoni oratione , affirmantis , nisi Veneti opem tulissent , suáque pro Italiæ salute , & pro Antistite sacrorum , & principe Christianæ Reipublicæ justa , & pia arma adversus gentis externæ , & nequaquam vanâ spe omnium libertati imminentis vim opposuissent , oppressum in tanta , tam repentini , nec opinati belli mole Pontificem Maximum , cui si victo jugum ab superbo hoste injectum fuisset ,

id verò non turpe solùm, ac deforme Venetis, qui confugientem ad eorum societatem Pontificem aspernati dicerentur: quod à pietate, & sapientia Senatus alienum esset, sed periculosum quoque, atque adeò exitio proximum fore. Hæc Commendonus cùm apud Patres, tum apud amicos, & propinquos suos graviter, accuratèque differens, civitatem in magnam curam, metùmque conjecerat, ne Hispani, gens imperii avida, imparatum aggressa Pontificem subigerent, atque nullo inde pudore reliquarum civitatum libertati vim afferrent. His anxii, cùm neque tutum civitati suæ esse videretur pati in tantum jam propagari Hispanorum in Italia opes, ut omnium rerum vis, ac potestas ad eos perveniret, neque tamen temerè se dubio implicare bello vellent, in præsentia medium sequi consilium placuit. Reconciliatores pacis se ferentes Franciscum Frumentum scribam Reipublicæ cum litteris, & mandatis ad Albæ Ducem, qui pro Cæsare Italicis rebus cum imperio præerat, mittunt. Orant, ut vi, atque armis absistat, neque sacrosanctum Pontificem, quod invidiosum Hispanorum nomini, & à Cæsaris, Regisque filii pietate abhorrens esset, oppugnatum eat: posse de quibus dissiderent vtilius, salubriusque per communes amicos componi. In eandem sententiam litteras in Hispaniam ad Regem dedere. Videbantur & ad minas, denunciationesque belli, si preces non valuisent, impelli posse, tantus metus incesserat civitatem,

ne Pontifex inermis, & impar opprimeretur, protinusque inde ipsi à victoribus peterentur. Sed Carolus Carafa Cardinalis, vbi descendere ab Alpibus Gallorum copias accepit, spe victoriæ perinde ac ipsâ victoriâ inflatus, ac tumens, Venetias ipse excurrerat, Senatúmque vrgendo ad capeſſenda simul arma, atque infestæ gentis spiritus infringendos, perſequendósque communes hostes, & Italiâ pellendos hortabatur. Ingentem vim equitum, peditúmque invictæ juventutis è Gallia adventare, & tranſgreſſas Alpes eſſe, Pontificem ad ultionem ſui inflammatum enixè inſtruere bellum, juſtúmque exercitum habiturum. Accedere Ferrarienſium Ducem opportunum diſtinendo circa Padum hoſti; victoriam eſſe in manibus, magnâque victoriæ præmia: Venirent ipſi in partem, & augendi imperii occaſionem elabi ſibi ne paterentur. Hæc Carafa elarè, ac magnificè jactabat: Cæterum Senatum, quem metus ex periculo Pontificis ad curam rerum ſuarum converterat, tantæ oſtentatæ vires ſecurum ſui magis, quàm alieni ſollicitum reddiderunt. Itaque accepto, cultóque omnibus honoribus Carolo, & ſpecioſis reſponſis ſine vlllo effectu dimiſſo, ipſi quietem egerunt.



---

*Quomodo è Pauli gratia decidit.*

## CAPUT XVII.

**C**ARAFa quamquam sensit hac jactatione virium laxatum ab se eum metum in Veneratorum animis esse, quem Commendonus studiose intenderat, & quo vno trahi Senatus in causam posse videbatur, tamen errati sui invidiam in Commendonum ipsum vertit, quem occultè oderat dissimilitudine morum. Nam Commendonus arctiori amicitia ejus, vel ultro officiis invitatus abstinuit semper, horrens ingenium hominis mente malâ imbutum, ac perditum flagitiorum consuetudine. Unde obsequii jus obtinere apud eum, quàm gratiæ, & familiaritatis satius duxit. Ergo vitare arcanos aditus, temporâque, & publicarum rerum ministerium, non malorum conscientiam appetere. Si quando imprudens indecoris supervenisset, abire statim, tamquam per reverentiam, adversus eum. Venetiis solemnes post dapes, quibus Carafam Senatorum vnus acceperat, nobilium matronarum cœtum, saltationemque celebraturum, moris civitatis, quàm personæ suæ magis memorem, vnâ ingrediente, & in assentationem ejus hilarè, ac jucundè agente, rogatâ comitum turbâ, solus Commendonus reliquit, fictâ sibi discedendi causâ, veniâque impetratâ ab libente, sed occultè ira-

H iij

sciente, quòd exprobrari sibi quos ille respueret mōres, rebatur. Haud ignotum id Commendonō, cujus & audita vox inter suos scientem se, ac prudentem labi: sed honesti, decorique amor in juvenis animo ambitione validior erat. Offendebatur quoque Carafa, quòd cū ipse numquam de Hispanis, Regēque eorum mentionem sine insectatione, & contumelia faceret, furorique ejus assentantes plerique assiduē probra ingerebant, moderatiū Commendonus ageret, & quamquam apud Senatum pro Pontificis causa acriter, tamen cum privatis nomen Cæsaris, Philippique modestē, nec sine honore vsurparet; sedare, quam intendere odia vtilius ad omnia ratus. Carafa igitur Romam reversus frigide rem actam à Commendonō dicere, Hispanorum respectu, quibus occultē studeret. Nec apud Paulum cupidine vindictæ flagrantem atrocius vllum crimen. Itaque rediens Romam Commendonus ad pedis osculum admissus, brevi sermone, nec pro pristino amore comiter, atque amanter excipitur à Pontifice. Sensit ille ictum se Carafæ malevolentia, quam sponte motam multi spei ejus invidentes aluerant, atque incitarant. Sed & fore ita providerat, nec remedia quæsit. Non ipse locum, tempusque aptum alloquendi Pontificem, non per alium purgare se tentavit, tacitus, pacatusque injuriam tulit. Mansit tamen sua illi integra dignitas, neque re, neque dicto minùs liberali est violatus. Non ædes in Palatio ademptæ, non vi-

ctus præberi desitus, ne aditu quidem, atque amicitia prohibitus, nisi quod ipse ultro se rebus subduxit, idque Carafa satis habuit, virum infontem, & secundissimæ famæ, vltra insectari, aut non ausus, aut non visum. At reliqui ferme omnes, quicumque initio publicis negociis, consiliisque à Paulo admoti fuerant, gravius perculsi, Palatio alii ejecti, alii carceribus inclusi, in exilium alii pulsati, in quibus & ii fuere, qui maximè Commendono obrectaverant. Nam Carafa, ut solus omnium rerum potiretur, neminem vlllo amicitia, aut gratia jure pollere apud Pontificem patiebatur, nisi qui ab ipso provecti ejus beneficium agnoscerent. Ita alium alia de causa omnes amovit, in locoque eorum clientes suos suffecit, homines, quibus nulla Reipublicæ, aut honesti cura, ipsaque in illum fide, non religione, sed utilitate, ac spe improbâ crescendi ex publicis malis stabat. Vacuus igitur Commendonus publicis muneribus, insperatumque eo tempore nactus otium, avidè studia sua repetiit, opusque antè inchoatum à se de jure Romani Imperii ad Germanos translatus, de Pontificum Maximorum potestate, ac de publicorum Conciliorum vi pertexte, atque absolvere est adorsus. Ob id assiduos in Vaticana Bibliotheca vetustos, ac situ, & pulvere obritos libros excutere, evolvere, totam scrutari, atque eruere antiquitatem, multa librorum, multa etiam suâ manu exscribens. Per hæc ipsum fermè annum utilibus, atque honestis stu-

diis cùm transegiſſet, poſtremò bona cum Pontificis venia anno inſequenti M. D. LIX. ab Urbe Venetias diſceſſit, inde Zacynthum, ac Cæphaleniam, quarum Inſularum Episcopuſ erat, tranſmiſſurus. Verùm dum ibi tempeſtatem ad navigandum idoneam opperitur ad xv. Kal. Septembris Pauluſ IV. deceſſit, tertium quidem & octuageſimum agens annum, ſed irâ, ac mœrore magis, quàm ſenio conſectus, quòd ſclerum Carafæ, fratrumque, vt diu neſciuſ, ita ſeruſ ultor extitiſſet.

*De Carafa, fratribuſque Urbe pulſis.*

#### CAPUT XVIII.

**C**ARAFÆ Cardinali duo fratres erant, natu maior Ioannes Dux Paliani, minor Antoniuſ Marchio Montibelli, vterque titulum per alteriuſ injuriã adeptuſ. Diverſi vitiis, ſed omneſ arrogantia, & ſocordia pariter odioſi, inviſque. Cæterùm diſcordes inter ſe, obſidendi patri auribuſ, ne quid quod ipſorum ſclera proderet, permanare ad eum poſſet, fraternã concordia, & fideſ ex mutuo metu. Uni Paulo fictæ probitatiſ, & innocentiaſ ſpeciem præferabant; apud alioſ certabant flagitiis. Ac falſuſ ſimulatione Pauluſ iis ſe abutenduſ permiſerat, intentuſ ipſe jubendiſ novis legibuſ, quæſ projectam homi-



hominum licentiam frenaret ; & domesticæ turpitudinis nescius aliorum ordinabat mores. Unde pari odio & virtutes ejus , & vitia suorum habebantur. Quæ cùm omnem excessissent modum , extitit , qui miseretur Pontificis , alioquin egregii , & publicæ rei percupidi ; & in quo , præter alperius adversus repugnantes ingenium , vehementiorémque naturam , nihil quod magnopere reprehendi posset , invenires , quando ille in tantam invidiam , atque offensionem hominum nullo suo merito adductus videretur. Is quicumque fuerit ( nam & in occulto mansit , nec sciri ad rem magnopere pertinet ) dicitur veniâ impetratâ , quod non hæc antea derulisset , vitam , mores , facinora trium fratrum , ac dedecora domus omnia aperuisse , addito , quantum inde ad bonos offensionis , quantum ad ipsum invidiæ , atque adversæ famæ redundaret. Artonitus ea audivit Pontifex , & vbi haud vana referre viso fides auctori fuit , ingenti dolore , atque impetu exarsit , cùm quid potissimùm in eos statueret pudore simul , iraque confuso non satis succurreret , in præsentia misit , qui omnes , quicumque se aliquâ propinquitate contingeret , aditu , & conspectu suo prohiberet , & Senatum in sequentem diem , quia tum nox suberat , vocari jussit. Cùm ventum in Senatum est , gravi oratione prius de Patrum fide est conquestus , à quibus admonitum se oportuit eorum , quæ contra publicam rem , famamque , & existimationem suam fieri animadverterent.

I. I. M. F.

Quamquam ignoscere se alienis dixit, quando à suis tam sceleratè deceptus, ac proditus fuerit. Trucibus inde verbis in eos invec-tus, Carasam Cardinalem legatione Bononiæ, atque omni publicâ administratione removit: Joanni militare ducatum, atque imperium, quod ei totâ Romanæ Ecclesiæ ditjone erat, item Præfecturam clas-sis ademit: Antonium suâ Burgi, & Palatii custodiâ privavit, atque ipsos, & præterea reliquos gentiles, atque affines suos, præter Alphonsum Cardinalem Antonii filium spectatæ modestiæ juvenem, ante noctem excedere vrbe, & assignata cuiusque exilio in oppida abire imperavit; malum minatus, si quis aliquem eorum vllâ re ju-visset. Professusque graviora meritos, adjecit vl-ciscendi sui, ac dignas pœnas à fontibus repe-rendi palmam successorì relinquere. Cùm multâ in hanc sententiam atrocia plenus iræ, vultu, voce, oculis terribilis intonuisset, (& inerat ei dicendi summa vis, summâque facultas, & gravitas, & trux cùm ira efferveret, oculorum obtutus) ad-eò exterruit Senatû, ut magis nutu, vultu-que mitiora Patres precari viderentur, quàm quis-quam aggredi sermone auderet. Et Ranutium Farnesium Cardinalem clementi ingenio, libe-ralisque naturâ, ac præstanti facundiâ juvenem, vnum lenire iram, tegere reos, deprecari tam subitam damnationem, audiendisque, & copiam adeundi patruî aures, diluendisque quæ objice-rentur, aut clementiam implorandi fratris filijs

non negandam differere orsum responso adeò sã-  
 vo pertulit , vt diceret , Si Paulus III. avus tuus , „  
 Ranuti , eãdem severitate Petri Loyfii filii fui fa- „  
 cinora , morẽsque coërcuiffet , non illum fœdum „  
 in modum trucidatum , laceratũque Placenti. „  
 ni è fenestris in viam publicam projeciffent. Tum „  
 verò ne hifcere quidem audente vllo exilium Ca-  
 rafæ , cæterisq̃ue indicitur , denunciaturque , nul-  
 lam veniæ spem , nifi fortè in obfequio effe. Tum  
 dilabentibus qui affiduè affectari , deducere , obser-  
 vare confueverant , qui fere fortunæ auram , non  
 amicitix jura fequuntur , Commendonus , ( non-  
 dum enim Romã difcefferat ) quamquam Flo-  
 rentium domo pridem abftinuerat , tum labefa-  
 ctos , preffosque omnibus officiis percoluit , ma-  
 ximè Cardinalem , à quo etiam decorum nava-  
 tæ fidei testimonium tulit : cùm enim eum Vi-  
 tellius Cardinalis Palatio exeuntem folaretur , &  
 vt fit , bonam habere spem juberet , Carafa ver-  
 fus ad Commendonum , qui ponè fequebatur ,  
 dextrâque in humerum ejus injectâ : Quid , in- „  
 quit , Vitelli ; non æquo animo adverfa noſtra fe- „  
 ramus , quando fic tulit ? Quem ſi nos audiſſe- „  
 mus , numquam hoc ſcopulo impacti tantam con- „  
 tumeliam ſubire nunc neceſſe haberemus. Ita „  
 Carafa Marinum exulatum abiit , cæteri itẽp „  
 quò quiſque juſſus erat. Pontifex ad hæc eorum  
 acta permulta reſcidit , quos ipſi publicis mune-  
 ribus præpoſuerant , ſtatim eiecit , tributa , on-  
 erâque ſe inſcio ab iis impoſita populis ſuſtulit.

Nec tamen grata hæc in vulgus erant , quia non tam ex beneficentia in alios , quàm ira in suos profecta interpretabantur. Et quamquam illos amotos rebus , punitosque gaudebant , tamen quisque quid sibi timendum esset , quando proximis tam implacabilis fuisset , reputabant. Quantum verò terroris ea severitas in omnes effuderit , id argumentum sit , quòd cum fortè ignara rei in Urbem venisset , eo ipso tempore Poliniani Marchionis vxor , Pontificis ipsius sororis filia , inventus nemo sit , qui eam domo reciperet , quæ ut venerat frequentî comitatu , imbre maximo , totam emensa urbem , ab singulis Principibus , cum quibus aliquod hospitii jus haberet , exclusâ , ad publica diversoria descendit , sed ne ab iis quidem admissa , timentibus cunctis , ne quid contra voluntatem Pontificis facerent , post diuturnum ludibrium remota in Urbis parte ab caupone omnium ignaro , humili , ac sordido recto madida , deformisque recipitur. Inde insequenti die primâ luce Neapolim abiit. Et Carafa Cardinalis cum ab ægritudine animi morbo quoque corporis graviter decumberet , medicosque accitum Romam misisset , nec ire ad eum , nec ea de re Pontificem appellare quisquam est ausus. Non omittam hoc loco exitum horum fratrum , qui documentum mortalibus esse possunt , quàm incertis casibus humanæ res versentur , & quàm instabili gradu illi nitantur , qui fixam terræ mentem cælo numquam erigunt. Hi satis amplâ do-

mi fortunâ orti , eâ mox per ruinam partium ,  
 quas secuti fuerant , dejecti , diu exules , atque  
 egentes fuerunt , & Carolus vitam mercede mi-  
 litia sustentavit. Ad eam inde potentiam perve-  
 nerant , ut potiundi Neapolitani Regni spem ani-  
 mo concipere , atque aggredi potuerint , rerum-  
 que arbitri quatuor Romæ annos fuerint ; ran-  
 dem à patruo indelebili ignominia notâ Urbe  
 expulsi , quandiu ille supervixit , exularunt. Po-  
 stremò à Pio IV. qui post Paulum Pontificatum  
 gessit , Carolus , & Joannes capti , damnatique ,  
 ac publici carnificis manu necati sunt.

*FINIS LIBRI PRIMI,*





ANTONII MARIÆ  
GRATIANI  
DE VITA  
JOANNIS FRANCISCI  
COMMENDONI  
CARDINALIS  
LIBER II.

---

*Ad Casarem, & Germaniæ Principes de  
Concilio mittitur.*

CAPUT PRIMUM.

**M**ORTUO, ut tradidimus, Paulo,  
Commendonus omisso consilio  
in Græciam navigandi Romam  
est reversus, eo animo, ut suc-  
cessorem sibi in Episcopatu à no-  
vo Pontifice postularet. Retinue-  
rant enim eum in Italia sui, nec passi trajicere

Zacynthus fuerant. Quid enim longinqua , atque inopi in insula inter paucos, & sordidos Græculos incultam , desertamque ab amicis vitam ageret , ut maris , & navigationis incommoda non eximesceret ? Ipse si non eundem sibi , ne habendum quidem Episcopatum statuit. Romæ post quartum demum interregni mensem renunciatur Pontifex Joannēs Angelus Medices Mediolanensis , qui Pii IV. nomen accepit. Ab eo facile impetratum , ut alius Episcopus Zacynthiensibus præficeretur , arbitriumque deligendi Commendono ipsi permissum , quem etiam honorificâ oratione Pius est prosecutus , virum talem Romæ ad usus Reipublicæ retinendum ferens. Mansit igitur Romæ Commendonus imperio Pontificis non integrum annum. Quo tempore traditis in custodiam Carafâ Cardinali , & fratre ejus Pallianj Duce , cum amici quoque eorum, & qui sub Paulo aliquam partem Reipublicæ administrarent , & maxime belli consiliorum participes fuerant , passim alii in vincula conjicerentur , alii fugâ sibi consulerent , ne aut diluere sua , aut aliena prodere crimina cogerentur , Commendono tanta fides innocentiae , atque integritatis fuit , ut neque ipse in ullius culpæ suspicionem Pontifici , aut Judicibus veniret , neque necessitas ei vlla imposita sit testimonio suo cujusquam periculum onerandi. Interea Pius cum multas Christianæ Reipublicæ partes pravis religionibus turbatas , & præter cæteras Germaniam à Chri-

stianis sacris palam descivisse, & gliscere in dies malum, remediumque posci maximè à Pontifice animadverteret, animo sanè ingenti publicum omnium Episcoporum Concilium habere instituit: invitatus maximè opportunitate pacis paulò antè inter Gallos, & Hispanos compositæ. Ita edictis promulgatis, missisque per provincias Concilium Tridentum convocavit. Quam urbem Paulus, & Julius Tertii Pontifices Maximi antè delegerant, ut quia Germanorum causâ ea suscepta res esset, eorum quoque commoditati in primis consuli videretur. Est enim intra fines Germanorum in Rhetiis Alpibus sita. Cùm ad ipsos mittere Germaniæ Principes, in quibus aliquot erant magnæ dignitatis, atque potentiæ Reguli, aliquem statuisset, qui eos aut exciret ad Concilium, aut quid spei ostenderetur sanandi mentes tot hæresum labe depravatas exploraret, diligendûsque ad id munus vir cùm fide, atque industriâ spectatus, tum doctrinâ, atque eloquentiâ promptus videretur, multi, ut fit, suam ad id operam profiteri, magnisque studiis per potentes, & gratiosos homines apud Pontificem contendere instituerunt. Sed non iudicio solum, & sermone hominum vni Commendano ea provincia destinabatur, illum parem tali negotio ferentium, qui præter litterarum, & ingenii laudes innocentiam vitæ, & gravitate morum antecelleret. Sed Pontifex ipse sepositum sibi in hanc ipsam Legationem cum pro aliis petentibus respondit. Vocato igitur



tur ad se, cùm ei suam sententiam aperuisset, litteris, mandatisque instructum dimisit: jussum ante omnes Ferdinandum Cæsarem adire, perlatâque ad eum Pontificis voluntate, ejus ad reliqua consilio maximè uti. Commendonus præmissâ suorum parte, jussisque per Carnos in Regiam Cæsaris pergere, ipse cum paucis dispositos per equos Tridentum, atque inde Viennam contendit: quò circiter Kal. Januarii anno M. D. L. X. I. venit. Erant apud Cæsarem Pontificis Nuncios duo, Stanislaus Hosius Episcopus Varmiensis, Polonus, & Zacarias Delphinus Episcopus Pharensis, Venetus, paulò antè de Ungaricis rebus ad Ferdinandum missus. Atque is proficisci ad civitates, Regulosque, qui Rhenum accolunt, eoque ad Concilium invitare est jussus; dum Commendonus trans Visurgim, Albinique interiora Germaniæ peragratur. Cum his communicatis rebus vnâ ad Cæsarem postera die deducuntur, à quo Commendonus comiter, benignèque acceptus, litteras ei Pontificis manu scriptas reddidit, cásque oratione subsecutus, quæ sibi mandata erant, aptè, & copiosè expoluit. Summa fuit, Pontificem Maximum occurrendum tot hæresibus, magna in dies incrementa capientibus ratum, postquam & Dei, & cælestium opem, veniâque implorasset, & Regum cæterorum, & ipsius in primis Cæsaris sententias perrogasset, Christianæ Reipublicæ Concilium de integro cogere Tridentum decrevisse, ut discussis, quibus

» Christiana res in sectas , ac dissidia abit , errori-  
» bus , antiquus decor , speciésque , & pax Catholi-  
» cæ Ecclesiæ redderetur , aut si qui adamas se-  
» mel opiniones pertinaciùs amplecti voluissent ,  
» illi à cæteris manifestâ animi labe distingueren-  
» tur. Quamquam autem omnes vniversè per edi-  
» ctum evocarit , tamen dedisse hoc Pontificem  
» dignitati Germaniæ , suóque in gentem illam  
» summo , ac singulari animo , vt duos Episcopos ,  
» se , & Pharensem obire omne Germanicum no-  
» men , & singulos Principes , liberásque civitates  
» ad id Concilium celebrandum , ac de communi-  
» bus rebus in medium consulendum adhortari ius-  
» serit. Quod quo promptiùs , ac sine vlló metu à  
» cunctis fiat , velle , juberéque Pontificem omni-  
» bus tuò veniendi publica sub fide potestatem ef-  
» fe , júsque liberè , atque audacter apud Patres dis-  
» ferendi , qua quisque de re seu conqueri , seu di-  
» scepere , seu rogare Patres voluerit , Petere ergo  
» à Cæsare , vt qui reliquos Reges dignitate præ-  
» ster , exemplo quoque antecæ , & Tridentum pri-  
» mo quoque tempore Legatos suos mittat , qui non  
» peragendis modò , sed inchoandis quoque rebus  
» adsint , salutarémque hunc Pontificis conatum  
» opibus , auctoritate , consilio juvet. Cæsar collau-  
» dato Pontificis pio instituto , seque in auctorita-  
» te ejus futurum semper , neque passurum vllâ re  
» desiderari ab se officium suum pollicitus , mo-  
» nuit Nuncios Germaniæ Principes illos , qui à Ca-  
» tholicæ religionis fide desciverant , postquam de

Pontificis Maximi voluntate habendi Concilium certiores facti sunt , missis inter se Nunciis , locum , diemque statuisse , quo & ipsi de suis rebus convenirent: Diem ad 1 x. Kal. Februarii , locum Nauburgium Misniæ urbem ad Salam fluvium sitam delegisse. Quando commodius univērsos coactos in vnum ipsi allocuturi videantur , sibi quidem videri , ut eò vnâ vterque Nuncius proficiscatur , aut enim moturos aliquid , aut quid spei in singulis sit , certiùs intellecturos ; sed leniter agendo , mulcendóque animos , plusquàm castigando apud alienatos , atque contumaces profecturos. Se quoque idoneos viros ex suis eódem allegaturum , mandaturúmque iis , ut Nuncios , rémq̃ studiosè , ut locus dabitur , adjuvent. Verùm instare diem , nec Germanos credi diu Nauburgii moraturos , ut si in tempore adesse velint , ne differendus discessus sit , & iter maturandum. Pragæ certiora à Ferdinando filio suo scituros , & consilium tempori accommodaturos. Quamquam Commendono ea profectio non probaretur , quòd diceret in tali conventu , neque Nunciis adeundi , ac agendi cum singulis , & consilia eorum disjungendi , quâ vnâ viâ profici aliquid posse videretur , facultatem , & vnâ omnium sententiam fore , & asperrimum quemque plurimùm valiturum , tamen cùm Collegis non refelli Cæsaris consilium , quod ipsi poscere , & sequi iussi essent , placuisset , sequenti die Vienne discedunt.

*Acta per eum in conventu Germanorum.*

CAPUT II.

**P**RAGAM septimâ die, atque inde hieme  
 sævâ, atque adedò frigidâ, vt ferri vix posset,  
 viâque per Bohemiæ saltus maximè nivibus im-  
 peditâ, die quintâ Nauburgium venerunt. Ad-  
 venientibus nec obvium missum, nec vllum ho-  
 noris, aut amicitiz officium, nec omnino hospi-  
 tale quidquam tributum. Biduo cognoscendis re-  
 bus dato, tertiâ die constituunt, vt singulos suæ  
 quisque provinciæ privatim conveniat. Delphi-  
 nus ad Palatinum Rheni, Commendonus ad Du-  
 cem Saxoniz ( ii quia è septem viris erant, qui  
 jus creandi Romani Imperatoris habent, cæteris  
 præminebant ) mittunt, qui adeundi tempus po-  
 stulent. Ab utroque idem responsum, in commu-  
 » ni conventu, nihil nisi de communi sententia agi  
 » posse, relatu-ros ad socios, & voluntatem omnium  
 » significatu-ros Romanis. Decernitur inde in co-  
 rum consilio privatis colloquiis in re publica opus  
 non esse: & verba Legatorum ab adversariis ve-  
 nientium omnibus coram esse audienda. Ab hoc  
 decreto mittunt cum militum cohorte, quam Saxo  
 ad custodiam corporis habere circa se consue-  
 vit, primos amicorum, qui Nuncios in curiam  
 deducant. Illi quamquam id quidem minimè  
 voluissent, tamen reculare non ausi, ne si ab his

exclusi forent, ab nullo deinde Germanorum satis benignè acciperentur, ire porro, & alloqui universos statuunt. Curru vectos, Germani, qui ad deducendum eos venerant, pedibus, quod honoris est, antecesserunt, & Principes ingredientibus ad se omnes assurrexere; non tamen illis dextras ex more gentis porrexerunt, qui mos apud Germanos, sicuti servatus amicitiae pignus habet, ita prætermisus non dubium est alieni, atque averſi animi argumentum. Nuncii litteras Pontificis edictique exempla singulis reddiderunt: vbi confedere prior Delphinus omnia quæ edicto continebantur, de voluntate Pontificis, de studio, atque consilio medendi tot morbis, quibus Christiana Respublica ex mora semel religionis fide laboraret, est persecutus. Tum ejus excipiens orationem Commendonus admonuit Germanos temporis ad sacrum celebrandum Concilium peropportuni, reconciliatâ nuper inter Gallos, atque Hispanos gratiâ, & pace constitutâ inter duos opulentissimos Christiani nominis Reges, & eo nobis Pontifice ad regimen divinarum inter homines rerum dato, qui curas, & cogitationes suas huc omnes contulerit, ut pietas, cultusque Dei purus, sanctus, inviolatus habeatur, custodiaturque, & si quid negligentia irrepsit in publicas ceremonias, quod alienum à dignitate Christianæ fidei videatur, id verò antiquari, atque abrogari velit, ac præterea corrigi, emendarique, & ad veteris disciplinæ normam restitui, quidquid in homi-

» num moribus à majorum nostrorum sanctissimis  
» institutis deflexisset. At cùm Christianos omnes  
» gaudere hujus celebratione Concilii, quo pristi-  
» nus Ecclesiæ decor, & moribus pudor reddatur,  
» debere, tum verò ab his accipi animis libentibus,  
» qui sive errore decepti, seu callidâ quorundam  
» sacrarum litterarum interpretatione inducti, se ab  
» aliorum sententia, placitisque sejunxissent. Cùm  
» enim nostra omnium salus verâ de cælesti numi-  
» ne opinione, atque fide maximè contineatur,  
» nec fides esse vera, nisi vna, possit, eaque non à  
» singulis pro cuiusque libidine animi dijudicari;  
» sed ab vniversis ex cælestibus jussis constitui de-  
» beat, an vsquam melius, certiusque exquiri, aut  
» dilucidius explicari veritas queat, quàm vbi ex  
» omnibus gentibus coacti doctissimi mortalium  
» convenêre? Ubi à sacratis viris nihil nisi rite, pla-  
» catóque per preces, & sacrificia Deo incipitur?  
» Ubi omnia divino instinctu, afflatúque aguntur?  
» Nec verò vltra cunctandum, differendúmque re-  
» medium esse; prolabi enim, ac ruere quotidie  
» in deterius rem, divinos monitus, præceptaque  
» detorqueri, perverti, depravari ab ambitiosis no-  
» varum rerum auctoribus, quos dum nescia sui  
» multitudo suscipit, favoréque tollit, infirmari  
» vim legum, & ipsa convelli fundamenta religio-  
» nis, quæ quanto periculo moveantur, non ne-  
» cesse esse apud expertos memorari. Neque verò  
» Christianam esse religionem inventu hominum  
» comparatam, sed cælitus traditam nobis, ac præ-

sentis ore Dei institutam, ut eam arbitrio subji-  
 cere, atrectare, minuere, sensui suo accommo-  
 dare mortalis nemo possit, quin idem se, & gra-  
 vissimo piaculo, atque inexpiabili fraude in per-  
 petuum obstringat, & erroribus inexplicabilibus,  
 turbulentissimisque involvat. Quippe sacrorum  
 dicta librorum, si quisque pro capitu ingenii sui  
 interpretetur, idque verum sit, quod cuique pro-  
 babilius visum fuerit, tum quot capita hominum  
 tot fore de divinis rebus sententias. Ab tali ar-  
 rogantia, ac vanitate longè sanctos illos abfuis-  
 se viros, qui, quæ à præsentī Deo acceperant,  
 nobis tradiderunt, traditæque capite, ac sangui-  
 ne suo sanxerunt; nam Divos Paulum, & Barna-  
 bam, ut Lucas rerum ab Apostolis gestarum scri-  
 ptor memoriæ prodidit, de controversia inter  
 Christianos tum fortè Alexandriæ orta de Moy-  
 sis legibus, nihil auctos statuere, Hierosolymam  
 petiisse, ac rem ad Concilium Apostolorum re-  
 tulisse, decretoque eorum paruisse. Hinc nostram  
 à primordio sui vniuersi de cælestibus fidem,  
 immutabilémque manere, aliorum variam, mul-  
 tiformem, nec usquam firmè consistentem esse.  
 Nempe Dei cultum, ac religionem, quæ verâ  
 sanctitate nitatur, usu, & consensu augeri, ac  
 propagari, moræque, ac tempore stabiliri. Ho-  
 minum commenta, quæ tantum novitate pla-  
 cent, atque impetu pollent, diuturnitate vane-  
 scere, & extingui. Quot his paucis annis opinio-  
 nes summis vulgi studiis acceptas cum ipsis au-

„ Aetioribus consensuisse? Quot quotidie exoriri no-  
 „ vas, aut veteres, & pridem explosas, atque ob-  
 „ soletas revocari? Ecquis in tanta licentia, atque  
 „ impunitate modum audaciæ statuatur, ne ad vtri-  
 „ mum impietatis provolvatur? Etenim quibus tam  
 „ varii, ac diversi ritus, & modò hæc, modò illa  
 „ sacra, ac semper prioribus rejectis novissima ma-  
 „ ximè placeant, iis brevi nulla fore. Tollenda igi-  
 „ tur hæc dissidia, tantumque coalescere, atque hæ-  
 „ rere in Republica malum non finendum, quod  
 „ & Dei in nos iram irritat, & si invaluerit, dis-  
 „ tracturum, ac debilitaturum rem Christianam,  
 „ & Turcis veris, & internecinis Christiani nomi-  
 „ nis hostibus, & jam pridem ab sua immani po-  
 „ tentia, nostræque infelici discordia in omnium  
 „ cervices imminuentibus, aditum ad communem  
 „ perniciem patefacturum. Proinde mitterent Le-  
 „ gatos, & de quo vel minùs liqueret, vel ab aliis dis-  
 „ sentirent, conditorum nostrorum exemplo ad pu-  
 „ blicum Conciliū referrent. Magis hæc cum silen-  
 „ tio audita sunt, quàm quidquam movere Germa-  
 „ nos, quos in eum locum ad confirmanda, & re-  
 „ novanda inter se fœdera contraxerat, non cura  
 „ concordiae, aut religionis, sed metus, ne quo  
 „ Regum consensu vis eis pararetur, armisque, ac  
 „ bello parere Concilii voluntati, jussisque, & ra-  
 „ pta Ecclesiis restituere, atque ad auctoritatem  
 „ Pontificis redire cogerentur. Nunciis orantibus,  
 „ multi è Germanis Principibus, qui in consilio ex  
 „ more aderant, singula verba excipientes, vtrius-  
 „ que



que orationem perſcripſerunt. Ac tùm quidem non alio reſponſo accepto , quàm deliberaturos de poſtulis eorum Principes , domum iſdem comitantibus Germanis , à quibus antea deducti fuerant , redierunt. Vix horæ vnus ſpatium interceſſit , cùm miſſi à Principibus tres viri eorum , quos ipſi , quia publicarum rerum participes , ac miniſtros habent , Conſiliarios vocant , advenère : introductique litteras , quas Nuncii à Pontifice Maximo ſingulis Principibus reddiderant , ad eos retulerunt , his toridem ferme verbis uſi. Principes , cùm has litteras eis redderetis , appellatos ſe filios à Romano Pontifice non adverterunt , quem quia ipſi parentis loco non habent , ne litteras quidem tali cum appellatione accipere ab eo voluerunt. Reſponſum à Commendono eſt , Non aliter appellatos à Pontifice Maximo Germanos Principes , quàm quomodo Cæſar ipſe , cæterique Chriſtiani Reges , & Principes nuncupari ab eo conſueverunt. Illi poſitis litteris abière. Nunciis quamquam rejecta legatio videbatur non acceptis Pontificis litteris , ex quibus fides dictis eorum habenda erat , tamen quia illi edicta de Concilio retinuerant , opperiri paululùm rei finem placuit. Germani remiſſis epistoſis , ac lætis edictis de reſponſo conſultant , ſententiâſque alius alio ferociùs dicunt ; nam quo quiſque aſperius , & contumelioſius adverſus Romanos loquebatur , eo plus laudis ab aliis , & gratiæ ferebat : audiebatürque vt uſurpatorum ſacròrum , &

Germanicæ libertatis vindex. In quibus acerrimum fuisse Christophorum Wirtembergensium Ducem accepimus, qui præter insitam Germanorum ingeniis ferociam, magnas possidebat opes ademptas templis, unde justos dominos exturbarat, ac supra centum millium aureorum vctigal sibi ex illa rapina confecerat. In eadem noxa & cæteri ferè Principes erant: sed Christophorus eo infensior nobis, quo plura eripuerat, increpare confidentiam Pontificis eos ad Concilium evocare ausi, & tentationem eam esse dicere, ut si molliri, si flecti leni, ac subdola oratione se patiantur, mox graviora moliantur, donec aut vi, aut dolis eos sub antiquum jugum servitutis redigar. Ex hujus maxime sententia, & repudiatae litteræ Pontificis fuere, & quæ inde contumaciter responsa sunt, composita.

---

*Principum Germania ad Pontificis Maximi  
Nuncios contumelia plena oratio; &  
Commendoni responsio ad eos.*

### CAPUT III.

**T**RIDUO igitur post expectantibus Nunciis, ut ad accipiendum responsum in Conventum vocarentur, decem ad eos Consilarii primarii homines magnâ comitum frequentiam missu Principum venire; inter quos dignitate

præstabant Misquitius quidam, & Gregorius Cracovius, amicorum intimi, ille Palatini, hic Saxoniæ Ducis. Omnes à Nunciis summa cum comitate, atque benignitate appellati, atque accepti cum essent, Cracovius vir multarum linguarum peritus, nec ignarus dicendi, ita Latine infit. Magnopere mirantur Germaniæ Principes quâ tandem de se opinione, aut spe fretus Romanus Pontifex eorum tentare constantiam, & se compellare legationibus sit ausus: cum incredibile sit, ignorare eum quæ jura sacrorum sancta Germanis, quam de divinis rebus infixam animis fidem habeant ab eo tempore, quo eam scriptam, firmatamque, & comprobata illustribus sacrarum litterarum testimoniis Carolo V. Cæsari triginta abhinc annis Augustæ tradidère. Sed neque tum temerè, aut levibus de causis fecere, ut à Pontificum ditione, ac potestate, cui parere antea assueverant, desciscerent, quando non JESU CHRISTI nomen, aut gloriam propagari, curarive ab iis, sed propriæ potentæ, atque amplitudini studeri didicerant. Neque nunc sibi statuunt Pio IV. ad Concilium vocanti obtemperandum, penes quem ne esse quidem vllum ejus rei arbitrium sciunt. Etenim auditu etiam indignum est, cum disceptatorem aliorum controversiæ, ac discriminum statui, qui ipse discordiarum, ac dissensionum omnium fons, & origo sit, & in Judicis sedere loco eum, quem maxime sisti ad judicium, inter reosque haberi convenit,

» & à quo vno veritas ipsa tam diu tam immaniter  
 » oppugnatur. Cui enim obscura sunt Pontificum  
 » Romanorum studia committendi assidue armis  
 » inter se nationes, dissidiâque ferendi, quod ex  
 » aliena pernicië suas ipsi opes, & potentiam au-  
 » geant? Cui non nota infectatio, ac sævitia ad-  
 » versus eos, qui à cultu ipsorum, atque inanum  
 » idolorum ad veram pietatem animum traduxe-  
 » runt? Quis verò nescit quantum contaminatæ  
 » superstitionis, ac falsarum opinionum dispersum  
 » per gentes sit à Romanis Pontificibus; quantum  
 » tenebrarum Evangelii luci offusum, & nunc ma-  
 » ximè offundatur? ut tetriores, ac fœdiores erro-  
 » res ferat, foveâtque vester iste Pontificatus, quàm  
 » olim ante cognitum Christum gentes habuere;  
 » & quod detestabilius est, res impias, & execrabi-  
 » les honestis nominibus regitis, & morum, & sa-  
 » crorum corruptores, vni sacratarum legum aucto-  
 » res, & custodes haberi vultis. Nos verò cum ipsi  
 » cupimus, tum in omnibus esse populis non dubi-  
 » tamus probos, & Reipublicæ amantes viros, qui  
 » vanas istas fraudes, & impuras corruptelas, qui-  
 » bus deformatam Ecclesiam cernimus, aboleri,  
 » auferri que cupiant, & veram, & cum cælestibus  
 » iussis consentientem disciplinam restitui. Quod  
 » sanè in primis curæ esse debuisset Romanis Pon-  
 » tificibus, qui sibi tot sæculis superbum in Chri-  
 » stiana Republica titulum, summumque sacrorum  
 » jus arrogarunt. Sed nimirum constat eos id qui-  
 » dem minimè velle, qui vnâ dominandi libidine

occupati, cumulandis superstitionibus, quàm divinis rebus ordinandis magis intendunt. Falsò præterea, & iniquè Germani levitatis à vobis insimulantur, & sibi non constare, pluresque in sectas divisi contrariis, & repugnantibus opinionibus jactari dicuntur, cum vna nostrorum omnium voluntas, & consensus sit in eam doctrinæ formulam, quam scripto comprehensam Augustæ ex auctoritate Cæsaris edidimus: ab ea nostri Principes neque se discessuros vnquam profitentur, & minimè verò leges imponi sibi à Romano Pontifice passuros. Nullius enim mortalium, nisi Cæsaris imperio Germani continentur, quippe hic arbiter, ac princeps, & caput rerum est in Christiana Republica, huic, non Pontificibus vestris, iusta, & legitima Concilia cogere, atque habere, jus est. A quo cum Legati ad Conventum hunc venerint, iis suam de convocando hoc tempore Concilio rationem, ac sententiam Principes expromunt, cum Romano Pontifice omni rerum communicatione in perpetuum sibi abstinendum esse statuunt. Vos verò iidem Principes, quia claris Venetorum familiis ortos, & egregiis virtutis, ac sapientiæ laudibus excellentes esse viros acceperunt, omni quoque honore, & observantiâ dignos judicant, præstitissentque ea vobis, si privati huc, non Pontificis Romani jussu ad eos venissetis. His acceptis Nuncii pauca inter se collocuti, non tacitis ea esse ferenda statuunt. Tum Commendonus: Fecêre, inquit, prudenter vestri „

» Principes, qui quando talia responfurerant, abfen-  
 » tibus ipsis ea, quàm coram dici à vobis maluerunt.  
 » Quò enim acerbitas ifta, ac licentia verborum  
 » adverfus eos, qui ad fuum teftandum ftudium  
 » Reipublicæ, veftрумque in vltimam vſque Ger-  
 » maniam venire nos jufferunt? Scilicet hunc quo-  
 » que morem à Doctõribus, ac Magiſtris veſtris  
 » didiciſtis inceſſendi contumeliis, invidiaque one-  
 » randi eos, quorum redargui rationibus, ac veri-  
 » tate revinci vos ſentitis, cujus tamen ea viſ eſt,  
 » vt maledictis illuſtetur, non obruatur. Caterum  
 » ego dicta criminofè à vobis in Pontifices Maxi-  
 » mos reſellam, non imitabor, vt vos modetiã  
 » quoque, & temperamento linguæ, non ſolùm  
 » cauſa vinci à nobis intelligatis. Quo animo, &  
 » quo conſilio Pius Pontifex Maximus vocatum  
 » Germanos ad Concilium miſerit, dictum abun-  
 » dè à Collega, mèque eſt nuper apud ipſos Prin-  
 » cipes; optimo ſcilicet, & cùm publicæ, tum in  
 » primis Germaniæ ſalutis cupido; licet id vobis,  
 » vt cætera, ſuſpicioſè, criminofèque libeat inter-  
 » pretari. In ſanandis enim Eccleſiæ morbis, nec  
 » juſtius aliud, nec vſu compertum eſt ſalubrius,  
 » vllum remedium, majores noſtri adhibuerunt,  
 » quàm auctõritatem publici Concilii, cujus tan-  
 » ta majeſtas, ſanctitasque apud omnes Chriſtia-  
 » nos omnibus temporibus fuit, vt ejus juffis haud  
 » ſecus, quàm cæleſtibus monitis paruerint homi-  
 » nes, ii etiam, qui aut proprio mentis errore, aut  
 » alterius impulſu lapſi, ab aliis diſcreparent. Quo-

ties enim accidit, ut ægrè, ac gravi, ac pestilen- »  
 ti hæresi laborantes provinciæ, Concilii auctori- »  
 tate acceptâ ad sanitatem, officiûmque redierint? »  
 Et quis adeò projecti pudoris est, qui plus sa- »  
 pientiæ, plus consilii vindicet vni sibi, quàm »  
 tribuat vniverſis? Et adversari consensui eorum »  
 audeat, quos Deus nobis interpretes religionum, »  
 & sacrorum magistros dedit, & quibus ipse præ- »  
 sentiam sui in perpetuum est pollicitus, & læpe »  
 manifesto numine declaravit? At vos etiam de »  
 exemplo, ac de jure Concilia convocandi, ha- »  
 bendique dubitare, & cavillari vultis? Unde ve- »  
 rò vobis venit in mentem hanc potestatem à »  
 Pontificibus Maximis, penes quos ab Ecclesiæ »  
 ortu, Dei, hominûmque concessu fuit, perpe- »  
 tuâque mansit, ad Cæsares transferre, qui nec »  
 usurparunt vnquam ut suam, & Ferdinandus ipse »  
 ad quem vos scilicet eam desertis, non recipit? »  
 Quippe discrimina sui, & Pontificis muneris, & »  
 novit ille, & qui vir est antiquæ sanctitatis etiam »  
 servat: ea autem quæ sint, non est hujus loci »  
 differere, neque omnino res vllum sermonem de- »  
 siderat, cum obscurum nemini sit, quâ fide, & »  
 observantiâ, & optimus quisque Cæsarum Pon- »  
 tifices Maximos coluerit, & Ferdinandus colat, »  
 & quàm ipse paterno animò, atque amore à Pio »  
 Pontifice habeatur. At ne illud quidem est igno- »  
 rum, quàm propensa Pontificum Maximorum stu- »  
 dia in Germanos semper fuerint, quantâque orna- »  
 menta in hanc gentem contulerint. Unde enim »

» vobis Cæsares? Unde Imperii hoc decus, & jus Im-  
» peratoris eligendi, quo cæteris nationibus præful-  
» getis? An igitur Pius I V. Pontificum aliorum ve-  
» stigia secutus, & officii, ac personæ memor, quæ illi  
» divinitus est imposita parentis, & rectoris humani  
» generis, si errantis Germaniæ curam habet, si moni-  
» tum vos, si patriæ charitate revocatum à pravissimis  
» erroribus, invitatumque ad Concilium nos misit,  
» quorum tamen dignitati tribuere vos aliquid vi-  
» demini, id ei audaciæ vertetis? mirari vos dice-  
» tis? Videre vel hinc licet, quàm à recto majorum  
» vestrorum more, ac voluntate desciveritis. Illi  
» dubiis, aut incommodis eorum rebus nusquam  
» aliò fidentiùs, quàm ad Pontifices Maximos re-  
» fugerunt. Vos Pontificem ultro admoventem  
» vulneribus vestris manus, iniqua cum exprobra-  
» tione repellitis. Revocandi autem veterem dis-  
» ciplinam, ad eamque corruptos hominum mores  
» emendandi curam ad Pontificem Maximum per-  
» tinere, quod objicitis, & nos fatemur. Atque  
» id quidem Pius I V. statim ac est Pontifex renun-  
» ciatus, enixè, ac studiosè facere est aggressus, &  
» nunc impensius in idem opus incumbit; & quia  
» magni negotii res est, quo absolutius, perfe-  
» ctiusque conficiatur, omniæque, quæ ubique  
» sunt, incommoda comprehendat; universæque  
» ad omnes permanet, de Concilii ipsius senten-  
» tia, & ex consulto Patrum sanciri, constituique  
» voluit, idque vobis ignotum esse non debuit;  
» cùm & edicto contineatur, quod legistis, &  
» quæ



quæ Romæ aguntur, perferri ad vos quoque poterint, nisi cāpere cuncta in deterius, & honesta, rectaque nescire, & tantum secus facta reprehendere, atque infectari liberet. Et quid ego nunc illam orationis vestræ partem refellam, quā nobis superstitionis crimen, si Deo placet, & obscurati Evangelii invidiam, maculamque infligere, odio veri, ac libidine maledicendi occæcati, non estis veriti? Quibus gloriari liceret nullā re æquē Romanam Ecclesiam cæteris Christianis populis, quā Evangelii propagatio- ne, custodiāque præstitisse, nisi à consuetudine nostra abhorreret, aliter, quā in eo gloriari, cujus cælesti numine hæc orbi terrarum salutis, & beatitudinis lux effulsit. Sed profectò constat omnibus antiquitatis monumētis veteres illos Patres, qui maximè sanctitatis, & doctrinæ laude floruerunt, Christianamque pietatem pariter moribus, atque ingeniis illustrarunt; ab usque Apostolorum memoria, ut quæque res dubia, aut difficilis explicatu incidisset, Romanam Ecclesiam consulere, ejusque responsis haud secus, quā divinis oraculis stare consuevisse. Possem ego, ad quamcumque terræ plagam me verterem, percensere Reges ultimarum quoque gentium, nationesque, quæ sacrorum jura petitem Romanis misere. Possem & innumerabiles hominum multitudines, Pontificum Romanorum curā, atque illius Ecclesiæ studio ab impiis falsarum religionum ludibriis, quibus captas mentes habebant,

M

» ad Christi veri Dei cultum traductas commemo-  
 » rare, cùm nulla Christiana provincia sit, quæ  
 » aut acceptæ, aut conservatæ Catholicæ religionis  
 » gratiam Romanæ Ecclesiæ non debeat. Sed ut  
 » alios mittam, ( neque enim mihi apud vos agen-  
 » ti aliena exempla conquirenda sunt) quero à vo-  
 » bis, vnde Christianæ religionis, fideique primum  
 » nomen Germani audiveritis? Unde magistri pie-  
 » tatis, vnde Evangelii ipsius lumen, disciplinâ-  
 » que ad vos pervenerit? An inficiari potestis, quòd  
 » Christiani sitis, quòd barbaras superstitiones exue-  
 » ritis, id secundum Deum beneficium esse Ro-  
 » manæ Ecclesiæ? Ab hac prima Christianæ pieta-  
 » tis semina jacta in vobis sunt, ab hac sacrorum  
 » jus, & Dei rite colendi, ac de divinis rebus verè,  
 » rectèque sentiendi tradita ratio est, à qua sum-  
 » mo isto imperii, & majestatis honore præ cæte-  
 » ris gentibus aucti, atque decorati estis. Ab hac  
 » vos Ecclesia, quæ beneficiis meruit, ut parentis  
 » majestatem apud vos obtineret, postquam gra-  
 » tiæ obliti descivistis ab hac veritatis, ac fidei re-  
 » gula, ad quam omnes, quæ rite Christum Deum  
 » venerantur, gentes, suas de divinis rebus ratio-  
 » nes semper direxerunt, postquam declinastis, &  
 » quòd vnum rectum est ad cælum iter reliquistis,  
 » in quos, Deus bone! & quàm devios amfractus  
 » deflexistis? quibus vos erroribus implicuistis?  
 » quibus mentes vestras tenebris mersistis? At et-  
 » iam iniquo animo ferri à Principibus vestris nu-  
 » per dicebatis, quod nos variâ, ac multiplici re-

ligione agitari , impellique Germanos vobis ad-  
 jecimus , idque inficias ire verecundia non fuit. „  
 An potest clarius , an evidentius esse quidquam „  
 vestris inter vos de tota cælestium rerum , ac di- „  
 vinarum ceremoniarum ratione dissidiis , & con- „  
 certationibus ? Una est vestrum omnium consen- „  
 sio , & conspiratio adversus nos , Ecclesiámque „  
 à qua defecistis ; cætera nihil dissimilius , nihil „  
 disjunctius , nihil discrepantius. An verò id non „  
 restatum omnibus ? An non omnis referta libris „  
 Germania est , contraria , & pugnancia docenti- „  
 bus ? An adeò hebetes nos , ac rudes Germani- „  
 carum rerum esse putatis , ista vt ignoremus ? At „  
 Lutherus quidem ipse , Paulus alter , vt vos vul- „  
 tis , qui præcepit se ex Ecclesiæ navi in mare de- „  
 jecit , à quo jactata à vobis Augustana formula „  
 conflata est , quando sibi , aut in quo satis con- „  
 stitit ? An istam ipsam formulam non quotannis „  
 quamdiu vixit , commutatam , diversasque in „  
 sententias contortam edidit ? An qui postea „  
 ipsum secuti sunt , non æquè licenter trahendo „  
 eam , quò cujusque libido rapuit , totam aliam „  
 fecerunt ? Sed quot jam rixæ inter vos de dictis , „  
 sententiisque Lutheri ? Et quotus quisque est , qui „  
 quæ placita illi sunt probet ? Quot Melancthon ? „  
 Quot Oecolampadius ? Quot Zuinglius ? Quot de- „  
 nique Calvinus trahit ? Quot alii sexcenti , qui „  
 omnes de summis rebus à Luthero , atque inter „  
 se dissentiant ? Non modò civitas , aut municipi- „  
 um ; sed ne domus quidem in Germania est

» vlla horum certaminum expers. Cum viro vxor,  
 » cum parentibus liberi de fide sacrorum, de divi-  
 » narum litterarum intelligentia altercantur. Fœmi-  
 » næ, pueri in circulis, in cauponis, inter pocula;  
 » ludolque, quod miserandum est, de religione  
 » constituunt. A vobis denique ipsis hoc ipso in  
 » Conventu, quanto laboratum est opere, vt ali-  
 » quam vniufmodi mentis speciem præferre posse-  
 » tis? Quod assequi tamèn nequivistis: scilicet, vt  
 » discrepare inter se vera, ita conjungi, & con-  
 » venire falsa non possunt. Et quantò quis ab Ec-  
 » clesiæ portu magis recedit, quantò longiùs à ve-  
 » ra, stabilisque fide in errorum veluti pelagus pro-  
 » vehitur, tantò cæcioribus fluctibus jactatur, fal-  
 » laciioribusque opinionibus involvitur. Quin vos  
 » ipsa varietas, inconstantiæque Doctorum vestro-  
 » rum revocat aliquando ad cogitationem verita-  
 » tis, quæ simplex, neque plus vna est? Quin imi-  
 » tamini Pauli Apostoli exemplum, ad nostram  
 » eruditionem memoriæ proditum? qui cùm ni-  
 » hil, nisi divino spiritu afflatus ageret, divinitus-  
 » que traditam sapientiam haberet, vt labi, atque  
 » errare nullo modo posset, tamen divinitus item  
 » admonitus de re, quæ iustam dubitandi causam  
 » habere aliis videri poterat, ad Apostolorum Con-  
 » cilium retulit, ne fortè, vt Lucas inquit, in va-  
 » num curreret, aut cucurrisset. Sed hæc vos vide-  
 » ritis, Pontifex quidem Maximus pio, piisque pa-  
 » rentis officio adversus vos functus, omnique ni-  
 » xus studio, vt deviiis quoque, & contumacibus

filiis salutem redderet, jure vobis, ac omni Ger-  
 mania exprobrabit illud Evangelii, *Quoties volui*  
*congregare filios tuos, quemadmodum gallina convocat*  
*pullos suos sub alas; Et noluisti?* Quæ autem postre-  
 mō honorificè de nobis ipsis dixistis, pro priva-  
 to Principum erga nos studio, privatās quoque  
 gratias iis à nobis referre vos jubemus. Cæterum  
 ea nos non aliā re deberi nobis, quàm ejus à  
 quo missi sumus nomine, profitemur. Hæc à  
 Commendono habitā oratione, Germani nullo  
 dato responso discesserunt, variè pro cujusque in-  
 genio dicta Nuncii accipientes; pars veritate per-  
 culsi taciti ingemiscere, fremere alii, ac indi-  
 gnari, ea dicere tam celebri loco ausum. Et mox  
 conventus ipse dissolvitur, renovatis fœderibus,  
 & constituto, ut neque ipsi mitterent ad Conci-  
 lium, & metum injicerent Germaniæ Episcopis,  
 ne à custodia rerum suarum abscederent. Actum  
 inter eos magnis certaminibus est de conciliandis  
 opinionibus, quibus dissidebant Palatinus, qui  
 totum Calvinum amplectebatur, Lutherique ex-  
 plodendi locum quærebat, ut ad Augustanam for-  
 mulam Melanchthonis quoque apologia addere-  
 tur, contendit: eo enim libro Melanchthon paula-  
 tim à Luthero, cui in docendi munere successerat,  
 deflectens, viam ad Calvini disciplinam aperuerat.  
 Alii item alia adscribi demissè Augustanæ for-  
 mular, ut cujusque rationibus conducere, aut in-  
 geniis aptiora esse videbantur, postularunt. Id  
 cum alii indignè ferrent, res in magnam est al-

tercationem adducta. Et Joannes Federicus Vemariensium Dux, Friderici illius filius, qui à Carolo V. armis victus, septemvirali dignitate privatus fuerat, susceptum familie suæ inde ab initio Lutheri patrocinium tuendum sibi existimans, quamquam Palatini filiam in matrimonio haberet, tamen adeò socii auctoritatem non est reveritus, ut palam eum Calvinianum, & Augustanz formulæ desertorem, appellaret, protinusque se concilio proripiens in suum regnum abierit. Quæ res actionem illam, & consultationem omnem abrupit. Nuncii cuncta ordine Romam ad Pontificem perscripserunt, ubi maximè probata ab omnibus Commendoni oratio est, quâ contumaciam Germanorum tam licenter in Romanam Ecclesiam insultantium, egregiè retudisse est visus. Cum enim aprè ad rem, verèque, tum moderatè simul, ac fortiter, & prorsus pro maiestate Romani nominis locutum prædicabant. Nos exitum, actaque in eo conventu paulò fufius tradidimus, quia & celebris res fuit, nec scitu injucunda, & veriùs differi, quàm à nobis, qui omnibus rebus interfuimus, à nemine posse est visa.



*De reliquo ejus per Germaniam itinere.*

CAPUT IV.

**N**UNCII Naumburgio profecti ad reliqua obeunda digrediantur. Commendonus Saxoniam intrat, fide prius ab Augusto Duce acceptâ per regni sui fines tutò transeundi. Is erat Augustus non immiti vir ingenio, & fessus tantâ sectarum varietate, nascentium quotidie, atque intereuntium, aliquam gratiæ, ac pacis cum Pontifice reconciliandæ rationem iniri cupivisset; sed in discordia, ac defectione audacissimi, atque infestissimi cujusque, valentissima semper auctoritas est. Tum improbi, ac turbulenti furore, sapientes necessitate reguntur. Altera, quàm à Naumburgio profectus est die, Lipsiam venit; inde Halam, ut ibi Archiepiscopum Magdeburgensium conveniret. Is erat Joachimi Brandenburgii septemviri creando Cæsari, quos Germani à munere Electores appellant, filius: sed eo non invento Berlinum ad Joachimi ipsius Regiam perrexit, Albi flumine ad Vitembergiam trajecto. Oppidum Lutheri furore, & Caroli V. victoriâ, & Federici Saxonis, & Lantgravii clade nobilitatum. Joachimus Alberti patris curâ in fide Romana Ecclesiæ diu retentus, post mortem inde patris, temporum illorum procellâ abreptus se hæreticis adjunxerat. Sed tamen ex ingenio suo

multa retinuerat de pristinis sacrorum ritibus , multa item ex disciplina Lutheri respuerat. Advenientem Commendonum perhonorificè hospitio accepit , coluitque omnibus humanitatis officiis, plura ut ne à Catholico quidem præstari potuerint. Cum eadem apud illum Commendonus, quæ Naumburgi dicta ab se, Collegæque de Concilio fuerant, disseruisset, responsumque pro cætera benignitate ejus accepisset, quo magnum pacis, & compositionis studium declarabatur, ac de Pontifice, & Romana Ecclesia mentionem numquam sine honore usurpasset, cupientem deinde discedere, aliquot apud se dies precibus, & comitate retinuit, quotidie plures cum eo horas consumens, ut numquam nisi ægrè à colloquio, ac sermone ejus avelli videretur, viri ingenio, atque eruditione, ut ipse ferebat, delectatus: inerat enim Commendono gravitas, & facundia par, & mira rerum variarum notitia, & serijs, atque efficax sermo. Itaque non difficile ei fuisset Joachimum ab illo errore, in quem credulitate lapsus erat, ad Ecclesiæ fidem reducere; fatentem jam ignota sibi fuisse multa, quæ Commendonum disputantem audierat, nisi suorum auctoritas eum continuisset. Nam Germaniæ Principes omnes ipsi doctrinæ, omnium exterarum rerum, morumque expertes, mirum quàm se plerumque iis credunt, quos sibi in consilium asciverunt, scientiâ juris, aut industriæ opinione commendatos. In Joachimum deterruere, ne oratio-



orationi, cohortationibúsq; Commendoni assentiretur. Ab eo profectus Brunsvigiis, Lunemburgiis, cæterisque regionis ejus Regulis, Episcopisq; conventis, ad Rhenum per Vestphalos iter vertit, visis circa Paderbornam campis, saltibúsq; Varianâ olim clade, & Arminii victoriâ claris; quæ loca adhuc post tot sæculorum spatium à Germanis cum gloria, & ostentatione majorum suorum virtutis monstrantur. Sed ingenti dolore animi circumiens Saxonix vrbes afficiebatur Commendonus miseratione tot populorum à propria salute aberrantium, atque impiâ paucorum fraude tantis sese erroribus, ac exitiabili superstitione obligantium. Nec tenere lacrymas poterat, aspiciens tot monasteria, quæ sanè frequentia per omnem Germaniam immanibus ædificata sumptibus visuntur, tot templa magnificis structa operibus, monumenta veterum pietatis, alibi spoliata, desertaque miserabiliter squallere, alibi prorsus diruta, ac vastata esse, quibusdam etiam locis non in profanos modò, sed etiam abominabiles canum, atque equorum usus haberi, vt quibus altaribus sacrificia Deum propitiantia fieri antè consueissent, iisdem jumentorum præsepia locarentur; tantus in quibusdam furor, tanta inventa rabies est. In Ubiis apud Agrippinensem Coloniam; vrbs ejus Archiepiscopum, atque inde bidui itinere adversâ progressus ripâ ad Confluentem Mosellæ, Rhenique, Trevirorum item Archiepiscopum adiit; est enim

utroque è septemviris, qui Cæsarem creant. Tum navigio exceptus secundo flumine ad Oceanum usque provehitur, tantum ex itinere ad Clivensem Regulum digressus. A mari Bruxellas petiit, conventaque ibi Margaretâ Philippi Regis sorore, quæ cum imperio iis gentibus præsidebat, in Eburones ad Leodiensem Episcopum transiit. Unde cum haud parvi initium motus in Brabantiam (ea Belgarum regio est) revocavit. Lovanium est ampla, ac nobilis gentis ejus urbs, in quam studiorum, ac litterarum causâ magnus è totis Belgis, circumjectisque Provinciis adolescentium numerus convenire solet. Ac tum doctissimis hominibus divinarum rerum, & sacrarum litterarum interpretibus florebat. Inter hos questio, ac dissensio magnis orta de rebus distraxerat civitatis studia, vehementerque accenderat juvenum animos, ut non modò in scholis palam pro sua quisque sententiâ contenderent: sed scriptis quoque, librisque placita tueri parabant; quæ res alienissimo tempore novum datura incendium, aditumque hæreticis ad perturbandas Belgarum res factura videbatur. Eò accersitus Commendonus vocatis ad se, qui utriusque factionis capita erant, quâ comiter appellando, quâ leniter castigando, & de rebus ipsis, quæ in disputationem venerant ex usu differendo, erumpentem illam flammam repressit, neque destitit, donec auctores quoque dissidii in gratiam, concordiamque reduxit. Quæ res non parvam illi

famam , atque exultationem adjunxit ; quippe quos non Magistratus auctoritas , non imperium Præsidis revocare à pertinaci contentione poterat , vnius viri prudentia , aptusque mulcendis , tractandisque eorum animis sermo , ad pravam æmulationem deponendam pertraxerat. Hac re perfectâ , Pontificis Maximi litteris ad Daniæ , ac Sueciæ Reges ultimas Germaniæ , ac Septemtrionis oras incolentes , proficisci , atque eos invitare ad Concilium jubebatur. Nec ille moram sibi ad proficiscendum fecit ; properans difficillimum iter antequàm exiret æstas conficere , ne hyeme in frigidissimis regionibus deprehenderetur. In Holandiam cum transisset , consensâ apud Amsterdamiam navi , Oceani finum , cui incolæ Zudersee nomen dixerent , sævâ vexatus procellâ trajecit , atque inde per Frisios in Saxoniam , ac Lubecam , nobile ad Balticum mare oppidum venit. Certos hinc homines ad utrumque Regem misit , & prius voluntates eorum cognoscere , quàm ipse se tam barbaris nationibus committere statuit. Ac Danus quidem juvenis aspero , ac feroci ingenio , & usque adeò vino , atque intemperantiæ deditus , ut rarò sobrius inveniretur , interque ipsa pocula efferri insolenter , ac jactari solitus , superbè , ac rusticè respondit , non esse , cur se Romanus Episcopus legationibus sollicitaret. Suecum , qui missus est , comparatâ classe in Britanniam parantem trajicere , ab Elisabetha Regina inani spe conjugii illectum , invenit. Hic

quamquam in Lutheranorum erroribus institutus erat, & tum etiam, vt sibi Elisabethæ animum, cuius magnopere affectabat nuptias, conciliaret, Calvinī scilicet sapientiam amplexabatur; tamen magnificum existimans se in vltimis positum terris tam longinquis legationibus adiri, benignè  
 ” Commendono rescriptit, siue in Regnum suum,  
 ” siue in Britanniam, quò propediem transmissurus  
 ” erat, ad se venisset, verba ejus libenter auditu-  
 ” rum, neque ei vllum apud se jus hospitii abfutu-  
 ” rum. Commendono, neque Suetiam petere, vn-  
 de profecturus Rex erat, neque eum in alieno ad-  
 ire Regnò est visum, sed Pontificis iussum de eo  
 opperiri, atque interim in Belgas reverti decre-  
 vit. A Lubeca bidui itinere Namburgium venit,  
 opulentum oppidum, ac frequens, non longè à  
 mari, quà se Albis in Oceanum effundit tantus  
 quidem, ac tam lato alveo, vt nos qui ab Nam-  
 burgio Stadiam petentes medio flumine navi de-  
 scendebamus, veluti magnopelago navigantes ri-  
 pas fluminis ab neutra parte cernere satis posse-  
 mus, neque ea latitudo non magnarum quoque  
 navium capax, quæ ab Oceano ad mœnia vsque  
 oppidi subvehuntur, variâ merce onustæ: Cym-  
 bros olim ea loca, Vandalosque tenuisse credunt,  
 & hodie septem circa civitates pro communi li-  
 bertate inter se nexæ fœdere, Vandalicæ vocan-  
 tur. Ad Bremam inde trajecto Visurgi nobili  
 item Germaniæ flumine, per Frisiam, ac Vestpha-  
 liæ fines in Holandiam, atque inde Bruxellas red-

iii. Ibi Pontificis litteras cùm accepisset, quibus comprobato consilio ejus, vt omiſſa ad Regem Sueciæ profectione in Italiam reverteretur, & ex itinere civitates, Regulosque, qui Rhenum circa colunt, adiret iterum, colque, & maxime Episcopos ad Concilium exciret, jubebatur. Per Rhemos Lotharingiam petiit, & regionis ejus Regulo appellato in Treviros, atque ab his navigio per Mosellam vectus ad Rhenum descendit, ac Maguntiam, atque inde Assemburgium ad Maguntinorum Archiepiscopum se contulit. Is est Archiepiscopus septemvirum, qui Cæsarem suffragiis suis creant, loco, ac dignitate princeps. Paulum inde à Rheno discedens ad Herbipolensem, & Bambergensem Episcopos divertit. Ab his Norimbergiam prævalidam Franconiæ urbem, atque inde viso Aistadii Episcopo, Monachium ad Albertum Baviaræ Ducem venit, atque ab eo discedens, decimo tandem, ac septimo mense, postquam profectus ex Italia fuerat, Tridentum pervenit, quò jam frequentes Patres ab Italia, Hispania, Galliâque ad celebrandum Concilium convenerant. Tridento Romam vocatu Pontificis perrexit, Germaniâ, quanta à Belgarum ultimis finibus, Britannicòque Oceano ad Oderam flumen, atque ab Dania, Cymbriâque, & Baltico mari. ad Rhetias Alpes patet, omni peragrata; omnibus latissimæ gentis populis, Principibusque aditis, pari industriæ, atque innocentie opinione apud omnes relictâ. Miraban-

tur plerique , quòd cùm tot feroces , & Romano nomini infestas nationes obvissset, omnes non solum intactus ab injuria , sed ne risu quidem , aut ludibrio vlllo violatus evasit , sive hæc in ipso caurio fuit , seu spectatæ virtutis , atque integritatis fama venerationem ejus etiam apud barbaros fecerat. Nam Germanorum ingenia aspera , indomitæque , quemadmodum vera Dei religio , cultusque mollierat , ac frenum ferocibus animis injecerat , ad humanitatẽque traduxerat , ita solutis nunc , abjectisque Christianæ legis , ac disciplinæ vinculis , quibus antea continebantur , efferari iterum , atque in antiquam revolve trulentiam , barbariẽque videantur : hæc maxime gentes , quæ longius ab exteriorum commercio remotæ , interiora Germaniæ colunt. Romæ Commendonus in renuncianda apud Pontificem legatione , multa de Germaniæ vulneribus commemoravit , nihil ibi intactum à pravis , religionibus , nihil non pollutum , nihil non inquinatum. Priscæ sanctitatis instituta omnia , aut vi  
 » sublata , abolitæque ab hæzicis , aut novorum rituum contagione contaminata , & corrupta. Ecclesiasticum ordinem , amissâ majorum disciplinâ , licentiam omnium , rerum amplexum , ac plerosque non tam officio , ac studio religionis , quàm vtilitate , ac spe retineri. Episcopos præ  
 » posteris animis posthabere divinarum rerum curam , & ut suæ sibi fortunæ , opesque , & princeps  
 » ille splendoris , ac dignitatis locus , quo inter

cæteros eminent, salvus, inviolatusque perma-  
neat, id enixè laborare. Hinc Regulis, ac po-  
tèntibus hominibus, quos antè in sua auctorita-  
te habere consueverant, adulari, tantòque dedi-  
tos, atque obnoxios magis esse, quanto illos a-  
vidiùs, aut occupandis Ecclesiasticis bonis in-  
hiare, aut occupatis incubare sentirent: scilicet  
quorum cupiditati, conatibusque obviàm ire,  
insolentiàmque coercere, & deberent, & si se  
nosserent, conjunctaque, & concordia habere con-  
silia vellent, etiam possent, eos ipsi ultro me-  
tuunt, suspectosque gratià, atque officiis lenire,  
& conciliare student. Quin' Episcoporum quos-  
dam à fide Romanæ Ecclesiæ descivisse, atque  
in Principum hæreticorum clientelam se tradi-  
disse; eorùmq; tectos ope ex sua libidine vive-  
re. Ad Concilium arbitrari se eorum venturum  
neminem, paucos missuros, si quidem sibi, qui  
aut valètudine, aut senio invalidi, inhabilesque  
ad laborem, itèrque essent, prolixè pollicitos se  
Pontificis Maximi dicto audientes futuros, ac  
Tridentum primo quoque tempore venturos, cæ-  
teros manendi veniam omnes orare, negarèque  
sine evidenti periculo posse ab se Ecclesias, res-  
que suas relinquì, patentes adversariorum inju-  
riis, & absentia suà opportuniore excubantibus  
in omnes occasiones hæreticis futuras. Adversus  
hæc tot incommoda, quæ apta, atque vtilia re-  
media, quibus Catholici, & Ecclesiastici præsi-  
diis, adjumentisque fulciendi, confirmandique

» esse viderentur , quibus inter se fœderibus jun-  
 » gendi , obligandique , quò ab inimicorum frau-  
 » de , atque vi tuti libertatem suam , munúsque  
 » vindicarent , ac neminem magnopere formidare  
 » necesse haberent , exposuit. Quæ omnia magnâ,  
 & locorum , & hominum , & rerum illarum no-  
 titiâ , memoriâque differentem attentè audivit  
 Pontifex , acceptúmque , & collaudatum aman-  
 tissimis verbis redire Tridentum , atque eadem  
 Præsides Concilii edocere , iisque tantam Rem-  
 publicam agentibus consilio , atque operâ adesse  
 jussit. Profectus Tridentum cum omnia Præsidi-  
 bus , vt præceperat Pontifex , nunciasset , non diu  
 moratus , vt se paucorum mensium otio à labo-  
 ribus , curisque tam diuturnæ peregrinationis re-  
 ficeret , & familiares , ac domesticas res suas , quæ  
 ipsum aliquando præsentem magnopere deside-  
 rabant , constitueret , impetrato com meatu Ve-  
 netias concessit , vbi ingenti gratulatione acce-  
 ptus à suis , omnique cultus honore , atque offi-  
 cio ab omnibus fuit. Quippe magnum jam esse  
 ejus nomen , magna de rebus ab eo sapienter ,  
 atque industriè administratis prædicatio. Æquè  
 & acceptus Principibus civitatis , & gratosus in  
 vulgus , clarúsque haberi , vt nullum non virtu-  
 ti ejus patere , atque adeò deberi honorem ho-  
 mines existimarent.


*Nova*



*Nova ejus ad Casarem profectio.*

CAPUT V.

**Q**UIETO, ac tranquillo animo rem suam familiarem, domesticamque curantem, & jam cum studiis, librisque suis in gratiam redeuntem, instruendumque se ad ea, quæ pro sententia dicturus de religionibus, de sacrorum fide, de correctione, atque emendatione morum in Concilio erat, novum de integro injunctum, iter ab instituto avertit. Ferdinandus Cæsar, acto Germaniæ conventu, in quo Maximilianum filium successorem sibi in Imperio designaverat, ut ex propinquo Tridentinis actionibus, Patribusque adesset, Oenipontem accesserat, oppidum ditioris suæ haud ferme plus centum millibus passuum à Tridento distans. Hinc ut præsens assidebat Patrum consiliis, mente vir optimâ, & magno in Christianam rem studio, & pietate; sed ex eo genere hominum, qui quanto sunt ipsi probiores, tanto difficilius esse alios improbos arbitrantur. Quæ ingenia maximè opportuna sunt alienam simplicitatem per speciem boni, rectique ad fallendum captantibus. Itaque callidorum quorundam instinctu, quædam interdum movebat, & à Præsidibus Concilii, Concilioque ipso postulabat, quæ turbandis rebus magis, quàm ordinandis, quod ipse cupiebat, fore vide-

O

bantur. Venerat ex Gallia Tridentum eo tempore Carolus Lotharingius Cardinalis, idem & Archiepiscopus Rhemensium, summâ auctoritate vir, summisq; & suis, & familiæ opibus: magno item usu, excellentique ingenio, ac doctrinâ præditus; denique animis, genere, dignitate ingens vir; sed has laudes longè superabat ambitio hominis propè immensa, quâ elatum animum stimulabat insana cupido cuncta sub arbitrium, nutumque suum revocandi. Galliarum Episcopi, qui satis frequentes partim ad Pontificis Maximi edictum, partim ipsum secuti Cardinalem Tridentum convenerant, non sentire modò cum illo, sed ne audere quidem ab ejus auctoritate discedere videbantur. Cæsaris quoque Legati ventitare ad eum, frequentare domum, ac pellekti conferre consilia dicebantur. Incussit ea res curam Patribus, ne turbidi aliquid rebus tranquillè ad eam diem procedentibus, ex his coitionibus oriretur. Id ne fieret, cavendum in tempore rati Præsides mittere ad Cæsarem delectum è Patrum numero aliquem, à quo de Concilii, præsentiumque rerum statu ille crudiretur, & si quid incommodæ opinionis animo ejus inculcatum à suis hæssisset, evelleretur. Eum denique de Gallorum postulatis, ac de Lotharingii ingenio, atque animo ad vasta semper, atque immodica aspirantis, edoceret. Ad id vnus ex omnibus maximè idoneus visus est Commendonus. Venetiis igitur evocatum proficisci exemplò jubent. Ni-

hil cuiquam eâ tempestate in eo Concilio tam speciosum, tam decorum, tam quod sermones hominum subiret, quôdque plus invidiæ succenderet, accidit. Christiani nominis conventus habebatur, quisquis doctrinæ, quisquis ingenii laudibus vspiam totâ Europâ emineret. Trecenti ferme Episcopi, tot insignes virtute viri Tridentini erant, quorum nemo non par, quantumvis magno negotio, nemo non in eam mitti legationem expetisset. Omnibus vnus, & absens, & non petens est prælatus, tantum ei superior ad Germanos obita legatio nominis, tantum existimationis pepererat. Nec ipse opinionem, ac spem sui fefellit. Nam Cæsarem non modò ab omni cogitatione, si qua injecta illi fuerat, novandi aliquid, aut fovendi alterius cuiusquam consilia, quibus arbitria Patrum labefactari, aut scindi consensus, voluntasque eorum posset, abduxit; sed in priore sua mente, ac sententia adeò confirmatum reliquit, vt Lotharingius ipse paulò post ad eum visendum Oenipontem profectus nihil eum immutarit; atque exinde habitum, ac peractum sine suspitione vlla Concilium sit.



---

*In Poloniam Nuncius Apostolicus ad Regem  
mittitur.*

CAPUT VI.

COMMENDONVM Tridento Venetias redire domesticæ iterum res coëgere. Sed ne ea quidem diuturna mansio illi fuit. Nam Pontifex certior factus turbatas magnopere in Polonia res, periculûmque esse, ne hæreticorum factio, quæ tum maximè valens, ac vehemens (ut fere sunt acres primi desciscientium motus) ferebatur, per tumultum, ac seditionem statum illius Regni perverteret; tamquam si, ut quæque pars Reipublicæ ægrotare cœpisset, hujus mandanda curationi foret, Commendonum Paravio; quò se ille tum contulerat, atque privatarum rerum curâ excitum in Poloniam protinus jubet proficisci, manerêque apud Regem, & dare operam, cum ut pristinam sacrorum fidem à perditarum sententiarum contagione, quoad fieri posset, prohiberet: tum sacerdotum ordinem primas in Polonorum Senatu, ac Republica parte obtinentem, in quem maximè incurri ab seditiosis illis, atque amentibus novarum opinionum auctoribus sciebat, ab imperu, atque injuria tueretur, Regem in officio retineret, atque ad amplectendam religionis Catholicæ causam excitaret. Commendonus quamquam perexiguum ad

se comparandum spatium Pontifex concedebat, cupiens maturè eum gentis conventui, quem tum maximè indictum cogi Varſaviam acceperat, intervenire; tamen magnâ adhibitâ diligentîâ paucioribus, quàm quos Pontifex præſinierat diebus, cùm reliquis rebus ſplendidè inſtructus, tum egregio comitatu, viæ ſe dedit. Semper quidem ille magnam curam in comitum, atque familiæ delectu habuit, ne quem ſecum duceret, non temporibus, non moribus ſuis congruentem. Sed tum eo majori quàm antea ſtudio, quo in longinquiorem, & perturbatiorem Provinciam iturus erat, inſignes aſcivit viros, nulli in ea re impendio, aut ſumptui parcens. In quibus excellentes litterarum, & doctrinæ laude fuère Paulus Emilius Joanninus exquisitâ, ac multiplici eruditione vir, qui poſtea Montaltenſium Episcopus in Picentibus fuit; & Federicus Pendaſius, ſummus ætatis ejus Philoſophus, cujus non multò poſt ex ipſa Polonia magnâ propoſitâ mercede à Veneto Senatu, vt Patavii publicè Philoſophiam doceret evocati, atque inde Bononiam tranſlati, nomen inter cæteros acuminis, & ingenii famâ claruit. Commendonus igitur Patavio Novembri menſe proſectus, celeritate, quanta per ingruentem hyemem, impeditâſque multis rebus vias adhiberi potuit, iter intendens in Poloniam, atque Varſaviam in tempore venit. Præceſſerat magna de prudentia, ac virtute illius fama, cùm multorum gentis ejus hominum, quos

ipse antea amicitia, & consuetudine devinctos habebat, sermone, & litteris celebrata, tum maxime prædicatione Stanislai Hosii Cardinalis Varmienfis, vnus è Concilii Præsidibus, cui cum Commendono plurimus vsus, & familiaritas intercedebat. Itaque & advenientem Chelmenfis Episcopus, & Plocentium Palatinus primarii homines perornato, ac frequenti comitatu ad tertium ferme lapidem obviam Regis missu egressi cum omni humanitatis, ac benevolentia significatione acceperunt; & apud Regem ipsum singulari in honore, atque dignatione fuit. Vim enim illam ingenii, quæ in eo semper summa enituit, atque vitæ integritatem, & modestiam Rex adeò suspexit; vt quamquam ipse cupiditatibus suis impotenter parere assueffet, tamen alienæ virtutis haud sanè obtrektor, & diligere eum, & certè revereri magnopere visus sit.

---

*De sacrorum disciplina in Polonia depravata.*

## CAPUT VII.

**R**EGNUM Poloniæ Sigismundus Rex Augusti hujus, ad quem Commendonus venerat, pater, diu temperato, iustoque imperio habuerat, filioque moriens firmum, atque stabile reliquerat, vir cum cætera rectus, & rei suæ probe gnarus, ac prudens, tum eximia, & constanti in

Christianam religionem fide. Qui cum junctos sibi amicitia, & affinitate Germanæ Regulos aliquot haberet, iis sacrorum jura turbantibus adeò non favit, ut graviter correptos missis legationibus ab exitialis sententiæ ausu detertere conatus sit, florentem Germaniæ statum, roburque validissimæ gentis convelli, atque infringi confusione illâ religionis identidem monens. Idem paulò post ab eodem furore desciscentes cum omni propè Germania à Carolo V. Federicum, & Lantgravium, armæque moventes, & se ad societatem ejus belli promissis ingentibus sollicitantes, non rejecit solum, sed cladem, quâ mox afflicti corruerunt, utrique prædixit; adeoque cavere, atque alieno periculo sapere didicit, ut nec ipse se in illud bellum interposuerit, nec privatim ex suo Regno quempiam ulli parti militare sit. passus, quod apud Polonos gentem ex legibus suis, non ex Regum libidine viventem, & maximè gaudentem libertate, non mediocris curæ, atque diligentia fuit: tantumque omni tempore studii posuit in eo, ne qua contagio pestiferarum opinionum in suum Regnum manaret, ut ne libera quidem suis commercia cum Germanis reliquerit. Mercatores, ut aditu in Regnum non prohibuit, ita licentiâ invehendi, ac per colloquia, cœtusque disseminandi novam religionem, acerbis edictis, ac pœnis frenavit, planèque coercuit. Quin ne parentibus quidem, quod antea fiebat, mittere in civitates Germa-

niz liberos disciplinæ , ac litterarum causâ per-  
 misit , nisi quas integras , nec illâ pollutas esse  
 lue constaret , quamquam huic curæ ejus mole-  
 stum adversarium experiretur Albertum Brande-  
 burgium societatis Theutonicorum in Prusia Ma-  
 gistrum , qui cûm à religione defecisset , idem  
 virus , quo societatem suam non multò pòst op-  
 pressit , etiam in Polonia spargi cupiebat. Sed  
 Sigismundus hoc studio , curâque , quandiu vi-  
 xit , ad ultimam vitæ senectutem pervenit , si non  
 inviolatum à peregrinis religionibus Regnum  
 præstitit , certè incrementum sumere eam pestem  
 non est passus. Post mortem inde ejus , nec con-  
 silium par , nec animus ad eam curam Augusto  
 filio fuit. Ita spes erecta eorum , quibus per hæc  
 crescendo materia quaeritur. Secutum filii , ma-  
 trisque dissidium , quo Regis , legûmque resolu-  
 ta majestas , latè aditum excubantibus in occa-  
 sionem hæreticis patefecit , continuóque omnis  
 errorum , ac perditarum opinionum cohors irru-  
 pit. Fortè amissâ Isabellâ vxore in amorem Bar-  
 baræ Radgiville Augustus illapsus erat , cui mu-  
 lieri claro in Lithuania genere , ac principi fa-  
 miliâ natæ omnium rerum , quàm famæ major  
 semper cura fuit. Prostratâ pluribus pudicitia , ab  
 iis ipsis formam , corpûsque , & mollem lasciviam  
 laudantibus deductus ad eam primò Rex  
 ferebatur. Cæterùm utcumque potitus , adeò  
 blanditiis , & consuetudine ejus est irretitus , ca-  
 pûsque , ut brevi mulier non contenta vi , at-  
 que



que potentiâ, nomen quoque conjugii, & mox Reginæ appellationem affectarit. Idem Augustus ipse eo impensius cupere, quo plura adversarentur, ut ferè humanum ingenium verita flagrantius appetit. Id enimverò mater, sororêsque Regis, haud aliter quàm dedecus ingens domus, ac dehonestamentum averſari. Mater erat Bona Sfortia, Galeatii, & Isabellæ Aragoniæ filia, illius cujus injuriæ funestam illam, ac calamitosam faciem accenderunt, quâ, Italiâ Gallorum petitâ armis, ac diuturno vastatâ bello, omnis propè Patrum memoria conflagravit. Bonæ ingenio materni inerant spiritus, & minimè mulicbres curæ, & viro assueverat ab senectâ, ac miti naturâ vxori obnoxio, ut non consortem modò Regni, sed sæpe arbitram ageret. Filium ipsum Regem imperiosè habuerat, eo exuentem matris obsequium impatientius tulit. Et Barbaræ amores ipsa exploratiùs norat, ut ferè turpia fœminarum fœminis, quàm viris celerius, certiùsque noscuntur, & filio objectabat. Quæ igitur ne honestam quidem, & probam è privata domo nrum toleratura fuisset, scortum vsque ad æmulationem sui, nuptiâsque, & regium nomen, quod ipsa jam spe satis polluisset, extolli ferociter fremebat. Eo Augusti animus magis accendi, nec mora nuptiis fuit. Sed quia non ut conjugis, ita Reginæ quoque nomen, ornatûmque, & insigne Regium tribui ab illo, aut ne tribueretur obsisti, intercedique à matre poterat, nisi Senatus vo-

luntas accederet, sine cujus ordinis auctoritate nihil in Republica decerni ex legibus Polonorum potest, magnis jacturis conciliare, ac trahere ad se quisque Principum animos, singulorumque affectare sententias. Augustus suum cuique dicere in deligenda vxore iudicium, nec Regem non  
 „ æquâ cum cæteris conditione esse debere. Quæ  
 „ in matrimonii jus, in domum Regiam, in fortu-  
 „ narum, ac totius vitæ societatem recepta jam sit,  
 „ cur ei Regium nomen, & par cum viro honos,  
 „ qui mos in privatis valet, negetur? Bona adver-  
 „ sus hæc turpitudinem nuptæ, incontinentiam fi-  
 „ lii obijcere, & si juvenis infirmitate lapsus nomi-  
 „ nis, ac decoris sui curam abjecisset, publicam  
 „ fraudem, noxamque abesse debere, nec ipsos  
 „ alienæ intemperantiæ participes, ac suffragatores  
 „ fieri, scilicet Reginam appellarent, haberentque,  
 „ quam nemo domi suæ nurum, ob vitæ probra  
 „ passurus esset. Vicit tamen respectus Regis, ma-  
 „ jestasque, & conjux Barbara, & Regina appel-  
 „ lata est. Cæterum dum discordant ipsi, Regia  
 vis hebetatur, & impunitas, & licentia domina-  
 tur. Ita Regnum brevi, ex levissimi cujusque li-  
 bidine, peregrinis sacris, institutisque, & opi-  
 nionibus novis oppletur, dispergentibus latè vi-  
 rus multis novitatis Doctoribus, ut numquam  
 defunt, quibus captæ errore mentes emolumen-  
 to sunt. Nec secretò, atque intra privatos postes  
 Christiani ritus contemnuntur, sed in publico et-  
 iam, ac palam novarum disciplinarum rationes,

ac præcepta traduntur, cætus, concionésque mixtæ hominum, mulierúmque turbæ habentur: novis ritibus res divinæ, precationésque fiunt. Vetus & à majoribus sanctè culta religio eluditur, irrisuíque habetur, incestóque ore, ac maledictis incessitur, ac multis passim locis aboletur: templa invaduntur, bona Ecclesiarum ab alienis dominis occupantur, fortunæ diripiuntur, sacerdotes sedibus suis pelluntur, omnes denique ceremoniæ, omnia pietatis jura confunduntur. Principes quoque viri, & serpenti latius quotidie malo pars magna Senatus, eâ contacti labe habebantur, validiórque factio erat, quam ut leges, aut Regem timeret. Jam non impetu solùm, sed tempore etiam invaluerat morbus, cùm Commendonus in Poloniam venit, atque hæretici Ecclesiasticorum exitio maximè imminentes, ad eorum accidendas opes Senatusconsultum à Rege proximo superiore anno extorserant, quo sacerdotale jus magnopere minui videbatur, auctíque animi de vetustis legibus, quæ adversus violatores sacrorum institutæ apud eos sunt, abrogandis, agitabant. Et illi quidem (ut mos perpetuus omnibus hæreticis) quamquam diversis ipsi sententiis, rationibúsque inter sese pugnent, studia adversus nos conjuncta habebant, ardentésque animis, & conatu summo cæptis incumbabant.



*De diffensione inter se Episcoporum in Polonia , & quorundam consiliis à Com-  
mendono repudiatis.*

## CAPUT VIII.

**A**PUD Catholicos nihil acre , nihil vehemens, nihil quo stare, atque niti firmè consilium posset , cernebatur. Segnes , & cui vni fidere videbantur , causæ indormientes agebant , & malis haud aliunde majus , quàm ex bonorum mœrore incitamentum. Episcopi , quorum semper in Senatu , & in Republica auctoritas fuit , quique conjunctis viribus , animisque facillè non restitissent modò adversariorum conatibus , sed etiam in officio manere eos , & parere legibus coëgissent , tantâ dissoluti , ac dissipati discordiâ , in tot scissi studia , tantisque in occulto odiis , mutuâque invidiâ dissidebant , ut nemo eorum non reliquis omnibus infensus , invisusque esset. Ita nihil ab his in medium consulebatur , adversariorum amicitiiis , gratiæque servientes , suæ quisque privatim rei studebat. Jus , ac Respublica in medio jacebat. Duo erant eorum , & ordinis sui , & Senatus totius loco , & auctoritate facillè principes , Jacobus Ucangius Archiepiscopus Gnesnensis , & Philippus Padnevius Episcopus Cracoviensis , ille honore , hic divitiis , & opinione in-

genii præstabat. Inter hos præcipuè , nec obscuræ simultates cùm essent , dispares animis , consiliisque , par cupiditas miscendi , ac turbandi res sollicitabat. Ucangio inhæserant novæ opiniones , quibus inquietabatur animus suâ sponte varius , inconstans , & novis vsque studens rebus , vt si perturbatâ Republicâ invec̃ta nuper disciplina , religiôque prævaluisset , exclusâ Romani Pontificis auctoritate , summum se Antistitem , ac Principem sacrorum in Polonia fore , ad summâsque opes perventurum , vt suæ quisque cupiditati blanditur , sibi persuaferat : neque ex hæreticis decerant , qui assentando spei illius alimenta subjicerent. Apud Commendonum is priscae religionis studium simulans , deplorabat perditas Catholicorum res , dissidia Episcoporum , cæterorum languentes animos inculcabat , Regemque deditum adversariis omnia illis indulgere querebatur. Hunc inde coërcendum minis , ac denuntiacionibus terrendum esse differebat. Catholicos in-  
fensos ei esse omnes ob crebras in Magistratibus , publicisque muneribus repulsas , & favorem in adversarios ; nec eorum defutura studia , si se ipse Romani Pontificis nomen , auctoritatémque præferens , Ducem præbuiisset , ac Regem ipsum ingenio timidum , atque audenti opportunum , metu subactum , sibi obnoxium fecisset , scilicet his consiliis averti Augustum à Pontifice , tradique hæreticis , atque ita suas procedere rationes , cogitatâque cupiebat. Padnevius quoque idem de

Rege terrendo , quamquam diverso animo sua-  
debat. Neuter publico bono , sed suæ quisque rei  
tendentes , privata consilia habebant , ad ea a-  
ptam sibi facere Rempublicam cupiebant. Hic  
auctoritate , & gratiâ Regis tantus paulò antè  
fuerat , ut omnia arbitrio suo subiecta haberet.  
Eâ non deciderat solùm , sed ut plerumque acrius  
ex magna benevolentia exurgit odium , invisus ,  
suspectusque irâ , atque invidiâ æstuans agebat.  
Et superbus , atque indomitus animus , & domi-  
nari assuetus , eminentibusque inter ceteros , opi-  
bus subnixus quiescere non poterat. Regem sibi  
magno aliquo periculo , metuque implicandum  
callidè rebatur , tum aut necessitatibus compul-  
sum ultro ad se venturum , aut locum sibi ad vl-  
tionem ex eo aliquem futurum sperans. Eum igi-  
tur accusans apud Commendonum magnis crimi-  
nibus ut reum agebat , nihil leniter agendo pro-  
fecturum , opponendas formidines , intentandas  
minas , denunciandum periculum esse. His infir-  
mum , & fractum animum , & ex conscientia om-  
nia timentem in fide , atque Pontificis Maximi  
futurum. Nihil fallebant hæc consilia Commen-  
donum , qui & ipse per se satis utriusque ingenia  
tractando perspexerat , & percuntationibus , qui-  
bus primum semper tribuere tempus consuevit ,  
aperta & explorata omnia habebat. Itaque longè  
aliâ , quàm quâ ipsi voluissent viâ ingressus , Re-  
gem non asperandum minis , quæ nisi prompta  
vis ad cogendum adsit , plerumque vanæ evadunt,

aut in intempestivè feroces recidunt: sed crebris orationibus hinc confirmabat adversus metus quosdam, qui ei à falsis, callidisque hominibus ostentabantur; hinc monebat, ne ipse se, Regnumque in id discrimen ultro conjiceret, quod connivendo, atque indulgendo, vitare posse confideret. Quippe sic quidem contrahi, majoraque in dies incrementa capere id malum, constare. Quid hac temerariâ licentiâ decedendi à fide, quam majores nostri de divinis rebus habuere, fieri aliud, quàm jus, morem, leges publicas sperni, infringi, subverti? Regni fundamenta subruï, ac labefactari? Adimi Regibus vires, ac tradi multitudini, & seditiosissimo, ac audacissimo cuique adjungi? Eo ipso, quòd ille sæpe quereretur esse quosdam, quorum apud nobilitatem auctoritas valeat, ut illi plus privatim, quàm Senatus, ac pene quàm ipse Rex polleant: propterea quòd iis multitudo fidat, eorumque orationi assentiatur, admoneri eum, & ad cogitationem rerum suarum converti debere, nec ultra pati invalescere eorum audaciam, qui excussâ omni legum reverentiâ ex libidine sua omnia agant, cœtus cogant, Concilia habeant, concionibus seditiosis homines à vero Dei cultu ad peregrinas ceremonias; & perniciosos errores avertant; qui denique sibi tantos spiritus, tantam arrogantiam sumplere, ut pæne jam nec ferri, nec corrigi posse videbantur. Ad hoc Dei quoque metum injiciebant, cum numinis sui vindicem, ultorem.

» que , seu neglectæ , seu pollutæ religionis futu-  
» rum , tantòque graviores pœnas ab iis repetitu-  
» rum , qui veluti in custodia locati legum , ac pu-  
» blicorum sacrorum sunt , quanto eos celsiores  
» inter mortales honore , imperiòque præstare , ac  
» præfulgere voluit ; nam in minuenda , violandâ-  
» que divinarum. ceremoniarum disciplina , Deique  
» opinione , aut jussis pervertendis , qui alios , cum  
» possint , ab impio ausu non coërcent , exitiosius  
» peccare , quàm illos ipsos , qui alienâ fraude in-  
» ducti , mentis errore labuntur. Excitabat præter-  
» ea illum parentis sui summi viri ; ac Regis in il-  
» la propulsanda peste diligentia , ac pietate ; in-  
» terdum vicinæ Germaniæ , & tum maximè fla-  
» grantis Galliæ ruinas , cladésque memorans , ut ex  
» alienis malis vtilia sibi exempla caperet , hortaba-  
» tur. Episcoporum verò gratiæ reconciliandæ ma-  
» gno studio , curaque intendit , rei cum spissæ spon-  
» te suâ , nodisque inextricabilibus plenæ , tum eo  
» difficiliori , quòd palam amicitia , & benevolen-  
» tia simulabantur , odium , & obrectatio in occul-  
» to erant. Ipse & singulos monendo , rogando ,  
» obtestandòque castigavit , & omnes in vnum coac-  
» ctos. multis sæpe , & gravibus verbis , est adhor-  
» tatus , ut communem causam communibus con-  
» siliis agerent , neu se , neu dignitatem suam per-  
» tinaci discordiâ proderent , ad eamque everten-  
» dam , gradum , aditumque hæreticis ipsi facerent.  
» Si consentientibus studiis , animisque amplexi  
» Rempublicam fuerint , non magno negotio vul-  
» nera



nera Ecclesiæ in eo Regno à paucis hominibus «  
 imposita sanari, & legibus, quas majores eorum «  
 ad faciendam Ecclesiastici ordinis majestatem, «  
 firmandamque religionis fidem piè, sapienterque «  
 condiderunt, vim suam reddi, & aut falsæ animi «  
 opinione deceptos revocari, aut nimia ambitio- «  
 ne, & cupiditate proVectos cohiberi, & sub le- «  
 gum jura compelli ab iis posse: Sed quo majores «  
 in Republica opes eorum, quo honor, dignitas. «  
 que præstantior esset, eo promptius privatas si- «  
 multates pro publica salute deponere, & patriæ, «  
 & religioni, quæ tam ab dissidio eorum, quàm «  
 ab alieno scelere gravius laboraret, remittere de- «  
 bere. Id ab iis fidem, id munus, atque officium «  
 ipsorum postulare, id Regem, id Senatum velle, «  
 id omnes bonos flagitare. Quem quidem Regem «  
 ne quidquam ab singulis, aut incusari, aut appel- «  
 lari, si vniversi disjuncti, dissipatique sese ab ad- «  
 versariis obterendos, atque subigendos vltro tra- «  
 derent, qui vt intenti, vt vigilantes videantur, «  
 somno, ac socordiâ Catholicorum fieri, & auda- «  
 ciâ, & consensu eos, non viribus terribiles esse. «  
 Hujus generis orationibus sicut planè mederi im-  
 butis pravâ æmulatione, atque invidiâ animis  
 non potuit, ita est affecutus, vt alios adjungeret  
 sibi, alios verecundiâ obstrictos contineret, æ-  
 quioribusque & erectioribus ad omnia vteretur.  
 Per hæc, taliæque cum magnam sibi fidem, at-  
 que existimationem apud Regem, apud omnes  
 fecisset, multa salubria in Republica hortatu, at-

que consilio ejus acta, multa, quæ evertendæ pietati fuissent, rejecta sunt. Cùm tributum Rex decerni sibi extraordinariæ magnæ pecuniæ in sumptus belli, quo tum à Moscis, trans Boristhem carpebatur, vehementer cuperet, hæretici per factiosos, ac populares homines rem impediebant. Id callidè molientes, ut inde concessi tributi mercedem decretum abrogandis, aut infirmandis legibus, quæ contra nova invehentes sacra, aut de veteribus quidquam mutantur sunt, auferrent. Etenim hoc vno telo multis in locis perita, gravissimæque vulnerata religio est. Nam capti, percitique pravis erroribus populis jus, quibus velint ceremoniis res divinas procurandi, ac de Deo, ut cuique visum sentienti, loquendique à Regibus pretio mercati sunt. Et Reges ipsi proditam religionem à cultu, & pietate abductam ad præmium, & quæstum transfulere. Nil ergo mirum, si tempestate nostrâ sæpe evenisse videmus, ut & populi irato, & majestatis suæ violatores vlciscente numine, omnibus discordiarum, ac bellorum cladibus affecti sint, & Reges, quam semel multitudini licentiam peccandi in Deum, & in majorum instituta, empti, ac deliniti pretio laxavere, ad eam ne adversus se quidem ipsos cohibendam potentes inde fuerint: justamque illis ea in pœnam verterit, ut intestinis seditionibus, suorumque factionibus vexati, vno tempore, & imperii vim amiserint, & exhausti sumptibus inopes, atque egentes, usque

obsequi vulgi studiis, & turbulentissimi, & audacissimi cujusque libidini obnoxii agere cogantur. Id tum ne fieret vna obstitit vigilantia Commendoni, atque industria, quâ factum est, ut & Rex pecuniæ collationem, quam voluit, sit consecutus, & animadversâ fraude, ac malitiâ hæreticorum, etiam in posterum intentiores ad cavendum, & Rex ipse, & Catholicorum Principes fuerint.

---

*De Bernardino Ochino, hæreticisque aliis per eum à Polonia pulsis.*

#### CAPUT IX.

**P**ATEBAT eo tempore Polonia non civium modò, sed exterorum quoque licentiæ, quorum erat omnium mira impunitas. Quicumque aut ob noxam, malumque in religione sensum, patriâ pulsus, aut ne sub legibus viveret sponte profugus, in Poloniam se veluti in asylum conferebat. Ibi nemini deerat ex nobilium numero aliquis, qui in fidem receptos tegeret, foveretque, alii insitâ vanitate ingeniis, alii rerum ipsarum novitate illiciebantur. Ex Germania, Gallia, Italia corruptores aderant, ac prohibente nemine, & inanissimo quoque dictis applaudente, sua quisque somnia venditans, cætus æmulantium studia profligatæ doctrinæ habebant, & li-

Q ij

centiâ linguæ grassabantur. Eòdem Bernardinus quidam Ochinus confugerat, & præter cæteros magno concursu, & assensu audiebatur. Is erat ex Etruria Senensis civis, qui cùm primam ætatem inter Franciscanos, quos Minores vocant, egisset, inde deflexisse eos à moribus priscis, longèque à Magistri ratione aberrasse ferens, quæ contemptu humanarum rerum contineretur, secesserat ab iis, nactusque sententiæ suæ sectatores, quos & auctoritas ejus & amor religionis attraxerat, societatem Capuccinorum revocatis Francisci institutis, cum Matthæo quodam Urbinate, antiqui moris, & magnæ simplicitatis, atque innocentiae homine constituerat. Horum est vita omnis (nam propagata inde disciplina est, ac per omnem Italiam latè diffusa, vigetque nunc maximè sanctissimis, & innocentissimis referta viris) dura atque inops; cibus illis, victusque in dies quæsitus simplex sine lenocinio, aut conditione vlla: pellere non irritare famem, corporique alimenta præbere, non etiam oblectamenta volunt: quod crebris insuper jejniis, vigiliisque exercitum, domitumque habent, quo purior mens, solutiórque divinarum rerum contemplationi, atque cultui vacet. Vestitus cætera vitæ congruens horridus, vilisque, vnicâ tunicâ, ac brevi pallio operiuntur, è ciliciis, aut non absimili materiâ confectis, perpetuóque iisdem nullo æstatis, aut hyemis discrimine, sine calceis nudo pede per nives, per saxa, aspretaque incedunt,

crepidati tantùm sacra faciunt. Quietem aut humi, aut perangusto grabato, stramentove recumbentes, capiunt, non aliâ, quàm quâ amiciuntur veste contecti. Domicilia eorum rarò in Urbibus, pleraque omnia in solitudine hominum. Denique omnis est in eo disciplina, vt à corpore, humanisque curis abstractus animus divinis operetur rebus, paupere victu, cultuque, & religione gaudens. Ochinus aliquot annos in illa asperæ, atque egentis vitæ patientia perduravit. Pascebat scilicet, sustentabátque animum hominis mirè levis, & sui amantis, & ad omnem asperitatem perferendam firmabat gloria, & sanctitatis opinio, quæ illum sic viventem est consecuta. Et fuit præterea vir ipse non ineruditus, quamquam majori multò verborum, quàm rerum doctrinâ excultus, sed patrio sermone (nam Latinas litteras vix didicerat) in eo quod sciret adeò comptus, ornatúsque, & copiosus, vt mirum in modum captos specie, ac nitore orationis teneret audientium animos. Nam hominum nostrorum plerique conciones, quæ more antiquitus tradito de divinis rebus in templis habentur, frequentant, celebrántque, non tam quidem, quo mentem præceptis cælesti doctrinâ haustis instruant ad religionem, ad pietatem excitent, quàm quòd ducuntur orantis ingenio, & genere illo speciosæ, & omnibus luminibus, omnibus vndique floribus exornatæ, atque expolitæ orationis delectantur. Cæterùm inde nihilo meliores effecti,

Q iij

planè iidem abeunt, qui venerant. Pari vanitate Concionatores ipsi quidam, quò sibi audientiam faciant, hanc ipsam delectationem studiosè aucupantur, auriúmque voluptati omni arte morigerantes inserviunt omni verborum lenocinio, atque omnibus orationis illecebris influere in animos student. Quibus mihi non fructus, vtilitáque proposita populorum, esse videtur, quos docendos, instituendósque susceperunt, cujus rei causâ is est in Rempublicam vsus concionandi introductus, sed placere ipsi, laudarique, quàm proficere alios malle. Quò enim de rebus maximis, atque gravissimis, de Deo, de pietate, de religione, de vitæ disciplina, sacratis in locis ante aras, ante simulacra Dei, & veluti ipsius instinctu numinis dicentibus, inanis ille, atque indecorus apparatus, sonitúsque verborum? Quò illa tanto artificio, & varietate distincta, tanto delibuta fuco, tot flosculis conspersa, tot compta concinnis, tot denique coloribus illita, atque picta oratio? Et hi quidem quàm vim, quam auctoritatem habeant aut ad impellendos, aut ad continendos homines, vt vitiis absistant, virtutem amplectantur? qui in re tam severa tam leves, ac dissoluti sint, & permulcendis modo animis, ac suavitate perfundendis, non frangendis, evincendisque intendant? In quo tanta est sæpe quorundam intemperantia, tantum blandiendi, ac placendi studium, vt nullâ quid rem, quid locum, quid ipsos deceat, ratione habitâ, ne te-

nerioribus quidem, & amatorijs verbis interdum abstineant. Quis non tam animi à terrenis abducti curis ad cælestium cogitationem eriguntur, quàm titillantur sensus, & ad jucunditatem, voluptatémque molliuntur. Res sacræ, divinæque puram, castam, simplicem orationem, quales mores desiderant: verba delecta, si vis, non tamen nimia cum cura exquisita, & vndique excerpta, vt dignitatis maior, quàm gratiæ, ac leporis ratio habita videatur. Sententiæ, quæ gravitate, ac severitate laudentur, non tantum specie, ac venustate placeant: quæ admirationis, ac terroris audientibus, quàm delectationis plus incuriant, perrumpant pectora, vnde noxios affectus expellant, non molliter influentes foveant; denique doceant, & ad probitatem, pietatémque instituant, non ad levitatem, vanitatémque erudiant. In Ochino (vt ad institutum revertamur) præter eloquentiæ famam, & hanc ipsam orationis suavitatem, & cultum, ætas, genus vitæ, horridus ille ornatus Capuccinorum, promissa, & fluens infra pectus barba, argentea canities, pallor, ac macies oris, & magno studio, arteque simulata imbecillitas corporis, & sanctitatis opinio, propè excefferant humanæ admirationis modum. Ubi cumque concionaturus esset videre erat excitas sedibus suis civitates, nulla templa multitudinem capiebant, mulierum turba pæne maior, quàm virorum. Si quò transisset, vndique ex omnibus locis occursum ad eum au-

diendum fiebant. Nec verò à plebe solùm ille, humilibúsq; , sed à principibus quoque viris, regulisq; colebatur. Advenientem hospitio, obviam itionibus accipiebant, pari studio, honoréque abeuntem prosequiebantur: & ipse quantum poterat omni arte augere famam, ac venerationem sui. Iter non aliter, quàm ex disciplina nudis pedibus facere, tam tenui valetudine ætatéque jumento insidentem nemo vidit. Quæ vitare nequivisset Principum hospitia ingressus, magnificentiâ ædium, vestium, ornamentorum, nihil de instituto moveri. Apparatis epulis adhibitus cibo non plus vno, eoque communi, ac simplici vescébatur; pari vini abstinentiâ. Datis lectis mollibus, ac pulchrè stratis, oratus, uti fessa membra quiete commodiori cubili sumptâ reficeret, humi extento pallio cubabat. Hinc incredibile est, quantum ejus nomen totâ Italiâ, quantus illi honor ab omnibus haberetur. Cæterum ut falluntur qui certam gloriam, quæ tantum in vera virtute firmè consistit, fictâ virtutis imagine se consequi posse, & diurnam pietatis simulationem sustinere mente aliter affecti sperant, inflatus, elatusque tantis hominum in se studiis, tantâ sui prædicatione, animus sua sponte levis, & inconstans adeò sibi placere, sese amare, ac tanti suam æstimare fortunam cœpit, ut spem ad immodica, vastâque homo Capuccinus adjiceret: Sed cùm apud Pontificem Maximum non quanti ipse crediderat se, suâque in Rempublicam,



blicam, ac religionem merita fieri, nec spei, & cupiditati suæ Pontificis judicio responderi intellexit; mente malâ irâque stimulante, ne continere quidem se potuit, quin ex ipsis concionibus quædam interdum sub ambagibus jaceret, queis Pontificis ipsius majestas, auctoritasque perstringi, minuique videbatur. Hæc ubi excipi, animadvertique sunt cœpta, & in vulgus quoque suspicio manavit, sub tanta sanctitatis ostentatione ambitiosum, & contumacem latere animum; paulatim digredi ab illo homines, in diésque senescere ejus fama, gratia quoque, quâ latissimè pollebat, languere, minuique quàm antea frequentari. Postremò cum ad ipsum quoque Pontificem ea delata essent; Romam ire, & purgare sese, & coràm diluere, quæ objicerentur, jubetur; nec tamen vincula, aut custodes adhibiti, sive parum creditum criminibus, sive tantum dignitati ejus tributum. Veronæ apud Joannem Marthæum Gibertum civitatis ejus Episcopum fortè erat, cum Pontificis maximi voluntas perlata ad eum est, quem commotum, dubitantemque cum sensisset Gibertus, vir cum egregiè pius, & Episcopalis officii laude excellens, tum Ochini ipsius ob innocentie opinionem in primis studiosus, magnopere hortatus est eum, ut porro Romam iret, & veritate fretus animi, ac sententiae suæ rationem apud quos Pontifex jussisset, exponeret, eaque, de quibus insimularetur, constanter refelleret. Ille deterrente hinc

R

metu ex pravæ mentis conscientia, inde hominum existimationem verens, si defugere judicium videretur, Veronâ profectus consilii atque animi anceps, tamen Bononiam usque processit. Ibi tum erat Legatus Gaspar Contarenus Cardinalis, à quo benignè quidem pro pristina amicitia hospitio est acceptus, sed facultatem cum Legato de rebus suis colloquendi, quam cupiebat, non habuit, quòd æger Contarenus tum maximè decumberet eo morbo, qui supremus illi fuit. Itaque manere, atque opperiri tantisper, dum Cardinali melius esset, jussum; ut est suspicax eorum ingenium, qui gravis alicujus delicti conscii sunt sibi, qui omnia circumspiciunt, omnia timent, & quam meriti sunt pœnam semper ante oculos versantem habent, ingens hominem occupavit suspicio, ne per simulationem valerudinis, ipse à Legato detineretur, quo inde appositâ custodiâ etiam invitus ad dicendam causam Romam perduceretur. Hoc metu percitus, cum rogando, instandoque introductus tandem ad Legatum esset, & cum æstuantem febri tantùm salutasset, eâdem nocte fugæ consilium cepit: sumpto communi sago, abjectoque cucullato indumento primus disciplinæ ejus desertor cujus auctor extiterat, ad hæreticos transfugit; atque hic finis illi mentiendæ sanctitatis, & ferendæ alienæ personæ fuit. Cum enim ad eos homines, atque in illa castra venisset, ubi in summa rerum omnium impunitate pro ingenio cujusque, ac libidine vi-

vebatur, ita se statim in eorum formavit mores, ut ab illa continentia, ac modestia professione, votoque, quo constrictus erat, sacerdos, & Capuccinus, & sexagenarius sibi ante omnia virginem juvenulam per matrimonii nomen junxerat, omnisque exuta jejunandi, vigilandi, precandi, corporis domandi consuetudine, memoriaque, cum adolescentula vxore liberis operam daret, atque vitam penitus eadem cum cæteris licentiâ institueret, ut non immerito prioris vitæ austeritatem, ac religionem occulta ambitioni, novam intemperantiam moribus suis adscriberent homines, sed ut ferè perfugis vsuvenit, initio benignè, mox per contemptum habitus, spreusque, apud quos in summo se honore futurum speraverat, ad tuendam nominis sui auctoritatem, quod in primis popolare, ac plausibile rebatur, totam aggredi religionem, nec contentus iis, quæ rum erant falsæ, & ab Ecclesiæ scitis abhorrentes opiniones, novas ipse invenire, conflare, & comprehensas scriptis in vulgus edere, quæ ex Etrusca in Latinam linguam amici vertebant. Et quidem non, ut alii, de perturbata morum disciplina, de Ecclesiæ institutis, de cibis vetitis, de cœlibe vita sacratis hominibus indicta, negatogue conjugii jure, de divina hostia populo aut in altera, aut in vtraque specie impartienda, cæterisque hujusmodi, quæ quamquam gravia, & adversantia veritati, tamen solemnia illis jam, & vsitata, sed audaciùs se in ipsum profundum im-

mergens, ne senescentis Lutheri signa secutus videri posset, ac signifer ipse, atque dux ferretur, in ipsam Dei notionem invasit, & sententiis Ecclesię disceptis, partibus, personisque confusis, & aut revocatis antiqui Arij opinionibus, aut deterioribus additis, ipsius nomen, atque viam Trinitatis nefarie, ac sceleratè impugnare, atque perturbare cœpit, prorsusque ad ultimum impietatis præceptu ruere, & cùm initio apud Helvetios consedisset, pari inde inconstantia sedes, atque fidem in dies mutans, omnem pervagatus Germaniam, Britanniamque atque undique explosus, postremò se in Poloniam contulerat, & Cracoviæ, ut ostendimus conciones, cœrusque habebat. Referre hîc non pigebit verba ipsa orationis ejus, quam primam ad Italicos homines habuit, qui studio videndi, atque audiendi hominem frequentes quot Cracoviæ erant (& plures ibi negociabantur) ad illum adierunt; quæ nobis ipsi retulere, qui interfuerunt. Hos fratres  
 » appellans, Cavete, inquit, putetis ad alium vos  
 » hodierna die visendum, quàm ad verum JESU  
 » CHRISTI. Apostolum accessisse; Quin ego plu-  
 » res, & majores pro nomine, atque gloria Christi,  
 » & pro illustranda cœlestium rerum veritate, la-  
 » bores, atque ærumnas perpeßus sum, quàm aut  
 » fides fiat pari hominem posse, aut ullus Aposto-  
 » lorum unquam tulerit. Neque verò propterea  
 » quòd mihi, ut illis, edere miracula, atque por-  
 » tenta facere datum non est, fidei minus nobis

debetur, quàm illis, nam eadem nos ab eodem “ accepta Deo docemus: ac satis magnum miracu- “ lum, atque prodigium est ea à nobis perferri po- “ tuisse, quæ tulimus. Atque hæc ille de se, ex “ quibus vanitas hominis, & fastus faciliè perspi- ci potest. Verùm ad cætera sacrilegæ doctrinæ por- tenta addiderat novum argumentum dialogorum de Polygamia, (sic enim evulgatum à se librum inscripserat) in quibus colloquentes secum quos- dam facit, qui rationibus, exemplisque ex sacro- rum librorum monumentis, & ex utilitate Rei- publicæ derortis, cuiquam plurimos gigni, ac procreari filios, sobolémque ac multitudinem propagari conducit, non licere solùm, sed etiam præcipi Christianis hominibus asseverant, quas, & quor cuique placitum fuerit ducere, atque ha- bere vxores: sic intrudere nobis Barbarorum ri- tum conabatur, quibus nulla fides, nullus conju- galis amor, nulla charitas liberorum, nulla san- guinis necessitudo, quæ omnia illis multitudine distractis vilia ducuntur; quippe alii decem, alii plures pro cuiusque facultatibus, aut libidine alunt vxores. Adeò Capuccinum hominem præ- teritæ continentiæ prænituit, ut cum ipse refra- ctis legum vinculis, incestis se, atque innuptis contaminaverit nuptiis, ad evertendam inde ma- trimonii sanctitatem, turpis nequitie magister coortus sit, cuius vim, atque nomen adeò san- ctum esse hominibus Christianis Deus voluit, ut virum vxorémque, veluti mentem corpúsque,

R. iij

vnum ex duobus fieri præceperit, penitusque alterum alterius voluntati subjecerit, & fœdere sempiterno, & indissolubili junxerit, sic vt iusti conjugii solvendi, dirimendique jus ne illi quidem ipsi reliquerit, quem potestatis suæ vicarium inter homines constituit. Hunc igitur, aliisque perniciosis opinionibus per Poloniâ grassantes Commendonus cum apud Principes, & maximè apud Regem redarguens, crebris sermonibus incesseret, tenuit, vt Senatusconsultum fieret, vt exteri hæretici omnes à Regno abire cogerentur. Ità Ochimus Poloniâ excessit, ac omnibus jam terris extortis, ac profugus, cum in vili Moraviæ pago à veteri amico hospitio esset acceptus, ibi senio fessus cum vxore, ac duabus filiabus, filioque vno peste interiit.

---

*De nationali Concilio per Commendonum rejecto.*

CAPUT X.

**E**XPURGATA perditis hominibus Poloniâ, & illis seditionum flabellis amoris, facilius fuit gentis quoque ipsius licentiam paulam cohibere, & à templis sacerdotibusque vim, atque injuriam prohibere: sed hæreticorum capita, in quibus erant Principes nobilitatis, & homines summæ potentiae, & magnæ cum apud multitu-

dinem , tum apud Regem gratiæ , & auctori-  
 tatis , quanto intentius rem agi à Commendono  
 intelligebant , tanto ipsi acrius causæ , consiliis-  
 que incumbere . Unum erat , quod summè opta-  
 re , summæque moliri ope videbantur , ut gentis  
 Concilium , quod vocant nationale , cogeretur ,  
 in quo sine vlla auctoritate Pontificis Maximi de  
 vniversa religione inter se , prout ex ipsorum vsu ,  
 atque Republica visum esset , constituerent : &  
 nacti Archiepiscopum cogitatis eorum opportu-  
 num , cuius dignitas pariter in sacerdotum ordi-  
 ne , atque in Senatu emereret , ipsius intimas spes  
 pollicitationibus fovebant , incitabantque , rati  
 maximè per eum effici posse , ut tale Concilium  
 haberetur . Eòdem intentu cupidò Ucangii Ar-  
 chiepiscopi rapiebatur ob eas , quas suprà attigi-  
 mus causas . Id ergo vnum dies atque noctes se-  
 cumolvebat , id clàm cum Frisio quodam inti-  
 mo amicorum coquebat , homine obscuro quidem  
 genere , sed Catholicæ Ecclesiæ , ac priscæ pie-  
 tatis infectione nomen adeptus , adversus quam  
 scripta à se multa volumina foras dederat . Neque  
 hæc quidem consilia Ucangii , & machinamen-  
 ta hæreticorum Commendonum fugiebant : sed  
 quemadmodum intentissimo studio id agebat , ut  
 ne iis quidquam procederet , ita dissimulanda ,  
 quæ ad se de Ucangio deferebantur , statuerat .  
 Quòd in tali tempore , in tantis hæreticorum o-  
 pibus tantam vim hominis divitiis , amplitudine  
 honoris , amicitiiis adversariorum pollentis mini-

mè exagitandam, irritandamque, ne in apertam  
 turbam erumperet, rebatur; eo minus, quod  
 ne Rex quidem talibus cogitationibus abhor-  
 rebat, cui multæ incommodæ opiniones ab  
 hæreticis, atque ipso Ucangio inculcatæ in ani-  
 mo infederant, in quibus evellendis magnum in-  
 » de negotium Commendono fuit. Sed cum sæpe  
 » cum studiosè docuisset, quàm ea res ad publicæ  
 » quietis, jurisque, & imperii sui conservationem  
 » pertineret, cum quidquid hæreticis, & multitu-  
 » dini semper turbidæ, ac plerumque in suam per-  
 » niciem furenti adjiceretur jurium, id totum de-  
 » trahi majestati ejus necesse esset: vix eos tot le-  
 » gum auctoritate, tot scitis, exemplisque majo-  
 » rum oppositis sustineri; quid si juris aliquid pu-  
 » blici illorum audaciæ adderetur, fore? Quid in-  
 » de non timendum turbarum, ac seditionum esse?  
 » In Gallia biennio antè Regem puerum, & sui  
 » non satis gnarum, quàm imbecillitate matris, quàm  
 » infidelibus suorum consiliis inductum hæc fecif-  
 » se, ut Poyssi habito Regni conventu discepta-  
 » tor ipse, materque inter Catholicos, hæreticós-  
 » que consideret. Num aliud eam coitionem,  
 » quàm initium tumultuum fuisse, ac veluti buc-  
 » cinam civilium armorum, atque classicum ceci-  
 » nisse? ita ab illa disceptatione discessum ad vim,  
 » atque ad bellum, cujus finis nullus cerneretur,  
 » fuisse. His Regis animum nihil magis, quàm in-  
 » testinos motus, atque vim formidantem, à tali  
 cogitatione penitus avertit. Itaque cum agitata  
 res



res in Senatu esset instinctu hæreticorum, Rex mentionem ejus præcidit professus de sacrorum jure statuere nihil ad se pertinere. Nam non ab Episcopis modò, sed à multis præterea Senatoribus acriter, & constanter defensâ religionis causa fuerat: quorum Stanislaus Volskius Castellanus Ravensis non privatis vnius populi, aut gentis conventiculis consilari, & scilci divinarum rerum jura, & colendæ Christianæ pietatis rationem dixit, quæ omnium salutem contineret: sed in legitimis, atque œcumenicis Conciliis tradito à majoribus more ex Dei præcepto decerni, atque constitui. Atque ego, inquit, Auguste, « te quidem Regem meum libenter agnosco, & confiteor: Pontificem Maximum esse mihi non dubitanter nego. Ucangium ipsum palam profiteri furorem non audentem, ne inde auctoritate Pontificis Maximi, & rei invidiâ, & consensu bonorum opprimeretur, partim per se in officio continebat, partim per Episcopos, Catholicosque alios conatibus ejus obviâ ibat. Et ille dum suos occultare studet sensus, atque utiles quoque interdum sententias in Senatu dicit, & venditans se Commendono cum hæreticis altercatur, ne illi quidem ipsi satis fidere ingenio ejus cœperant, quam suspicionem Commendonus studiosè alebat; atque ita hominum pro præsentis vsu habebat. Sed ille in hanc cogitationem incubuerat: & cum Tridentinorum decreto Patrum iussu Archiepiscopi omnes essent, suæ quis-

que provinciæ conventus agere ad res Ecclesiasticas ex scitis eorum ordinandas, Ucanġius aptam cogitatis suis occasionem arripuit, & studium parendi Patrum auctoritati præ se ferens, consilium convocandi Synodum cum Commendono habuit, & reliqui Episcopi, & ferè optimus quisque Synodum expetebant. Idem Commendonus maximè omnium probasset, nisi suspectum Ucanġii ingenium habuisset: verùm ne saluari rei, & in eam consentienti bonorum studio vnus aduersari, qui pro officii sui munere favere maximè debebat, videretur, Petricoviam, sic enim convenerat, indici patitur Synodum. Interea observat Ucanġium, ejusque consilia quàm potest diligentissimè, explorat, à quo vt occultè invitatos hæreticos, capitæque eorum se comparare, vt Concilio interessent, comperit, per Nicolaum Volscium Episcopum Chiovientem, vnum eorum, quos maximè deditos sibi habebat, Regem, quæ clàm agitarentur, certiore fecit, caverisque initia civilium discordiarum monuit. Itaque ex auctoritate Regis per litteras ab Ucanġio pariter, & à Commendono petentis, vt ea Synodi coactio in pacatius tempus differretur: rejecta res est, & Ucanġii machinationibus sine motu vllò occursum, & magni negotii discrimen Commendoni solertiâ vitatum.



*De Concilii Tridentini decretis à Rege ,  
Senatûque acceptis.*

CAPUT XI.

**I**NTER hæc publicum Christianæ Reipublicæ Concilium, quod Tridenti cum magnâ Episcoporum frequentiâ, tum Cæsaris, reliquorumque Regum legationibus celebrabatur, tertio pòst anno, quàm revocatum à Pio IV. vigesimo, quàm à Paulo III. fuérat cœptum, ad finem pervenerat, explicatâ, atque constitutâ totâ ratione, atque disciplinâ sacrorum. Et Pontifex Maximus Concilii acta, decretâque cum auctoritate suâ comprobasset, ratâque omnia habuisset, & referri in volumen, edique, atque pareri legibus iis imperavit. Hunc librum ad Commendonium in Poloniam misit, ac dare operam iussit, ut publicè acciperetur, ex ejusque præscripto res Ecclesiastica administraretur. Ea res magnam Commendono curam incussit, magnæque illi difficultates proponebantur, quâ ab hæreticorum factione prævalida, & Regi ipsi formidolosa, quâ ab Ucangio causas publici dissidii, atque alienationis quærente. Agere cum Rege, & ei solùm librum tradere, ut tutius, ita neque ex dignitate rei esse, neque satis firmè receptum à Regno videri poterat, quod vnus non de suorum sen-

tentia Rex accepisset. Reddere porro in Senatu, ne res in disceptationem veniret, atque etiam ne contententibus hæreticis dubio aliquo, atque incommodo responso vulneraretur, timebat. Helſpergæ in Prussia erat, cùm id Pontificis mandatum accepit, profectus eò ad visendum Stanislauum Hosium Cardinalem Varmienſem, tum maximè Tridento reuerſum: is enim ob excellentes innocentie laudes, atque doctrinæ in amplissimum Collegium lectus Concilio ipsi Pontificis Maximi nomine cum quatuor ex eodem ordine Collegis præſederat, quo dimisso Varmiam, ubi Episcopus erat, ad muneris sui functionem redierat. Ei Commendonus erat omnibus officiis, omnibus amicitis, atque benevolentie necessitudinibus conjunctissimus, ut facile hominum voluntates ex morum, studiorumque similitudine conglutinantur. Cùm igitur aut conandum id sibi, ut à Rege, Senatuque acciperetur, aut aliter non reddendum cum librum statuisset, particeps consilii sui vno Varmienſe habito profectus ab eo magnis itineribus ad Regem contendit: qui longè inde in Lithuania finibus Parzovia conventum Regni habebat. Eò Commendonus cùm venisset, priusquam aliud inciperet, aut rem cum ullo communicaret (nolebat enim spatium Ucangio, hæreticisque adversandi, seque contrà instruendi, esse) Regem convenit, atque cum eo de tota re diligentissimè egit, quo sibi ex sententia præparato, cùm placuisset Regi

eâdem die verba Legatî audiri, Commendono in cubiculo suo relicto, seque ibi opperiri jussu, Senatum ipsum ipse ingreditur, nec diu moratus ad accersendum eum duos Senatores misit, à quibus in Senatum, qui frequentissimè jam convenerat, est introductus, auditusque magno silentio. Ille à causis convocandi, habendique Concilii exorsus, celebritatem, progressionem, exitum denique ejus exposuit. Nihil ibi actum, nisi rite ex veterum consuetudine, & tradito à conditoribus ipsis Christianæ disciplinæ more: nihil prætermissum, quod ad explicandam divinarum rerum rationem, atque omnia sacrorum jura constituenda res poscere visa sit, quod libentius fecisse Pontificem Maximum, ut Patrum consulta rata approbatione suâ faceret, & auctoritate additâ promulgari, edique, atque iis stari, ac pareri ab omnibus juberet. Horum igitur decretorum volumen ab se Regi reddendum misisse, ut qui eo in Concilio Oratorem suum testem, auditoremque omnium consiliorum habuisset, ejus quoque scita Poloniæ populis ediceret: esse verò eum cælestibus præceptis, legibusque refer- tum librum, & cum univ ersæ Christianæ Reipublicæ vtilem, tum ægris, & ab hac novarum opinionum pravitate laborantibus provinciis salutarem, ut quibus ad eum fortè diem fluctuantibus mens in ambiguo fuisset, eorum jam in explicatâ, constitutâque sententiâ animi conquiescerent. Cum enim ab trecentis ferme Episcopis,

» & quicquid hominum doctorum torâ Europâ fuit  
 » singulis accuratissimè perpensis , examinatisque  
 » ea condita , atque sânsita decreta essent , quem  
 » tandem tantæ arrogantiz , & contumaciæ fore ,  
 » qui non sedulò iis obtemperet ? & legitimo , at-  
 » que œcumenico Concilio , quod cælesti numine  
 » regi dubitare nemo possit , qui Christi nomine  
 » contineri velit , ipso auctore Deo , atque ex ipsius  
 » doctrina Christi hausta vitæ , & pietatis præce-  
 » pta tradenti suam gravatè sententiam subjiciat ?  
 » Atque hîc quanta in Ecclesia fuerit semper , &  
 » quàm necessaria sacrorum Conciliorum auctori-  
 » tas ad tenendam , tuendâque pietatis , & fidei  
 » regulam , ne imbecillitate humanæ intelligentiæ  
 » à vero , atque recto vllam in partem inflecti , aut  
 » detorqueri vnquam posset , disseruit : refutavit-  
 » que amentes eorum errores , qui ab Ecclesia de-  
 » sciverunt , & sese veluti à salutis navi in mare  
 » dejicientes , nullo inde animi portu incertis affli-  
 » duè fluctibus agitantur. Quid enim tam absur-  
 » dum , & ab omni ratione abhorrens , quàm ex  
 » suo quemque sensu fidem sibi , ac religionem fin-  
 » gere ? Judicem vnumquemque , atque arbitrum  
 » cælestium rerum , & opinionis , & cultus , & ce-  
 » remoniarum , quæis adorari , quæis placare divi-  
 » num numen debeat , fieri : & quæ ab ipso Deo  
 » tradita sunt veræ pietatis præcepta , quæque di-  
 » vini homines servanda nobis litteris mandavêre ,  
 » ex vniuscujusque libidine statui , distrahi , detor-  
 » queri ? Id verò incommodum ne ipsos quidem

desertores Catholicæ religionis non intellexisse, “  
 quamquam id quidem illi re magis fateri cogun- “  
 tur, quàm verbis concedere velint: quippe eos “  
 justum, ac legitimum Apostolicæ Sedis Magistra- “  
 rum Christo Deo auctore institutum, pro cujus “  
 fide rogavit ipse, ne vnquam deficeret, & quem “  
 conuersum confirmare aliquando fratres suos ius- “  
 sit, respuentes, post concitas passim multitudi- “  
 nes, post omnes sollicitatos ad defectionem po- “  
 pulos, omniâque tumultibus, seditionibus, ar- “  
 mis denique, ac bello confusa, ac perturbata, “  
 novos sibi Magistratus, novos Pontificatus, aut “  
 Genevæ, aut Virtembergæ, aut aliis nescio qui- “  
 bus in angulis condere necesse habuisse; & quam “  
 in Ecclesia Catholica non ferunt potestatem, “  
 eam in cœtibus, & conciliabulis suis nullo jure, “  
 aut more coactis quærere, & Calvinos, & Lu- “  
 theros, & huiusmodi hominum quisquilias sacro- “  
 rum Principes, & religionum interpretes pati. “  
 At Tridentum ad Concilium veniendi factam “  
 omnibus potestatem, nec vniversos modò, sed “  
 singulos quoque benignè invitatos; datam pu- “  
 blicè fidem, seu disceptare quis, seu petere, seu “  
 monere, siue etiam expostulare aliquid voluissent, “  
 nemini noxæ, aut fraudi futurum. Adversus id “  
 quàm absurdè, quàm intoleranter multa hæreti- “  
 cos? vt cætera fileantur, quàm illud indignum, “  
 quòd non Pontificis Maximi, non Patrum, non “  
 mortalium cuiusquam iudicium, aut disceptatio- “  
 nem admittunt? Ipsam quoque veterem sanctissi- “

» morum virorum testatam litterarum monumentis  
 » de Christianæ religionis fide consensionem reji-  
 » ciunt, & qui id agere, id spectare videantur, vt ex-  
 » leges, & cupiditatibus suis parentes vivant, impo-  
 » tentiæ suæ, atque expetite rerum omnium licentiæ  
 » divinarum litterarum nomen, & Dei verbum præ-  
 » tendunt: hoc se tegunt, in hoc delitescunt, hoc  
 » mutuo disceptatore differi de sacrorum jure de-  
 » bere contendunt: hominum iudicium fluxum,  
 » infirmum, quod labi, errare, decipi potest, sci-  
 » licet aspernantur, tamquam si aut homines ipsi  
 » non essent, aut errore capi, fallique mortalium  
 » vni non possent, & id modò pro vero, sanctoque  
 » habendum omnibus esset, quod opinati illi fue-  
 » rint; ea sacrorum librorum interpretatio, senten-  
 » tiæque accipienda, quam ipsi probarint, aptam-  
 » que rationibus suis duxerint. Religionis, & fidei  
 » jura ex sacris hauriri, atque constitui litteris nega-  
 » re neminem posse, sed ne illud quidem dubium  
 » esse sacrarum litterarum dicta aliter ab aliis intel-  
 » ligi, extollique. Quot enim ea de re omnibus  
 » temporibus Ecclesiæ cum hæreticis controversiæ:  
 » quot nunc & nobis cum illis, & illis inter se de  
 » celestium dictorum vi, atque intelligentia con-  
 » tentiones? Cum verò obscura multa, & quæstio-  
 » nem; & dubitationem habentia sint in divinis  
 » litteris, quæ veteres illi sanctissimi, atque doctis-  
 » simi viri Augustini, Hieronymi, Bernardi, Ba-  
 » sili, Chrysostomi, Gregorij vt intelligerent, a-  
 » liisque explicarent, tantum studij, laborisque ex-  
 » hauerunt,



hauserunt, ea nos perspicua, illustra, intellectu  
 facilia esse dicemus? Verius, dilucidius, ac mi-  
 nori negotio, quàm illi, nos perspicere, interpre-  
 tarique poterimus? qui neque vitæ, neque inge-  
 nii laudibus conferendi sumus cum illis clarissi-  
 mis sapientiæ, atque innocentie luminibus: &  
 quam Ecclesiæ tribuere auctoritatem gravamur,  
 eam aut nobis ipsis nostræque auctoritati arroga-  
 bimus, aut ad Calvinum, ad Lutherum turbu-  
 lentos, ac pestiferos homines deferemus: qui, ut  
 perpetuus hæreticis mos, verba Dei interverten-  
 tes, ac per summam arrogantiam ad sensus, cu-  
 piditatēque suas accommodantes, omnem dissol-  
 vunt Christianæ pietatis disciplinam: & cum om-  
 nis semper Ecclesiæ Catholicæ cum omnibus hæ-  
 reticis lis, & controversia de sacrorum librorum  
 sententia fuerit, sitque maximè cum iis, qui ne-  
 fariâ impudentiâ Dei verba semper in ore ha-  
 bent, ab iis discedi non oportere vociferantur,  
 quasi ea, aut repudientur à nobis, aut vlla lex,  
 vllum in Ecclesia colendæ religionis institutum  
 sit, quod non in divinis litteris habeat funda-  
 mentum: tamen illi cum vrgentur, vsque recur-  
 runt eò, in eamque se arcem recipiunt, ut dicta  
 Dei, sicut ipsi aut intellexerunt, aut malitiosè in-  
 terpretati fuerint, objiciant: denique nullam,  
 nisi quam ipsi invenerint, aut probaverint sen-  
 tentiam recipiant. Solos-ne igitur Calvinos, &  
 Lutheros, aut alios ab his pestibus ortos verita-  
 tem invenisse? Solos divinæ mentis internuncios,

„ atque interpretes nobis divinarum legum è cælo  
„ demissos esse? nisi hæc edita in lucem monstra,  
„ atque portenta forent, genus humanum mersum  
„ æternis errorum tenebris futurum fuisse? quam  
„ malum amentiam, quem huic sæculo furorem  
„ objectum, vt salutem perditorum hominum som-  
„ niis addictam habere, & de re omnium maxima  
„ ex paucorum aut inscitia, aut scelere statuere non  
„ pudeat? Ergo Catholicæ Ecclesiæ contemnetur  
„ auctoritas, cum qua Deus ipse futurum se vsque  
„ ad consummationem sæculi, nec portas inferi  
„ prævalituras adversus eam est pollicitus? Usurpa-  
„ tores isti verbi Dei, & nominis ejus dignitate ad  
„ fallendos imperitorum animos abutentes audien-  
„ tur? Qui & ipsi arripiunt, & aliis faciunt potesta-  
„ tem sacrorum librorum dicta flectendi, torquen-  
„ dique, quò cujusque animi aut error, aut libido  
„ tulerit? Hi non eo, quod plures de Deo, deque  
„ Dei verbis, ac ne, quod omnes quidem censue-  
„ rint, consenserintque, teneri se velint, verbum  
„ Dei ipsi opponant, assidueque jactent, quod in-  
„ de in quam placitum fuerit sententiam detor-  
„ queant, eoque stari oportere, vnúmque habere  
„ disceptatorem pugnent; justos ejus rei judices re-  
„ fugiant, ac detrectent, atque insuper iniquitatis  
„ insimulent? Quod perinde esse, ac si non Regem,  
„ non Senatum, non Judices audiendos, sed jussa  
„ legum spectanda, atque iis parendum esse con-  
„ tendatur, quæ inde quisque ad voluntatem fin-  
„ gat, & quocumque cupido tulerit, detorqueat;

quid verò id esse aliud, quàm omnes leges, om-  
 ne discrimen, omnia jura confundere, omnem  
 tollere hominum societatem? Nec finem ullum  
 his malis, dissidiisque imponi velle? id adeò no-  
 vorum Magistrorum scelere, atque fraude fieri,  
 qui quò vulgi studia retineant, ab omni pacis, &  
 concordiae mentione, vt à peste abhorrent: quip-  
 pe quibus in eodem versari, mergique errore  
 multitudinem expedit; & reconciliari populo-  
 rum cum Catholica Ecclesia gratiâ, pace, & tran-  
 quillitate constitutâ; sedari; atque compositâ  
 Republicâ, nullos se fore intelligant. Ergo has  
 lites, & controversias serunt, aluntque, atque cò  
 maledicendi, atque evertendi omnia libidine  
 provehuntur, vt nullum inter homines relictum  
 Ecclesiae suae Caput, ac Rectorem, nullum cer-  
 tum Magistratum, ac Judicem, ad quem dubiis,  
 difficilibusque de rebus referatur, datum esse con-  
 tendant, pugnaciterque defendant: & quod vitii  
 ne humanarum quidem legum latores, aut ullius  
 quantumvis barbarae Reipublicae conditores, si  
 habeant, ferendi sint, id caelesti Numini, divi-  
 naeque rationi obijcere execrandi homines non  
 verentur: Ecclesiamque morte, ac sanguine Jesu  
 CHRISTI Dei ad salutis spem revocatam, nec  
 hominum consiliis, sed ejusdem Dei sapientiâ  
 constitutam, veluti navem sine gubernatore, cœ-  
 tum sine rectore, corpus denique sine mente re-  
 lictum aiunt: quod haud satis sciri, vtrum contu-  
 meliosius dicatur in Deum, an hominibus exitio-

fius futurum fuerit. Commemoravit inde clades multorum Regnorum , Provinciarúmque Christiani nominis , quas obiens ipse proximis annis oculis aspexisset suis , & quot intestinas seditiones , quot motus armorum , quot bella , quot cædes , direptiones , vastationes , quot sacrilegia , quot sacerdotum à templis , sedibúsque suis expulsionones , quot denique conversiones , atque adeò everfiones Regnorum , ac Rerumpublicarum hæ pravitates opinionum peperissent , multis verbis luculenter , atque accuratè disseruit : ipsius quoque Poloniæ vulnera aperuit , ab hac eadem peste imposita , pristinam ejus gentis tranquillitatem , religionem , consensionem , atque ex eo vim , & robur , florentémque eorum omnium statum cum præsentibus incommodis , ac perturbatione comparavit : Hortatúsque inde est ad retinendam patriæ dignitatem , geminámque gloriam iis à majoribus relictam Catholicæ pietatis , & bellicæ virtutis incumberent ; quæ ad id vnica esse ratio , viâque videatur , œcumenici Concilii scita , decretâque susciperent ; ex iis remedia sanandis eorum animis , atque tot Reipublicæ incommodis haurirent : atque hæc tam varia , tam multiplicia sacra , tot , ac tam dissimiles , ac pugnantes opiniones , quas paucorum improbitas invexit , plurimùm aut error , aut levitas , aut licentia aluit , propagavit , & vt malorum omnium segetem , vt morum pestem , & omnis bene constitutæ Reipublicæ tollerent. Postremò contesta-

tus Deum est, se, quæ salutis eorum vitia essent, & privatim sapè, & tum publicè monuisse Pontificis Maximi verbis, eadem supremo illo vniuersitatis casu, atque vltimi iudicii die, cum omnes homines ad Tribunal Dei aperti, nudique, ac nullis recti involucris constitierint, obiecturum iis, atque testaturum, atque hæc dicens reddidit Regi librum. Quæ quidem omnia tantâ vi, tantâ gravitate, atque contentione peroravit, vt non commoverit modò Senatum, & maximè seniores, qui & pristinam Regni valetudinem, & ejus initia morbi recordabantur, sed ipsos quoque hæreticos obstupefecerit. Ego quidem, qui præsens pone ipsum aderam, librum manu ferens, affirmare possum, plerosque lacrymantes me animadvertisse. Cum finem dicendi Commendonus fecisset, vellétque Senatu abire, manere eum Rex iussit. Haud enim, inquit subridens, minùs liberè apud linguæ nostræ ignarum, quàm si abesses, sententiæ à nobis dicentur; ac statim exquiri cœptæ sententiæ. Ucangius Archiepiscopus Gnesnensis, qui primus rogatur, ab ingenio suo non discedens, cum magno honore verborum, & Pontificis Maximi studium, & Patrum Tridentinorum sapientiam extulisset, accipiendum quidem in præsentia librum, sed Commendono respondendum censuit, Regem posteaquam illa decreta cum suis legerit, quid sententiæ habeat indicaturum: Cum Episcoporum, & Catholicorum omnium fremitu aspernantium orationem ejus

est auditus, quâ sub arbitrium Regis, Senatûsque revocari scita Concilii videbantur. Tum Rex non expectatis aliorum sententiis, quas ex murmure perpexerat, satis scire se dixit eam à Commendono orationem ex tempore habitam, cùm accersitu suo eâ die in Senatum venisset, neque ita futurum divinare potuisset, ut quæ tantâ vi, atque ordine pronunciaffet, ea divini numinis instinctu magis, quàm præmeditatione, aut facultate suâ dixisse, ac monuisse eum existimari posset. Itaque sibi placere, ut Concilii œcumenici jussa accipiantur, iisque, ut convenit, & decet, obtemperetur. Atque in hanc sententiam per Vicecancellarium, ut mos Regi, responsum Commendono est redditum, deque eo Rex, Senatûsque multis inde, & gravibus verbis est ab ipso collaudarus.

---

*De ejus studio peragrandi Poloniam.*

## CAPUT XII.

**I**NDE ab dimisso Varſaviensi conventu Commendonus consilium ceperat Poloniam omnem perlustrandi, præter insitum ingenio ejus videndi, ac peragrandi studium haud rebus ipsis inutile ratus, singulas obite Provincias, cum Ecclesiarum Præsilibus colloqui, & singularum noscere incommoda, quo iis, quantum posset, mederetur, & ultimis quoque gentibus, queis nun-

quam antea visus Apostolicæ Sedis Nuncius esset, specimen sui ostendere. Vistulâ nobili Sarmatiæ flumine Dantiscum ad Balticum mare descendit, & ex itinere ad Plotiam, & Uladislaviam, & Culmam Episcopales omnes vrbes ad ripam fluminis sitas appulit. Dantiscum frequens est, ac celebre oppidum ad Vistulæ ostium, ac nobile Septentrionalis plagæ emporium portu maximè inclutum, quem Vistula lato se ore in mare effundens efficit, vbi sæpe sexcentæ naves majoris formæ ex Livonia, Suecia, Dania, Germania, Belgia, Britannia, Gallia, atque Hispania varias ferentes, petentésque merces videri dicuntur. Præter hunc duo sunt in Prussia portus ad Albingam, & Chinispergam, sed nullus celebritate cum Dantiscano conferendus, quamquam Albingensis magnas habere opportunitates dicitur. Iis ex Regnis vinum, oleum, faccarum, atque aromata, & lanei panni, & serici advehuntur, exportantur frumenta, vinum, oleum, mella, cera. Hanc urbem loci opportunitate ducti Teuthonici fodales condidere paulò postquàm in ea loca ad res contra Prussos gerendas à Pontifice Maximo missi venerunt, quæ cùm postea injuriis coacta se in Polonorum potestatem tradidisset, ab iis mutata fidei præmium libertatem cum legibus suis vendi accepit, quam miscendo se inde alienis discordiis sæpe auxit, interdum etiam omnem amisit, sed pecuniâ, atque auro omnia damna farcivit; quo quàm armis validior civitas, rectiorque

semper fuit, frumenta enim, aliâque quæ Poloni ad eorum urbem deportant externis mercatoribus, aut omnino alteri, quàm Dantiscano civi vendere per leges eorum non licet, quo fit, ut iis parvo veniant, quæ inde ipsi quamplurimo vendunt. Hinc magnæ illis, & privatim, & in commune divitiæ, quibus adhuc suam retinent, ac tuentur libertatem, atque urbem publicis, & privatis ædificiis egregiè nobilem incolunt. Est Prussia ferme omnis, quàm Polonia ædificata elegantius: nam raræ apud Polonos è lapidibus domus, è ligno, suppetentibus faciliè materiam vastis, & frequentibus sylvis, extruunt, nec id genti studium laxè, aut ornatè habitandi. Prussia Germanis ferè incolitur, unde cuncta illic Germanico more, quamquam pastores, cultoresque agrorum nec Germani sunt, nec Germanicè sciunt: reliquæ antiquorum Prussorum esse putantur, nec hos Lutherana hæresis omnes, ut urbanos, traxit cum linguæ commercio disciteros, tum quâ semel imbuti erant, religionem constantius retinentes. Ne autem omnis à prisce pietatis cultu, in novas, diversâsque sectas Prussia abierit, maxime virtus obstitit, ac vigilantia vnius Hosii Cardinalis. Is & suam ditionem (nam pluribus oppidis Varmienfis Episcopus imperitat) à contagione ejus labis prohibuit, & inductum in Prussiam Jesuitarum Collegium Brunspergæ, veluti in statione adversus hæreticos collocavit, & multos sanctitas viri, innocentiaque continuit, ut quam-



quamquam latè in omnes fufum id malum fit ,  
 tamen inter ipfam nobilitatem nonnullæ in Ec-  
 clefiæ fide familiæ permaneant. Pruffi vt dicti  
 à veteribus fint haud fatis ne inter ipfos quidem  
 conftat : partim Germanis adfcripti , partim Sar-  
 matis videntur , & hodie utrâque mifti funt gen-  
 te : fed tum nulla cum his populis commercia ,  
 ideo ne cogniti quidem fatis ; fub Nerone profe-  
 ctum Pannoniâ Equitem Romanum ad emenda  
 fuccina in ea loca penetraffe vt miraculum refe-  
 runt. Prufforum nomen à Boruffis accepere , qui  
 è Scythia , vltimifque Eutopæ terminis , quâ or-  
 tum Tanais habet , profecti eam regionem vaf-  
 tam , defertamque à Gothis infedère : ibi diu pa-  
 trio ritu , nullis ædificiis , nullo agrorum fructu ,  
 nifi quem terra fponfe ferret , nullo aut in Deos ,  
 aut in homines cultu , denique nullo imperio ,  
 aut lege egère , melle quod paffim per fylvas apes  
 fundebant , & lacte , & fanguine equorum , & fe-  
 rarum carnibus vefcentes ; tanta barbaries inerat ,  
 vt fine yllo conjugii nomine , aut difcrimine fœ-  
 minas in quafcunque , aut fors , aut libido im-  
 puliffet , brutorum ritu mirent. Ex tam prompta ,  
 & promifcua venere ingens brevè propagata mul-  
 tudo , quâ prægravante ; ne anguftiæ inde fi-  
 nium vrgerentur , infantibus , quæ fœminæ ede-  
 rentur , necatis , mares tantum fufcipi , nutririque  
 intituerunt , nec vlla toto biennio muliebris  
 ftirps fervata. Graves accolæ finitimis jam erant ,  
 nihil circà non infefum latrociniis , ac rapinis

juventute eorum relinquire, nec ipsis moderari  
 facilius erat nullo rectore, aut lege agentibus.  
 Ob id cum de Republica aliquando coivissent,  
 vnus Barbarorum haud sanè stolidi ingenii, no-  
 mine Viduutus, qui piraticam faciens nonnihil  
 » etiam opibus eminere inter eos cœperat, Quin;  
 » inquit, ab iis apibus, quarum quotidie pascimur  
 » fructu, vivendi quoque exemplum capimus? An  
 » videtis, vt illæ vni parere didicerunt, vt ab eo  
 » æquo iure habeantur, vt inertes ad laborem co-  
 » guntur, strenuis, atque industriis optimæ in suis  
 » cavis sedes dantur? Dictis assensere omnes, atque  
 ipsum Broterum suum esse Regem apum, ipsi  
 suâ linguâ sic vocabant, iusserunt. Non defuit  
 illi animus, atque indoles Regis, ab illa promi-  
 scua cum qualibet se miscendi consuetudine revo-  
 cavit, conjugiaque, & discrimina liberorum in-  
 stituit, & aliquod quoque legum frænum Barba-  
 ris iniecit; sed ante omnia Deorum metum, opi-  
 nionemque incussit, quâ plusquam vllis legibus  
 multitudo continetur, sumpto à finitimis Samo-  
 gitis, atque Lithuanis more, serpentes, rarum  
 in frigida regione animal, vt Deos vereri docuit;  
 deinde feras quoque, quas in victum antè assli-  
 duè venabantur, quò iis parceretur, sylvarum nu-  
 mina esse dixit: postremò sylvas ipsas quasdam  
 consecravit; & divisos inter omnes agros colere  
 iussit. Sed vicinis populis eò terribiliores Barba-  
 ri erant, quòd sub Regibus disciplinam viribus  
 addiderant, cum Massovios (Poloniæ populi sunt)

populationibus, cladibúsq; fatigatos in magnum metum suarum rerum coniecissent. Conradus eorum Rex ad Pontificem Maximum Romam confugit; adhibitis Germanorum quoque, & maximè Saxonum precibus, qui & ipsi ægrè Barbaros à finibus suis submovebant. Ab eo, quia Christiani à contemptoribus Dei oppugnabantur, missi in Prussiam sunt Teutonici sodales, qui tum maximè Syriá à Saracenis pulsi, novam sedem militiæ à Pontifice Maximo expectabant. Ii ad xxx. millia hominum fuisse dicuntur, Germani omnes genere; ceteræ enim omnes nationes eâ societate excludebantur, quæ paucis orta initiis, aucta, confirmatâque Pontificum Maximorum auctoritate ad magnam dignitatem, opésque pervenerat. In Prussiam profecti sedes accipere citeriorem Vistulæ ripam, Culmensémque omnem tractum, multósque annos vario Marte cum Prussis bellarunt. Postremò secundis aliquot præliis attritis Barbarorum rebus, & magnâ multitudine eorum interfectâ, omni Prussiâ potiti sunt. Gens Christiana sacra accipere coacta, missis à Pontifice Maximo, qui eos in Christianæ disciplinæ ratione erudirent, quam ad eò Barbari aspernati initio sunt, vt Aldebertum Balemum Archiepiscopum, virum, quem sanctitas morum, & miraculis affirmata religio in Divorum retulit numerum, ad eos à fœdo cultu bestiarum avertendos Româ profectum, sacra facientem aggressi obtruncarint; & sæpè, quam metu, & simulatio-

ne fufceperant, Chriftianam religionem exuerint: Sed Pontifices Maximi Provinciam omnem in Epifcoparus diviferunt, datis Epifcopis, qui eos regerent. Horum operâ paulatim mollitæ Barbarorum mentes, & ad pietatis ftudium traductæ funt, violatis eorum lucis, ferpentibûſque, & aliis diis interfectis, atque abolitis. Manſit ergo Pruffia in Teutonicorum ſodalium ditione, & Romanæ Eccleſiæ fide uſque ad memoriam noſtram, & vires, atque imperium in eam amplitudinem propagarunt, ut aliquando cum ſexaginta millibus equitum in aciem deſcendiſſe dicantur, ad eorum præfecturam viri Principes Regio quoque orti ſanguine ſummis ſtudiis aspirarent, magnûmque decus, ac titulum in familiam ſe intuliſſe putaret, qui iis præpoſitus cum imperio fuiſſet: ipſi Magiſtrum appellabant, & Regiâ præditum poteſtate Regio quoque cultu habebant. Quamdiu ille ferus, & internecinus hoſtis exercuit, manſit ei integra diſciplina, cujus vnus eſt cuſtos optimus timor, qui ubi domitis, ac debellaris Pruffis deceſſit, in omnem præcipites licentiam, luxuriâque decidere, elatiquæ ſucceſſibus, nec jam Pruffiæ dominatu contenti, animo ad vaſta, atque immodica adjecto, sæpè Samogitios, atque Lithuanos armiſ tentarunt. Sed longè atrociffimum, maximèque diuturnum cum Polonis bellum gesserunt, quorum in primis rogatu in ea loca miſſi fuere. Cum iis per centum & quinquaginta annos vario eventu de potentatu

contenderunt. Postremò à religione, sacrisque Romanis desciscentes, cum Catholica fide etiam imperium amisere. Pervasis enim velut continens incendium omne Germanicum nomen exitialis Lutheri doctrina, atque hos Prussiar, & Livoniar sodales (nam in ea quoque gente objecti Barbaris erant) tantus furor incescit super novitatis studium insitum mortalium mentibus, stimulante animos cupiditate occupandi, & hæreditarias sibi, suisque faciendi præfecturas, quas à societate habebant, ut non abjecerint modò cruces, quas in signum institutæ adversus Catholicæ religionis hostes militiæ collo suspensas, ex lege societatis assidue gestare antè consueverant, sed eas per summam Christianæ pietatis contumeliam, atque ludibrium, figerent pro signo, telisque incescerent, & sclopiis collimantes trajicerent, ac perfringerent. Justâ igitur læsi Dei irâ factum est, ut ea nobilitatis subsidia, atque industriæ præmia Germanico sanguini, ac nomini erepta interierint. Nam Albertus Brandenburgius societatis Magister per speciem finiendi diutinum cum Polonis bellum, quod ægrè jam sustinebat, sublato omni societatis jure, ac nomine, cujus ipse suffragiis ad eum honorem pervenerat, publicas opes ad privatam potentiam vertit, & Romani Pontificis, & Germani Cæsaris speratâ auctoritate, partitâ cum Polonis Prussiam, se in fidem, ac ditionem eorum dedit, cum eo, ut Dux Prussiar appellaretur, atque concessu sibi imperii

jus filios quoque , posterósque ejus sequeretur. Ipse immemor religionis, votique , quo se Deo obstrinxerat, per licentiæ magistræ disciplinam Lutheri, ad quam transferat, vxorem duxit, filiúmque propè septuagenarius suscepit. Hunc ipsum Albertum ego, cum obirem Prussiæ partem eam , quæ Regni illius est, apud Chiniſpergam vidi, & vt externus, & qui cum Romano Legato in ea loca venissem, (nam Commendonus apud Cardinalem Varmienſem Hedſpergi ſubſtit erat) benignè, atque hoſpitaliter ſum invitatus, & cœnæ adhibitus, in qua ipſe medius inter duas matronas, quæ illi cibum miniſtrabant, interdum etiam ori admovebant, diſcubuit; erat enim confectus ætate nonageſimum annum agens. Sermo ejus comis, & vt fermè ſenum, multùm de temporum ſuorum rebus, quæ mecum, aut à me intelligi volebat, Latine loquebatur, ſed adeò inconditè, ac barbarè, vt pleraque me fugerent, præterquam quòd lenta ob ſenium, ac parum explicata oratio ejus erat.

*De Pruſſia feriſ.*

CAPUT XIII.

**A**B EUNTEM, datis qui ad ſepta ferarum viſenda ( hac enim potiſſimùm cauſâ veneram ) deducerent, quæ quinque inde millia paſſuum apud novam domum ille habet, multa

cum humanitate verborum dimisit. Ferarum, quas Prussia habet, paucas narrasse sat fuerit: cum id mihi susceptum non sit, nec desint scriptores, quibus id solum propositum. Ex omnibus maximè differunt à nostris Uri, ac Biffontes, sylvester uterque bos, utrique natura ferè eadem, sed species diversa, etsi plerique auctores nullo discrimine eos tradidère. Vis, velocitas, feritas, magnitudo utrique pæne paria, sed forma in nulla re à domesticis bobus, præterquam pilo differt, qui horridior belluæ, & subniger nonnihil, & mole corporis bovis magnitudinem excedit. Julius Cæsar paulò infra Elephantès posuit. In Mazoviæ sylvis circa Ravam armenta eorum esse feruntur, nec ferè alibi in Polonia Uros capi, seu natura loci gignit, sive alibi venatu agitari, pulsique eò congregantur, ubi capitale fuerit præterquam ex auctoritate Regis eos violasse, aut omnino in eà loca venatum isse. In Prussia vitulos vidi, quos stabulo emissos celeri sanè motu concursantes, & lascivientes spectavi. Horum carnibus vescuntur Poloni, & Principum conviviis adhibent, paulum frigoribus antè maceratas; & ipsi edimus, nec mihi à veri bovis carne magnopere distare sunt visæ. Fertur sylvestris, ac fera bellua agrestes vaccas inire interdum: verum nec genitum ex his vivere, & pelli armento, qui se alienis miscuerunt: cingula quoque dissecto ferè corio fiunt, quæ juvare mulierum partus dicuntur. Biffontibus & vis, &

figura atrocior , pandâ , atque latâ cervice , deducta cornua , ac majora , quàm Uris torta , ut Taurorum , erectâque ad ictum , & acuta , colore nigro , tactu lenia , intus cava , aures parvæ , ut juvenicis , grandes oculi , rubentes , atque ignei , torvo intuitu , ac truci , cùm irascitur , flat minaciter naribus , mento ut barba penderet juba , eadem collum omne , armôsque vestit , & anteriora crura hirsutis villis , & nigris : à collo super humeros declive tergum , graciles clunes , posterior omnis pars strigosior. Cauda ut Tauri , quam per iram in cursu erigit , vibrâtque. Rariùs hunc , quàm Urum conspiciunt. Biffontem ego in Alberti septis vidi juvenicum , cui cùm sepimentum ingressus , in quo ille claudebatur , temerè contemplandi cupidus appropinquarem , admonitus ab eo sum , à quo ducebar , pedem ut referrem ; si fera impetum fecisset , spatium ad recipiendum me intutum extra sepra non habiturum , quamvis passus non ampliùs viginti progressum , & bellua pæne ad lapidis ictum abesset , tantùm ei inesse aiebat pernicitatis. Pascebatur vnà agrestium boum armentum , à quo ille non abscessit ; sed in nos versus intentus , & ferox respiciebat. Neutra ferarum facilè aut conficitur , aut capitur ; Biffonti eam vim esse ferunt , ut vnà equum , fessorémque ictu cornuum sublimes tollat , & celeritatem , ut si porro concitus insequatur , nullius equi quantumvis pernicis ope effugias. Qui capere vivos volunt , quod raro accidit , foveis infidiantur ,



fidiantur, sed non faciliè quò velis impellas, vi-  
tro in hostem irruentem duplex aggrediendi ra-  
tio. Sagittandi periti in equis disponuntur, qui  
etiam averfi, & fugientes tendere arcum Scy-  
tharum ritu, ac mittere jacula norunt, in quem  
primum fera canibus excita impetum dederit, is  
conjectis telis capessit fugam: insequentem ma-  
gnâ vi excipit alius, in hunc pñori relicto aver-  
titur, ita subinde pluribus subeuntibus, ac repe-  
tentibus pugnam, atque illo in eum ferente sem-  
per impetum, qui se ei novissimus obtulerit, fa-  
tigata, ac sagittis confixa concidit. Est & alia ad-  
oriendi via. Venatores deligunt arbores non ma-  
gnitudine, ne circumeundæ cursu sint, sed aptas  
corporibus ab ictu belluæ tegendis, & quas levi  
motu corporis ambiant. Ad has consistunt cre-  
bris circa stationibus, fera canibus, & missilibus  
irritata, in quem primum conspexit accensa fer-  
tur: ille arbore tectus declinat ictus, & inferen-  
tem se venabulo appetit, bellua in arborem, ve-  
lut in hostem sævit, & percita rabie, & evulsura  
radicibus submittit cornua, tantóque atrociùs  
furit, quantò interea graviùs à venatore foditur:  
in eo certamine haud minùs quàm cornu bestię,  
linguam, caudamque timendam esse venatores  
aiunt, quàm exertam injicit, & quâ est asperita-  
te abripit, vel si summam modò vestem appre-  
henderit, qui amovere ab arbore, séque, ac fe-  
ram, & quietem capere voluerit, rubrum è capite  
projicit pileum, in quem illa vesano impetu ruit,

vel à tergo vlulans , relúmque conjiciens alter in se avertit , ac pari ratione ex arbore pugnam ciet , donec lassitudine , ac vulneribus confecta cadit. Capitur item iisdem sylvis animal , cujus confimilis cervo figura , nisi quòd paulùm magnitudine antecedit , cornua vt cervis magna , & ramosa , eo tantùm differunt , quòd non erecta consurgunt , sed flexa reclinantur in dorsum , nec teretes eorum rami , sed lati , ferme vt pedum anserum palmæ junguntur ; data ad pugnam non videntur ; nec fera ipsa invadentes canes cornibus , sed calce petit , interdum lethali ictu ; capitur ferè validis circumdatis plagis , in quas à tergo clamoribus , aut canibus acta præceps cursu se induit : si catulos suscipias , alaique vt cervæ mansuefiunt , atque ad homines assuescunt , vngulæ eorum curari comitalem morbum constans est ferè apud omnes opinio. Quidam omnibus vngulis eandem esse vim , quocumque tempore , aut modo cæsis contendunt , quidam dextera posteriori crure viventi abscissum oportere esse tempore , quo maximè ardore libidinis sævit. Correptos morbo comitali , cùm visu , sensûque ablato affligantur , vngulæ parte , quantumvis parvâ tactos excitari credunt ; anuli ferme ex ea fiunt , quos item qui in digito habent , corripì eo morbo negant , & vulgò feruntur. Itali Bestiam magnam ab corporis mole vocant. Poloni Onagrum , recentes scriptores Alcem indidère nomen. Onagri sylvestres sunt

Asini, quos Asia, & Africa, & præcipuos Phrygia, & Licaonia ferunt; nec huic simile quidquam. Alcibus Julius Cæsar Caprarum maximè formam, & varietatem tribuit, & mutilas cornibus esse, & crura sine nodis, articulisque habere scribit, & ne quietis quidem causâ procumbere, sed applicare se arboribus, quas subruì à venatoribus solere, ut cùm se fera in eas reclinaverit afflicti pondere arboribus vnà concidat. Quorum rerum huic visæ à nobis Alci nihil convenit. Plinius Alcem in Septemtrionalibus oris gigni jumento similem, nisi proceritas aurium, & cervicis distingueret, tradit. Et feros equos in Alberti septis vidi, qui in vastis Prussiz, & Samogitiz nemoribus capiuntur nullum ad usum: nam præterquàm quòd parvi sunt, ac deformes, & domari, & sessorem pati ob infirmitatem currum posse, & omnino mansuescieri negant; ab hominis certè conspectu statim refugiunt; carnibus eorum, ut reliquarum ferarum incolæ vescuntur.

*De Succino.*

CAPUT XIV.

**I**N Prussici maris littore Succinum legitur inter reliqua maris purgamenta rejectum, & quibus ea cupiditas est, etiam inter fluctus scrutantur, & vel arenâ obrutum, limôve eruunt. Captura.

ejus publicè præconi subijcitur, & cupidè, & sæpe magno redimi pluribus licentibus solet, nec levis quæstus ex eo, quàmquam non quantus antea fuit, & Romanis olim tanto fuisse in pretio, luxûque videtur, ut petitos bello hos populos Domitiano Cæsare ob Succinum memoriæ proditum sit, & Barbaros mirantes rem nullius usus tanti à Romanis æstimari, non insulsè tradito, quod vilissimum apud eos, & belli causa erat, pacem recepisse; & Plinius tradit, quantumvis parvam hominis è Succino effigiem vivorum, & valentium hominum pretia excessisse. Minuit, & minuta majestas religionis hoc sæculo illi pretium, cum antea in Dei, Divorûmque imaginuculas formatum à piis hominibus magnâ mercede pararetur, fingereturque vis ingens in parvos globos, quibus filo trajectis preces numerantur, quæ ad Virginem Genitricem propitiandam tradito à majoribus ritu fiunt, crebròque ad cæterum numerum repetuntur, quas ab quadam similitudine coronas appellamus, isque haud minus nostræ fœminæ, quàm cætero ornatu, quo nitere, ac splendere student, lætantur. Nunc capta ea gens novis erroribus, hæresibusque ab religioso usu vertit in ludicra, latrunculos, coclearia, vasculòsque fingens, caveas quoque, quibus concinentes aviculæ includuntur, vidimus affabre factas, sed nullo usu ob fragilitatem: hoc fit, ut nec appetatur, ut antea, nec tanti vaneat. Quæ illi natura, aut ex quo gignatur nondum

satis compertum, quamquam non incuriosè quæ-  
situm à multis, variantque de eo auctores, non  
veteres solum, sed etiam nostri. Credibile est  
in Septentrionis insulis, sive scopulis, sive arbo-  
ribus manare liquorem, ut cerasis gummi, &  
mox concrefcere gelu, ac in mare delapsum du-  
rari aquis, exuique inde fluctibus in contrarium  
littus. Hoc signi modo argumento sunt quis-  
quilæ, aliæque quæ in pellucidis cernuntur; nam  
culices, apes, muscas, araneos ipsi vidimus, quas  
liquenti adhæsisse humori, inque durefciente  
inclusas existimare licet, nullâ parte sui corru-  
ptâ, læsâve. Martialis ludere in omnia versicu-  
lis solitus non apem modo, & formicam, sed vi-  
peram quoque Succino interceptam: ipsos ver-  
ticillos subicere non pigebit.

## A P I S.

*Es later, & lucet Phaëthontis condita gutta,  
Ut videatur apis nectare clausa suo.  
Dignum tantorum pretium tulit illa laborum,  
Credibile est ipsam sis voluisse mori.*

## F O R M I C A.

*Dum Phaëthontea Formica vagatur in umbra,  
Amplius tenuem succina gutta feram.  
Sic modo, quæ fueras vitæ contempta manente,  
Funeribus facta est nunc pretiosa suis.*

## VIPERA.

*Flentibus Heliadum ramis dum vipera serpit,  
 Fluxit in obstantem succina gutta feram.  
 Quæ dum miratur pingui se rore teneri,  
 Concreto riguit vincla repente gelu.  
 Ne tibi Regali placeas, Cleopatra, sepulcro,  
 Vipera si tumulo nobiliore jaces.*

*De Russia.*

## CAPUT XV.

**D**ANTISCO Commendonus Elbingam, datque inde Varmiam petiit, fuitque plures cum Stanislao Hosio Cardinali Varmienſium Episcopo dies, ut supra diximus. Visâ Prussiâ regressus in contrarium latissimè patentis Regni latus, quâ maximè in meridiem vergit, multis peragratis populis, Roxolaniâ, hodie Russiâ vocant, transit, adito, ut docuimus, ad Parzoviam Rege: à quo dimissus Lublinum, atque inde per Chelmiam, & Belzam Leopolum venit. Caput hæc Russiæ est ejus, quæ Polonorum imperio parer, Archiepiscopali honore nobilis, quin quod rarò ulli civitati accidit, duo sunt Archiepiscopi; nam præter Catholicum, & Romanæ Ecclesiæ cultorem, cui civitatis, & sacròrum cura mandata est, Armeniorum natio suum in ea

civitate Archiepiscopum habet. Ea Turcarum pressa servitio sedibus suis relictis, cum Euxinum transmississet ab hostio Danubii per Valachiam in Russiam transgressa permissu Regum ibi consedit, vsuque sunt Armeni Russis, quod dediti mercaturæ cum Turcis, Persisque, & aliis Euxini accolis negotiantur, externaque multa in Poloniam inferunt, & immunitatem vectigalium inter Barbaros habere dicuntur datam iis à Mahometo, quem Turcæ, multæque Orientis nationes relatum inter cælestes pro Deo colunt. Hunc educatum in Armenia, & ab iis benignè habitum, postquam ad magnum imperium pervenit, vetasse ferunt vllum ab Armenis portorium exigi. His Leopoli, sacrisque eorum Archiepiscopus præest, magnusque ei cultus, honorque ab illis habetur. Is advenientem Commendonum extravrbem obviam egressus, præcipuâ gratulatione accepit, cumque demissè admodum, & humiliter est veneratus. Armeni in Romanæ Ecclesiæ fide se esse prædicant, & Pontificem Romanum in jus Divi Petri Apostolorum Principis successisse, ac divinæ potestatis inter homines vicarium esse confitentur, sacra tamen ab Armeniorum Patriarcha petunt, & Patriarcham ipsum à Romano Pontifice ex eo aiunt non petere, quod remissum id illi à Pontificibus Maximis, irrogatumque hoc genti Armeniorum privilegium sit, tum ob longinquitatem itinerum, tum ne eâ re Turcas offenderent, magisque in se irritarent,

Hæc differentes ipse audiui, & graviter ferentes, si quis secretos ab Ecclesia Romana eos dicere, cuius se in fide, ac doctrinæ esse contendunt. Sed credibile est, ut in externos alius degeneraverint, ita errores quoque in mentes eorum multos irrepsisse. Matrimonia ipsa magnâ religione habent, rem divinam facientem, ego Archiepiscopum eorum spectavi eodem ferme cultu, quo nos, ac pari collucentium circa luminum, ac vestimentorum apparatu, quæ ne formâ quidem magnopere à nostris differunt. Azimum panem, ut nos, immolant, subleânsque manibus sacratam hostiam populo adorandam nostro more præbent, sacrum omne magnâ religione cōficiunt: leges, carminaque divinarum veterum Armenicis scripta litteris, ac linguâ habent, sed ea præter sacerdotes pauci intelligunt, vulgò ipsi Scythicæ, & Turcicæ linguâ loquuntur, Latine nesciunt, sed Latinos scriptores divinarum litterarum interpretes aliquot in Armenicum versos habent, plurimumque auctoritatis illis tribuunt. Ephren Armenium inter Divos relinqui volumus scriptisque ejus maximam fidem habent. Præter Armenios, qui ferè Leopoli, & Carmenesi habitant, fusus totâ Russia est ingens hominum numerus in sacrorum disciplina Græcorum rationem, arque instituta sequentium, Rutheni vocantur, & Chiovia (quæ civitas est ad Boristhem in citeriori ripa sita, & latè caput earum gentium olim fuit) Antistitem, atque Principem sacrorum habent, quem



quem ipsi Metropolitanum Græco vocabulo appellant, dictoque ejus audientes per Russiam, Vallachiam, Lithuaniam multi Episcopi sunt, & aliquot etiam trans Boristhem in Moscorum Regno. Ipsi Constantinopolitani Patriarchæ imperio, ut reliqui omnes in eadem secta sunt, continentur. Chioviæ Metropolitanus fuit Isidorus, qui cum splendido comitatu centum equitum è Russia Florentiam vocatu Eugenii IV. Pontificis Maximi ad clarum illud orbis terrarum Concilium venit, ad quod non Græci tantum, atque Armenii cum Patriarchis, & Præsulibus suis convenère, sed cum Pontifice Maximo Imperator ipse Græcorum à Constantinopoli classe advectus interfuit, in quo cum diu de veteribus inter nostros, & Græcam nationem controversiis disceptatum esset, postremò causâ, & rationibus victi Orientales in Catholicæ Ecclesiæ sententiam omnes concessère: honorique gentis datum ab Eugenio est, ut duo eorum doctrinâ, & dignitate præstantes in Cardinalium Collegium legerentur, quorum alter Bessario Nicænus ætatis suæ vir religione, & virtute longè clarissimus. Alter Isidorus Chiovensis Antistes fuit. Sed Græci assensu magis sunt in præsentia Concilii auctoritati, quàm inde decretis paruerint. Et Isidorum apud Moscos Catholicæ pietatis disciplinam, vniuersæque Ecclesiæ consensionem prædicantem Barbari spoliatum omnibus fortunis, injuriis abire provinciâ, ac redire Romam coegerunt, vbi

Pontificum Maximorum liberalitate sustentatus , reliquam vitam suam egit. Rutheni præter ea , quæ sacerdos rem divinam faciens ex ipso sacrificii loco de sacris recitat libris , nullas de religione , & cælestium rebus conciones ad populum habent ; scilicet multitudinem piè colere acceptam de Deo fidem , non difficultatibus , & captum ejus excedentibus quæstionibus agitare , impellique eorum mentes volunt. Hinc retentissimi suorum sacrorum , & depravatis variâ hæresi tot circà populis , cum quibus ipsi & linguæ , & rerum omnium commercia habent , incorrupti manent , nec ullis se novis opinionibus infici patiuntur. Judæorum quoque hæ gentes admixtam multitudinem habent , non ut in plerisque locis inopem vitam fœnore , & servilibus operibus tolerantium , quamquam ne hoc quidem genere quæstus abstineant , sed qui & agros possideant , & mercaturam faciant , & litterarum quoque studiis , maximè Astrorum , & Medicinæ se excolant , & ferè vectigalibus publicis præsent , ac ad honestam fortunam perveniant , ut non æquentur modò ingenuis , sed interdum etiam imperent : nec tegumento capitis , ut apud alios , aut ullâ omnino insigni re à Christianis distinguuntur , quin arma ferunt , & cum telis incedunt , & planè æquo cum aliis jure vivere videntur. Commendonus ab Leopoli Camenetiam progressus Corthinum Vallachorum oppidum in ulteriori ripa Tyræ aspexit : atque deflectens inde ad or-

rum per ultimos Polonorum fines , & loca paucis antè diebus Scytharum incurfione vastata ad Boristenem circumiit , & relictâ ad dexteram Chioviâ , vbi vetustæ , ac nobilis vrbis vestigia , ruinæque visuntur , per Ostrorogum , & Luxicum Leopolim rediit ab Alberto Lescio Polonicæ juventutis tum facilè principe cum egregia equitum manu deductus : inde Jeroslaviâ , Prismsiliâ , Tarnaviâ aditis , vbique summis studiis , atque officiis , & publicè , & privatim à Regulis , & Principibus cultus in Poloniam , atque Petricoviam contendit : quò Rex Concilium gentis indixerat , frequentésque adesse Principes jusserrat.

*De Podolia , deque ejus frequentanda consilio  
Regi allato.*

## CAPUT XVI.

**A**DVENIENTEM Rex benignè , amantèr- que accepit , multa super populis Regni sui , quos obivisset , ab eo sciscitans , qui Podoliam ( pars hæc est Russiæ ) locaque incolunt inter Tyram , & Boristenem , quæ flumina *Nieper* , & *Niefter* Polonis vocantur , atque altero à Vallachis , altero à Moscis , Scythísque dividuntur , latissimos agros , & summæ fertilitatis habent ; versâ leniter terrâ semen jaciunt , nec deinde amplius sementem , nisi cum falce secandam rev-

Y ij

sunt, adeò nullam culturam bonitas soli desiderat, & quidem acceptum tanto cum fœnore reddit, ut ex vno frumenti sextario quinquaginta atque amplius gignat; quin fama est, si paulum modò in metendo spicas decusseris, ex granis, quæ deciderint, sequenti, atque item tertio anno ibidem messem habiturum, nihil arato agro, nihil culto. In vasta planitie, ubi terra intacta omni culturâ suo ingenio parit, tantâ fœcunditate luxuriant herbæ, ut maximæ superare altitudine hominem dicantur: latèque odorem fundere, & pecora, quibus illi magis, quàm arvo student, abigi pascuis, ne pabulo nimio intereant. Hand minùs totâ illâ regione copiam mellis mirere, ne id quidem vllò incolarum labore, aut industriâ quæsitum: sponte suâ per omnes sylvas fusa apum examina arboribus insident, & sicubi cavi aliquid repperint, spargunt mella, quin rimis quoque terræ, hiatibusque se conduunt, passimque vim ceræ, mellisque fundunt. Advenientia examina (nam mos apibus se invicem pellere, acribusque præliis, veluti justis aciebus inter se concurrere, agrestes prohibent, quò veteribus, veluti hæreditariæ suæ sedes manéant: hic vnus cultus illis habetur; plurimum mellis irreptum, neglectumque perit, incolæ ex eo multum efficiunt radicis succo acri admixto, quo nimiam dulcedinem coërceant, atque hoc poru Podolii, Russique, & vndique accolæ gaudent. eoque magnâ intemperantiâ se ingurgitant. Ver-

num longè optimum putant , Lipiezum ipsi appellant , nec alius mellis vsus ferme apud eos , sed & frumenti non plusquam quantum abundantia eorum satis sit , serunt : sunt & crebri per Russiam , Podoliàmque lacus , quidam etiam de industria , opere , & manu facti , magnique proventus ex iis : certare fecunditate cum terra aqua videntur , tanta vis editur piscium . Optimi omnium Lucii , & magnitudine reliquos excellent . Sale condiunt , vicinisque populis imperiunt , nec aliud ferè vberius illis vectigal . Quibus propinqua , ac plures piscinae , secernunt genera , nec promiscue habent : fortasse ne mutuâ consecratione , aut metu minùs subolescant . Piscantur maximè hyeme , cum frigorum vi rigent omnia , & flumina , & lacus haud secùs , quàm marmora sic duruerunt , ut non homines modò , equosque , sed ingentia quoque plaustra onusta ferant ; tunc crebras veluti fenestras dextrâ , sinistraque perforatâ glacie aperiunt , paribusque spatiis ad perticarum modum , quas in introitu lacus sub glaciem vtrinque immittunt ; has ab sua quisque parte per proximum foramen exceptas furcistransmittunt ad aliud , atque deinceps aliud , donec ad vltimum , quod opportunè perfossum in diversa parte est , coeant . Perticis suspensa retia toto lacu , aut per quantum ipsi spatii complexi foraminibus fuerint , explicantur , pandunturque , & cuncta subitus converrendo , quantum est piscium trahunt , idque fit siccis pedibus , &

nullo labore. Hoc loco rem vix fidem habituram pigeret referre, nisi gravissimos viros permultos, & ipsum quoque Regem auctorem haberem, qui omnes vidisse se sanctè affirmarunt. Accidit aliquando hiberno tempore, cùm ita piscatur, vt ab imis lacubus involutum retibus extrahatur in littus globosum quid molle, & informe, quod videatur madidis, diùque maceratis plumis compactum, sed ne id quidem satis dispici possit, vti esse caro recenti vrsæ fœtus dicitur, nisi quòd hoc nigrum, & majus; si moveas, projiciásque inanime dicas: at idem si in hypocausta, in quibus ferè Poloni ob magnitudinem frigorum agunt, calidàque admodum habent, intuleris; paulatim calore recreatas, excitásque reviviscentes, & mox etiam avolantes hirundines cernas. Hæ aves adventante hyeme magno numero coire, vnàque vnguibus rostro inter se complicatæ mergi aquis dicuntur, atque in fundum delatæ terræ repescentis vapore foveri, atque intolerabili rigentis cæli frigore defendi, totàmque hyemem, aut humore, aut ipso veterino nutriri: vere novo emergere, avolaréque; an spirent sub aquis volucres, & ademptâ spiritus mittendi, recipiendique facultate, vt vivant, querant, quibus cordi est scrutari abdita naturæ: nos rem apud eos minimè dubiam retulimus. Lacum quoque esse in vltimis Podoliæ finibus haud longè Ciazovia ferunt nomine *Cołbein*, cujus aquæ æstivis siccatis solibus in salem omnes ab-

eunt , asportarique cum à Russis quotannis coactō magno plautrorum numero. Sed sæpè accidere , vt occurſu Scytharum , qui prædæ simul hominum , simul jumentorum infidiantur armis , ac prælio cum iis contendant , nec rarò Scythas , coniectis in fugam custodibus prædâ potiri. Id quoque è Scythiæ miraculis non omiserim , quod tamen ego à nullo , qui se vidisse diceret , accepi ; scriptores prodidère , multique fidem iis affirmant. In fluminibus , maximè Boristene , & Boccho per æstatem noctu gigni vim magnam vermium : hos manè aquis supernare , meridie innatis pennis circum ipsas volitare , cadente sole omnes occidere , & circa Belzam , & Chelmiam sylvestres pinus , quas ferè Poloniæ sylvæ habent cæſas , aut sponte ad terram delapsas in humum putrescentes , intra biennium lapides fieri. Sed hæc nos paulò ab instituto abduxerunt. Uberri mi Podoliæ agri partem maximam , quæ Pontum Euxinum aspicit , deserta , atque vasta solitudo tenet ; quòd & infesta loca sunt Barbarorum excursionibus , & suas fruges quò asportent , habitatores non habent : neque enim ipsi vt reliqui Poloniæ populi , aut Viſtulâ , aut in Viſtulam influentibus amnibus frumenta , & reliquos terræ fructus devehere Dantiſcum , atque inde per Balticum mare in externas mittere terras possunt : quorum flumina ab Russiæ finibus ad meridiem versa omnia in Euxinum ferunt. Commendonus igitur satis exploratis inquirendo rebus Augusto

ostendit posse fertilissimam Regni sui partem non  
coli tantum , & frequentari , sed ad magnam  
quoque opulentiam pervenire , auctórque conan-  
» di fuit. Venetorum urbem amplam , & maris la-  
» tè potentem , maritimarúmque rerum scientiâ ,  
» vsúque longè exteris præstantem in medio stare  
» mari , ducentisque ampliùs millibus hominum  
» habitari , celebrarique nullo circà proprio agro ,  
» quem colat , neque ad tantam multitudinem a-  
» lendam sæpe sufficere , quod à vicinis populis con-  
» vehitur : posse Venetias frumenta è Russia depor-  
» tari , nec longinquitate itineris , nec aliis , quæ  
» se primò ostendunt , difficultatibus deterreri de-  
» bere : nihil enim Regi , si adsit industria , stu-  
» diúmque , insuperabile fore. Ante omnia agen-  
» dum cum Turcis esse , vt metu , atque auctórita-  
» te imperii sui Vallachos , & maximè Scyrhas à  
» latrociniis contineant , quod Turcas credi liben-  
» ter esse facturos , quippe ex crebro illo navium  
» commeatu , & eorum portus celebrari , & vecti-  
» galia augeri , & pacem iis cum Polonis pariter ,  
» & cum Venetis esse : tum ad ripam Tyræ loco , qui  
» visus maximè opportunus fuerit , deligeret op-  
» pidum , atque novam urbem conderet , vbi tutam  
» mercatoribus stationem præstaret , ne subitis in-  
» cursionibus finitimorum pateret , vel levi muni-  
» mento , ac ligneis mœnibus , vt est mos iis in  
» terris oppidum firmasse , sat fore adversus Barba-  
» ros inermes , & nullis belli instrumentis , quæis  
» septa modò loca tentare audeant , instructos , &  
infcios



incios ejus rei, assuetosque tantum in latissimis "  
 campis excurrere, brevique certamine, aut in fu- "  
 gam vertere, aut fugere hostem, venturas Vene- "  
 tiis naves, portumque ad Bialogradum in ostio "  
 Tyræ, aut alibi, ut commodum fuerit, capturas, "  
 frumentaque secundo flumine devecta ad mare "  
 Ægeum in Adriaticum invectas sinum Venetias "  
 redituras; nec Venetis hominibus novum id "  
 iter, aut mare futurum, fuerit paucis ante annis "  
 longiorem illam navigationem ad Tanam urbem "  
 Tanais amnis ostio sitam suscipere mutandarum "  
 causâ mercium, & ex iis ipsis Podoliæ campis ad "  
 inficiendas lanas semina quædam exportare, quo- "  
 rum fructus, qui cum eo commercio defierunt, "  
 repeti possent. Vinci omnia superarique spe, & "  
 cupidine lucri, multaque diem, atque usum in- "  
 venturum, queis quotidie negotium proclivius, "  
 expeditiusque reddatur: nec frumenta solum, "  
 sed ubi procedere res cœperit, vim magnam "  
 mellis, ceræ, piscis, cinerum, pellium, quæ nunc "  
 neglecta sine emolumento habentur, Venetis mer- "  
 catoribus vendituros: eosque ipsos varias, variis- "  
 que usus, quas Venetiæ ferunt merces, quarum- "  
 que indiga Polonia est, ultro advecturos, nec "  
 dubium frequentem novam urbem brevi ipsam "  
 quæstum, utilitatemque effecturam, mollituram- "  
 que, & mansuefacturam feros quoque Barbaro- "  
 rum animos, qui & ipsi mercari, quæ externa navi- "  
 bus subvehuntur, & sua exhibere, & denique "  
 commercio, & fructu advenarum lætabuntur. "

» Ita coalescere rem, & coli, habitarique regio-  
» nem salubrem cælo, vberem solo, ac situ oppor-  
» tunam posse, ex quo ingens, & publicè, & pri-  
» vatim emolumentum Polonia esset captura. Cùm  
magnopere probata Regi res esset, relatâque  
ad Concilium suorum approbatione omnium ac-  
ciperetur, magnæ ob id Commendono gratiæ  
actæ, vehementerque ex eo incitata sunt homi-  
num in illum studia, quem & amantem gentis  
suz, & de commodis eorum Reipublicæ cogitan-  
tem omnes prædicabant. Ipsi quoque hæretici  
diligebant, ac reverebantur eum, nec palam mi-  
nori, quàm Catholicî cultu, & honore digna-  
bantur; ventitabant etiam domum, & consuetu-  
dine, & sermonibus ejus commoti quidam sese  
collegere, & resipuere, minúsque jam eorum a-  
ceres in Ecclesiam imperus erant. Cæterùm de  
Podolica re cùm appellasset Turcarum Regem  
per Legatos Augustus, nec ille abnuir, & Vene-  
ti ultro gratias ei, Commendonóque egerunt.  
Sed Palatinus Russiæ, aliisque quibus datum ne-  
gotium circumeundi, lustrandique eam omnem  
oram, & maximè Tyram amnem inspicendi erat,  
retulere à Cameneria aliquot dierum iter secun-  
do flumine provectis occurrisse vada saxis ingen-  
tibus impedita, nec ultrà pervium navigiis am-  
nem fore, nisi iis aut amoris saxis, aut cæsis lo-  
cus aperiretur; nec opus esse parvi laboris: ve-  
rùm, etsi Commendonus ostenderet posse, quod  
difficile, atque impeditum naturâ videretur, con-

filio, atque arte superari, nec omnino magnâ mole illa confringi, aut amoliri saxe; tamen huic præter spem objecto scopulo negotium hæsit, ac tum dilatum, post etiam totum omissum est.

---

*De Rege cupiente divortium cum uxore facere,  
per Commendonum ab tali consilio  
abducto.*

## CAPUT XVII.

**A**D cætera intestina mala, quibus vrgeri Polonia videbatur, accessit aliud gravius multò, ac periculosius, vnde tragici illi Angliæ motus, & ex pari causa par quoque exitium haud dubiè imminebat, si in Commendono, aut minùs fidei, aut minùs industriæ, animique inventum fuisset. Regem pugnacem in vitiis suis ingens cupido incesserat vxoris repudiandæ, cujus in matrimonio decimum jam annum agebat. Primum huic cum Isabella Ferdinandi Cæsaris filia conjugium fuerat, ne id quidem ipsum satis concors, aut diuturnum, quæ cum sine liberis decessisset, Barbaram, de qua suprà mentionem fecimus, amore ejus, atque illecebris irretitus, ipsâ maximè adversante matre, sibi copulavit, brevique amisit, quòd mulier meretriciis imbutâ artibus, dum assiduis medicamentis, sibi conciliare partum studet, pro factu ~~motum~~ concepit, eoque absum-

pra interiit. Hujus desiderio Rex diù in mœrore, luctûque fuit, ac ne perseveraret in cælibatu, magis suorum hortatu, & aliquâ cupiditate liberorum, quàm sponte sua fecit, quo indignitas proximi cum privata, ac famosa connubii levaretur, & simul inopia non dispari se jungendi, Legatos ad Ferdinandum Cæsarem vnam ex sororibus Isabellæ prioris vxoris petitem misit: nam Ferdinando fœcunda proles vndecim filiarum erat; ac ne ipsi quidem facile singulis ob multitudinem invenire viros Majestati suæ non indecoros. Sed quia matrimonia in tam arcta affinitate scitis, & jussis Ecclesiæ prohibentur, postularum à Julio III. Pontifice Maximo est, vt lege solverentur; quod cùm difficulter impetrarent, tergiversante Pontifice rari, & parum faustirem exempli inducere, tandem summis ab vtroque Rege adhibitis precibus, summè conducere vtriusque Regni rationibus eam renovari affinitatem contendentibus, annuit Pontifex, atque legis veniam dedit. Ita Catherina vidua, quæ antea Federico Mantuanorum Duci nupta fuerat, ad Augustum in Poloniam, atque in sororis thorum deducitur. Omnino communi errore in matrimoniis jungendis laboratur, vt non mores, non ingenia pensentur eorum, quibuscum agenda omnis vita sit; sed vna commodorum, aut inconsulti, & citò desituri amoris ratio habeatur: Hinc plenæ discordiarum domus. Id cùm privatis adversum, tum ferè Regibus vsu venit, quibus non solùm

cognitæ, aut visæ nunquam sunt, quas in lecti, in liberorum, in vitæ, & fortunarum, & rerum omnium societatem asciscunt : sed plerumque longinquis in terris natæ, sermone, ritu, institutione diversæ ad eos adducuntur, ut mirum videri non possit, si qui more, ac pæne naturâ inter se dissimiles sunt, non faciliè inde sensibus, & voluntate conjungantur : atque adeò evenit sæpe, ut unde necessitudo, atque amicitia quæritur, inde odia, inimicitia, ac interdum sæva etiam bella oriantur. Augustus recentibus novæ nuptæ amplexibus, obsequiisque delinitus primò lætari novo conjugio est visus. Mox ubi satietas ex multa copia orta, & suo uterque vivere, & nosci ingenio cœpère, paulatim digredi, ac secumbere, nec illa mariti amores, ac incontinentiam tacita ferre, & ipse eo in dies magis alienari, donec non Regni, non fortunæ confors, non itinerum comes, deserta, spretâque Radomii seponitur : tertiumque jam annum separati agebant, quotidieque dissidium, quâ Reginæ questibus, quâ perviciâ Augusti augebatur. Et Ferdinandi Cæsaris injuriam filiæ querentis, & interdum minarum auculeos in generum jacentis crebræ litteræ, legationisque non remedium, sed irritamentum ad Augusti animum cupiditatibus suis mirè cedentem fuere. Causæ tam alienati ab ea animi Regis variæ traduntur. Vulgò ferebatur Augustum muliebrem mundum atque omnem vestium apparatus, qui Barbaræ fuerat, cujus desiderium in animo ejus

novæ non extraxerant nuptiæ, Catherinæ munus danti, quàm accipienti grātius obtulisse : ab illa negante turpis, atque impudicæ ornatum, cultumque veram decere Reginam, mariti donum, quamquam magni pretii rejectum, altiùsque id in Augusti animum penetrasse, atque inde ortum initium diffidii. Plerique alii aiebant non convenisse mores, & Polonos, Germanósque pæne naturâ dissidere : ac Polonos quidem, quemadmodum in aliena terra, alieni ritus, linguæ, vestitus, totiùsque vitæ consuetudinis mirus est imitator, statimque se ad eorum format, atque fingit arbitrium, vsumque, apud quos vivit, ita in sua peregrinum non faciliè admittit, aut patitur, morem, & tam ipse apud externos, ne rideatur, moribus patriis abstinet, quàm inter suos ridet, atque aspernatur alienos. Rex præter hanc ingeniorum dissimilitudinem, quam utique se toleraturum fuisse aiebat, comitali morbo visu, oréque fædo, ac deformi eam corripi solere affirmabat, ejus morbi se non aspectum solùm, sed cogitationem quoque ipsam horrere. Præter hæc fides quoque ejus in gravi suspitione, atque culpa ponebatur, quasi ementiri partum, suppositumque alienum filium alere pro suo tentasset. Alii medicamenti partum abegisse sibi mariti, atque gentis odio insimulabant : quamquam id quidem nec Rex ipse pro comperto affirmavit unquam, & spectata probitas, & innocentia Reginæ satis refellere videbatur : de co-

mitiali morbo constantior fama erat : cæterùm  
 probri vllius insimulare eam adeò nemo vnquam  
 est ausus, vt veram pudicitia laudem præconiũ-  
 que & Rex, & cæteri omnes illi semper tribue-  
 rint : sed sive ab iis causis, sive fato aliquo, seu  
 iusto numine peccata eorum vlciscente, à consue-  
 tudine ejus, suprà quàm existimari, aut credi po-  
 test, Augustus abhorrebat. Adeò vt de via, &  
 ratione, si qua inveniri posset, amoliendi illam  
 matrimonio suo occulta consilia habere cœperit.  
 Non desunt vnquam, qui Regum quantumvis  
 pravas cupiditates acuant, incitèntque, ignavi  
 assentatione pessimâ, & vitiorum altrice, & gra-  
 tiæ parente, alii quò difficilem, & præcipitem in  
 locum deductos obstringant sibi, atque obnoxios  
 habeant. Augustus & cum intimis rem coquebat,  
 & hortatu eorum cum Ucangio Archiepiscopo  
 Gnesnensi, & Painevio Cracoviensi Episcopo  
 communicaverat ; vtriusque consiliis implicito  
 ancipiti curâ, negotiòque Rege opus erat. Sed  
 Ucangius etiam novis, ac turbidis rebus lætaba-  
 tur ; atque ab hoc maximè fota Regis spes ad-  
 ditusque ad audendum est animus. Ratio agen-  
 dæ rei composita, vt Rex idoneos præpararet  
 homines, qui Equitum nomine, in cujus ordinis  
 manu Respublica Polonorum est, palam in senatu  
 ab se postularet, quando maximè interesset Rei-  
 publicæ Regem filios procreare, vt aut cum Re-  
 gina habitaret, liberisque operam daret, aut pro-  
 meret causam cur ab ea tam diu sejunctus age-

ret. Cùm Rex impediri religione se respondisset, quòd justum sibi conjugium cum vxoris suæ sorore non esse intellexisset, tum ex auctoritate gentis Legati ad Pontificem maximum dirimendo matrimonio mitterentur. Hæc quamquam studiosè occultabantur, ne quid antea emanaret, quàm omnia, vt res poscere videbatur, instructa essent, tamen & comperta Reginae erant, & Commendonum ipsum nihil fugiebat, qui Anglicam tempestatem animo prospiciens, tantàmque sibi molem negotii imminere, intentissimâ in id curâ excubabat. In eo verti negotium omne rebatur, si res in apertum non erumperet, & illa ad Pontificem Legatio non decerneretur. Nam si palam Rex in causam descendisset, publicam suorum auctoritatem, postulatúmque ferens, tanto præterea studio hæreticorum adiutus, qui se locum aut gratiâ, & opibus apud Regem crescendi, aut eum à Pontificis Maximi amicitia, fidéque avertendi nactos rebantur, quomodo sisti res posset, non cernebat. Rex ipse hunc maximè suis inceptis adversarium timebat, in multis aliis expertus quàm cum acri, & intento res sibi esset futura. Tentare fidem, quòd omnia summâ religione, atque constantiâ septa, obfirmatâque antea senserat, non ausus, tantam viri vim lenire, omníque cum humanitatis, atque officii genere sibi devincire contendebat, beneficiis quoque ac liberalitate demereri : sed nullus apud Commendonum largitioni locus fuit : profusus



fessus enim gratiam recipere, rem constantissimè semper remisit. Rex inde studio ejus magis incitatus per Petrum Miscovium Plocensium Episcopum designatum, quo intimo consiliorum ministro utebatur, Commendono institit suam ad Cardinalatum commendationem offerre diligentem, accuratamque, & addebat ad persuadendum Miscovius, cum aliorum Regum rogatu externos, & Romanæ civitati ignotos in illum ordinem Pontifices Maximi sæpe cooptassent, haud dubium videri, quin Regi Poloniæ hominem magnis in Rempublicam meritis commendanti gratificaturus Pontifex foret, præsertim quòd ex quo regnare Augustus cœpisset, nemini eum honorem petiisse constaret. Quin & missurum deditâ operâ Romam, qui hoc summis precibus à Pontifice contenderet, Regem pollicebatur. Ille haud magis cupidine honorum, quàm antea munerum suam labefactari constantiam est passus, & qui in ipsa Urbe suffragatores nunquam quæsisisset, ne Regis quidem vsurum commendatione respondit ad eum honorem, cui se parem non duceret. Et cum vni Pontifici Maximo operam, & fidem obligasset suam, non alterius quàm Pontificis judicio sua merita, seque existimari debere; vetuitque verbum vllum ea de re Romam scribi, in eoque ita perstitit, vt Miscovius, qui eum præcipuâ benevolentia colebat, mecum sæpe questus sit, eum dignitati suæ in prætere deesse, qui ultro sese offerentem fortunam

contumaciter repelleret: non sanè parvo moderationis, & abstinentiæ documento, cùm neque dubia spes ostendi, neque adversari mos videretur, & plura, & recentia exempla extarent eorum, qui Regum gratiâ in eum dignitatis gradum ascendissent, & tum quoque niti quidam dicerentur. Sed is mos tantùm abest, vt probandus, imitandusque Commendono videretur, vt dicere soleret non aliunde graviora, aut plura detrimenta Romanæ rei esse importata. Dum enim quidam ejus, ad quem venerint, non à quo missi fuerint, gratiæ serviunt, & in rem missi publicam, suam agunt privatam, eos non solum liberè, ac fortiter mandatum munus non obire, sæpe de fide, atque officio decedere, sed semel cupiditate, atque ambitione prolapsos, ipsam quoque Rempublicam prodere, per cujus opes crescere animo destinarunt. Quod Pius Quartus Pontifex Maximus serò quidem post lectos ab se in Senatum quosdam suspicionis ejus maculâ aspersos, sed aliquando sensit, decretóque scivir, ne cui Regis, aut Principis, ad quem Legatus fuisset, ejus ad honores commendatione vti liceret; qui fecisset, ei noxæ esset. Augusto quanto admirabilior hæc integritas, invictusque adversus omnem cupiditatem, & gratiam animus erat, eò acrius objecturum se conatibus suis eum suspicabatur. Laudibus igitur eum ferrè, industriam, prudentiam, fidem, pietatem omni sermone prædicare; traditos, commendatosque ab

eo augere, ornareque, hæreticos edictis coercere; denique ut cum Senatore Regni sui de Republica conferre, consilium exquirere, & plerumque uti. Hæc incusserant metum Reginae, ne Commendonus ad juvandum inceptum Regis suscepisset, quam illi suspicionem malevoli quidam inculcaverant; cujus ignarus Commendonus rediens à Russia Radomiam, ad visendam eam, etsi suspectum id Regi intelligebat, diver- tit. Benignè admodum hospitio acceptus, post epulas remotis arbitris Regina omnia, quæ machinari Regem senserat, Commendonum edocuit, quæque sibi objicerentur refutavit: inde quantà injuriâ, & quàm indignè afficeretur, multis cum lachrymis exposuit: Regis nomen nunquam aliter quàm summo cum honore usurpans, omnemque ab eo culpam in quosdam, qui plurimum gratiâ malis artibus quæsitâ apud eum valerent, avertens. Commendonus bonum animum habere eam, & causæ, & innocentiae suæ fidere jussit, sibi & ante omnia explorata, & præparatos è Catholicis probos, & recti amantes, qui si moliti aliquid adversus eam hæretici fuerint, se eis audacter opponant, nec vlla in re officio suo se defuturum. Hac mota oratione Regina simpliciter aperuit quæ delata ad se de illo essent. Per eum cum Pontifice Maximo de suo dirimendo matrimonio agi jam cœptum, atque ipsum, quo Regi gratificetur, huic rei favere, neque si adversaretur tanto in honore, at-

que dignitate apud impotentem cupiditatis hujus futurum, quæ tamen nec credita ab se esse, cum contraria famæ sint, quæ de ejus integritate, ac religione circumferretur, nec celare eum voluisse. Pauca adversus hæc Commendonus: atque illud primum sanctè affirmat, se cum Rege ea de re verbum nullum vnquam esse locutum; cæterum ad se quod attinet, sic vitam instituisse, ut non opinantium, aut obtrectantium sermonibus, sed rectæ mentis conscientiam staret, & in omni negotio fidem suam rebus quam verbis purgatam, probatamque mallet: Quæ Cæsari fratri, quæ familiæ vniuersæ cum Pontifice Maximo gratia, & benevolentia intercederet, & cum parente suo viro optimo, & sanctissimo intercessisset, satis quidem ab hoc metu securam eam reddere debuisse. Sed Pontificis ipsius fide multò securiorem esse eam debere, qui quod divinam vim, atque sanctitatem habet, id ut rescinderet, nullius mortalis gratiæ, aut dignitati daturus vnquam esset. Tum verò Regina dextram ejus amplexa effuso fletu, per sacerdotium, quo præditus esset, per virtutem ejus, nomenque, & existimationem, quam partam apud omnes bonos haberet, per parentis sui memoriam, cui charus ipse in primis fuisset, orare eum, atque obsecrare instituit, ut solitudini suæ subveniret, seque indignè proditam, desertam, abjectamque ab omnibus vnus pro officio, & fide sua tuendam susciperet, atque hæc ad eum demissè: & tam

crebris inter fletum, lacrymâsque singultibus egit, ut Commendonum tam claræ, tantique fastigii feminæ miseratio confunderet. Consolatus eam, suamque illi fidem, studium, diligentiam non defuturum pollicitus discessit. Petricoviæ Rex cum frequens Concilium convenisset per eos, quibus data provincia erat, quod antè diu concoxerat; occulteque habuerat, consilium proferre institit. Bifariam Poloni de Republica coeunt. Rex cum Senatu, in quem Episcopis, Palatinis, Castellanis (hæc sunt honorum, & magistratuum vocabula apud eos) jus est veniendi, centum & quinquaginta ferme hominibus, cum omnes adsunt, quod haud scio an vnquam accidat, consultat. Equites, quo ex ordine Senatores leguntur è singulis regionibus (in plures autem Poloniæ Regnum dividitur) binos, ternosque, aut plures etiam Legatos ad Concilium mittunt, qui de Republica in medium consultant (terrestres Nuncios ipsi appellant) ii separatim conveniunt, & quæ visa fuerint ad Regem, & Senatum referunt. Hi nuncii initio ad id modò mittebantur ad Concilia, ut decreta Senatus domum ad suos renunciarent: sed sub Augusto novam, & veluti Tribunitiam potestatem invaserant, cum ex licentia sacrorum audaciores ad omnia facti fuerint, ipso fovente eos Augusto, minuere dignitatem Senatus optante, & ipse cupiditatibus suis licentiùs indulgere. Hinc citiùs, quàm ipsi sperassent, omnis ferme Respublica

sub arbitrium Equitum iit : non tributa decerni , nisi accepissent , non leges fieri , quas ipsi non probassent , nihil denique pati in Republica , nisi ex auctoritate , & libidine eorum agi , omnibus aliis intercedere ; nec dicto audientem fore nobilitatem denunciare. Ipse interdum Senatus , penes quem publici Consilii majestas , correptus , atque acribus verbis objurgatus ab iis est. Quin Senatorum quidam omisso , amplissimo ordine transire ad Equites , crearique Nuncii malebant , quò populares haberentur , plúsque in Republica pollerent , & vnus , qui cohibere vim eorum poterat , Rex , incitabat. Inter hos Commendonus è Catholicis acerrimum , atque optimum quemque familiaritate , & benevolentia conjunctum habebat , à quibus & de rebus , quæ religionis causam attingerent , edocebatur , & ipsi consilia cum eo conferebant. Itaque cum referente Ostrorogio quodam disertio homine , ac nobili in primis viro , & summo hæretico , de Regina agi cœptum esset , quâ sterili , ac filios non gignente Reipublicæ opus non esse injecerat ; adversantibus , qui à Commendono instructi erant , magnis contentionibus est certatum. Ad extremum & hæretici tenuère vti rogaretur Rex , vt in gratiam cum Regina rediret , cumque ea conjunctè , & amanter viveret , neque liberorum spem suis præcideret ; & Catholici , vt omnis repudii , dirimendique matrimonii mentio omitteretur. Ut ventum in Senatum est ( in quo Rex

de industria adesse noluit, seu pudore abstergitus, sive ex dictis Nunciorum, quæ respondenda sibi essent, meditaturus) idem Ostrorogius summam Reipublicæ agi præfatus, copiosâ oratione Senat-  
 um est adhortatus, Ut non præsentibus modò re-  
 bus consulerent, sed longè in posterum, quod sa-  
 pientiam eorum deceret, prospicerent. Vivo Re-  
 ge non alium rectorem desiderare Rempublicam,  
 sed hominem eum, & progressum ætate, & mor-  
 ti etiam obnoxium: Rempublicam æternam esse  
 oportere, quam, si quid Regi humanitus acci-  
 deret, in cujus manus venturam? Sic eum de se,  
 sic majores ejus meritos, ut non ipsum modò re-  
 gnare, sed in ipsius manere domo Regnum ve-  
 lint, quod quæ fieri ipso filios non suscipiente  
 posse? Filios porro qui suscipiat tertium jam an-  
 num sepositâ, & procul habitâ vxore? ipsorum  
 esse partes, qui parentum sanctitatem apud Re-  
 gem meritò obtinerent, cum in gratiam cum Re-  
 gina reducere: eodem tempore & Poloniæ po-  
 pulis spem propagandæ Regiæ stirpis ostendere,  
 & exemplum parum integrè culti conjugii ab ho-  
 minum oculis amovere; ne spretum inde in ma-  
 lum publicum erumperet. Et paucos hæc quò  
 spectaret oratio, fallebat, quòd gravis jam esse  
 hujus rei fama cœperat, & ut assentatio, & ne-  
 gligentia publicè ferè prævalent, etiam qui Re-  
 ginæ injuriâ movebantur, respectu Regis silebant.  
 Ucangius, qui Senatus ob Archiepiscopalem di-  
 gnitatem erat princeps, sequenti die in Senatu,

quæ Equites movissent , exposuit Regi , adjecit-  
 que Senatus verbis , quæ apta rei sunt visa. Rex  
 ad mœstitiam compositus posse ab se & Reipu-  
 blicæ occupationes opponi , quibus curis disten-  
 tus per hoc omne tempus fuit , & morem majo-  
 rum , quibus placuisset Reginas à publicis con-  
 siliis abesse , quæstosque sæpe multos matrem  
 suam , dum vixit , nimis se publicis rebus im-  
 miscere solitam , quòd ferè secuta virum , fi-  
 liumque Concilia Regni habentes sit , sed prom-  
 pturum se apud eos simpliciter , quæ animum  
 » obturbant suum. A probis , & in scientia divina-  
 » rum rerum apprimè versatis hominibus injectam  
 » sibi religionem esse , negantibus justì conjugii  
 » jus sibi esse cum Regina , cujus sororem antea in  
 » matrimonio habuisset. Hinc se vehementi con-  
 » siliari curâ , ne incestis implicitus , & pollutus  
 » nuptiis , Dei iram in se quotidie magis incitaret ,  
 » petere ab iis , ut se consilio juvarent. Respon-  
 sum ab Ucangio rem non esse hujusmodi , de  
 qua statim dicendæ sententiæ viderentur. Ita  
 spatium ad cogitandum , componendumque con-  
 silium est sumptum. Ucangius Episcopos om-  
 nes , qui tum præsentés erant , & præterea ex sa-  
 cerdotum ordine quicumque aliquam doctrinæ  
 - opinionem in sacrarum litterarum studiis habe-  
 rent , convocavit in Templum , & ad Commen-  
 donum misit simul significatum , de qua re id  
 Concilium esset habiturus , simul quæsitum , an  
 ipse adesse vellet , qui cum maximè velle respon-  
 disset ,



disset, sequenti die manè summo in Templum perrexit: Ventum ad certamen, idque vni sibi excipiendum, sustinendumque esse existimans, quando Episcoporum in aliis animus, & audacia, in aliis fides desideraretur. Consedit medius inter Episcopos Commendonus, in eum omnium oculis, auribusque intentis. Tum Ucangius Regem cum se solvi non potuisse existimet, divinâ lege, quæ est de matrimoniis inter conjunctos affinitate, quanta illi cum Regina esset, non ineundis, statuisset cum ea sibi divortium faciendum esse. Hæc dicentem Nicolaus Volcius Uladislaviensium Episcopus interpellavit, negans Regem ita esse locutum. Tum Padnevius Cracoviensium Episcopus Regem ait admonitum à suis, oratumque, ut cum Regina pro conjugii sanctitate, quo obstricti inter se essent, viveret, objecisset religionem, quâ se diceret deterreri, propterea quòd vereretur, ne lege, quæ matrimonio inter se tam propinquos jungi verat, ita tenerentur mortales, ut eâ exsolvi vlllo modo ipse potuerit; proinde Episcoporum de eo sententiam rogasse, ut eorum potissimum consilio vteretur, qui divinarum rerum, & sacrorum interpretes sunt constituti. Id excipiens Ucangius Commendonum oravit, ut ipse eos doceret, quid consilii ad Regem super tantâ re afferrent. Ille nihil cunctatus, ac si rem in tam celebri, ac frequenti cœtu explicuisset, seque palam indicasset, fissi vel ruentem jam posse sperans. Et rem Rex,

Bb

» inquit , rite , & sapienter fecit , qui de quo illi  
» incussa religio fuit , haud alios , quàm Episcopos  
» consulere elegit ; & ego à vobis statim ei occur-  
» sum , omnémque ex animo ejus scrupulum con-  
» tinuò erutum mallem , quàm de re minimè du-  
» bia deliberando spèciem dubitantium præbere ,  
» & Regis augere hæitationem : Matrimonium  
» rem inter mortales sanctissimam esse , & JESU  
» CHRISTI voce sancitum , & præceptum , vt  
» quos Deus conjunxit , homo non separet. Pau-  
» lum hîc orationem interpellans Uçangius : Re-  
» cte , inquit , sed , vt ego audiui , est apud Juris-  
» consultos , quod initio constare non potuit , id  
» ne tempore quidem perfici , aut invalescere. At-  
» qui , inquit Commendonus , hæc inter propin-  
» quos conjugia maximè constare , & jungi initio  
» poterant , nullo enim vel Dei jussu , vel naturæ  
» lege , sed tantùm instituto , ac decreto Ecclesiæ  
» prohibentur , cui cùm in honorem duorum Re-  
» gum Pontifex Maximus jam derogavit , tum  
» ipsos illo decreto ampliùs non teneri : nam quod  
» Levitico præcepit Deus , Sororem vxoris tuæ in  
» pellicatum non accipies , ad hanc rem non per-  
» tinere ; subjecisse enim illico Deum , Non rele-  
» vabis turpitudinem ejus adhuc illâ vivente : & il-  
» lud in Evangelio , Non licet tibi habere vxorem  
» fratris tui , eandem rationem habere. vetantis vi-  
» væ conjugis sorori corpus miscere , aut detractam  
» fraterno lecto vxorem sibi incestis nuptiis con-  
» jungere. Ergo , inquit Uçangius , ad eundem

Pontificem Maximum est Regi confugiendum ,  
 qui quos lege solvere potuit , quâ jus ineundi ta-  
 le conjugium adimitur , profectò dirimendi quo-  
 que ex auctoritate sua conjunctos potestatem ha-  
 bebit. Longè verò aliter se res habet , inquit  
 Commendonus , nam postquàm legis , ex qua  
 jus connubii non erat , sublatâ vi , maritali se fœ-  
 dere conjunxerunt , tum verum , & justum inter-  
 cedit matrimonium , quod dirimi , aut solvi nul-  
 lius mortalis ope jam possit , tantâ est religione ,  
 ac sanctitate ab ipso Deo munitum , & confirma-  
 tum ; & potestatis quidem Pontificis fuit iis ve-  
 niam legis dare , sed devinctos jam matrimonii  
 vinculis dissolvere , nec Pontifex Maximus , nec  
 mortalium quisquam potest , quemadmodum o-  
 leum si in ignem non injicias , non incenditur ,  
 at idem si in ignem effuderis , continuò concipi-  
 t flammam , nec jam voluntate , & permissu a-  
 lieno , sed sponte , ac naturâ suâ ardet , sic vt ex-  
 imi , aut vindicari ab incendio nullo modo pos-  
 sit , nisi aut ipsum absumptum , aut ignis extin-  
 ctus fuerit. Pari ratione matrimonia inter con-  
 junctos iniri non posse Ecclesiæ lege interpositâ ,  
 sed legem si sustuleris , oleum in ignem injeceris :  
 tum rectè conjunctum conjugii fœdus naturam ,  
 aut vim suam assequitur , quæ est hujusmodi , vt  
 abrogari , aut rescindi nullâ re , nisi morte pos-  
 sit. Mulier alligata est legi , quanto tempore vir  
 ejus vivit ; quòd si dormierit vir ejus , liberata  
 est à lege , cui vult nubat. Iis qui matrimonio

„ juncti sunt , præcipio non ego , sed Dominus ;  
 „ Qui vxorem suam dimittit , & aliam duxerit , a-  
 „ dulterium committit super eam ; & si vxor dimi-  
 „ serit virum suum , & alteri nupserit , mœchatur :  
 „ quod quî fieret , si per remissum vxori nuncium  
 „ matrimonii vis solveretur ? Propter hoc dimittet  
 „ homo patrem , & matrem , & adhærebit vxori  
 „ suæ , & erunt duo in carne vna. An hac potest  
 „ necessitudine obstringi quidquam arctius ? Atque  
 „ hæc divino sunt consilio , atque voce sancitæ ma-  
 „ trimonii leges : quibus nemo mortalium manus  
 „ attulerit. Secundùm hæc Anglicas tragœdias ,  
 „ ferôsque illos casus , atque eventus Angliæ , quos  
 „ ipse cognitos habebat , recensendo ordine mul-  
 „ tis verbis copiosè , vehementer , & propè tragi-  
 „ cè exposuit , sic vt qui aderant magnopere ani-  
 „ mis commoveri , atque exhorrescere viderentur.  
 „ Adjecit , atrociam quidem hæc , & auditu gravia ef-  
 „ fe , sed eo magis deslenda , quòd Ecclesiasticis ho-  
 „ minibus , & Insulæ Archiepiscopo auctore Hen-  
 „ ricus maximè ad cupiditatem dimittendæ vxoris  
 „ esset incitatus , qui dum Regis studiis oblitus mu-  
 „ neris sui blandiuntur , & ad ejus voluntatem lo-  
 „ quendo gratiam aucupantur , nolle se commemo-  
 „ rare quas pœnas singuli Deo persolverint. Id tan-  
 „ tùm dicturum , non ipsos solum dignitate , atque  
 „ fortunis , spoliatos , sed omnem inde Ecclesiasti-  
 „ cum ordinem strage ingenti afflictum , fundituf-  
 „ que eversum in Anglia fuisse. Adjecit inde duos  
 „ Henricos ætatem nostram Reges , alterum Angliæ ,

alterum Gallia tulisse; hos dispares animis parad  
 imitandum, cavendumque exemplum homini-  
 bus præbuisse, insigni utrumque iudicio Dei no-  
 bilitatum. Gallum quidem fidei in matrimonii  
 sanctitate non violanda, quam adeò constanter  
 coluit, ut cum uxorem familiâ longè infra ma-  
 gnitudinem suam positâ duxisset, eaque quintum  
 jam annum nullum enixa partum; haud dubia  
 signa sterilitatis dedisset; nec fratres Regi essent,  
 quorum liberi exciperent, & intra domum con-  
 tinerent Regnum, & Gallia omnis charitate  
 Henrici stirpem ex eo precibus, votisque expo-  
 scere vehementer sollicitaretur, & ipsa vxor non  
 gravatè cessura thoro, seque in septa sacrarum  
 virginum additura fuerit, ne spem, optatâque  
 tot populorum vna diutiùs moraretur; tamen  
 omnibus rebus antiquiorem religionis, & con-  
 jugii fidem habuit; nec admittens quidem auri-  
 bus cohortationes eorum, qui aliter consulebant.  
 At Henricum Anglum, quem ex summo, & vir-  
 tutum ingentium gloria, & fama rerum gestarum  
 viro in sævum, atque importunum tyrannum, at-  
 que adeò in teterrimam belluam vnius sceleris fu-  
 ror commutavit, satietate vxoris, in cuius consue-  
 tudine, & convictu duodetriginta annos, liberis  
 quoque susceptis, egerat, ortam clarissimo æta-  
 tis ejus Rege matrimonio suo expulisse, agita-  
 tumque libidinum furiis, brevi aliis necatis, a-  
 liis repudiatis vxoribus sextis vsque nuptiis jura  
 conjugii violasse. Quid ergo evenit? huic ex tot

» conjugii nullam superesse prolem; illi vnicam, &  
 » diu sterilem egregiam septem liberorum sobolem  
 » peperisse, quos ille moriens superstites omnes re-  
 » liquisset; non enim effrenatâ libidine liberos, sed  
 » iusti, castęque culti matrimonii conjunctione  
 » procreari, quam Deus non ad propagandum mo-  
 » dō genus instituit, sed illius societatis, quâ ille  
 » Ecclesię suę arctissimē copulatur, & conjungi-  
 » tur, signum, atque indicium, id est, sacramen-  
 » tum esse voluit; in quo suscepti filii veri numinis,  
 » verę fidei, & pietatis cultores educantur. Proin-  
 » de mitterent ipsi has consultationes de re, quę  
 » dubitandi, aut deliberandi causam non habet,  
 » quibus alitur id malum, non discutitur; & ab  
 » initio præciderent hanc in Regis animo cogita-  
 » tionem, & radicitus evellerent, ne stirpes rena-  
 » sci vnquam possent, quas qui serere conantur,  
 » eos improbos, & Regis, & Reipublicę, & bo-  
 » norum omnium hostes ducerent: dum enim per  
 » speciem religionis fallaces, & importuni homi-  
 » nes revocari student à falsi flagitii, peccatęque  
 » conscientia Regem, efficiunt, vt verē, & publico  
 » periculo peccet, piaculōque gravissimo se, Re-  
 » gnūmque obstringat. Regum cupiditates, fręna-  
 » ri, non incitari oportere; tanto enim majore vi  
 » ferri, quanto ex altiori dignitatis fastigio erum-  
 » punt, nisi amicorum occurrat fides, quę eos ve-  
 » luti fręno contineat, regātque; quod si pestifer  
 » aliquis assentator præcipites porro impulerit,  
 » haud secūs quàm saxum ex edito monte per de-

clive evolutum nullâ vi, aut conatu sistas, donec ad  
 imum vallis cum magna rerum strage pervenerit. "  
 Quo magis iis cavendum, providendumque esse "  
 id moliri, ac impellere saxum improbi assentato- "  
 res ne possint; docerent ipsi Regem nihil esse, cur "  
 animum variâ religione sollicitum habeat, quan- "  
 do in ejus, & Reginae conjugio vitii nihil sit ( quæ "  
 æquitas, & pietas ipsius est ) cum quanta sancti- "  
 tas, & quàm indissolubile vinculum ejus, intel- "  
 lexit, absisteret molestis se afflictere curis, & in "  
 Dei voluntate, & Ecclesiæ placitis acquiesceret. Hoc "  
 quo Regis animus stimulatur scrupulo crepto, "  
 omnique dubitatione ejus sedatâ, futurum ut in "  
 pristinam cum Regina gratiam rediret, vnâque "  
 concorditer, & conjunctè, ut eorum necessitudo "  
 postulat, viverent. Verùm si ab recenti hoc dissi- "  
 dio in convictum, & consuetudinem ejus reduci se "  
 continuò Rex non patietur, vim illi afferendam "  
 non videri: Tempus, Deumque; rationem, ac "  
 viam reconciliationi eorum aperiturum: ipsi piis "  
 utrumque precibus Deo commendarent, atque in- "  
 terea darent operam, ut si qua incommoda opinio, "  
 si qua offensio hæsit in Regum animis, ea stu- "  
 dio, ac sedulitate eorum tolleretur, atque sanare- "  
 tur. Adjecit postremò, ut cogitarent, quàm a- "  
 lienio tempore tam periculosas, & inutiles res "  
 moverent, cum & gravi bello à Moëcis pre- "  
 merentur, nec vllâ circa satis fideli à finitimis "  
 populis pace niti possent, & multis præterea in- "  
 testinis incommodis ægra, atque afflicta eorum "

» Respublica esset. Hæc cum Commendonus composuisset, copiosèque, & summa cum gravitate, quæ propria omnis sermonis, actionisque ejus semper fuit, disseruisset, omnium non approbatione solùm, sed admiratione constantiæ, integritatis, & prudentiæ accepta oratio est; qua & rem ipsam perspicuè, & distinctè enodatam expeditivisse est visus, & perstrictos qui Regi suasores, adjutoresque exitiosi consilii putabantur, egregiè deterruisse, atque caput ipsum hujusce mali recidisse. Nullius præterea rogata sententia est, & tergiversante, & nutu magis, & motu corporis, quàm dictis assentiente Ucanzio, Padnevius gratias Commendono, suo, & aliorum nomine amplissimis verbis egit, atque ita prorsus facturos, quemadmodum ipse censuisset, dixit. Sequentibus diebus separatim optimus quisque, qui illi concilio interfuerunt, domum ad eum venire, gratias, laudèsq; habentes, ejusque virtute liberatam eorum Rempublicam, discussumque ingens periculum prædicantes. Miserat Rex accitum eum ad se postquam à Nunciis res in Senatum adducta prodierat, & antè quoque sæpe injecerat, habere se, de quo magnopere colloqui cum eo vellet. Eo plus negotii Commendono in mitiganda, sedandaque Regis perturbatione fuit, quòd rationem omnem aspernabatur ægritudo  
 » animi sui non potentis. Præfatus id illud esse,  
 » de quo multo antè agere cum eo statuisset, cujus  
 » & prudentiæ tribueret meritò plurimum, & pietatem



ratem in Rempubicam, & in se studium, ac benevolentiam, & omni re fidem, ac religionem spectatam, cognitamque haberet, à cruciatu, quo se dies noctesque aiebat torqueri, à lachrymis, à desperatione exorsus omnia perpeti supplicia, omnia aduersa paratum subire, famam, vitam, Regnum amittere faciliùs posse, quàm cum illa vivere. Præterquam quòd ingenia, quòd mores non congruerent, ab illa se scèditate commitalis morbi, vt à peste, & morte abhorrere, & quo haud minùs terreretur, non ab vno sibi, sed à pluribus spectatæ fidei, atque doctrinæ viris affirmatùm, verum inter eos matrimonium non constare. His animum confici, ac lacerari assidue suum. Ab ipso pro amore, quo complexus eum inde ab initio adventùs ejus in Poloniam esset, pro fide, quam ei rerum suarum omnium quantam vix ulli ex intimis amicorum habuisset, petere, orare, obtestari, vt viam, & rationem, quæcumque esset, eripiendi se huic miserix aliquam inveniret: iterum sibi vitam, iterum datum Regnum existimaturum: aut ab ipso liberari se, aut à nemine posse. Nihil verò postulatum à se, nihil factum, nihil obtentum, nisi ritè, ac de Pontificis maximi voluntate, & concessu velle. Quæ cum diceret, non in vultu modò dolor animi ingens eminebat, sed crebræ etiam oculis emanabant lacrimæ. Animadvertere hîc libet, quantam fortuna facultatem Commendono in manus tradidit, Regem sibi immortalî beneficio devin-

ciendi, si modò blandiri paulùm cupidini ejus;  
 fovere spem, & offerre operam, & studium pol-  
 liceri sultinuisset : sed ejus non tam abstinentia,  
 constantiaque tentata est, quàm ipse simul dolo-  
 re, simul difficultate hæc audiens afficiebatur.  
 Tam amanter animum profundenti in se Regi  
 adversari durum, atque inhumanum, adeò impo-  
 tentem, inflammatumque, ac propè affectu ni-  
 mio amentem mitigare, ad rationem, ad consi-  
 lium revocare maximè arduum, & spissum vide-  
 batur. In re tam ancipiti ab integritate, atque  
 fide sua subsidium petiit; & summis humanita-  
 » ris meritis Regis in se prædicatis, nec vlli se, qui  
 » majorem ex casu ejus dolorem caperet, professus  
 » concedere locum, qui sibi vnicus daretur, gra-  
 » tiam ei aliquam referendi, & suam in eum fidem  
 » & pietatem testandi, prætermitti à se non debe-  
 » re. Reges quò majore potestate, & copiâ rerum  
 » omnium cæteris hominibus præstent, eò ferè ma-  
 » gis ab amicis, à quibus vera audiant, inopes es-  
 » se. Nam probos quoque, & constantes viros su-  
 » bigi cupidine, aliisq; auctoritate, & opibus,  
 » quæ Regum gratiâ parantur, excellendi, & nul-  
 » lã re faciliùs, quàm ad alterius voluntatem lo-  
 » quendo, assequi. Hinc omnia auribus dari, ni-  
 » hil veritati: Hinc sæpe magnos Reges in summa  
 » veri ignorance versari, atque ex eo innumera-  
 » bilia peccata oriri, validissimâque Regna sæpiùs  
 » perniciosis adulantium illecebris, quàm hostium  
 » armis esse subversa. At sibi stare cum Regem,

cujus tanta haberet benignitatis & amoris officia, blandâ, & ad gratiam compositâ oratione non fallere. Si res facultatem haberet, cujus ille studio tam vehementi teneretur, nullius operam illi promptiorem fore, cum verò ejus ne fingi quidem spes vlla possit, cur eam alat cogitationem, quæ Regi & curam, ægritudinẽque augeat, & periculum creet? cur ut placitura loquatur, vera, atque vtilia fileat, in quo & ipse à fide, atque officio discederet, & Regem humanissimè de se meritum non turpi solum, sed pestifera assentatione decipiat? In ipsos inde Nuncios acriter est invecus, negans eos aut Regis, aut Rei publicæ studio hæc movere, sed locum turbandi præsentem rerum statum quærere: Nuncios eos appellari, quia legati à sua quisque civitate ad Concilium sint, cum certis præfinitis, atque etiam scripto comprehensis mandatis, quæ mutare, à quibus discedere illis jus non esse. Juberet eorum sibi mandatorum ab singulis commentaria exhiberi, facilè deprehensurum nihil illis publicè à suis ea de re imperatum. Labem perfidiæ proximam non solum de eo, quòd justifi non sint contra civitatum voluntatem referre ad Senatum ausos, sed ex sua libidine Regem ipsum arguere, ei vivendi leges ferre, atque ejus intima domus, & lectum ipsum genialem scrutari, & si quid rixæ sibi cum vxore sit, inquirere, denique rem periculi, atque offensionis plenam ciere non veritos, qui si Regina vicem

» dolebant, aut Regem cupiebant ab inclementi in  
» illam animo, aut etiam ab errore aliquo revocare,  
» an non priùs, quod nos divinæ docent litteræ,  
» ipsum solum admonitum, & precibus cum eo  
» actum oportuit? statim nullâ modestiâ, nullo  
» more, nullo majestatis ejus respectu penè accu-  
» satoriè palam in Senatu Regem perstrinxisse; ni-  
» mirum eos aliud spectare, turbas quærere, &  
» quâ audaciâ religionem, & omnium sacrorum  
» jura violarunt, eâdem occasionem novandi in Re-  
» publica res captare, & moturos aliquid, quod  
» deinde sisti sine magno negotio non possit, nisi  
» ipse effrenatæ eorum licentiæ obviam ierit, & in-  
» tra muneris sui fines manere coëgerit. His in-  
» cusatis eadem illa repetiit, quæ nuper apud Epi-  
» scopos disseruerat de vi, ac sanctitate matrimo-  
» nii, quod semel ritè initum infringi, aut dirimi,  
» nisi morte, non potest, iis ab eo vinculis, eâ im-  
» mutabili lege esse constrictum: nec ipsum affini-  
» tate, quæ illi cum Regina erat, à conjugio ejus  
» prohiberi, quando ex auctoritat e Pontificis Ma-  
» ximi antè de jure Ecclesiastico derogatum fuerit.  
» Quod non datum à Deo (nam sic quidem attin-  
» gere, aut solvere scelus inextinguibile foret) sed ab  
» Ecclesia scitum, quo periculis, quæ maximè in  
» convictu, & domestica propin quarum consuetu-  
» dine esse videbantur, occurreretur, & peccandi  
» licentiam hominibus reprimeret, & cohiberet.  
» Aut ergo imperitissimos divinarum litterarum,  
» aut improbissimos mortalium esse, quicumque

animum ejus turbare vanâ religione his injectis  
 dubitationibus conati essent; nimirum callidos  
 homines rimatos esse Regis sensum alienatum,  
 abhorrentemque ejus à Regina animum intellexisse,  
 atque hunc ineundæ gratiæ locum nactos  
 protinus invasisse. His falsis ægri animi medicis  
 haud aliam mercedem deberi, quàm si Regi æstu,  
 ac febris ardenti gelidam aquam obtulissent, eam  
 depellendo morbo, & recreando corpori esse af-  
 firmantes: quâ avidè epotâ multò inde gravius,  
 vehementiùsque, quod ferè fit, affligeretur, at-  
 que etiam in magnum salutis, & vitæ discrimen  
 adduceretur. Quæ pœna sive temeritati, sive ma-  
 litæ negetur deberi? an ut gratiam levatæ pau-  
 lum in præsentia sitis caperet, aliquis Regem suum,  
 & in Rege Rempublicam prodat, atque in ex-  
 tremum periculum adducat? an quis mihi pu-  
 blico periculo ludat? Næ hos non amicos, non  
 salutis, non tranquillitatis suæ studiosos duxerit,  
 vanum incutientes timorem, vbi non est timor.  
 Angliæ deinde recensuit ruinas, atque Henricum  
 pari assentatorum peste corruptum, & cum  
 nobilissimo Regno perditum, ad ultimumque e-  
 xitium præcipitatum fuisse; idque ipsum postea  
 eum inter suos aliquando questum constare, &  
 quanta commutatio morum ejus secuta esset,  
 quem inter omnes ætatis suæ Reges clarissimis  
 virtutum laudibus longè præstantem, & ab tali-  
 bus corruptoribus depravatum, atque inductum  
 in tam ferum evasisse monstrum, ut truculentio-

» rem Tyrannum ne veteres quidem scriptores me-  
 » moriæ prodiderint, & quæ natura Tyrannorum  
 » est, cum cædibus suorum, rapinisque grassaretur,  
 » haud secus, quam si expilandum, vastandumque  
 » suum ipse Regnum suscepisset, adeo suspectam  
 » omnium fidem habuisse, ut ne vxoribus quidem  
 » suis, quas singulis propè annis pari incontinen-  
 » tiâ dilexit, & inconstantia abjecit, fideret; ac ne  
 » ipse quidem minus se suspectum omnibus, atque  
 » execrandum esse sentiret. Quin Gallorum ipso-  
 » rum, & quorundam Germanorum, quorum amici-  
 » tiâ se, ac fœdere junxerat, insidias timere soli-  
 » tum, & cavere omnia, & circumspicere, tam-  
 » quam si terrarum orbis ad eripiendum ei Re-  
 » gnum, & immania scelera, quæ se contamina-  
 » verat, vindicanda, conspirasset, ad omnia pave-  
 » re, & in mediis voluptatibus, in quibus assidue  
 » volutabatur, interdum subitis terroribus corripe-  
 » retur, tantisque curis, angoribus, sollicitudini-  
 » bus, suspicionibus diuturnis, nocturnisque adeo  
 » fatigaretur, interdum ut professus inter amicos  
 » sit, nihil sibi accidere posse morte optabilius.  
 » Audivit hæc attentè Augustus magno silentio,  
 » nec dicentem interpellavit unquam, sed gemitus  
 » crebros, & suspiria ab imo pectoris subinde mit-  
 » tebat, ut faciliè appareret vinci magis veritate  
 » eum, quam suam ab ipso cupiditatem vinci pos-  
 » se. Postremò, Et mihi, inquit, mori satius est,  
 » quam cum illa vivere: cui malo privato unquam  
 » nuptiæ infeliciores contigere? Conjugem non

habeo, & conjugii vinculis adstrictus teneor, & “  
 cùm præter me nulla tot Regum in Polonia stirps “  
 reliqua sit, mihi ætate, & valetudine integrâ “  
 præcisam spem liberorum cerno, quod vnicum, “  
 & domus, & vitæ solatium, & Reipublicæ stabi- “  
 limentum erat, & vnâ mecum Regum stirps, no- “  
 men familiæ est interiturum; vnus infinitæ, at- “  
 que intolerandæ miseræ, nec remedium; nec “  
 modum, nec finem invenio, cum vxore cælebs, & “  
 maritus sine vxore, prodigium, atque ostentum “  
 matrimonii futurus perpetuò sum. Hæc ingenti “  
 motu animi cùm dixisset, iterum orare, atque “  
 obsecrare Commendonum institit, vt si qua ra- “  
 tio iniri posset, sibi & Regno consuleretur; nam “  
 ad cæteram infelicitatem suam accedere studium “  
 popularium suorum, vt ipse suscipiat liberos, iis- “  
 que operam det, deque eo sæpe molestas voces “  
 auribus suis accidere. Commendonus cùm adeò “  
 impotentem cerneret, vt quas refellere rationes “  
 nequireret, eas tamen per mollitiem, atque infir- “  
 mitatem respueret, iterum hortatus est eum, Ut “  
 animum ad constantiam, firmitatēque revoca- “  
 ret, neque huic ægritudini ita succumberet, vt “  
 se de rationis, & prudentiæ statu dejici pateretur, “  
 reputaret omnino quanta, & quā ad multa per- “  
 tinens res moveretur, & quæ nunc fortuna, quæ “  
 conditio Regni sui esset: quanto intestino mor- “  
 bo laboraret turbata, & pravis opinionibus, er- “  
 roribusque omni sacrorum disciplina, & audaciâ, “  
 atque licentiâ Magistratuum, atque legum ma- “

» jestate convulsâ, & multis Principum alienatis de  
» eo decreto, quo publicis vectigalibus, bonisque  
» cedere eos coëgisset. Ad id tot propè hostes cir-  
» cumstare Poloniam, quot circâ essent finitimi  
» populi. Imminere Russiâ Vallachos, Tartaros  
» populari Podoliam, Lithuaniam gravi Moscorum  
» bello vrgeri: Regibus Suetiæ, Daniæque, Litua-  
» niam carpi, Germanos naturâ infensos ereptam  
» Prussiam fremere. Cæsarem ipsâ illâ suspitione  
» sollicitari, quòd armis se à Transilvaniæ Regulo  
» petitum Rege auctore opinetur, questumque de  
» eo apud suos ipsum non ignorare. Quid si hæc  
» insuper ignominia non illi solùm, sororique,  
» sed vniversæ Austriæ familiæ imponeretur? Ab-  
» sisteret iis consiliis, quæ se gravi curâ, & Re-  
» gnum ancipiti discrimine implicaturus esset, &  
» desineret ea sperare, quæ humanas vires exce-  
» dunt, in quo graviùs ipse, quàm Anglus Henricus  
» esset peccaturus, quòd de eo perfectum iudicium,  
» sancitâque lex fuerit, ejusque tam recenti, tam  
» insigni, atque exitus tam funesti exemplo deterri  
» omnes possint. Hæc se ei tam liberè nunquam fuisse  
» dicturum, quæ insolentia, graviâque auribus ejus  
» fore meritò suspicari posset, nisi pari & officii fi-  
» de, & pietatis studio erga ipsum afficeretur. Gra-  
» tiam se quidem ejus maximi facere, sed pluris  
» salutem, atque incolumitatem æstimare. Po-  
» stre mò Augustus, quamquam perturbatione, ac  
» dolore disrumpi videretur, tamen vim, inquit,  
» afferre insuperabilibus equidem, Commendone,  
nolo;



nolo : meo infelici fato, quando ita necesse est, «  
parebo. Tu autem cave putes tuâ me oratione, aut «  
libertate offendi : nam vt mihi gravis, atque a- «  
cerba res sit, de qua differuisti ; tuus tamen in «  
me animus, & hæc fides, & religio non iucunda «  
esse non possunt. His sermonibus sedatus non «  
nihil est Regis animus, atque in præsentia om- «  
nis ejus rei mentio omiſſa ; neque datum Nunciis  
reſponſum, neque ab iis petitum ; ita compreſſum  
eſt oriens illud incendium, quod ſi vires cepiſſet,  
ſi Commendonus paulum modò cupidinem Re-  
gis fovifſet, aut loci aliquid ſpei ei reliquiſſet,  
haud dubium erat, quin conflagraturum validum,  
ac nobile Regnum, interiturumque fuerit. A Cæ-  
ſare paulò poſt hæc ipſâ de re Legatî venêre im-  
buti eâdem de Commendono ſuſpicionem, quam  
ei falſa de ſe Regina fuerat, eorundem malevo-  
lorum, atque obtreſcatorum artificiis. Cæſaris au-  
ribus inculcatâ. Sed brevi ab Legatis ipſis non  
deprehenſa ſolùm calumnia eſt, ſed omnem e-  
rumpentis ejus flammæ impetum vnum excepif-  
ſe, vnum reſtinxifſe compertum : & magnæ ea  
de re actæ à Cæſare, Legatîſque gratiæ ; nec ab  
iis cœptum inde quidquam, aut actum in ea re,  
niſi de conſilio ejus eſt : qui cùm antea pertene-  
raſſet Regis animum, excuſato comitiali Regi-  
næ morbo, nec perpetuum eum, nec incurabilem  
eſſe oſtendens, adeo à conſuetudine ejus averſum  
animadvertit, vt auctor Legatis fuerit non ſolùm  
vt de concubitu, ſed ne de convictu quidem

mentionem ullam facerent, ne Rex si se vrgeri ad id sentiret, quod mortis instar exhorreret, præceps inde ad divortii consilia revolveretur, omnique abjecto pudore, omni spreto periculo ruere iterum inciperet. Ab Regina obsequiis, & officiis deliniendum, permulcendumque esse, donec tempore quoque ipse animus ejus molliretur, ac mitigaretur. Et parvè quidem consilio ejus Legati. Cæterùm Regina impatiens contumeliæ non multò post per speciem visendi suos, egressa Regno Viennam se ad fratrem contulit, quod à nobis inferiùs suo loco tradetur.

*FINIS LIBRI SECUNDI.*





ANTONII MARIÆ  
 GRATIANI  
 DE VITA  
 JOANNIS FRANCISCI  
 COMMENDONI  
 CARDINALIS  
 LIBER III.

*De eo in Cardinalium Collegium cooptato.*  
 CAPUT PRIMUM.



B his rebus magnum Commendoni in Polonia nomen, magna omnes ceperat admiratio, cum viri fides, religio, & constantia morum in ore erat, tum verò virtutem, industriam laudibus ferebant. Ante omnia miraculo erat cum, & Regem ab tam ef-

D d ij

frænata, atque impotenti cupiditate cohibere potuisse, & eundem ei adituū, eundem amicitia locum manere, adeò quidem integrâ gratiâ, ut etiam aucta existimatio ejus apud Augustum, majorēque in honore, ac dignatione haberi videretur, & cū hæc, tum præterea impetus hæreticorum in religionem egregiè repressi ab eo, Sacerdotes, qui perculsi, abjectique videbantur, erecti, protectique. Ad hæc multas ab illo ordine studio, ac sedulitate ejus prohibitas, ac propulsatas injurias esse; nunc ipsos excitando, animandoque Episcopos, eorūque causæ Catholicos adjungendo; nunc Regem variâ arte tractando, continendoque ne, ab officio discederet; nec parum exemplo innocentia, religionisque ex crebris cohortationibus ejus ad Ecclesiasticæ disciplinæ cultum, quæ pæne jam omnis interciderat, obsoleveratque, profectum esse passim homines sermonibus celebrabant. Haud Romæ minor fama de præclaris hisce actionibus percrebuerat, cū ipsorum prædicatione, ac litteris Polonorum, qui ad suos hæc perscribebant (est enim genus omne perquàm curiosum, & loquax, mirēque omnia observitant, nec segniùs cujusque seu bene, seu malè facta sermonibus disserunt) tum etiam ipsis Pontificis Maximi testimoniis, qui cū de susceptis à Rege, gentēque, ut supra docuimus, Tridentini Concilii decretis litteras à Commendano accepisset, recitare in Senatu apud Patres jussit; atque eas ipse verbis am-

plissimis est profecutus; eo quippe gratior, celebriorque res erat, quo plus habituram difficultatis rati erant in Regno, vbi nec vni omnia parent, nec vniversis eadem mens, idem de sacrorum jure sensus, ac plerisque etiam aversus ab Ecclesiâ, veroque animus esset. Necdum quid cæteræ Provinciæ fecissent, allatum erat, vt inde initium probandi, accipiendique Concilii leges ortum, vnde minùs tam promptum obsequium sperari poterat, læti, & Pontifex, & Romani Patres acceperint. Subsecuta & reliquarum fama actionum, & metus, quousque Rex tantâ libidine dimittendæ vxoris incensus processurus esset: & mox idem ipse metus vnus virtute, constantique prudentiâ, ac sedulitate sublatus; quâ vnâ re fatebantur omnes magno non negotio solum, sed etiam periculo Rempublicam fuisse liberatam: & actæ ob id Pontifici Maximo à Cæsare gratiæ, qui repulsam, prohibitamque ab sèque, ac sorore, & Austria familia iniquissimæ contumeliæ injuriam vnus se fidei, industriæque debere testabatur. Itaque Commendoni virtus, atque excellens in difficillimis rebus administrandis, explicandisque consilium, solertiæque in magna laude, & prædicatione erant. Sed ex præclaris hisce, & maximis pro Republicâ laboribus ad eum plurimum gloriæ, nihil fructus redibat, vt ferè virtus laudatur, & alget. Quod ferentes ægrius amicos, & industriæ præmia ambiciosi, divitibusque intercipi querentes sæpè ri-

debat Commendonus, ipsa rectè facta, eorúm-  
que conscientiam probis, ac modestis viris satis  
magna esse operæpretia differens, & mereri ho-  
nores, quàm eorum assequi ornamenta pulchrius  
esse. Ut initio ostendimus, eam ipse secutus viam,  
rationémque in Republica fuerat, vt in nullius  
se clientelam, aut fidem traderet, probatissimi  
cujusque Patrum amicitias appeteret, studens eo-  
rum sibi gratiam, & benevolentiam decori, at-  
que ornamento esse, adjiceret tamen se nemini.  
Eo fiebat, vt qui probarent, laudarent, dilige-  
rent etiam, atque ornatum cuperent multi: qui  
fufciperet, proferret, enixéque commendatione,  
ac studiis contenderet (quod sæpè pro iis fit, qui  
fortunam suam alterius opibus applicarunt) esset  
prorsus nemo, vt in Principum amicitiiis plus  
splendoris illi, quàm opis esse videretur; sed qui  
verâ virtute, ac religione nituntur, & nullas  
sui secuti spes charitate Reipublicæ communi  
saluti cum fide consulunt, ii nimirum in Dei  
tutela sunt, qui quamquam vera merces maxi-  
mis meritis ipse sit, ne tamen hoc quidem ca-  
rere splendore dignitatis, atque præstantiæ eos  
patitur: atque hinc Commendonus, & absens,  
& nihil petens, quem nec opinari poterat  
laudum, & honoris sui fautorem est nactus. Pio  
I V. Pontifici Maximo fratris priùs fortunâ,  
deinde suâ ex obscuro, atque infimo loco ad al-  
tissimum, atque summum mortalibus gradum di-  
gnitatis evecto, in tanta felicitate, proventúque

rerum nihil felicius contigisse existimare licet, quàm quòd Carolum Borromeum sororis filium habuerit, quo rerum, atque consiliorum interprete, ac ministro vteretur. Hunc ipse adolescentem claro genere, honoratâque, ac principe familiâ Mediolani ortum ab simplicitate ingenii, probitatêque tantâ charitate, atque benevolentia complexus est, vt primis Pontificatûs sui diebus lectum in amplissimum ordinem, vnum rerum summæ præposuerit: qui quidem in maxima potestate tantâ modestiâ, ac religione egit, vt avunculi studium in eo ornando, augendôque, ingentibusque instruendo opibus nimium ipse magna ex parte cohibuerit. Idem Federico fratre, quem Pontifex ad immodicam potentiam effusâ indulgentiâ efferre videbatur, defuncto, cùm se sermonibus hominum successorem fratris fortunæ, regiisque inde nuptiis commutatâ vitæ ratione destinari sensisset, nec ab tali consilio alienum Pontificis animum suspicaretur, statim sacris initiari, obstringique antevertit, atque ex eo tempore cùm totum se pietatis studiis dedisset, ad perfectam illam Christianæ disciplinæ laudem pervenit, quam admirati magis homines sunt, quàm imitari potuerunt: Nam & vivo avunculo cùm in summa gratia, & auctoritate, quâ longè omnes anteibat, summâque copia, atque affluentia rerum omnium tot eum circumstarent illecebræ voluptatum, quæ vel progressam, & confirmatam ætatem pellicere, ac labefactare potuiss-

sent, adolescenti ad edenda virtutum specimina incitamenta fuere, qui se adeo ab omni luxuriæ, & avaritiæ omnisque intemperantiæ contagione integrum præstitit, ut in moribus ejus clarum innocentiae, modestiae, ac religionis exemplum eluceret. Et mortuo deinde Pontifice ad suum munus Mediolanum profectus (erat enim civitatis ejus Archiepiscopus) omnes quibus cum largè, ac munificè avunculus cumulaverat, aut e gentibus elargitus est opes, aut sacrarum rerum cultui erogavit: ipsa etiam beneficia, quæ per multa, atque vberrimorum vectigalium habebat, novo Pontifici remisit, quo liberior vni Episcopalis officii, & sacrarum curæ vacaret: neque hæc, ut quidam per ambitionem, & gloriam; sed constanti decreto, & prorsus quomodo fieri nisi ex animo non potest, quippe fuit humanarum rerum contemptioni consonam, & æqualem vitam egit, ne eum divitis honorum quoque insignia abjeceret, haud vllâ re deterritus, quàm quod ea sibi ad exequenda Episcopalis officii munia adjumento fore putavit: quo vel maxime declarasse est visus, non famæ, atque gloriæ servitum, sed populi, quem curæ, atque fidei suæ traditum regendum suscipiebat, commoda tantum ab eo esse spectata. Atqui hujus Episcopalis officii, quod est longè omnium inter homines gravissimum, atque maximum, adeo inde omnes partes implevit, non solum sanctitate motum, ac vitæ disciplinâ, & sacrarum cultu, quibus pur-

re



rè, castèque, & summa cum religione quotidie operabatur, sed templis restituendis, ornandis, excolendis, novis ædificandis, & populorum corruptis moribus, pravisque consuetudinibus, quas temporum superiorum perversitas induxerat, & aluerat indulgentia Episcoporum, abolendis, & ad veterum institutorum rationem, normamque revocandis, ut in civitate vasta, & corruptelis referta, & diuturno peccandi usu à prisca tum vivendi, tum sacra colendi religione desuefacta, non modò libidini, luxui, ingentibusque ex omni genere vitiis, quibus præceps illa ferebatur, fræna injecerit, sed tantos exemplo virtutis, & sanctitatis suæ amores pietatis excitavit, ut nusquam plures invenias ex omni ætate, sexu, ordine, qui piis, & Christianis officiis se, operamque suam devoverint; nusquam templa frequentiori populo celebrentur, aut divinus cultus, aut sacrarum ædium administratio majore religione, sanctioribusque ceremoniis habeantur, nusquam denique Ecclesiastica disciplina sit intentior. Sed ne singula (quod longum esset) perensem, tantus vir cum in suo persequendo, atque explendo munere, tum in omni laude, & officio Christianæ religionis colendo evasit, ac tanto in iis studio, cura, labore, diligentia, assiduitate, tantòque omnis gratiæ, invidiæ, offensionis contemptu est versatus, ut illorum virorum imaginem temporibus nostris retulerit, quos propagatæ Christianæ fidei glòria, & veræ virtutis, atque in-

E c

nocentiae opinio divino numine contestata in caelestium Concilium sublato consecravit. Huic igitur dum sub avunculo rerum potiretur, cum Commendono non plus benevolentiae intercessit, quàm quantum fama; atque opinio, quae in civitate de illo erat, adjungere illi posuit; usus, & familiaritas certè nulla, nam praeferquamquod Commendoni animus ambitiosam illam rationem per assentationem insinuandi se in gratiosorum, & potentium amicitiam respuebat, iis, quas commemoravimus, legationibus obeundis, totum fermè tempus Pii Pontificatus ab Urbe, atque Italia abfuerat. Sed Borromeo inerat recti, honestique amor, cujus laudem vel in eo colebat, mirabaturque cum quo sibi nullum necessitudinis jus esset: virtutis quippe ea vis est, ut ignotis quoque studia, ac benevolentiam conciliet; Itaque apud eum ratio dignitatis, quàm ambitiosa in se observantia major ducebatur, & spectata arduis rebus, probataque fides, atque consilium Commendoni, quamvis absentis, pluris erant, quàm multorum fucata studia, à quibus quotidianis deducendi, saluandi, affectandique officii colebatur. Ad hunc Borromeum promovere, cui praepositus ab avunculo erat, referebant omnes, quicumque aliquid publicae rei gerendum accepissent. Ad eundem cum litterae quoque à Legatis, Praesidibusque Provinciarum publicè mitterentur, summum huic rei studium, curamque Commendonus est impartitus, ut quantum reli-

gionis in æbus verè, & ex fide præforibendis, tantum in explicandis diligentie adhiberet, eo quidem magis accurate, cogitatèque, quòd eo studio teneri, delectarique magnopere Borromeum à suis erat certior factus. Genus orationis secutus est (vt id quoque hoc loco attingamus) quod rebus congrueret, grave, ac serium, ab omni fūco, pigmentisque, & inani ornatu verborum longè abhorrens, quibus vñtatis, ac de medio sumptis non exquisitè delectis utebatur: In ordine; & collatione rerum, & sententiarum, vt nexæ inter se, aptæque aliæ ex aliis essent, elaboratior, quàm in ipsa expoliendâ, exornandâque oratione fuit. Nulla verò in iis prædicatio sui, nulla operæ, aut industriæ venditatio, in quo sæpe intemperanter, ac moleste jactare se quidam solent: quæ bene, atque vtiliter gesta mandatis responderent, ea ad Pontificis ipsius consilium, gloriâque vt minister referebat, studium in agendo, in renunciando verecundiam retinens, quod cæteris additum ejus laudibus fidei, integritatis, abstinentiæ, religionisque omnium sermonibus commendabatur, incredibiliter Borromei animum in Commendonum accendit, qui pariter & in administrandis rebus, & in enatrandis prudentiam, atque ingenium ejus enitere prædicabat; nec id quidem præterire juvenis consilium volumus, qui iis rebus, virtutibusque incitatus, cùm ad eam voluntatē incubuisset, vt Commendonus Cardinalis crearetur,

idque pro gratiâ, quâ apud avunculum pollebat, haud difficile fore sibi existimare posset, tamen sive à quibusdam magnæ potentiz, atque auctoritatis viris Commendoni laudibus senserat invideri, quos conatui suo adversari nolebat, seu tantum ei Reipublicæ spectata utilitas sit, nullâ sibi propriâ quæsitâ gratiâ, cogitationem hanc suam tam altè compressit, ut animadverti à nemine potuerit, ac ne ad ipsum quidem Commendonum suspicio, aut indicium ejus rei vllum permanere; ejus ne habita quidem vlla ratio fuerat in quotidiana beneficiorum largitione, cum in tenui fortuna ægrè dignitatem suam tueretur; præmia, & beneficia sæpè cupidis quibusdam, atque ambiosis auferentibus; qui omnibus occasionibus, temporibusque imminentes, omnia tendiculis circumdata egregii aucupes habent, nihil ut effugere avidas eorum manus possit. Quin Commendono tot itineribus, sumptibusque exhausto non modò pecuniæ nullum supplementum est missum, sed illa ipsa menstrua pensio ducentorum aureorum, quæ in victum est Nunciis constituta, sæpè dilata, interdum etiam nonnisi magnâ suorum diligentia à quæstoribus exacta est: adeò nihil illi ad spem ejus honoris, quo mox est affectus, ostendebatur. Sed eum haud dubiè occultâ vi divinum Numen provehebat: sub illo enim Pontifice ad amplissimum gradum pervenit, qui nec ante Pontificatum vllis sibi officiis propriè cultus; vnde jus aliquod, aut

aditum ad eam spem præsumendam habere posset, nec in Pontificatu ipso aliter illi, quàm absens per ministeria esset cognitus; scilicet, ut honor nec petenti, nec præsentì, neque ad eum ullis amicitiiis, aut ullis suffragatoribus nitenti ultro delatus insigniori gloriâ decoraretur, & dignitati habitum honorem, non gratiæ aut opibus tributum omnes faterentur. Pridie ejus diei, quo habita Cardinalium comitia sunt, commendanti hunc Borromeo perquàm accuratè, illustriæque ejus merita in Rempublicam permulta memoranti, haud aliud respondisse Pontifex dicitur, Quàm tu verò mactè virtute es fili, qui talium virorum dignitati, atque honori favens, ipsum te omni honore, ac dignitate dignissimum præstas; statimque assensus describi referrique in eorum jussit numerum, quos ex ingenio suo delegerat cooprandos, & falsus pudore affici se, qui alieno admonitu ad eum ornandum indiguisset: eo libentiùs sibi suscipi illum dixit, quòd cum quosdam minùs probatos sibi invitùs, coactùsque summis Regum precibus, studiisque esset renunciaturus, eo minùs apparitura indignitas foret, hujus velata tectaque dignitate. Nec ullius nomen majori Collegii totius approbatione est acceptum, aut pluribus laudibus ab optimo quoque Patrum cumulatam, quorum vna propè omnium vox, sententiæque fuit non plus Commendonium ex eo honore accepisse decoris, quàm ex virtute ejus excellentibusque animi, atque inge-

ni ornamentis ad ipsos, qui dedissent, redun-  
 re. Unus omnino Patrum fuit (cujus nomini,  
 quando jampridem fato est functus suo, parcere  
 placet, dum astutissimum, & pessimum genus  
 obrectandi bonis, eosque ipsorum laudibus op-  
 pugnandi prodere non pigeat) is lividi animi vi-  
 tio Commendoni honori acriter invidens, nec  
 palam ausus tantæ universi ordinis consensio-  
 ni, studioque obviam ire, propius ad Pontificis so-  
 lium accedens, (ut est callida sui occultatrix ma-  
 litia) Commendonum quidem, ait, habere eas  
 „ ingenii, doctrinæ, integritatis laudes, ut nullus  
 „ honor tantus sit, qui habitus ei ante tempus vi-  
 „ deri possit; sed tamen gravissimo tempore Rei-  
 „ publicæ in tanta eorum inopia, qui spectatâ fi-  
 „ de, atque industriâ mitti publicè extra Italiam  
 „ quò, & ad quos posceret usus, possent, virum,  
 „ & tractandi Regum animos, & exterarum rerum  
 „ longè pretiosissimum flore ætatis, & robore vale-  
 „ tudinis quantivis laboribus, aut negotiis parem  
 „ præmaturo studio honestandi egregia ejus meri-  
 „ ta non revocandum à præclaro, & multis mor-  
 „ talibus salutare industriæ, atque gloriæ cursu, ma-  
 „ joresque ex tam insigni virtute, ac pleniores fru-  
 „ ctus esse præcipiendos, & alitis interim remune-  
 „ rato ornatoque præmiis honorem purpureæ, ut  
 „ non negandum viro tali, ita Reipublicæ causâ  
 „ non nihil differendum esse videri. Ne lecturam  
 „ quidem tam impudens nocendi argumentum si-  
 „ ne risu, ac stomacho arbitror quemquam. Pon-

tificem certè & ingenii hominis, & harum artium  
 haud ignarum veterator non fefellit, quà eo per  
 risum sine responso dimisso de Commendoni Car-  
 dinalatu retulit adeò magnificis verbis, ut non  
 ornatorem modò ipsum ordinem amplissimum  
 illius viri dignitate, & decoribus, futurum, sed  
 munitiorem etiam, ac firmiorem tantæ virtutis  
 fultum præsidio diceret : atque hac ille viâ, hoc  
 maximè modo Cardinalis est factus I V. Idus Mar-  
 tii M. D. L X V. ætatis suæ altero & quadragesimo.  
 Ipse apud Polonos ignarus fortunæ muneri suo  
 intentus agebat : nihil minùs quàm honores, &  
 purpuram meditans, qui debitam sibi in necessa-  
 rias impensas mensuram pecuniam vix atque  
 ægrè exprimere esset solitus, ac sæpè domesticæ  
 difficultatis curis, tædióque angeretur, jamque  
 & rebus, & sumptibus fessus de reditu in Italiam  
 cogitabat, oraverátque per litteras Borromeum,  
 ut sibi successorem impetraret, & secessum sibi,  
 & Patavium, & otium spe, ac animo fingeat, &  
 reditum in gratiam cum litteris, & studiis suis,  
 quorum consuetudine aliquot jam annos publi-  
 cis rebus, curisque distensus perinvitus caruerat :  
 flagrabátque otio, ac studiis obsequendi deside-  
 rio, & fortè sermonem mecum ipsis de rebus in-  
 stitutum jucundè ( ut optata memorantur ) habe-  
 bat, cum ei nunciatur adesse Viennâ à Zaccha-  
 ria Delphino Episcopo Pharenfi missum cum lit-  
 teris, qui festinans adire ad ipsum posceret. Del-  
 phinus tum pari Nuncii munere apud Maximi-

lianum Cæsarem fungebatur, fuerátque iisdem comitiis Cæsaris ipsius commendatione Cardinalis renunciatus. Introductus ille Commendonigenua amplexus Cardinalem cum salutat, litteræque cum eâdem appellatione ipsi à Delphino tradit. In iis erat, tabellarium ad se ab Urbe magnâ celeritate venisse, qui se, & Commendonum in Cardinalium Collegium 1 v. Idus Martii fuisse coopertos nunciarit, idque illi Delphinus multis verbis honorificè, atque amicè, vt mos, gratulabatur. Commendonus lectâ epistolâ paulùm cogitabundus constitit: deinde lætari quidem se pro amicitia Delphini honorem magnopere dixit: cæterum de se, quando non solum litteræ sibi nullæ ab Urbe; sed ne suspicio quidem ejus rei antè allata vlla esset, efferri eam priusquam tabellarii sibi à Pontifice Maximo, aut Borromeo Cardinali venirent, nolle: nunciúmque comiter acceptum, & silere jussum ad curandum corpus dimisit, prorsus vultu eodem, ac nihil quod notari posset animo motus; quin me tam læti, tam improvisi, atque inopinati nuncii miraculo defixum, ac propè artonitum cernens primò irrisit, mox perfusum voluptate, & gaudio juveniliter gestientem corripuit, abireque, & monere illum, qui venerat, vt planè rem régeret silentio jussit. Posterâ die, ne si quid aliunde emanasset celare ipsum Regem videretur, ire me, ac nunciare illi jussit omnia vt allata sibi Viennâ essent, & vt tacitè haberet, donec ex Italia tabellarii

larii



larii venirent, orare: adeò lætus audivit ea Rex, vt quamquam maximis Commendoni meritis multò antea debitum eum esse honorem intelligeret, lætari se tamen diceret delatum ei fuisse, vt potissimum in suo Regno acciperet. Supprimendi autem rem, ne efferretur Commendonus, vt erat ad omnia cautus, hanc habuit causam; quòd nec auctori Delphino satis fideret, quem sæpè æmulatione, atque invidiâ obrectasse sibi compererat, nec erroris suspicio abesset, aut rei, aut nominis, quando nullum indicium ad se talis rei perlatum antea foret. Quintus ab adventu Viennensis Nuncii dies præterierat, mèque ejus moræ sollicitudine anxio vehementer, & propè jam spe dejecto, ipse haud aliud, quàm suo consilio silendæ rei lætabatur. Tandem adventu tabellariorum, & Fulvii Rogerii Bonoñiensis à Pontifice missi cum purpureo capitis indumento, primoque Cardinalatûs insigni, quod biretum vocant, res pervulgatur, ad eumque concurritur, cui à sacris, quibus operatus erat, Pontificis Maximi, & Borromei litteræ redduntur, honorificentissimis in se scriptæ verbis, quas tristitiæ propior, quàm gaudio legisse observantibus vultum ejus est visus. Inde gratulantium studiis benignè susceptis, cum se domum, atque in conclave recepisset, me quidem, qui solus cum eo remanseram, & amplecti dexteram, & effundere gaudium, quod animo capere vix poteram, ardebam, severitate, & constantia vultûs deterruit,

nec aliter ipse stantem, tacitumque est affatus,  
» quàm, Nobis verò, inquit, oprari Patavini otii  
» spem præcisam vides, & jam agimur, vbi alieno  
» arbitrio vivendum, & longè à portu danda ven-  
» tis in altum vela sunt. Deum precare, vt cursum  
» tenere possimus, & fluctibus, tempestatibusque  
» ne obruamur. Tum Senatores duo à Rege missi  
adfuere, qui Regem, si fratri suo is habitus honor  
esset, non plus lætitiæ capturum fuisse, quàm ex  
amplificatione illa dignitatis ejus cepisset, dixe-  
runt. Secuti inde Episcopi, reliquique Principes  
gentis, etiam ex hæreticis plerique, nec ferme  
quisquam fuit ex omni nobilitate, quæ in illo  
conventu frequentissima aderat, quingratulatum  
domum ejus veniret, tanta omnes studia in il-  
lum proficentes, vt plura nec à civibus quidem,  
aut propinquis suis expectanda ei fuisse videren-  
tur. Ipse gratias quidem omnibus egit, sed oris  
» habitum minimè lætantis ferens, tranquillis quo-  
» que, & quietis Ecclesiæ temporibus gravem, diffi-  
» cilémque muneris ejus functionem esse aiebat, per-  
» turbatis verò, ac turbidis, qualia tunc essent, longè  
» gravissimam: itaque Deum orandum, oneri feren-  
» do impar ipse ne esset. Atque in hanc sententiam  
gratulantium quoque litteris respondit; vt nihil  
ab gaudio dissolutum, nihil elatum, aut ab cæ-  
tera gravitate ejus, modestiæque alienum in di-  
ctis, factisve ejus existeret, prorsusque rem ita  
acciperet, vt eam suâ vi, ac religione, non tan-  
tùm specie, ac splendore honoris metiri videre-

tur. Facta autem illi singularis grátulatio non ab Collegio suis modò summis viris, sed ab omnibus Regulis, & Principibus Italiæ; & ab ipso etiam Cæsare perhonorificè, amantérque scriptæ litteræ sunt allatæ, qui quidem Cæsar non contentus eâ significatione litterarum, vocato ad se Venetorum Legato, gratulari se civitati ejus dixit, ad quàm non parvæ pars laudis ex Commendoni Cardinalatu rediret, cui vni confessione omnium præter virtutem ad eum consequendum honorem nihil suffragatum esset: quod cùm Legatus publicè ad Senatum scripsisset, magno ea res Commendono apud cives suos decori, ac dignitati fuit. Regis Poloniæ verba ipsa huc transferam excerpta ex ejus ad Pontificem Maximum epistola. In hoc, inquit, Joanne Francisco Com. «  
mendono, quem nuper in amplissimum Ordinem «  
legisti, incredibiliter sum lætatus respondisse opioni, & cupiditati meæ judicium tuum: Nam «  
ego maximis ejus virtutibus addictus, fueram eum «  
tibi quàm diligentissimè commendaturus, & pro «  
summo beneficio à te petiturus, vti eum hoc ipso «  
honore, qui mihi præstantibus ejus meritis videbatur deberi, rogatus quoque meo honestare «  
velles, sperans tuâ fretus benignitate te hoc mihi non negaturum, nisi huic voluntati, ac studio «  
meo moderatio ipsius, & in recusando perseverantia obstitisset. Quo mihi jucundius accidit, sapientiam tuam simul & dignitati ejus, & desiderio meo occurrisse. Ego verò non tibi solùm, «

» sed ipsi Ecclesiæ , ac Reipublicæ gratulor , ad  
 » quam non parum præsidii , atque ornamenti ex  
 » viri tantis ingenii , atque animi bonis excellen-  
 » tis , ac tot jam veræ virtutis experimentis specta-  
 » ti , ac cogniti honore videtur accessisse.

*De discessu ejus ex Polonia , & legatione ad  
 Germanos.*

## CAPUT II.

**S**EXTO post Cardinalatum mense jussus à Pon-  
 tifice Germanorum obire concilium , quod  
 Augustæ apud Vindelicos à Cæsare indictum erat ,  
 è Polonia discessit , Rege , ac Principibus gentis  
 certatini officiis , atque honore abeuntem profe-  
 quentibus. Pragam ( Bohemiæ caput est ) adve-  
 nienti obviam progressus Archiepiscopus Pragen-  
 sium , Pium IV. Pontificem Maximum ad v. Idus  
 Decembris diem suum obiisse nunciavit , & mox  
 tabellarius ab Urbe magnâ celeritate missus à  
 Carolo Borromeo , & Marco Altempzio Cardi-  
 nalibus , Pontificis sororum filiis cum litteris af-  
 fuit , quibus magnopere illi à Commendono pe-  
 tebant , vt omnibus rebus posthabitis , Romam  
 ad comitia adcurreret. Censentibus omnibus eun-  
 dum , protinûsque eâdem nocte iter cum paucis  
 expeditis arripiendum ; ipse quidem vtrumque  
 cupivisset , & interesse comitiis , & perstudiosè

vocanti parere Borromeo : sed & Germanos ex occasione molituros adversus jura sacrorum aliquid in eo conventu rebatur , & Cæsarem , nisi custos ei aliquis , ac monitor esset appositus , haud satis per se impetunt eorum propulsatum existimabat , & antea dissimulationis , & negligentiae in ea re suspectum , & tum etiam obnoxium Germanis , quorum opem implorabat ad arcendam Turcarum vim , à quibus sævo bello ab Ungaria petebatur. Deliberanti privatis rationibus , officioque Respublica antiquior , potiorque fuit ; statuitque non antè redire in Italiam , quàm Cæsarem convenisset , & privatim , quando Legati auctoritas Pontificis morte interciderat , eum & muneris sui defendendæ religionis , & consiliorum , quæ hæretici haberent , admonere. Triduum Pragæ agendi , colendique causâ diem natalem Christi commoratur ; inde profectus , superatis Hirciniæ saltibus , quibus Bohemia omnis ambitur , & nivibus , quibus oppleta , impeditæque per sylvam viæ erant , agrestium operâ amotis , in Germaniam ingreditur , Bavariamque petit , sperans ibi occursum se Cæsari iter Viennâ Augustam ad conventum habenti ; atque ita accidit , ut eò paulò ante Cæsarem veniret. Regnum in Bavaria tenebat Albertus , vir dignitate , opibusque , & affinitate Cæsaris , cujus sororem in matrimonio habebat , & Cæsareæ familiæ honore inter reliquos Germaniæ proceres eminens , & studio avitæ pietatis , & fidei in

Romanam Ecclesiam, & Catholicam religionem longè eminentior. Cum hoc Commendonus inde ab superiori legatione, quâ Germanorum gentem obivit, institutam benevolentiam haberet, quam & coluerat absens omnibus officiis, & Albertus ipse huic amicitia plurimum semper tribuerat, & tum novâ dignitate ob virtutem auctura ad se venientem quam potuit comiter, atque splendide hospitio accepit; ipsâ quoque opportunitate adventûs ejus lætatus, cum domum suam initurus Cæsar adventaret. Cum igitur Commendonus cum Alberto de Republica confilia contulisset, & ab eo vehementer collaudaretur, quod non statim neglectâ, ac posthabitâ religionis causâ, cupidè Romam ad comitia properasset, Cæsar advenit magnificentiſſimo hospitio ab Alberto acceptus, qui quidem equo discedens, cum opperientem se in vestibulo Regiæ Commendonum aspexisset, ultro ad amplectendum eum accurrens, & perquam familiariter ap-  
 „ pellans, Tu verò, inquit, hîc frigido in cælo  
 „ nobiscum moraris, at Roma interea magno æstu  
 „ comitia calent; apprehensâque ejus dexterâ per  
 gradus unâ in ædes, atque in cubiculum ascendit, nec destitit eum, quamdiu ibi mansit, palàm magno in honore habere, cum eodem tecto uterque, iisdem quoque epulis, mensâque quotidie utebantur, cui præter ipsum, & hospitum Albertum nemo adhibebatur: cum unâ & vxor Cæsaris, & soror, & filia duæ nobiles ac-

cumberent, quarum paulò post altera Philippo, altera Carolo Hispaniarum, & Galliarum Regibus nupsere. Peracto convivio, & amoris arbitris in conclave idem Cæsar, Commendonus, & Albertus ad colloquium secedebant, multasque horas unà quotidie erant, cum multa de Polonicis rebus, de sororis suæ cum Rege dissidio quæreret Cæsar, deque eo quod ipse debere se Commendono profitebatur, memoraret, cujus studio, curaque effectum esset, ne quod impotenti cupiditate rapi videbatur, præceps iret. Multa quoque de Turcico instanti bello communicavit, rationemque cum eo iniit, quâ salvis fœderibus, quæ Regi Poloniæ essent cum Turca, aliquot ex ea gente turmæ equitum ad id bellum conduci possent. Ante omnia illum Commendonus de consiliis hæreticorum, quæ compererat, docuit, & commodâ oratione muneris eum sui admonuit, tantò tum intentius suscipiendum avitæ religionis patrocinium, tuendaque sacerdotum jura illi esse differens, quantò incommodiori tempore aggressuri ea adversarii essent, cum Pontificis Maximi morte, præfide suo, ac rectore Ecclesia, & Christiana Respublica careret, atque in eo maximè Concilio, quod ipse primum post adeptum Imperium haberet, dandum sui specimen, ac documentum, quantumque in illo spei bonis esset ponendum, indicandum. Per hæc confirmato Cæsare, eoque non passurum ab se desiderari officium suum prolixè

pollicente , quartâ post adventum ejus die , cùm eâ die Commendonus esset post convivium discessurus , lavantibus manus , vt accumberent , celeritatis plenus tabellarius Cæsarem adiit , litterásque à Cosmo Medice Florentinorum Duce reddidit , quibus Michaëlem Ghislerium Alexandrinum Cardinalem Pontificem Maximum ad VIII. Idus Januarias esse renunciatum , & Pium V. appellatum scribebatur. Cæsar lectâ epistolâ , quam ipse & alium ex iis , quibus studiosè favebat , & quamvis alium , quàm Alexandrinum fieri Pontificem maluisset , cujus acres spiritus in sua dignitate tuenda , vindicandâque religionis majestate antea rumore , atque famâ acceptos , minimè opportunos consiliis , & cogitatis suis existimabat , quem quæstionibus adversus hæreticos præpositum , eas severè , atque integrè exercuisse cognoverat ; tamen dissimulato animi sensu , Commendono creationem Pontificis læto vultu enunciat , litterásque legendas tradit. Cùm discubuiissent , sermóque de novo Pontifice esset institutus , Commendonus (senserat enim ictum eo nuncio Cæsarem ) à primordiis ejus vitæ exorsus , de maximis ejus sanctitatis , atque innocentiae laudibus , quibus nullo ipsius non solùm ambitu , sed ne studio quidem , per omnes honores ad summum rerum humanarum fastigium provectus esset , ita copiosè , aptéque disleruit , vt omnes in admirationem , & venerationem ejus adduceret , omniumque animos magnâ ejus spe , ac expectatione



tionē replet; quo factō ipse statim ē convivio equos ascēdit, Romam magnis itineribus, ut Pii initiis adesset, contendens. Cāterū vix tridui iter progressō ad Oenipontem Nunciū à novo Pontifice missus cum litteris occurrit Germanicam ei legationem decernentibus; nam Pius antequam ē comitiorum conclavibus egrederetur, cum omnia strepitu, concursatione, turbāque miscerentur, nihil illo supremæ potestatis honore ullam in partem animo excus-  
sus, (tantū illi inerat roboris) jam tum curam in Rempublicam intendit, litterasque extemplo ad Commendonum dari jussit, quibus ostendit sibi placere, ut Germanorum conventui interesset Legatus. Quinquaginta Cardinales ea comitia habuerunt, in quibus erant summæ dignitatis, & omnium virtutum excellentes viri, quorum nemo non eum honorem legationis, munusque mandari sibi cupivisset, singulorumque tantum, ac tam recens in Pium extabat meritum; tamen consensu, & approbatione omnium ad Commendonum ea delata provincia est, tum opinione industriæ, prudentiæque, quæ summa de illo erat, tum quod vnus maximum gentis ejus habere vsum existimabatur. Reversus igitur Augustam Commendonus, ibi cum novæ legationis, Cardinalatūs quoque sui insignia, purpureum gale-  
rum à Pio missum de Othonis Truxii, qui idem Augustæ Episcopus erat, manibus solemniter inter-  
fra de more suscepit, Alberto Bavaro cum vxo.

re, ac liberis, multisque præterea principibus viris adstantibus, qui honestandi Commendoni, & celebrandæ rei causâ convenerant. Indixerat cum conventum Maximilianus, cum aliis de causis, tum maximè ut auxilia à Germanis impetraret adversus Solimanum Turcarum Regem, qui Ungarici Regni reliquias persequens, & Austriæ ipsi jam, Viennæque magnopere imminens, ingentes peditum, atque equitum copias, quibus à Constantinopoli in Maximilianum ferretur, parabat; quo majus religioni periculum impendere ab solitis licentiæ jura pretio mercari videbatur. Præter id ingravescentibus multis Germaniæ morbis, ut remedio occurreretur, id erat coactum concilium; quorum tamen ea vis, ea desperatio erat, ut ne remedia quidem ferre posse viderentur. Cum publicè in eo conventu de religione agere propter nimias hæreticorum opes, & pertinaciam tutum non videretur, Commendonus domi suæ Catholicorum concionem habuit, missis, qui singulos Principes convocarent; nec illi gravatè parere, quod erat ejus apud Germanos magnum nomen, magna ab superiori legatione integritatis, religionis, eloquentiæ fama. Primæ dignitatis in iis fuere Cardinales duo Otho Truxes, & Marcus Alcampius, alter Augustæ, alter Constantiæ Episcopus; & tres septemvirali honore præfulgentes, quos ipsi Electores appellant, Moguntinorum, Coloniensem, & Trevirorum Archiepiscopi; & præter hos ma-

gnæ nobilitatis, & potentia viri Albertus Bavarorum, & Gulielmus Clivensium, & Henricus Brunsvicensium Reguli, multique præterea liberarum civitatum, & absentium Episcoporum, ac Principum Legati. Ad hos orationem habuit, quâ primùm eos ad tutandam prisca religionis integritatem, propulsandisque impios hæreticorum conatus magnopere est adhortatus. Id autem fore iis haud difficile, si consentientibus studiis, constantibusque animis sese adversariis opposuissent, quos hætenus tam socordia, atque inertia nostra, & dissociata consilia, quàm vires eorum firmiores, validioresque adversus nos fecissent. Hanc verò voluntatem, animorumque consensionem, & mutuam de salute, atque incolumitate alterius curam cum præsentibus rebus salutarem fore: tum esse laudem Christianorum hominum propriam, & veram solidamque virtutum omnium radicem, ac fontem ignotum cæteris gentibus, nobis ab ipso Christo Deo indito charitatis vocabulo proditum, cujus vim nec veteres assecutos esse humanæ sapientiæ doctores, nec nisi ab iis intelligi, qui eadem in Deum fide, eodem sensu, eodem studio, atque mente conjuncti, veluti corpus vnum vni præsentī capiti, parentis Ecclesiæ Catholicæ gremio continerentur. Maxime autem ejus esse virtutis expertes hæreticorum omnes factiones, qui nomen modò charitatis suis immanibus flagitiis prætendentes, rem ipsam exploderent, rectè faciendi necessitate sublata, &

Gg ij

» ab illo capite, quod Vicarium suæ potestatis con-  
 » stituit inter homines Deus, sese præcidentes,  
 » omnia societatis, & mutæ necessitudinis vincu-  
 » la refringerent, concordiam, pacemque illam  
 » abrumperent, quam terras relinquens, in cælum  
 » abiens Christus tantopere nobis commendavit.

Cùm multa in hanc sententiam, quare magno  
 animo, communibúsque consiliis obsistendum,  
 atque obviam eundum audaciæ hæreticorum ef-  
 fet, & majestas religionis, & sua ipsorum liber-  
 tas, dignitasque piè, fortitèrque defendenda, di-  
 xisset, orationem ad Concilium Tridentinum  
 » flexit. In eo cùm sacrorum, & fidei rationem  
 » egregiè explicatam, atque institutam esse, tum  
 » morum, ac vitæ disciplinam ad prisce sanctita-  
 » tis consuetudinem revocatam, acerrimùmque  
 » telum adversariorum manibus ereptum, atque  
 » in ipsos per summam omnium flagitiorum, ac  
 » turpitudinum licentiam degentes retortum, pa-  
 » ritèrque & impiè dicta in Deum, & improbè ja-  
 » ctatas in bonos obtrectiones repulsas, ac refuta-  
 » tas esse. Susciperent ergo salutare leges, & quod  
 » sanandæ maximè Germanorum genti tot per an-  
 » nos, tantis sumptibus, tanto ab ultimis quoque  
 » terris Patrum, doctorumque virorum concursu  
 » habitum Concilium esset, ejus decretis Principes  
 » ipsi parerent, ex eorum jure rem Ecclesiasticam  
 » regerent, sancirèntque, consensum cum bonis  
 » ostenderent; impios & hæreticos contumaciæ,  
 » ac discordiis suis relinquerent, donec aut radio

diffidendi, in novásque, & contrarias quotidie “  
 sc̄ctas transeundi resipiscerent, aut in illa pravi- “  
 tate perseverantes justas pervicacis animi pœnas “  
 Deo penderent. Germani cū paulò inter se con- “  
 sultassent, Moguntinus Archiepiscopus, qui di- “  
 gnitate cæteros anteibat, de reliquorum senten- “  
 tia gratias Pontifici Maximo, atque ipsi Com- “  
 mendono egit, quòd de Germaniæ salute, deque “  
 eorum rebus tantam curam gereret, easque stu- “  
 dio, operâ, consiliis juvaret : Quæ apud ipsos de “  
 animis, voluntatibúsque jungendis, item quæ de “  
 Concilii Tridentini legibus graviter, copiosèque “  
 disseruisset, scire vera esse, & se adnixuros, ut “  
 vulneribus suis ea maximè remedia adhiberent, “  
 quæ ipse commemorasset. Scita Concilii accipe- “  
 re ipsos, sanctèque omnes polliceri ejus se jussis “  
 obtemperaturos in iis, quæ fidem, & sacrorum “  
 cultum respicerent, sine exceptione vlla, aut du- “  
 bitatione: in disciplinæ ratione quædam esse ca- “  
 pita, quibus excipi cuperent; quod in tam de- “  
 pravatis hominum moribus, tantæque licentia, “  
 ac perturbatione Germaniæ nec utile foret tum “  
 revocari, nec tutum; ad id pacatius, magisque “  
 tranquillum esset tempus opperiendum. Quæ apud “  
 ipsum eo libentiùs profiterentur, quòd sibi cum “  
 prudentissimo Germanicarum rerum esse sermo- “  
 nem scirent, quo etiam ab eo peterent, ut susce- “  
 ptum erga Germanos studium retineret, postu- “  
 larisque eorum publicis, privatisque apud Pon- “  
 tificem Maximum auctoritate suâ, gratiâque ad- “  
 G g iij

” esset , atque in præsentia , vt cœpisset , tegeret ;  
” tuereturque ; tantorum ejus in gentem suam of-  
” ficiorum perpetuam apud Germanos mansuram  
” esse memoriam. At hæretici in omnem semper  
occasionem intenti more suo multa moliebantur :  
ante omnia Maximilianum ipsum magnis polli-  
citationibus sollicitabant , vt tandem sententiam  
proferret , palàmque in partes transiret. Nam pau-  
cis antè annis hæreticorum partim spe , partim  
consuetudine corruptus , alienatè à Catholicæ pie-  
tatis fide animi haud ambigua signa dederat ,  
qui & sacris eorum interfuerat , & quemdam pro-  
fligatæ doctrinæ magistrum domi aluerat , habue-  
raturque in honore , & Viennæ in templis de divinis  
rebus concionantem frequenter audierat , nec nisi  
magno studio , atque curâ Ferdinandi patris , impri-  
mis pii , & religiosi hominis , denunciantis , eo ab-  
dicato , ad alium se filium natu minorem Impe-  
rium , atque nomen Cæsaris delaturum , à nefa-  
riæ opinionis professione est revocatus. Post mor-  
tem inde patris affectus Imperium ita vixit , vt  
dum spem sui utrique parti facere studet , omni-  
bus æquè suspectus , neutrorum gratiam tenuerit.  
Tum quidem hæretici promissa exigentes vehe-  
menter urgebant , vt jungeret se illis , & mentem  
aliquando nudaret , ac propterea extorquere ab  
eo conabantur , vt fœdera concordia , pacisque  
anno M. D. LV. inter ipsos , & Catholicos Passa-  
vii constituta , violata sæpè ab iis , tum penitus  
rescinderentur : eo enim anno quemadmodum à

Ferdinando Cæsare ab simili periculo Turcici belli copiarum, ac pecuniæ indigo expresserant, ut quibus libuisset, sacrorum ceremonias ex Augustana formula colere, atque habere jus esset; ira additum fœderi fuerat, ut qui à prisca sacrorum ratione, & Catholicæ Ecclesiæ sensu deficerent, aut omnino dissentirent, ii ne vectigalia quidem vlla, aut honores Ecclesiasticos obtinerent, aut potiri possent. Id ut antiquaretur, summis studiis hæretici contendebant; item illud, ne qui disciplinæ eorum sectatores Catholicorum imperio, ac ditioni subiecti essent, paterna bona vānum exponere, & excedere patriā, atque exulare cogerentur: cū ne graviori pœnā in eos animadverterent, ejusdem pacis legibus cautum esset. Quibus hæretici stare jam ab insita animis arrogancia, atque contumacia detrectabant, & impiè pariter, atque impudenter postulabant, ut potestas omnibus foret, quam quisque probaret opinionem habendi, & pro sua cuique religione Deum colendi, vel, si hæc non placerent, concilium ( Nationale quod appellant ) haberetur, ad quod coactum omne Germanicum nomen de universo jure sacrorum inter se constitueret. Harum rerum vtram tenuissent, amittenda Germania erat, & cuncta prædæ hæreticis futura, cuncta confuso omni humano, ac divino jure pessumitura videbantur. His conatibus, tantòque ad exitium, atque vltimum impietatis gradum ruentium hæreticorum furori vna opposita erat

Commendoni prudentia, atque industria; nec ipse rei gravissimæ defuit, aut sui dissimilis fuit, admirabili solertiâ indagando, investigandóque omnia, & auctores cujusque consilii, fautoresque, & quò eorum rationes, cogitaráque spectarent, vt si eorum cœtibus interesset, exploratum, cognitúmque habebat, & summa cum cura, atque studio omnibus eorum machinamentis, nunc hortando, monendóque Catholicos, & adversariorum dolos, fraudésque enudando, nunc deterrendo, continendóque occurrebat: tantúmque oratione, atque auctoritate cùm apud alios, tum apud Cæsarem ipsum valuit, vt & Catholici nunquam se commodiore, aut causæ æquiore Maximiliano vfos esse prædicarent, & ille negaret vnquam antea firmiores, vehementiúsque inter se consociatos Catholicos expertum esse. Ita hæreticorum spe, consiliisque frustratis, nullâ novâ re decretâ, conventum æquabiliter habitum dimisit, impetratis quæ petierat ad arcendum Germaniæ finibus Turcam, auxiliis: & Pius Pontifex quinquaginta millia nummorum aureorum tribus pensionibus solvenda Maximiliano ejus belli causâ dono dedit, quam pecuniam Commendonus Augustam ad se missam ad concilii finem, eo dimisso, omnem simul, consulto tamen prius Pontifice, Cæsari repræsentavit.





*De reditu ejus in Urbem.*

## CAPUT III.

**G**ERMANIA Venetias Junio mense venit, acceptus, cultusque à civitate cùm publicè, tum privatim omnibus honoribus; nam & Princeps cum Collegio, magnaque Senatûs parte domum ad visendum eum venit, & frequentia omnium ordinum, quamdiu Venetiis fuit, est celebratus. Quamquam haud dubiè nobilium plerique livore, atque invidia vrebantur, insueti alibi, quàm apud Patricios decora illa aspicere, & quidem Romæ æmulatione improbâ nitenti per virtutem adversati fuerant. Reliquam inde ætatem vitandis caloribus, atque animo ab assiduâ curis, laboribusque recreando, Patavini agri villas obiens egit. Incunte autumno Romam vocatu Pontificis proficiscitur: quo concursum, atque officia amicorum falleret, Urbem noctu, nec expectatus ingredi cupivit: sed vetuit Pius non decere ferens tot gentibus tanta cum fama sapientiæ, atque innocentiae peragratâ, tam bene gestâ Republicâ redeuntem, novo insuper honore fulgentem, sine solita celebritate, & obviâ itione Urbem inire. Itaque Senatu ad portam occurrente, maximè celebri comitatu in Vaticanum, atque inde ad Pium in Pontificio solio, ut mos, opperientem deducitur: magnaque fit illi ab omnibus gratu-

Hh

latio. Prædicabant vetustissimi, Romanæ aulæ neminem vnquam in eum Ordinem paribus, atque ipse, itineribus pervenisse; alios divitiis, alios claritate generis, alios gratiâ, & commendatione Regum, alios potentium studiis provectos; vnum suapte vi, ac virtute omnia adeptum, nullo aliunde præsidio, & quod mirabilius est visum, nullâ cupidine, nullo ambitu, nihil petenti vltro omnia obvenisse medio ætatis, & valetudinis flore: quæ læta maximè bonis erant, patefactum in eo virtuti aditum cernentibus. His sermonibus quantâ ante eum meminerant neminem expectatione, atque opinione virtutis celebratus, Romam est ingressus. Et Pius egregius dignitatis fautor addidit hominum inclinationi magnum momentum, nihil, quo singularem animum, atque benevolentiam testari posset, omittens. Vetus est Pontificibus Maximis mos, vt quæque incidit res, cuius aut consultatio, aut cura deleganda amicis sit, delectis è Cardinalium numero quot, & quos placitum fuerit, negotium mandare; ii, vt res poscit, ad eum, qui ordine inter illos antecedit, ad consultandum conveniunt, atque hi cœtus ab re congregationes appellantur. Post Commendoni adventum, vt expectatus videretur, septem Pius congregationes variis de rebus, vt visum è publicæ rei vsu est, instituit, singulisque Commendonum addidit: adeò vnum ad omnia ingenio validum duxit. Nec minùs frequenter arcanis consiliis summis de re-

bus adhibuit. *Ædes* in Palatio laxas imprimis , & menstruam pecuniæ pensionem in necessarios rerum vsus attribuit , donec peramplis quoque , ac diribus sacerdotiis adauxit. Et cum cæteri ferè Patrum , nisi per Magistrum cubiculi antè constituto , ac dicto tempore , ad Pontificem non adirent , ne qui per ambitionem conclavibus , foribúsque assisterent ; ( quod maiestati eorum indecorum Pius rebatur ) vnus est exemptus Commendonus , eique haud secus , quàm Alexandrino Cardinali propinquo suo quoties , & quando vellet , nullo in ea re Cubiculariorum arbitrio , aditum ad se esse Pius iussit. Itaque versa continuò in eum omnis civitas , frequentari domum , observari egressus , deduci , coli , appeti , vt quisque industriâ notus aditum ad amicitiam quærere , in ejus se fidem conferre ; commendari , probari , testimoniis juvari ab vno maximè , vel ante omnes , qui litterarum , & doctrinæ laudem haberent , ad eum confluere , eum alumnum bonarum artium , veluti auctorem fortunæ , ac patronum adoptare. At ipse tantis in se hominum studiis , tam secundâ fortunæ aurâ nihil efferri , amicis fidem , omnibus modestiam præstare , quos veris ingenii , aut animi laudibus probasset , iis ultro , atque enixè favere , adèò navatam operam non ostentans , vt multi studio , & commendatione ejus aucti , ornatique sint ignari per quem crevissent. Nec ille suarum virtutum visus constantius vllam amplecti , quàm rectè facto-

H h ij

rum conscientiam, non gloriam petere. Sic officiorum in amicos fructum in beneficentia, non in gratia ponebat, quorum cum plerique hortarentur tempore uti, & quantum se offerret potentiae, capeßere, firmare se opibus, devincire, fovere clientelas, & quamplurimos beneficiis amplecti; repulit consilium, præterquam quod moderatio moribus ejus magis congrueret, gnarus nihil tam fluxum, ac lubricum, nihil tam omnium obrectationi, atque invidiæ propositum, quàm magnorum Principum gratiam non modeste, ac temperanter habitam, & qui modicè utitur rebus, hunc fortunam in potestate habere, & incerta casuum consilio subjicere: sin prosperis ferri te finas, sæpè in adversa, atque præcipitia rapiare. Hinc quantò Pii amor intensior in dies, illustriórque, tantò ipse parcius uti, non, nisi res posceret, ac plerúmque vocatus adire, ac publicis ferè de rebus munera, beneficiáque aliis pro cujusque dignitate, sibi, quod perpetuum illi fuit, nihil vnquam petere. Rarò per Urbem; sæpè currutectus, hortos, aut in abditis locis templa invisens, cætus salutantium declinabat, aut domi studiis tempus transigebat. Quoties aut in Senatum veniendum, aut ad Pontificia sacra prodeundum esset, turbam deducèntium præmaturo egressu antevertens plerúmque vitabat, modico, ac domestico comitatu contentus: & quod omnem suspensionem cupiditatis, ambitionisque extinxit, singulis annis per causam valetudinis, vi-

randique ætate calores vrbanos, Urbe excede-  
 bat, magis non negante, quàm non ægrè feren-  
 te Pio, qui tamen cuncta illi in modestiam ver-  
 tens, gratiorem vel ex eo habebat, quòd gratiam  
 minimè affectaret; atque ille per hæc & preme-  
 re invidiam, & occurrere satietati, quam plerúm-  
 que assiduitas affert, & gratiam desiderio tueri,  
 & redintegrare videbatur. Æmulationem cum  
 Michaële Bonello Cardinali Alexandrino, quem  
 Pius ob morum, atque ingenii indolem in sum-  
 mum Ordinem cooptraverat, non tam ipsius sponte  
 juvenis, quàm aliorum instinctu motam non leni-  
 vit solùm hac moderatione, & prudentiâ; sed  
 ita discussit, vt suis quoque in rebus Alexandri-  
 nus consiliis ejus vteretur, ac præcipuum stu-  
 dium erga illum præ se ferret, appeterétque il-  
 lius auctoritate, ac testimonio laudem sibi, & com-  
 mendationem apud Pontificem tribui. Cæterùm  
 Pius, si qua gravior res incidisset, ad absentem  
 quoque per epistolam referri, & sententiam ex-  
 quiri jubebat. Nec si causâ publicæ legationis,  
 quæ Cardinalis personam posceret, incidisset, al-  
 terius operâ est vsus. Ter id munus, quod lon-  
 gè gravissimum, honestissimúmque habetur, illi  
 à Pio nunquam præsentí est mandatum.



*Secunda legatio ejus ad Cæsarem.*

## CAPUT IV.

**M**AXIMILIANUS Cæsar, five animum Lutheranae superstitionis labe infectus, eam sectam occultis studiis fovebat, five spe ingentis pecuniæ, quam ei Austriae populi, usurpato antea exemplo mercandi pretio à Regibus, quam mox Reges in ipsos exercerent, licentiam, pollicebantur, tribuere iis jus ex ritu Augustanae formulæ sacrorum ceremonias colendi statuerat. Inceptis  
» impiis titulum honestum prætendebat : Lacera-  
» ri opinionibus rem Christianam, dirisque reli-  
» gionibus convelli, infirmarique prisca pietatis  
» fidem, eoque impunitatis ventum, ut novis er-  
» roribus nullus finis, aut modus fieret, & præstare,  
» datâ vnius veniâ, cæteros submovere vi Regum,  
ac prohibere, quàm omnibus simul premi. Hæc  
vbi nunciata sunt Pio, advocat Senatum, &  
quanta res moveretur edoctis Patribus, flectit ad  
Commendoni laudes, unumque maximis Rei-  
publicæ negotiis fide, industriâ, usu parem edisse-  
rens, omnium consensu Legatum deligit, ac primo  
quoque tempore transire in Germaniam, & perge-  
re ad Cæsarem jubet, & se pestilentibus consiliis  
obicere, misso celebri tabellario, qui hæc ad eum  
perferret. Commendonus æstatem apud Veronam  
egerat, & instante jam autumno, ex consuetu-

dine redditum, in Urbem parabat, cùm ei Senatus consultum, & mandata Pontificis redduntur. Paucos dies adsciscendis comitibus, instruendoque itineri absumpsit; inde acceptâ de manu Augustini Valerii Episcopi Veronensis argenteâ cruce, quod est legationis insigne, Veronâ proficiscitur. Eâdem die ad Volariam duodecimo à Verona lapide festinus à Cæsare Nuncius cum literis occurrit, quibus magnopere petebat ab eo Cæsar, ne longius progrediretur: missurum se ad Pontificem Maximum, qui ostenderet, quàm non opportunum Reipublicæ hoc tempore Cardinalem Legatum ad se mitti: tantisper opperiretur, dum de eo, quæ Pontificis voluntas esset, cognosceret. Erant qui gerendum Cæsari morem, mandatûmque Pii Veronæ expectandum censerent: sed Commendonus negavit sibi mutare quidquam de Pontificis jussis ad alterius, quàm Pontificis ipsius nutum licere, ac missò protinus Romanam, qui à Pio sciscitaretur, quid se facere juberet, ipse viam perrexit, moderans iter, ut qui missus esset, ad Oenipontem se assequeretur: oppidum in Rheticis Alpibus quadridui iter à Tridento, Italiæque finibus dislitum; ita se mandatum munus non deserturum, & Pontificis nihilominus integram de se deliberationem fore. Oeniponti apud Ferdinandum Cæsaris fratrem esse Archiepiscopum Salisburgensem, & Albertum Ducem Baviaræ audierat; cum iis interea collocuturum, acturûmque maximè cum Alberto,

cujus auctoritatem non nihil revereri Cæsar credebatur, ut eum ab inceptis Germaniæ pestem allaturis revocare conaretur. Et dedere quidem illi ex Commendoni voluntate graves ad Maximilianum litteras, & Albertus id quoque incusavit, quod Commendonus questus apud se fuerat, adeo præposteris vivi moribus, ut commodius plerique, ac melius consilari religiones à quovis machinatore putent, quàm ex Pontificis Maximi auctoritate constitui, qui sacrorum custos, interpretæque ab ipso Deo hominibus sit datus; & Turcarum, & Barbarorum Oratores accipi cum honore, Româ venientes Legatos, amplissimæ viros dignitatis gravatè, & repugnanter admitti. Sed Pius interea, cum pariter Commendoni & firmum adversus gratiam animum, consiliûmque non parendi Cæsaris litteris, neque iter inceptum intermittendi, & in se constans, atque immotum obsequium multis verbis palàm extulisset, factumque id maximè ad voluntatem suam ostendisset, ire porrò eum, & exequi jussum imperavit. Qui inde statim profectus, navigiis ad Halam conscensis Oeno flumine, Danubiôque devectus, octavo die Viennam appulit, omnibus, quâ transiret, perditam spem, & frustra fore quemvis conatum denunciantibus, progressum esse Maximilianum, unde receptus ad pœnitentiam non esset; siquidem pactione pecuniæ, & promissis devinctâ fide nihil sibi integri fecisset.

» Postridie aditus Cæsar, qui prior non ideo optasse

se



se ait , ne Cardinalis Legatus ad se hoc tempo-  
 re veniret , quòd eam legationem abnueret ,  
 quam ipse sibi honorificam fateretur ; sed ne ea  
 in tanto Belgarum tumultu , motúque animo-  
 rum , quibus immixti plerique Germaniæ populi  
 essent , incommodam aliquam suspensionem affer-  
 ret , veritum : id quando Pontifici Maximo non  
 probasset , lætari advenisse eum , apud quem ra-  
 tionem consilii sui exponeret , quo adductus Au-  
 strios in sacrorum ceremoniis Augustanæ formulæ  
 ritu , atque jure uti passurus esset. Visum id sibi ,  
 ut in malis salubre imminentium remedium ,  
 quod pridem illæ sibi Provinciæ usurpassent juris ,  
 ac licentiæ vivendi , opinandi , statuendi ex cu-  
 jusque arbitrio de fide , & cultu sacrorum , id  
 eas permissu suo certis obstrictum legibus habe-  
 re , quæis ingruentibus quotidie novis errorum  
 monstris aditus aliquando obstrueretur. Etenim  
 tantâ tam turbulentorum errorum , ac sectarum  
 multitudine elevari omnem auctoritatem religio-  
 nis , omniâque divinarum rerum jura perverti.  
 Delectam ex cunctis à se Lutheranæ familiæ ra-  
 tionem , quòd ea minùs à Catholica pietate ,  
 propiùsque à vero abesse videretur : additurum ri-  
 rus , cultumque , & formam ceremoniarum sum-  
 ptam maximè à nobis : sic finem impiæ libidini  
 novas in singulos dies opiniones comminiscen-  
 di , dispergendisque impositurum ; & faciliùs ad  
 sanctitatem revocatum iri , si , ne longiùs à no-  
 stro more recederent , provisum foret : quippe

» depulsis aliis pestilentibus , ac mortiferis morbis ,  
» expeditam vnus haud vehementissimi curatio-  
» nem futuram. Nec se tamen ad id consilium , ni-  
» si necessitate descendisse , quòd neque quam in-  
» ireret , aliam remedii viam inuenisset , neque infinita  
» illa licentia tolerari , ac sustineri diutius jam posset.  
» Versari enim se assidue in metu , ac periculo gra-  
» vis alicujus seditionis , quæ inde haud dubiè im-  
» penderet : nec novum id à se incipi , antè à Ca-  
» rolo patruo , & Ferdinando patre , optimis Impe-  
» ratoribus , ac Romanæ Ecclesiæ , & Catholicæ fi-  
» dei reverentissimis factum ; nec verò , quòd po-  
» pulis illis semel concessum adimi non posset , id  
» quemquam arbitrari esse , qui satius non duce-  
» ret adstrictum legibus , modoque , ac specie ali-  
» qua religionis adhibita eos habere , quàm per  
» summam impunitatem polluere , inquinare , com-  
» mutare , confundere quotidie omnia , & Provin-  
» ciam Austriæ portentorum omnium , ac scelerum  
» sedem , & receptaculum fieri ; tantàmque mate-  
» riam discordiarum , tantum intestini belli semen  
» inclusum sinu fovere. Postremò testari Deum ,  
» non aliud sibi propositum , quàm vt à suorum men-  
» tibus superstitio depelleretur , omnesque ad pri-  
» scam avitæ pietatis , & Romanæ Ecclesiæ fidem  
» redirent. Hæc ferè Cæsar. Commendonus id qui-  
» dem laudare , quòd reducendos ad fidem Roma-  
» næ Ecclesiæ popularium animos , mentesque per-  
» versis erroribus exolvendas suscepisset ; idque  
» propositum consilium ab se initium haberet , mo-

dò ne falsis remediis , contrariisq̃ue insisteret ,  
 quæ augerent , & foverent , non tollerent , aut  
 levarent morbum. Cælestium fidem nullam nisi  
 incorruptam , perfectamque esse , & pietatis ratio-  
 nem cultu , & sanctitate constare , ut religioni re-  
 medium non aliter afferatur , quàm eam intemera-  
 tam in sua integritate , nitoreque habendo ; aut si  
 quid alieni moris , opinionisq̃ue irrepsit , purgan-  
 do , abolendóque putare ejus sit , qui nequaquam  
 res suâ vi , ac pondere metiatur. Dei certè jussis  
 violandis , ac multitudinis semper imperitæ , & ubi  
 legum venerationem excussit , & à vero , rectóque  
 deflexit , pessimo cuique parentis cupidinibus ob-  
 sequendo , nihil aliud , quàm affinem te culpæ fe-  
 ras , & sceleri eorum , furorisq̃ue alimenta subji-  
 cias ; cujus rei non esse longè petenda exempla :  
 quid enim hoc malum parvis ortum initiis aluif-  
 se , & ex tam parvo , & vix animadvertendo igne  
 tantum , ac tam latè fufum incendium fecisse ,  
 nisi quòd primò neglectum , deinde cùm occur-  
 sum , atque obviàm irum oportuit , præbita ma-  
 teria est ab iis , qui populorum desideria indul-  
 gentiâ lenienda , captandâque esse putaverunt ?  
 Carolum , & Ferdinandum cum iis ipsis Luthe-  
 ranis de eadem Augustana formula certis pactio-  
 nibus concordiæ causâ transegisse spe , ut credibi-  
 le est , & ipsi ferebant , cohibendi , sistendique  
 flagrantium impetum , & quotidie nascentium  
 novarum sectarum contagionem avertendi : sed  
 eventu tristi , & calamitoso ; quippe cùm omnes

» omnium disciplinarum , atque opinionum sectæ  
» in Augustanæ formulæ nomine , atque auctorita-  
» te faciliè delitescerent , cuncta ex eo depravata  
» brevè , ut nulla gens totius Germaniæ integra, nul-  
» lius diligentiam prohiberi , ne illa passim grassare-  
» tur pestis , potuerit. Atque hæc quidem sic fieri ,  
» divino numine consilia nostra humanis imbuta  
» cupiditatibus in pœnam nobis , remedia in per-  
» niciem vertente. Neque hos ipsos Imperatores  
» tamen cum iis pactionem ullam fecisse , qui pro-  
» priæ ditioni eorum subjicerentur , sed cum va-  
» lentissimis Regulis , populisque , quorum consen-  
» tientium vim , atque arma etiam timuisse non ex  
» vano videre poterat. At ejus quid simile habere  
» consilium , qui Austriis , vni non minimæ Ger-  
» maniæ genti , & ejus privatim imperio subjectæ  
» id ultro obtulerit ? At enim exclusâ multiplicium  
» sectarum multitudine , facilius sub vnam Augusta-  
» næ formulæ disciplinam coacti ad fidem inde Ca-  
» tholicæ pietatis rediguntur. Jam primum om-  
» nium ab illa regula divinitus nobis tradita non  
» esse discedendum , quâ præcipitur , ne quid ma-  
» li quorumvis bonorum spe faciamus ; quam le-  
» gem cum ad omnia pertinere , tum maximè re-  
» ligionem , & res sacras complecti , quæ cælesti  
» vi , non humanâ sapientiâ continentur : deinde  
» quod semel inutile foret , atque adeò exitu fœ-  
» dum , & perniciosum in aliis expertus sit , cur id  
» iterum in se , suisque periclitari velit ? Verùm mit-  
» tenda exempla , ubi efficacior ratio adsit. Qui ,

inquit, hoc juris, ac licentiæ à te expetunt, si  
 omnes Lutherani sunt, & placita Augustanæ for-  
 mulæ ultro complectantur, quid permissione istâ,  
 & sanctione est opus ad eos in illam sententiam  
 adducendos, aut cæterarum prohibenda, pellen-  
 dâque hæresum inventa, quæ nulla sunt? Sin, quod  
 ais, animos diversæ, & aliis aliæ terriores sectæ  
 perturbant, distrahúntque, tum tibi ea consul-  
 tatio prima occurrit, jubenti-ne sacrorum leges  
 dicto audientes futuri sint, aut, si imperium de-  
 tractent, suppetant-ne ad cogendum vires; nam  
 si tantum vel nervorum tibi, vel auctoritatis  
 apud eos est, ut quò velis flectere, aut repugnan-  
 tes vi subigere possis, haud dubium, quin tibi  
 ex illis intestabilium opinionum, atque errorum  
 tenebris eruti, ad veritatis lucem, id est, Catho-  
 licæ Ecclesiæ revocandi sint. Verum si illi con-  
 tumaciores sint, quàm ut parere tibi velint, &  
 plures, quàm ut tutum adhibere vim videatur;  
 tum ne subvnius quidem Augustanæ formulæ jus  
 redigere eos possis. Neque enim illi minùs a-  
 cerbè inter se, quàm nobiscum dissident. An  
 Calvinianos, confidentissimum, ac pervicax ge-  
 nus, qui nunc maximè obsolescente in dies Lu-  
 theri auctoritate florent, tuméntque, adduces, ut  
 alterius cujusvis placita suis præferant? aut eos no-  
 bis credis infestiores, quàm Lutheranis ipsis, aliis-  
 que ab eorum ratione discrepantibus esse? Idem  
 de Trinitariis, idem de reliquis licet judicare.  
 Sed esto, concedant omnes, consentiántque Lu-

»thero, quod nemo speret, qui hæreticorum inge-  
 »nia norit, & Augustanæ formulæ nomine cenleri  
 »velit: quem tu ex eo capias fructum? Ut quid  
 »ægro, & pluribus morbis graviter affecto ad salu-  
 »tem profuerit alios depulisse morbos, si remediis  
 »eorum gliscens reliqui vnus mortifera vis perin-  
 »de laborantem, extinguat? Quemadmodum pro-  
 »fundo in pelago pereuntem si extrahas quidem  
 »ad summum, sed mergi tamen, atque obrui aquis  
 »finas, nihilo magis vitæ ejus subuenias, quàm si  
 »abforberi voraginibus, fluctibusque patiare. Si tui  
 »hæretici, expertesque Christianæ pietatis sunt, ex  
 »Ecclesiæ navi (quâ vnâ qui vehuntur, salutistene-  
 »re cursum, atque intrare portum queunt) aut ex-  
 »ciderunt, aut se ejecerunt, nec magni refert,  
 »cujus sectæ vndis involuantur, submerganturque.  
 »Nec tu aliter salutem eorum consulas, quàm si er-  
 »rorum æstibus creptos in navim receperis; nam  
 »eos cælesti irâ in ultionem sceleris summis de re-  
 »bus discrepantes in concordiam, quæ non veri-  
 »tate nitatur, cogere nec vnquam assequare, nec  
 »tibi fas esse arbitreris. Quod enim manifestius vl-  
 »lum Dei numen, quàm à quo immissus in istos  
 »hic est dissidii furor, ut propriis odiis, senten-  
 »tiisque inter se digladiantur, & conspirati adver-  
 »sum nos de eo ipsi minimè conveniant, quo nos  
 »oppugnare contendunt? Æternam hanc hæreti-  
 »corum dissensionem Ecclesiæ pacem Augustinus  
 »summus sapientiæ atque sanctitatis auctor appel-  
 »lavit: & nos reducere eos in gratiam, concor-

diámque conemur, & Dei voluntatem, cujus illi “  
vi, atque irâ agitantur, venire contra non verea- “  
mur, & animis, rebúsque pugnantes, ipsi con- “  
sistentium speciem induendo, ultro confirme- “  
mus, & veluti armemus adversùs nos, Ecclesiám- “  
que, à qua desciverunt, quam vnam impugnant, “  
in quam omnes omnium eorum impetus ferun- “  
tur? Quid ergo si à te, tuóque imperio defecif- “  
sent hi populi, & alii vi, atque ferro, alii aliâ viâ, “  
omnes pariter te oppugnarent, tuæque vitæ, ac “  
dominationi insidiatum irent? Utrum tandem iis “  
discordantibus inter se, nullo certo duce, cui pa- “  
rerent, nullo signo, ad quod coirent, eóque minùs “  
tibi validè incumbentibus, ultro impietatis du- “  
cem, ac signiferum præbiturus ipse esses, an con- “  
scindi, collidíque, & confici suâ ipsos discordiâ “  
passurus? Tu verò etiam sponte consentientes vt “  
arte, atque consilio disjungeres, dissociarésque, “  
curam, operámque intenderes, nec quiescere pos- “  
ses, donec amoris seditionum auctoris, multi- “  
tudinem sub leges redigeres; adeò nostra nos ma- “  
gis movent, & acres nostri ultiores; quæ in Deum “  
patrantur, lentè, negligentérque accipimus. Pa- “  
tere, quæso Cæsar, me salutis tuæ imprimis, & tot “  
circà gentium causâ nihil reticere eorum, quæ “  
palàm homines loquuntur, & apertè, ac liberè “  
apud ipsum te omnia effari. Ipsi hæretici hoc jus, “  
hanc licentiam ex lege, atque ritu Augustanæ “  
formulæ vivendi pretio emptam se habere, pró- “  
que ea vigesies centies mille aureorum nummum “

» in tres proximos annos dare tibi pactos esse, ita  
» non obscurè ferunt, ut etiam, quàm sunt insolentia,  
» tanquam exprobrantes jactent; nec te tuâ  
» voluntate aut consilio, sed hujus tam grandis pecunia  
» spe captum, illectumque esse, auctores hujus  
» corruptelæ, & accusatores produnt: necdum  
» vlla firmata privilegio tua promissa habent, &  
» hos illufores, & criminatores dignitatis tuæ more  
» destè quicquam, aut obedienter acturos, & ab  
» insita arrogantia, atque contumacia discessuros  
» speras? Hos ut concilies tam perniciosi exempli  
» rem induces? cujus vel solam famam quantum  
» animorum motum in finitimis Germaniæ populis  
» fecisse, facturamque in omnibus putas?  
» quantum cupidis irritamentum, quantam bonis  
» desperationem allaturam, ut non corruptæ more,  
» & aliquâ ejus mali contagione affectæ nationes  
» accendi, irritarique, sed integræ quoque,  
» atque intactæ ad cupiditatem novarum rerum conciti,  
» & sollicitari vno hoc facto posse videantur?  
» Quid quod non solum non opportunum huic malo,  
» adeoque contrarium, atque exitiosum remedium  
» initum abs te est; sed hujusmodi, quod alterius  
» propè gravioris facinoris culpam sustineat,  
» usurpationem muneris, atque juris alieni?  
» Neque enim, Cæsar, tibi, aut ulli Regum hæc data  
» potestas est ordinandi, disponendique, aut omnino  
» attingendi res sacras, quarum jus, atque arbitrium,  
» quantum capere mortalitas potest, vnum penes esse Pontificem  
» Maximum Deus iussit:



sit : aliorum nullæ , nisi parendi sunt partes , & “  
 tuæ præterea , Regumque cæterorum tuendi , de- “  
 fendendique . Id nos non divinis modò litteris , “  
 monitisque docti sumus ; sed magnis , & quæ ter- “  
 rere omnes debeant exemplis , à Deo est affirma- “  
 tum . Proditum memoriæ est in sacris libris , cum “  
 plaustro veheretur Arca Dei , & inquietatione “  
 boûm , qui trahebant , decussa pænè concide- “  
 ret , Ozam vñum è rectoribus currûs , quò casum “  
 ejus averteret , manum Arcæ admovissè . Idque “  
 crimen , quia ille Sacerdos , & Levita non erat , “  
 & alieni muneris officium invaserat , visum est à “  
 Deo dignum , quod ille statim morte lueret : adeò “  
 divinas res non egentes humanæ opis , nec attre- “  
 ctandas prophanis manibus , consiliisque esse te- “  
 statum , sancitumque apud posteros Deus voluit . “  
 Magnum hoc , & triste abstinendi se contactu sa- “  
 crarum rerum , ac vitandæ cælestis iræ documen- “  
 tum ; sed haud minùs severum illud , & propriè “  
 ad Reges pertinens . Sublatus ex humili loco ad “  
 Regni fastigium à Deo fuerat Saül , ita partitis in- “  
 ter ipsum , & Samuelem muneribus , ut huic re- “  
 ligionis , & sacrorum jura , illi Imperium , & belli , “  
 & pacis jus essent : imminente cum innumerabili- “  
 bus copiis Philistæo hoste , indictum populis solen- “  
 ne sacrificium , sacrificiique dies dictus fuerat , “  
 quo divino propitiando Numini certæ hostiæ , ut “  
 tum mos , immolarentur ; neque enim religiosa “  
 gens sumptura aliter arma , & prælium initura e- “  
 rat , nisi tantè placato patriâ ceremoniâ Deo . Con- “

„ venerat juxtà omnium multitudo, quæ cùm diu  
 „ expectasset, nec Samuel ad constitutum adesset,  
 „ dilabi porrò domum, atque omnes abire cœpe-  
 „ rant. Tum Saül ne tanto instante ab hoste peri-  
 „ culo, à suis defereretur, rem divinam ipse pere-  
 „ git, paratâque viâctimas aris admovit, & sacri-  
 „ ficavit. Id ob piaculum, electo paulò antea ad  
 „ Regnum, clarisque victoriis nobilitato, pereum-  
 „ dem Samuelem denunciari illico jussit Deus, Re-  
 „ gnum se illi, liberisque ejus adempturum, aliâ-  
 „ que in domum translaturum: nec multò pòst vi-  
 „ ctus prælio, occisusque, excidio domûs suæ cæle-  
 „ stibus minis fidem affirmavit. Regnum ad Da-  
 „ vid æmulum ejus est delatum, quem ipse pulsum,  
 „ abjectumque, & fugâ se, ac latebris à vi, atque  
 „ injuria ægrè tutantem sæpè interficere conatus  
 „ erat. Te oro, Cæsar, obtestorque, vt hæc cælestia  
 „ præscripta, documentaque nobis erudiendis divi-  
 „ nis tradita monumentis tecum reputes, & ani-  
 „ mum ab novis, præcipitibusque consiliis ad salu-  
 „ brioribus cogitationes, ac tuâ majestate, tuo loco,  
 „ tuâ familiâ, teque denique ipso dignas recipias.  
 „ Hoc genere orationum vincebatur quidem Cæ-  
 „ sar, vt quibus seque, remque obtegeret, illi ver-  
 „ ba non suppeterent: sed contrà nummorum cu-  
 „ pidine, & hæreticorum postulationibus recepta  
 „ flagitantium, & præterea intimo, quanquam oc-  
 „ cultâ, ingentique simulatione involuto in Luthe-  
 „ ranos studio vehementer animo distrahebatur. Id  
 „ haud ignotum Commendono eo impensius cùm

ipse instare vrgeréque; tum Legatos Regum, qui aderant, submittere communem causam communibus agendam studiis docens. Et Pius Pontifex, vt erat acer religionis vindex, & vbi ea ageretur, impatiens humanarum artium, litteras ad Commendonum dederat, quibus si cunctaretur Cæsar, neque inceptis desisteret, factâ re divinâ, & eo Evangelii capite recitato: *Quicumque non rece-* “  
*perint vos, neque audierint sermones vestros,* “  
*exeuntes foras de domo, vel civitate, excutite* “  
*pulverem de pedibus vestris, & ipse abscedere* “  
 Viennâ, atque inde Nuncium abducere, & Maximiliano renunciare amicitiam jubebatur. Non-  
 dum præcisâ omnis Commendono spes erat, nec maturum ad tam abrupta consilia tempus videbatur, ex quæis oriturum haud dubiè magnum, & periculosum rerum motum prospiciebat: sed hæc Pii mandata dissimulans ipse, Maximiliano clam enunciari, deferrique per alios curavit, quo & gratiam, opinionémque temperati, & quantum per mandati muneris fidem liceret, refugientis benevolentiam inter Cæsarem, & Pontificem abrumpere, & Cæsari ipsi curam injecit nihil temerè agendi, cernendique rem sibi cum Pontifice haud segni, obnoxiove, sed Deo, causæque fidenti, & facilè contemnenti humanas rationes esse. Et labi jam pertinaciâ cœperat, cùm Commendonum omnia molientem, omnésque vndique machinas ad expugnandum admoventem etiam casus iuvit. Adfertur nuncius

conjugem Philippi Regis Hispaniarum decessisse, nullâ virilis sexûs prole relicta. Confestim in Cæsaris Regia ortus differtur in omnes sermo Annam majorem natu filiarum ejus Philippi matrimonio destinantium, avunculo neptem, nam Philippi sorore genita puella erat: vnde jungi illi, ni Pontifex Maximus nuptiis annuisset, per leges non poterant; & Maximilianus, ac numerosa filiorum soboles Hispanicis rebus incumberebat, latissimo regno cupidine, & spe imminens, si Philippus sine liberis fato concessisset: eò & filios in Hispaniam educandos miserat, & Hispanos omnes officiis, Regem obsequio demereri studebat, & ad novam spem ex non opinato exortam sibi filiam in Philippi matrimonio collocandi animum magnoperè erexerat. Arripuit occasionem Commendonus, atque hinc Hispanos, quibus tum maxime grave bellum in Belgis perfidiâ, ac defectione hæreticorum, duce Aurangio excitatum erat, docebat quantum ea Cæsaris in Lutheranos inclinatio, & permissi Augustanæ formulæ ritus addituri ponderis, momentique hæreticorum rebus essent: hinc Cæsarem monebat non alienandum tali tempore à se, domoque sua Philippi animum; quod fieri necesse esset, si, qui minimè deberet, adversarios ejus, eosdémque Catholicæ Ecclesiæ hostes fovere, confirmareque indulgendo eorum furori, & pænè causam approbando videretur. Et nactus Viennæ Philippi Legatum, hominem Belgam, priva-

tim Aurangio , & factiōi illi inimicum , eam-  
 que valescere auctu malarum opinionum intelli-  
 gentem , perpulit denunciare Regis verbis Ma-  
 ximiliano , ne consilia admitteret , quæ vim , at-  
 que opes Hispaniarum hostibus adjungerent ; ne  
 suum quidem Regem existimaturum fraterno ; &  
 mutuo in se Maximilianum esse animo , rebûsque  
 suis , quando ab eo proderetur , quem haberet  
 propinquitate , ac sanguine conjunctissimum , ali-  
 ter consulturum. Adjecit idem Legatus Com-  
 mendoni instinctu , si Pontificis Maximi auctori-  
 tatem ea in re non quanti deberet , fecisset , nun-  
 quam ab eo impetraturum , vt filiæ nuptias cum  
 Rege approbaret , & quò fieri ritè possent , eos  
 legibus solveret : quod ipsi haud paulò pluris ,  
 quàm popularium suorum pollicitationes , & quan-  
 tæcumque pecuniæ conditionem esse debere. Hæc  
 plus ponderis apud Maximilianum , quàm reli-  
 gio , atque ratio habebant. Itaque quem jus , quem  
 fas , quem officium nequierat permovere , vt to-  
 tum negotium omitteret , cùm maximè & hære-  
 tici vt in confecta re exultarent , & boni spem  
 omnem abjecissent , vocato ad se Commen-  
 dono , in auctoritate Pontificis Maximi esse se  
 pronunciavit. Quod quidem Pio adeò accidit  
 optatum , vt in Commendoni extollenda indu-  
 stria , memorandisq; apud Senatum laudibus  
 precatus Deum esse dicatur , vt cùm ipse naturæ  
 concessisset , aut illum , aut illius similem sibi suc-  
 cessorem in Pontificatu daret : ad ipsum litteras

suâ manu amantissimè scriptas misit , in quibus sæpè filium appellans , gratias illi egit , virtutè- que ejus quàm potuit amplis , atque honorificis verbis collaudavit.

---

*De negotio illi dato ordinandi rem  
Ecclesiasticam.*

C A P U T V.

**P**OST hæc Pius , qui tum maximè corruptis hominum moribus emendandis , collapsæ- que Christianæ disciplinæ non Romæ solum , sed per omnes Provincias ordinandæ animum , curamque intenderat , conandi in eo aliquid apud Germanos negotium Commendono dedit ; apud quos omnia prisca moris instituta aut intermissa obsolevisse , aut polluta , perturbatæque hæresum contagione , ac licentiâ esse didicerat. Sed ea maximè aspera , ac difficilis res fore videbatur , cùm imbecillitate hominum malâ , ac diuturnâ consuetudine depravatorum , arctasque apud veteres vivendi leges laudantium magis , quàm re imitantium , tum Principum , atque potentium iniquitate , qui maledictis incessere licentiùs viventes , quàm corrigi malle videntur : seu potentix , ac dominationis munimenta popularem nequitiam esse putant : sive humanis ingeniis par libido inest reprehendendi vitia , atque habendi ; certè iidem illi turpes , & flagitio-

sos homines vniverfos assidue increpant , & singulos sæpè pertinaciter tuentur. Horum erat Viennæ magnus numerus , ac multi in ipsius domum Cæsaris irrepsierant , fugitivi ex Italia plerique omnes : nam vt quosque in sacerdotum sodalitiis , monasteriisq̃ue legum , institutorumq̃ue tæderet , aut ob vitæ probra iudicii metus ageret , haud ferme aliò confugiebant , & suæ disciplinæ desertores aliorum quoque inquinabant mores , eo liberiùs in omnem se luxuriam , dedecusq̃ue demittentes , quo plus licentiæ , atque impunitatis erant nacti , infamiâque , & fordibus eorum etiam boni , atque integri aspergebantur ; eratq̃ue omnis propterea sacerdotum ordo in odio , & contemptu omnium , neque tam tritum , ac populare quidquam , quàm invehì in eorum nomen. Cùm ea aboleri macula , & vsus priscæ innocentiae revocari , nisi civitate improborum illâ , ac perditorum hominum colluvie purgatâ , non posse videretur : incredibile memoratu est , quot ex omni genere reperti fautores eorum sint. Ipsi ante omnes hæretici tuebantur , qui iidem maximè strepere , obrectare , insultare turpitudini eorum , & nobis objectare consueverant. Horum gratiâ , atque instinctu ipse quoque Cæsar excusando alios , aliis testimonium impartiendo omnes tegebat. Præterea & Vienna ipsa , & multæ civitates Episcopis carebant , aut si qua habebat , perinde officium eorum desiderabat ; quòd illi aulam , Maximilianumq̃ue affectantes ,

& ambitioni suæ , aut pecuniæ , aut certè longè aliis procurationibus intenti , negligebant sacrorum curam. Id adeò malum plerisque in Provinciis grassatur , in quibus Episcoporum nominatio est Regibus tributa , concessûne dicam , an socordiâ Pontificum Maximorum. Nam antè , aut à Pontificibus dabantur , aut à sacerdotum collegiis , ut quisque innocentia , ac dignitate inter eos excelleret , justis suffragiis legebantur. Ita bonis quisque artibus nitebatur , adeptique honorem etiam munus implere , ac præstare suum studebant. Nunc longè alio ex genere hominum sumuntur ; sæpè bello exercitis , veluti militare præmium , Episcopatus datur : sæpè gratiosis , aut potentibus ; interdum & fœminis adulantes Episcopi fieri merentur , quibus nullum doctrinæ , nullum pietatis studium , nulla aut scientia , aut usus earum rerum , quarum causâ is est in Christiana Republica Magistratus Deo auctore institutus. Atque ex hoc maximè fonte manasse illa pestis satis creditur , quâ multa hodie Regna deformata hæresibus , vastata civilibus bellis , & quædam etiam everfa , ac propè funditus excisa esse cernimus : quippe Episcopis officii sui aut ignaris , aut negligentibus , continuò & populorum mores prolabantur , & laxatur Ecclesiastica disciplina , & religionis cultus , quo status Rerum publicarum continetur , omnis exolvitur , convellitur , destruitur. Hinc hæresum , ac pravarum opinionum turba in Ecclesiæ claustra veluti incustodita ,



dita, & patentia irrumpit, odio, ac discordiâ, & mox cædibus, seditionibus, armis cuncta permiscet. Commendonus cum hæc apud Cæsarem sæpè disseruisset, Strigoniensibus Archiepiscopus, & Viennensibus, & aliquot Ungariæ civitatibus Episcopi vt darentur, obtinuit. Fugitivos, & maculosos aulâ, atque vrbe ejicere multò operosius fuit; aliquod tamen confidentiæ, & vitæ eorum frænum est inditum, & audacia nonnihil eo metu repressa. Templâ inde, sanctiorâque delubra adiit; cultum, ritumque sacrorum, item sacerdotes ipsos, & templorum ministros recognovit; vasa, libros, vestem, omne instrumentum, atque apparatus rei divinæ conficiendæ, rationem denique omnem habendi, administrandique res sacras inspexit: in quibus quàm multa vitiosa fierent reprehendere, quàm emendare facilius fuit. Ipse quidem in singulis fanis convocatos sacerdotes aptâ oratione appellavit, quæque in rem esse visâ sunt, monuit, multâque exemit, quædam etiam sivit, atque ad veteris normæ, ritûsque formam ordinavit. Sed omnia, quia exactor inde eorum nemo extitit, neglectui fuere. Nam Maximilianus vnicum remedium esse ægræ, ac perturbatæ Reipublicæ emendationem morum, & prisce disciplinæ restitutionem palàm verbis prædicabat; occultè nec corrigi, quæ pravè, ac perperam fierent, nec omnino mutari quicquam patiebatur: vt labi, & ruere Ecclesiasticam rem velle ab non ignaris in-

genii, atque intimi animi ejus crederetur. Profectus Viennâ Commendonus diœceses Passaviensem, & Salisburgensem, per quas illi iter fuit, curâ, ac diligentîâ eâdem, fructu, ac opere pretio majore lustravit, quòd in vtraque Episcopi probi, ac religiosi homines præerant, qui Commendoni studio non solùm adversari non sunt, sed etiam adjumento fuere; & Salisburgensis quidem Archiepiscopus etiam Concilium Provinciæ suæ, rem diu antè intermissam, illius instinctu, atque hortatu habuit, in quo multa salubriter decreta, & sancita sunt. Ad reliquos Germaniæ Episcopos litteras ex auctoritate Pontificis dedit, quibus ad vsum, cultumque antiquæ disciplinæ renovandum multis, atque accuratis verbis eos est adhortatus,

---

*De fœdere per Pontificem adversus Turcas  
içto, & opera in id à Commendo  
dono impensa.*

#### CAPUT VI.

**R**EVERSUS inde Urbem sub finem sequentis anni, qui fuit M. D. LXIX. excepit bellum, quod Selimus Rex Turcarum libidine Cyprum insulam ditioni suæ subjiciendi terrâ, marique Veneris intulit. Cui propulsando bello Pontifex Pius haud secus, quàm si eo ipse peti-

tus esset, animo, conatúque incubuit, non studio erga Venetos, quibus ad id locorum subiratum fuisse constat, sed amore Christianæ rei, quam carpi in dies, atteríque impotentibus prævalidæ gentis armis cernens, ingenti dolore, curâque sollicitabatur. Cúmque eâ tempestate Philippus, debilitatis domestico malo Gallis, vnus omnes Christianos Reges longè opibus anteiret: quippe non vniversæ modò Hispaniæ dominabatur; sed omne Belgarum nomen, quod latè multas, ac bellicosas gentes complectitur, in ditione habebat, & in Italia cùm Neapolitanum, tum Mediolanense Regnum, firmum vtrumque, atque opulentum, obtinebat, & maximè opportuna parandis, alendisque classibus Sicilia, Sardiniaque, & Baleares insulæ imperio ejus parebant, & Corsica etiam, & Ligurici maris ora, civitatique Genuensium auctoritatem ejus sequebatur: Africæ quoque injecerat manus, ædificato haud longè à ruinis antiquæ Carthaginis castello, cui ab freti faucibus, quibus impositum erat, Golettæ nomen fuit, magnóque munito opere, & Tuncetum frequentem urbem regionis ejus in fide habebat, & vicinos populos Siciliam, atque Hispaniam contra sitos à maleficio continebat. Sed præter hæc, quæ commemoravimus Regna ditia, & viris, armisque potentia, multò maximum Imperium vltra Oceanum in Occidente propagatum habebat, quod patrum nostrorum memoriâ, Christophori Columbi Liguris inge-

nium, & humano captu major audacia aperuit. Ejus Imperii terræ ignoratæ veteribus in tantam magnitudinem patere dicuntur, vt eis novi orbis nomen scriptores nostri indiderint, ex quibus auri vis ingens ad Philippum per immensa vastissimi maris spatia quotannis navibus advehebatur. Hunc igitur Regem tantis subnixum opibus vt sibi, Venetisque ad Turcicum bellum fœdere, ac societate ante omnes adjungeret, Pius initio statim est aggressus: nec ille magnopere abnuir; nam & Pontificis Maximi auctoritatem, quantum Christianum, & pium Regem decebat, reverebatur, & amplitudine suâ indignum, & sibi invidiosum fore intelligebat, si tanto impendente Christiano nomini de Barbaris periculo, ipse Reipublicæ defuisset; & præterea Pium sperabat facturum sibi potestatem ex ditibus Hispaniæ sacerdotiis pecuniam corrogandi: ita bellum gloriæ sibi magis, quàm impendio vlli, aut sumptui futurum. Quòd si Philippo vafra, & dominandi cupida Hispanorum ingenia respondissent, acri, atque huc maximè intento Pontifice, magnâ, nec dubiâ spe victoriæ gesturi cum Turcis id bellum fuisse videbantur: sed illis non tam cordi erant, vt vincerentur, aut procul Venetorum cervicibus submoverentur Turcæ, quàm vt id alerent, ducerentque bellum, cujus morâ, oneréque pressi, attenuatque Veneti ipsi opportuni sibi Italiæ Regnum affectantibus fierent. Id cum Venetos Patres non falleret, antea quoque sub Carolo

Philippi patre Hispanorum artes, & ambitiosa, atque callida consilia æquè difficili suæ Reipublicæ tempore experti, inviti, ac reluctantes adducebantur, ut se villo fœdere cum Philippo alligarent, pacemque quamvis gravibus conditionibus redemptam Hispanorum societati præferabant. Sed hæc seniorum mens erat. Juventus injuriâ, perfidiâque Barbarorum incitata decertare, ac dignitatem suam armis tueri præoptabat, fœderique favebat, de quo Romæ apud Pium ab utrisque Legatis agebatur; in quo Commendoni singularis industria, prudentiâque enituit, multique difficiles nodi expediti per eum, explicatique sunt. Nam & Veneti Legatis suis imperaverant, ut omnia cum eo communicarent, illiusque consilio maximè vterentur: & Pius neminem magis intimis rebus adhibebat. Consenserant tandem Veneti, Hispanique in certas fœderis leges, & ad eas sancendas ad Pium utrique convenerant, cum Regii Legati præsentem excipere annum cœpere, quo non satis sibi supèresse temporis ad paranda, præstandaque, quæ ex pactæ societatis conditionibus deberent, aiebant. Id verò ad eò stomachum Venetis Patribus movit, ut à belli cogitationibus ad consilia pacis protinus converterentur, ac per speciem commutandi captivos Constantinopolim mitterent, qui cum Turcis de compositione ageret. Pio eâ re incredibiliter anxio, perturbatoque Commendonus auctor fuit Marcum Antonium Columnam Ve-

netias mittendi, qui & dux à Pontifice classis delectus fuerat, & vir erat non rei militaris peritior, quàm civilibus artibus, naturalique facundiâ ad pertractandos animos hominum instructus. Ipsum verò Columnam à Pio statim proficisci jussum monuit omni ope contenderet, vt de suis postulatis ad Senatum referretur, & belli, pacisque deliberatio à decemvirum collegio, paucisque senibus mentionem omnem belli horrentibus abducta ad Senatûs cognitionem traduceretur: plus ibi ardoris, animorumque ad rem armis decernendam, ineundumque fœdus futurum. Nomina quoque Senatorum, per quos id conaretur, edidit, & Columna cùm Venetias venisset, Commendoni præceptis ita obtemperavit, vt re in Senatum deductâ tenuerit, vt abruptâ spe pacis, Veneti strenuè bellum capefferent, ac fœdus summâ Pontificis, ac totius Italiæ lætitiâ feriretur. Unde nobilis illa navalis pugna, victoriâque est parta, quæ si quantum gloriæ Christiano nomini, tantundem fructûs, atque emolumentum attulisset, non adeò nunc immanem Barbarorum potentiam timere cogeremur. Quis hujus belli imperator eligeretur multum, diuque est disceptatum. Veneti Philippi gratiam respicientem, ex ejusque pendentem fide ducem antea adversum rebus suis experti, vt Cardinalium aliquis classi præficeretur, postulabant magnâ spe, quia Pontifex Commendono vni ex omnibus Patribus plurimum tribuere videretur, nullamque

rem esse tantam, quæ ejus ingenio, ac prudentiæ non rectè committeretur; prædicaret, fore ut cum potissimum summæ rei præesse juberet; ita bellum è re publica, suæque administratum iri. Sed neque Hispani Venetum imperatorem faciliè accipiebant; & Commendonus ipse militare imperium planè aspernabatur, Piumque dubitantem, & deliberantem monebat, quàm ea procuratio, tractatióque armorum ab hominibus togatis, & sacrorum ministris aliena, abhorrénsque esset. Ita res à Cardinalibus est rejecta, & ad Joannem Austriam Philippi fratrem, si præsens bello interesset, quod Hispani pollicebantur, imperium delatum.

---

*De nova ejus ad Casarem, & Polonos  
legatione.*

## CAPUT VII.

**C**OMMENDONO aliæ impositæ partes gerendæ Reipublicæ, vnde illi magnorum laborum, sed magnæ item laudis materia est orta. Post junctum cum Philippo, & Venetis fœdus, cupiens Pius omnes in Barbaros concire, ac sollicitare Reges, & ante alios Maximilianum Casarem, & Augustum Regem Poloniæ, qui finitimi Turcarum Imperio, maximè opportuni inferendis à terra armis, atque distinendo hosti habe-

bantur, & Maximilianus à Turcis Ungariæ pulsus Regno imminere vindictæ, si daretur fortuna, videbatur, Legatum ad utrumque Commendonum creavit. Ipse ex superiorum annorum instituto vitandi urbanos calores, initio æstatis disceserat Româ, nec minùs quicquam, quàm nova itinera, novas legationes meditabatur. Et cum Pius paucis antè diebus sexdecim præstantes viros in Senatum legisset, superiorum Pontificum secutus morem haud aliis, quàm quos ipse amplissimo honore affecisset, mandaturus tam claræ, tam appetitæ legationis munus credebatur. Sed Pio omnibus rebus antiquior Reipublicæ usus, atque utilitas semper fuit, & præterquam quòd Commendonum haud secus, quàm si ab se Cardinalis factus esset, in suis habebat, nec illi fidei, industriæ, prudentiæque laudibus quemquam anteferebat, ipsum notitiâ illarum gentium, Regumque, ad quos mittebatur, facilè omnes antecellere intelligebat. Acceptâ itaque Pontificis Maximi voluntate, comitibus, rebûsque comparatis, Commendonus Veronâ, quòd ad æstatem agendam concesserat, transiit in Germaniam, ac Viennam ad Cæsarem contendit. Lætatus impensè moto à Turcis in Venetos bello Maximilianus fuerat, versam aliò eam tempestatem cernens, quæ ne in se, suumque Regnum ingrueret, vehementer timuerat. Et quemadmodum fœdus ut Veneti, & Pontifex cum Philippo jungerent, studiosè operam dederat; ita abstinere se armis, & quietem  
agere,



agere, bellumque non tam ope, quam spe sui fore, atque alere decretum habebat. Nam & ipse imbelli corpore erat, & animus ejus ad magna discrimina fatiscens calliditate, & consiliis certare, quam vi, ac ferro contendere promptior habebatur: & neque eæ vires regni sui erant, quibus tam validum hostem aggrederetur, & Germanorum auxiliis precariis, nec vnquam in tempore coeuntibus parum fidebat; quæ gens nec crescere Cæsarum opes creditur velle, & propulsando, quam inferendo bello alacrior habetur. Cùm antè de fœdere Veneti eum appellassent, nunc induciarum, quæ sibi cum Turca essent, vt dies elaberetur, expectandum sibi, nunc vt eos spe lactaret, cupidum se belli ferens, petebat, vt quæ auxilia fœderati missuri ad se essent, si bellum susciperet, promerent. Commendonus cùm ad sic affectum venisset, adventûsque sui expositâ causâ hortatus eum esset, ne occasionem, quæ ei divinitus offerretur, tot graves injurias, tot incommoda, damnâque à Turcarum gente sibi, familiæque suæ illata vlciscendi perderet, aliâque quibus permoveri eum posse arbitratus est, facundè disseruisset, benignè quidem, & cum assensu est auditus. Sed Maximilianus consilio suo insistens, varias proponere difficultates, atque eandem induciarum causam prætere, earum fidem jurejurando firmatam violare homini Christiano nefas esse dicere. Postremò expectandum sibi aiebat, quid Poloni, quid reliqui Christiani Prin-

» cipes statuerent. Id verò vt præposterum argue-  
» re Commendonus, vt Cæsarem ducem se, at-  
» que auctorem aliis Regibus adversus Christianæ  
» Reipublicæ hostes præbere, non eorum expecta-  
» re consilia debere, quippe & ejus maximè inter-  
» esse retundi, ac reprimi Barbaros, & eundem ti-  
» tulo honores reliquos anteire; vt si cessaret eo  
» tempore Pontifex Maximus, partes ipsius fuissent  
» Christianos populos litteris, legationibûsque ad  
» bellum concitare. An Polonos ab se Pii verbis ap-  
» pellatos non illico quæsituros, quid Cæsar animi,  
» quid apparatus habeat? Quibus si secuturum eum  
» aliorum consilia narret, jam nunc existimari pos-  
» se, quam ab iis spem esset relaturus. Sed quid,  
» inquit, inanes Polonorum, aliarumve gentium  
» spes, si segnis ipse sis, moliamur? Veneti ipsi, vbi  
» verba dari sibi, deferique à te accendente nuper  
» eos ad arma, & non defuturum communi Rei-  
» publicæ causæ pollicente senserint, & Turcas ter-  
» restri metu liberos, totâ mole virium in classes,  
» ac navale bellum incumbere, magnitudini peri-  
» culi succumbent, territi que suis rebus pro tem-  
» poris necessitate consulent, & quibus poterunt  
» conditionibus cum hoste pacifcentur: nec majore  
» rem quisquam proditæ Reipublicæ, & abrupti  
» novi fœderis culpam, quàm idem ru sustinebis.  
» Nam quod præterea de induciarum fide prætexere  
» libuit, id facillimè refellitur. Ac primùm quidem  
» meminisse debes, sæpè te questum apud me esse,  
» & in omnibus Germanorum conciliis professum,

nomen modò tibi induciarum cum Turcis esse, “  
 re continens bellum manere, cùm Barbari quot- “  
 annis non prædatum modò in tuos fines excur- “  
 rant, sed justâ peditum, equitumque manu ipsas “  
 quoque vrbes, ac præsidia invadant; plurimum- “  
 que negotii te in iis arcendis habere. Deinde “  
 cùm illis nullum fidei jus sanctum, cuncta com- “  
 modo, ac libidine suâ metiantur, quid attinet “  
 mentionem jurisjurandi toties ab hoste violati, “  
 neglectique objicere, nisi quòd bellum pro de- “  
 fendenda religione susceptum sit, ab eo jureju- “  
 rando religione deterreri te prædicare velis? His “  
 orationibus cùm se Cæsar vrgeri, ac è simulatio-  
 num latebris erui in apertum sentiret, & Com-  
 mendonus insuper denunciaret, se omnia vt re-  
 sponsa sibi essent, Romam, Venetiâsque rescri-  
 pturum, verens id, quod futurum apparebat, ne  
 Venetis ardor ad bellum restingeretur, animi-  
 que frangerentur, si eorum spem destituisset, spa-  
 tium novæ deliberationi à Commendono postu-  
 lavit, atque eò confugit, vt diceret futurum qui-  
 dem se in Pontificis Maximi auctoritate, fœde-  
 rique accessurum; sed cùm vnus maximè hostium  
 injuriæ pateret, ne quâvis antè in se ingrueret,  
 quàm instructum bellum esset, cupere, vt prius-  
 quam consilia emanarent, promerent fœderati,  
 quæ, quantâque sibi auxilia missuri essent, vt sci-  
 ret quarum fiduciâ virium in eam aleam esset  
 descensurus. Atque hæc ita pollicebatur, sperans  
 antequam socii ex tam longinquis locis consule-

rentur, exituram æstatem, parique arte sequentem quoque annum se elusurum. Commendonus id jam laudare, quòd occasione vti, seque Reipublicæ accommodare statuisset, nec dubitandum, quin æqua omnia à fœderatis esset impetraturus; sed quæ cuperet, edere jam nunc ipsum debere, non vt à sociis definiantur, expectare. Id verò facturum se Maximiliano negante, & in eo vti-que perstante, vt priores socii, quâ se ope ad-  
» jururi essent, ederent, At sic quidem, inquit  
» Commendonus, in easdem revolveris suspicio-  
» nes, quas nuper vitandas esse intellexisti: quis  
» non videat moram te, ac dilationem quærere, vt  
» antè rerum gerendarum tempus elabatur, quàm  
» quæ tibi socii esse tribuenda censuerint, cognosci  
» possit, quæ tu inde dum aut augeri, aut muta-  
» ri contendes, res novis subinde dilationibus traha-  
» tur? Quin tu simpliciter promissis, quid tribui tibi  
» æquum censes, si veram spem tui facere Vene-  
» tis, & eorum ad consilia belli firmare animos vis?  
» Etenim quæ cupias, quæque opus habeas, & vnus  
» profectò optimè nosti, & ea verius est abs te ju-  
» dicari, quàm statui ab aliis. Diu contendit Cæ-  
sar, nec omnino facillè ex illa consiliiarce se de-  
jici est passus: sed tandem victus Commendoni oratione cessit, ac viginti millia peditum, qua-  
tuor equitum, quorum pars dimidia Germanis constaret, à sociis postulavit; hac se copiâ si ju-  
vissent, in partem belli venturum, armæque Tur-  
cis ab Ungaria illaturum est pollicitus, aliâ viâ,

quando hæc non processerat, promissa daturus. Hoc expugnato responso, in quo adeò pugnans Maximilianus fuerat, ut extortum à Commendono magnopere & reliqui omnes, & imprimis Veneri Legati mirarentur, qui sæpè cum eo iisdem de rebus verba contulerant, cuncta, ut acta erant, ad Pium rescripsit, missis celerrimis tabellariis, qui litteras perferrent. Et paulò post læti de Christianorum victoria allati nuncii vim Commendoniconatibus addidere. Nam Christianæ classes cum è Sicilia soluissent, provectæ in Græciam ad Echinadas insulas ante fretum Corinthi obviam Turcarum classem habuere, congressæque nobilem de hostibus victoriam retulere, captis ad centum, & triginta longis navibus, ac nonaginta prælio absumptis. His nunciatis postulavit à Cæsare Commendonus, ut supplicationes decernerentur, solennibusque sacris Deo grates redderentur, simul quò alacritas populis adversus Barbaros adderetur, juberet ignes, aliæque quibus publicum gaudium significari solet, fieri. Id Cæsar, ne Turcis in suspicionem veniret, si adversis eorum rebus veluti insultasse videretur, negavit; & tantùm rei divinæ, quam in ipsius Regiæ templo ejus victoriæ causâ solenni apparatu Commendonus ipse fecit, cum vxore, & liberis interfuit. Pius eodem ferme tempore & victos Turcas ad Echinadas, & ex Commendoni litteris traductum in partes Maximilianum accepit: utroque impensè lætatus, cum

Commendonum laudibus apud Patres extulisset, consultis celeriter sociis, renunciari Maximiliano jussit, missuros ei auxilia, quæ postulasset. Sed non multò post discessum Commendoni refrigere promissa Cæsaris, & secuta mors Pii cuncta pervertit.

---

*De causa magni Ducis Etruriæ per eum  
apud Cæsarem acta.*

CAPUT VIII.

**E**A tempestate exortum dissidii aliquid inter Pium, & Maximilianum erat, ex appellatione magni Ducis Etruriæ, quam Pius Cosmo Medici Florentinorum Principi tribuerat, viro, in quo efferendo certasse fortuna cum industria videri potest. Is non privato solum loco Florentiæ erat natus, sed patrimonium tenue à patre acceperat, atque id ipsum parum constitutum, & propè ambigui juris, de quo certè lis ei à potente, & gratioso adversario gentili suo intendebatur, cum ipse adhuc puer amisso patre in tutela matris ageret. Pater fuit Joannes Medices insignis ætatis ejus bellator, & inter claros duces audaciâ, & fortitudine, ac militaribus facinoribus habitus: mater Maria Salviata, Jacobi filia, Joannis Salviati Cardinalis soror, fœmina lectissima, & in tuendis filii fortunis pari diligentia, atque fide. Rem Florentinam Alexander Medices ha-

bebat Dux civitatis paulò antè armis subactæ à Clemente VII. Pontifice Maximo impositus. Huic juveni vel moderato, atque intento non facilis dominatio futura fuit in civitate ne libertatem quidem propter acria, atque indomita ingenia modicè ferente; luxuriosus, & incautus fraudi facilè patuit. Infidiator (adeò nihil tutum alienæ libertatis oppressoribus est) ex ipsa familia Medicea, atque ex intima familiaritate ejus exitit Laurentinus Medices, qui Principi voluptatum diu minister, & ex eo apud improvidum summam fidem nactus, dum domi suæ spe dilectæ matronæ potiundi intempestâ nocte opperientem habet, somno oppressi jugulum gladio profecuit, vno conscio, atque adjutore servo, cui Scorunconculo fuit nomen, protinúsque metu, ac scelere territus, vrbe aufugit. Cædes Ducis antè ab amicis Mediceorum est cognita, quàm populus, aut suspecti cives sentirent. Itaque spatium firmandi præsidio, continendique à seditione, ac tumultu civitatem fuit; nec aliud præsentium remedium est visum, cum nulli Alexandri liberi essent, quàm novum ex eadem familia Principem constituere, itumque ad Cosmum est vixdum octavum ac decimum annum egressum, eumque è villa fortè redeuntem, nec minùs quicquam cogitantem in Prætorium abreptum Principem creant. Nec adolescens segniter se occurrenti fortunæ tradidit. Ita accidit, vt quem Laurentinus paulò antè Alexandri gratiâ fretus

judicio, ac lite exagitabat, cum porissimum infandi facinoris ultorem habuerit; neque enim ei non antiquissimum fuit, pœnas à proditore expectere, qui cùm se fugâ Venetias recepisset, ibi submissis à Cosmo percussoribus est interfectus. Par in invadendo, firmandoque inde sibi dominatu Cosmi indoles fuit. Qui rem ad eum detulerant, quò proniores civium animos haberent, majôrque species libertatis, ac Reipublicæ maneret in præsentia, sublato Ducis nomine, cui odium dominationis inerat, eum non alio, quàm Principis vocabulo insignem fecerunt. Atque ille id quoque modestiâ, & humanitate lenire studebat. Et cùm nihil nisi de seniorum consilio ageret, cunctâque ad Magistratûs curam, auctoritatémque rejiceret, mirè spem sui, atque indolem probavit, tantúmque gratiæ apud omnes ordines inivit, ut bello mox ab exulibus magnæ viris potentiæ petitus, egregiâ populi voluntate, ac studio adversûs eos sit usus, quibus pari facilitate victis statum civitatis pacavit. Tum paulatim exurgens, quotidieque magis convalescens, cuncta ad se trahere, donec Ducis quoque assumpto nomine, omni abolito Reipublicæ jure, & vanis modò sine re Magistratuum relictis nominibus, veram dominationem, imperiûmque occupavit. Ac Petro inde Strozio viro forti, & militiæ claro, quo iterum exules Gallorum armis fulti ad repetendam patriam duce utebantur, acie superato, atque Etruriâ pulso, Senam opulentam



lentam urbem domitam armis Imperio suo adjecit ; atque ita duplicato propè Regno , longè reliquos Italiæ Principes dignitate , atque opibus anteire cœpit. Verùm ut nunquam præsentibus contentum humanum ingenium altiora vsque appetit , Cosmum ipsius jam Ducis nominis infra suas opes positi pigere cœperat , animúmque elatum secundarum rerum proventu vastâ cupiditate ad Regis appellationem adjecit : sive ut quem honorem potentiâ implessè videri poterat , ejus quoque titulo insigniretur : sive ut vi , armisque possessa jure quoque addito in posterum magis firmaret. In hanc cogitationem omnibus studiis ad demerendam Pii gratiam cùm animum intendisset , obsequio , ac religionis cultu , & acribus adversùs hæreticos quæstionibus , quibus maxime rebus Pium senserat capi , brevè est assecutus , ut ei esset charissimus , & mox ut magnus Etruriæ Dux , quod Regiæ dignitati proximum est visum , appellaretur , ab eo obtinuit : ac Romam frequenti , ac pernobili comitatu adveniens , duorum Cardinalium occurſu à Pio honorifico hospitio acceptus , in solennibus inde sacris de Pontificis ipsius manu insignia novi honoris suscepit. Maximilianus Cæsar eâ re minui dignitatis suæ jura , nec Pontifici Maximo licuisse eam appellationem Cosmo tribuere , qui in fide , ac ditione Cæsarum esset , neque omnino tales impartiri honorum titulos ad alium , quàm ad Cæsarem pertinere ferens , honorem ipsum

Nn

Cosmo abrogaverat, questúmque ea de re Legatos Romam ad Pontificem miserat; qui cum non impetrassent, ut, quod magnopere postulaverant, in Senatu audirentur, privatim ab adsidentibus aliquot Patrum auditi, atque etiam redarguti coram fuerant. Cum igitur & Cosmus liberi juris suum esse Regnum, nec se ullâ clientelâ Cæsari esse obstrictum affirmans, nequaquam respectu ejus eâ appellatione abstineret, & Pius non modò factum suum constanter tueretur, sed Maximilianum id non licuisse sibi ausum dicere ægrè ferret, res ad non leve dissidium spectare videbatur, mandatúmque propterea Commendono fuerat, ut de hac componenda, sedandâque controversia, quæ agitata magnam flammam datura videbatur, curam susciperet. Cum igitur ad spem jungendæ contra Turcas societatis Cæsarem, ut suprà ostendimus, adduxisset, & fortè inter se quantæ fœderatorum, quantæ Italiæ Principum vires essent, expendere, prior Maximilianus mentionem Cosmi intulit, eúmque vehementer accusavit, quòd eum honorem ab alio, quàm ab se petiisset, penes quem vnum potestas tribuendi esset, neque defutura voluntas fuisset, ni Cosmum præceps ambitio impatientem moræ, & necessitudinis, & officii immemorem fecisset. Se tamen memorem muneri, ac dignitatis suæ fore, neque passurum, ut imperante se, Cæsarium jus, & potestas minueretur: invitum quidem in ullam cum Ponti-

fice Maximo discepcionem descendere ; sed ipsum quoque credere probaturum , officii sui partes ab se non deferi. Præter hæc Philippum Regem Hispaniarum , & Principes Germaniæ , quos eadem causa attingeret , objiciebat. Commendonus ubi Cæsarem paulum oratione demul-  
fisset , & quàm alieno Reipublicæ , quàm ipsi , familiæque ipsius minimè apto tempore ea moveretur quæstio , ostendisset , culpam ab ipso in consultores avertens , totum de legatione Romam missa , querelæque exposita factum reprehendit. Ac si querelas , inquit , ordiri volumus , vter « tandem justius de altero queratur ? Pius Cosmo , « & viro , & Principi ornatissimo , ac tibi ipsi a- « nimo , ac necessitudine conjuncto , qui domi « suæ nurum sororem tuam habeat , merenti ap- « pellationem magni Ducis tribuit : tu tributam ab « illo abrogasti , Legatósque , qui hoc Pontifici Ma- « ximo negarent licuisse , Romam misisti. Liberi ju- « ris esse Cosmus , civitasque Florentinorum , ac se « Cæsarem potestati pecuniâ exemisse dicitur , & « diploma remissi juris à Rodulpho auctore gentis « tuæ , atque hujus amplitudinis , quâ inter omnes « eminet familia vestra , conditore ostenditur ; « tui nuper Legati omnem Etruriam ditioni tuæ « subjeciebant , immemores prorsus magnam par- « tem ejus Provinciæ Pontificum Maximorum jure « contineri. Quantum hæc habent odiorum , ac « dissidii irritamentum , ni Pius Reipublicæ neces- « sitates inanibus contentionibus præverteret , & «

N n ij

» te patrio animo complectens, patriâ quoque be-  
» nignitate agendum tecum censeret? At tibi,  
» aut adeò his, quos in consilio habes, quî venit  
» in mentem dicere, hoc Pio non licuisse? An du-  
» bia Pontificum Maximorum potestas est, non  
» Regum modò appellationes, sed ipsa quoque  
» Regna, atque Imperia tradendi, adimendique,  
» ut cujusque meritum in rem Christianam fuerit?  
» Huic ipsi Etruriæ, quam tui vendicant tibi,  
» nonne Clemens IV. Carolum Andegavensem,  
» Neapolis Regem, rectorem dedit? Nonne quoties  
» usus fuit, & visum è Republica est, eam Ponti-  
» fices Maximi ordinarunt? Caroli, atque Etruriæ  
» mentionem feci, quia de illa agitur. Sed ut à  
» longinquis ad propinqua, magisque illustra e-  
» xempla transeamus: in Ungaria neque obscura,  
» neque vetustissima res est, ortam de Regno con-  
» tentionem inter Vincislaum Bohemum, & Dira-  
» chinos Pontificem Maximum diremisse, qui  
» cùm judicium ad se totum avocasset, & senten-  
» tiam tulit, & valuit jus, quod Pontifex dedit.  
» Opponebas nuper & Philippum Regem Hi-  
» spaniæ, cùmque socium tibi causæ adjungebas;  
» at ille Navarra Regnum in Pyreneis saltibus con-  
» junctum Hispaniæ tenet, non alio scilicet jure,  
» quàm quod Julius II. Pontifex Maximus Joanni  
» Alibreto, quia se causæ impugnantium Roma-  
» nam Ecclesiam junxit, ademptum dedit. Quòd  
» si Pontifici hoc licuisse neges, alterutrum sequi  
» necesse est, ut aut reddat Philippus Vandomiæ

familiæ Alibretorum hæredi nunc maximè repo-  
 ſcenti Regnum , aut injuſtitia convincatur, qui  
 contra Chriſtiani , & boni viri officium , ac re-  
 ligionem , quod ſuum non ſit , per vim , atque  
 injuriam occupatum poſſideat. Dies me deficiat,  
 ſi memorare velim quoties, quibùſve in locis Ro-  
 mani Pontifices ſupremæ poteſtatis jus ſuſcepe-  
 runt; quoties ortas de Regno contentiones , li-  
 téſque non auctoritate ſolùm compoſuerunt ,  
 ſed juſdiſdictione, ac judicio decreverunt. Verùm  
 vt de his ipſis appellationibus , quarum ſcilicet  
 tribuendarum facultate tui , ſi Deo placet , Pon-  
 tifices Maximos privarunt , cognoſcamus : Al-  
 phonſus ſextus Hiſpaniæ Rex Henricum Lotha-  
 ringiæ Comitem , ob res præclarè adverſùs Mau-  
 ros in Hiſpania geſtas generum aſciturum , & Lu-  
 ſitaniæ parte donavit , quæ Portugallia dicitur.  
 Hunc haud multò poſt Henricum ob ſpectatam  
 virtutem , & egregia in rem Chriſtianam meri-  
 ta , Alexander III. Pontifex Maximus Regem  
 appellavit ; neque Alphonſus , quamquam æqua-  
 tum dignitate ſibi generum ægrè ferret, adverſari  
 eſt auſus, aut de Pontificis jure diſceptari , ambigi-  
 que eſt paſſus. In Polonia verò , gente cùm am-  
 plitudine Imperii , tum bellicæ laudis gloriâ im-  
 primis nobili, vtriuſque rei , & adempti, & reddi-  
 ti honoris exemplo Romanorum Pontificum jus  
 nititur. Quo enim tempore maximè Cæſarum au-  
 ctoritatem Poloni agnoſcerent , Boleſlaum Re-  
 gem, quia Staniflaum, Episcopum Cracoviensem,

» virum innocentiae, & sanctitatis famâ clarum im-  
 » piè occidisset, non solum ipsum Regno, sed Re-  
 » gnum quoque vetustâ appellatione Regis multa-  
 » runt Romani Pontifices, in perpetuumque eâ abs-  
 » tinere iusserunt; eorumque imperio ita obtempe-  
 » ratum est, ut per ducentos inde & quadraginta  
 » annos, non aliter illi se, quàm Duces appellarent.  
 » Neque tum negligens aliquis, aut secors, aut  
 » plus æquo Romanæ Ecclesiæ deditus Germaniæ  
 » Imperio præsidebat, sed vir acerrimus, Pontifi-  
 » cibûsque Romanis longè infensissimus Henricus  
 » I V. nec tamen aut ipse, aut qui ipsi successerunt  
 » eodem ingenio Cæsares, Pontifici Maximo id li-  
 » cuisse aut negarunt vnquam, aut factum infrin-  
 » gere conati sunt. Post tot inde annos, cùm pri-  
 » ſci honoris desiderium rediisset Polonis, meriti-  
 » que egregiis pro Christiana re facinoribus essent,  
 » ut eorum ratio haberetur, missâ in Galliam lega-  
 » tione, ubi tum sedem Romani Pontifices habe-  
 » bant, impetrarunt à Joanne XXII. ut Dux eo-  
 » rum de integro Rex appellaretur. At quis tum  
 » quoque Romano Imperio potiebatur? Nempe Lu-  
 » dovicus Bavarus hostis, atque insectator perennis  
 » Romanæ Ecclesiæ. Is tamen non invidit Polonis  
 » restitutionem Regii nominis, neque id ab se non  
 » petitum, aut traditum à Pontifice Maximo est  
 » questus. Neque, ut arbitror, aut Pio V. jus fa-  
 » ciendi, quod Joannes, cæterique Romani Ponti-  
 » fices jure fecerunt, est ademptum, adimisque ab vl-  
 » lo mortalium potest, aut tibi plus quicquam addi-

tum,quàm Henrici,quàm Bavari habuerunt,aut “  
 tua erga Pontifices Maximos fides , & cultus “  
 cum illorum odio, & contumacia conferri po- “  
 test. At in Germania , at in ipsa Austria tua “  
 nonne idem juris Pontifices Maximi exercuerunt? “  
 nec Rodolphus , nec Albertus , nec Fridericus “  
 Cæsares majores tui , qui quererentur, Romam , “  
 sed qui gratias agerent , Legatos miserunt. Ve- “  
 rùm vt omissis aliis, ipsam aliquando juris tui ra- “  
 dicem attingamus , Cæsaris , ac Imperatoris no- “  
 men , quo se tantùm Germania supra cæteras “  
 Christianas nationes extollit , vnde tandem ac- “  
 cepistis ? Quis Romanum Imperium , cujus Bi- “  
 zantium translati majestas , ac vis omnis in O- “  
 rientem verterat , cùm suâ jam mole laborans , “  
 neglectas Occidentis Provincias vastandas Bar- “  
 baris reliquisset,divisit primùm,deinde divisi par- “  
 tes ad Germanos detulit ? Nemo , vt arbitror , “  
 tam impudens veri inficiator , nemo tam aver- “  
 sus à Romanæ Ecclesiæ dignitate fuerit , qui Ro- “  
 manorum Pontificum id beneficium esse neget. “  
 An ergo ademptam Græcis dimidiam Romani “  
 Imperii partem , vobis cum Cæsaris , atque Im- “  
 peratoris appellatione tradere Romanis Pontifi- “  
 cibus licuit , Reges , ac Duces appellare non li- “  
 cet ? An quod tradere vobis potuere , ipsi non ha- “  
 bebant ? Equidem in eam interdum sententiam “  
 venio , vt suspicer , ne qui tibi auctores tam no- “  
 vi , tam intempestivi consilii sunt , aliud quàm “  
 quod præferunt , & cupiant , & agitent animo , “

„ téque velint cum Pontifice Maximo alienissimo  
„ tibi, & Reipublicæ tempore, committere. Ad  
hæc Maximiliano haud sanè quidquam, quod  
magnopere responderet, succurrebat. Id modò  
afferebat, quas sibi partes Cæsaris nomen injun-  
geret, ad eas tuendas, religione se, atque officio  
„ cogi. Atqui, inquit Commendonus, qui jus Im-  
„ perii tui tantopere defendendum esse tibi existi-  
„ mas, idem certè concedere æquo animo Pontifici  
„ Maximo debes, vt ipse juris, ac muneris sui ne-  
„ gligens ne sit, quod quale sit, jam profectò in-  
„ telligis. Postremò cum Maximiliani animus eò  
scilicet spectaret, vt concessi honoris mercedem  
quamplurimùm à Cosmo pecuniæ exprimeret,  
cum finem hæc tum disceptatio habuit, vt Cæsar  
velle se, ac cupere ostenderet, vt Commendo-  
nus ipse viam, rationémque exquireret, quâ ea  
res componi, salvâ Cosmo magni Ducis appella-  
tione, posset. Hoc autem totum ne tum transige-  
retur negotium, Commendoni discessus à Cæsare  
fecit, quem novi de Poloniæ Rege nuncii, &  
jussa Pii abire protinus magnis itineribus in Po-  
loniam coëgerunt. Sed non multò post & Cos-  
mus vitâ est functus, & Maximilianus idem hono-  
ris, quod Pius dederat, auctius etiam, cumula-  
tiúsque Francisco filio acceptâ pecuniâ tribuit.





*De nova legatione, & profectiōe ejus  
in Poloniam.*

CAPUT IX.

**C**AUSA properandi in Poloniam Commendonō fuit, quòd & rumor in dies percrebrescebat, & multorum afferebantur litteræ, Augustum Regem veteri suâ repudiandæ vxoris cupidine agitarum nova per hæreticos moliri consilia, nobilem puellam insigni formâ è sororis gynæceo abductam seposuisse, & per absentiam vxoris liberiùs jam novo conjugio viam sternere. Nam Regina, vt suprà demonstratum à nobis est, cùm nullis precibus suis, suorùmq; impetrare à viro potuisset, vt in domum, conjugalemque convictum reciperetur, pertæsa contumeliæ excesserat Regno, seque in Austriam ad Maximilianum, fratresque contulerat, atque Lintzii in fraternæ ditionis oppido, cultu modico, & paulò supra privatæ vitæ modum agebat, cùm præsentī mœrore, ac sollicitudine afflicta, tum anxia futuri, nec effrænata Regis cupiditatis, nec eorum quæ tum maximè moliretur, ignara. Cùm secundo Istro navigans Viennam descenderet Commendonus, Lintziùmque visendi causâ Reginam appulisset; (est enim in ripa fluminis situm) illa multis cum lacrymis, precibùsque se ei, famam, salutemque suam commendaverat, quæ-

O o

que de novis Regis adversum se machinationibus cognoverat, edocuerat. Quidam studio assentandi, seque in Regis gratiam insinuandi, sopitam spem ejus exsuscitaverant iterum, & cui rei vehementer Commendonus se semper objecerat, eò adduxerant, ut & litteras ad Pontificem Maximum tentandi causâ animum ejus daret, & litteras secuturi mox Legati fuerint, qui sterilitatem Reginæ, inopiam liberorum, necessitates Regni, populorum studia, precésque afferentes, dirimi matrimonium postularent. Profectus igitur Commendonus ad v. Kal. Decemb. maximè favo anni tempore, agrè superatis nivibus, quæ in frigidissimis regionibus omnia tenebant, in Poloniam pervenit. Et quanquam multi Principum ex veteri amicitia affines illi testandæ benevolentiz, atque officii causâ præsto fuerunt, à quibus pleraque de præsentis statu rerum accepit; tamen antequam pergeret ad Regem, qui Varsoviæ in Regno erat, substitit apud Petricoviam, simul corporibus suo, suorumque ex longinqui, maximèque incommodi itineris labore reficiendis; simul quò certius omnia exploraret, omniumque gnarus in Regiam veniret. Interea qui salutem Regi, adventumque suum nunciarem, multaque, quæ antè statuenda, præparandaque erant, curarem, Varsoviam me antecedere jussit. Omnibus demum satis exploratis, comparatisque, ipse aliquot post dies advenit omnibus honoribus, qui deberi ejus fastigii viro videbantur,

acceptus, cultusque cum à Rege ipso, tum à Principibus gentis. Et Rex quidem quamvis ex recenti morbo infirmus, & podagræ doloribus ægrè pedibus consistens, tamen intranti Regiam scipione nixus per scalarum gradus occurrit, comiterque congressus, ei latere dextero honoris gratiâ cessit, atque inde quoties aut in Regia, aut in templo congressi sunt, semper eum supra se collocavit. Jam antè ad primos adventantis ejus nuncios constituerat Rex coëptis de divortio consiliis tantisper, dum adesset Commendonus, abstinere, atque omnem rei mentionem opprimere, satius ratus, quia non diu moraturus in Regno crederetur, discessum ejus opperiri, expertus antea quam cum acri matrimonii propugnatore res sibi futura esset. Et tum implicitus amore vulgaris scorti, facilius novarum nuptiarum dilationem erat toleraturus, & affectâ valetudine, in ægro, & vitiato corpore etiam cupiditates animi languidiùs commovebantur. Sed Commendonus rem in præcipiti cernens; quippe designatos Legatos, qui Romam mitterentur, Cæsarem ipsum, ne adversaretur, lactatum spe oblatâ vnum è liberis ejus adoptandi, præparatos hæreticos, totam denique rem, ut usus posceret, instructam, compositamque esse, nihil sibi statuit dissimulandum, ac tempore apto ingressus, quæ rumoribus differrentur, quæque ad se multi detulissent, Regi ostendit, eademque illa, quæ aliquot antè annis apud eum de matrimonii jure, ac sanctitate disseruerat, re-

petiit, ac frustra adiri Pontificem, frustra vias, rationesque exquiri in re, quæ humanâ ope expediri non posset, monuit; nec mortalium quæquam libentiùs, studiosiusque navaturum ei operam fuisse, nisi res esset hujusmodi, quæ exitum habere nullum posset; & ipsum, licet multas gentes, populosque imperio suo contineret, meminisse tamen debere, se hominem esse, & Reges humanis fortasse legibus exsolui posse, at divinis jussis perinde ac reliquos mortales teneri. Proinde liberaret animum suum, cogitationemque, cui par non esset, & quâ in nullam spem dies, noctesque nequicquam cruciaretur, aliquando abjiceret. Ac Rex quidem ea negans verasse, quæ de Legatis, deque adoptione circumferrentur, rumorem omnem ex suorum ait studio ortum, à quibus ipse assidue sollicitaretur, ut liberorum procreandorum curam susciperet: iis se dare verba, eorumque solari desideria sæpe cogi. Cæterum sibi in animo esse infelicitatem suam patientiâ vincere, quando solus eâ miseriam premeretur, quæ remedii expers esset. Apparebat neutrum his contentum fore, quæ dicebantur, ni rem haud dubiè in publicum malum erupturam discussisset tandem Deus, illis ipsis fortè diebus allato nuncio, Reginam mortem obiisse, quam curis, ac dolore fessam, cujus vindex existeret nemo, repentinus morbus oppressit. Tum Rex atrata in veste, maximèque pannosa ingentem luctum præferens prodiit, & apud ipsum Com-

mendonum fœminæ probitatem, innocentiamque testatus, etiam fortunam ejus, quam ipse fecisset, profusis lacrymis est miseratus; quas tamen lacrymas nemo erat, qui veras putaret. Cui enim credibile videretur, quam nuper non contentus conjugali toro, domo, Regno exegisse, ipso quoque matrimonio dejicere, vel vitæ suæ, Regni que discrimine moliebatur, ejus extinctæ desiderio commoveri? At ipse & nuncium mortis, & funeris diem non mœrore solum, ac lugubri cultu, sed propè muliebri fletu est profecutus; & quod haud minus mirere, nulla jam ampliùs tum ab ipso, tum ab suis audita novarum nuptiarum mentio est, nulla procreandorum liberorum, nulla firmandi in familia Regnum, quæ antea alternis propè verbis jactabantur: sive concubina, quam nuper in Regiam transtulerat, blanditiis delinitum, ejusque ambri deditum novi conjugii poenitere cœperat: sive hoc inest humano ingenio vitium, vt ad vetitâ impotenti impetu feratur, eadem adepta contemnat.

---

*Actio cum Rege, & Polonis de fœdere.*

CAPUT X.

**D**E Turcico bello, deque jungendis adversus eam gentem armis egit vehementer cum Rege Commendonus, multaque quæ apta

rei visa sunt, accuratè apud eum differuit. Sed res erat multis, ac propè inexplicabilibus involuta difficultatibus. Rex ipse mulierculæ amorì deditus, suis addictus voluptatibus, ingenio imbellis, & vacuo curis otio gaudens, animo, & corpore æger, minimè opportunus belli consiliis erat: ita tamen loquebatur, vt Christianorum consensui adversus Christianæ pietatis hostes non defuturus videri vellet, & omnia ad concilium suorum, quod tum maximè Varloviam cogeatur, rejiceret; siquidem pacis, ac belli jura legibus Polonorum sunt penes id concilium. Polonis antiquum fœdus, ac pax cum Turcis manebat, eaque lætabantur, neque vt abrumperent, & cum prævalido hoste in certamen descenderent, adduci se passuri vllâ spè, vllis promissis videbantur. Omnibus in ore erat Varnensis clades, memoriâque ejus. & vulgò horrebant, & vrgenti Commendono, ac ne vni refides in communi causa adversus communem hostem esse vellent, hortanti sæpè opponebant. Uladislaus Tagellonis filius ab Ungaris, Polonisque pariter Rex expetitus vtrique genti imperitabat, & florebat eâ tempestate Ungarica res armis, virisque, & Regni fines in Thraciam vsque extenderat. Et Turcæ latè parto in Asia Imperio, multis clari victoriis, tum maximè Bizantio, Europæque imminebant, ac Amurates eorum Rex, ne pluribus simul bellis distineretur, & vt majori inde mole in Constantinopolitanum Cæsarem verum

hostem suum incumberet, pacem cum Uladislao composuerat. Sed Eugenius IV. Pontifex Maximus, veritus ne si gens bellicosa, & imperii avida, & infensa Christiano nomini Constantinopolim oppressisset, par inde periculum non Græciæ solùm, finitimisque Provinciis, sed Italiæ quoque, & Christianæ Reipublicæ vniversæ crearetur, Cæsarinum Cardinalem ad Uladislaum misit, quanti Ungariæ, Poloniæque interesset arceri Europâ Barbaros, illamque pestem finibus Regnorum suorum summoveri monens, & hinc Constantinopolitano Cæsare magniscopiis Thraciæ claustra occupante, hinc Venetis, Genuensibusque mare classe tenentibus, posse nimirum jam in communem perniciem crescens malum, antequam majora incrementa caperet, opprimi, nisi ipse vano pacis nomine deceptus victoriam moraretur; perpulit juvenem, ut repudiata pace, quam paulò antè cum Amurate pepigerat, eum bello aggrederetur, infelici prorsus exitu. Nam apud Varnam collatis cum eo signis ita conflixit, ut victor quidem ab dextero cornu, in quo ipse constiterat, Turcas in fugam averterit: sed hostes victores alterius Christianorum cornu ab tergo adorti Regem interfecerunt, ac magnam inde cædem nostrorum, amisso Rege, effusa fugientium ediderunt. Hujus memoriam cladis Poloni omnibus sermonibus vsurpantes à pace, atque amicitia Turcarum ne discederent inter se cohortabantur, & præterea haud ineptè differe-

bant, brevem Venetorum, Hispanorúmque societatem fore, quâ solutâ Polonis solis, & violatæ semel fidei reis, cum valentissimo Rege Afiæ, & Europæ opibus subnixo dimicationem haud quaquam suarum virium subeundam. Comendonus quam in consensu gentis nullam habebat, aliquam tamen arte, atque industriâ spem ipse effecerat: nam è Principibus, qui multi domum ejus (fuit enim semper ab illa gente mirè cultus) frequentabant, acerrimum quemque traxerat in sententiam, alios spe adipiscendi militares præfecturas, alios famæ, & propagandi nominis, alios prædarum cupidine illiciens, ut si res ad disceptationem Senatûs deducta foret, haud negligenda factio belli auctorum futura fuerit. Quod erat consilio comparatum, etiam casus adjuvit. Valachiam finitimam Polonis gentem, & Turcarum vectigalem Bochdanus Alexandri filius traditam à patre habebat. Huic adolescenti Polona virgo insigni formâ è Tarlorum familia nobili, atque opulenta apud Russos nupserat, ad quam deducendam, relicto Regno, Bochdanus in Russiam transferat. Iratus Regulo, infensûsque magnopere erat Christophorus Sborovius Polonus, ferox juvenis, & genere, & opibus suis, suorumque elatus; iræ causa erat, quòd in Valachiam ad spem sororis nuptiarum à Bochdano accitus, inde ex juvenilibus causis orto inter eos dissidio spretus, ac ludibrio habitus domum redierat. Is cognito Bochdani in Russiam adventu, occul-



occultus in proxima loca cum delectis juvenibus concesserat, intentusque inimicum observabat. Et Bochdanus trajecto Tyrâ flumine, quo Valachia à Russia dividitur, nihil suspicatus hostile, juvenili impetu, quò se inopinatum conjugii offerret, cum paucis celeri rhedâ prævectus antecesserat suorum agmen; quâ re cognitâ Sborovius incautum juvenem insidiis excepit, ac duobus vulneribus faucium in oppidum suæ ditionis abduxit. Id verò vbi in Valachiam est perlatum, gens ingenio ad omnem novæ spei auram mobili, nec vnquam fida Regibus suis, & Bochdanum paternæ sævitæ memoriâ perosa, alium sibi Principem legit, qui missis celeriter Bizantium Legatis, hinc criminando Bochdanum, quòd res novas cum Polonis, Christianisque moliretur, hinc pecuniâ, ac largitione, quæ omni jure potentior est, apud venales Barbarorum animos tenuit, ut rata esset voluntas Valachorum, atque ipse in Regis fidem acciperetur, ad præsidiumque Regni aliquot ei equitum turmæ mitterentur: perlatâque in Poloniam erat fama, acceptâque, ut cuncta in masus differe rumor, illum quò plus gratiæ apud Turcâs iniret, animum ad eorum quoque superstitionem, sacrâque traduxisse, eorumque ritu, ac ceremoniâ circumcidi se passum. Bochdanus, cum Sborovii facinus, à quo se pecuniâ redimere coactus fuerat, in summa invidia esset, partim miseratione tam indigni casus, partim Tarlorum gratiâ, studiisque adjutus,

Polonos ad consilium reducendi se in Regnum concivit. Neque enim non suarum rerum interesse illi rebantur, Provinciâ finitimâ Russiæ hominem suum potius, quàm Turcarum beneficium agnoscentem potiri. Coactâ igitur manu, ac trajecto Tyrâ impetum in Valachiam fecerunt, & haud magno negotio novum expulsuri Principem erant, ni Rex Poloniæ, Senatúsque cùm Turcarum militum præsidium esse cum Valacho accepissent, in magnum conjecti metum, ne Turcicum inde bellum conflaretur, properè suos ab incepto revocarunt, eosque vi, atque armis abstinere, ac tantùm dare operam, ut reconciliarentur Bochdano popularium animi, illorùmque voluntate in Regnum rediret, jusserunt. Sed ipsis quoque Turcis ea res suspicionem incusserat Polonici belli, cujus concitatore esse apud Regem Pontificis Maximi Legatum non ignorabant, & magnopere querebantur initium violandæ pacis à Polonis fieri. Convenerant interea frequentes Varsoviam ad concilium Poloni, nec aliud quominus Commendono Senatús daretur, quàm Regis morbus distinebat; nam Senatús adire, absente Rege, dignitatis suæ Legato non videbatur. Cùm ingravesceret in dies morbus, nec res diutius differenda videretur, decursum eò est, ut delecta Senatús pars ad audienda Legati verba domum ejus veniret. Venere Archiepiscopus Gnesnensis, Ordinis ejus Princeps, & Episcopi tres Cracoviensis, Plocensis, & Presmi-

liensis, cum Palatinis sex, & Castellanis octo, &  
 Cancellario Regni, & Marefciallo, ( nomina hæc  
 Magistratûs sunt, quibus Polonorum Senatus  
 constat) qui quàm potuit, honorificè, & comiter  
 à Legato accepti cum confedisſent, pro omni-  
 bus Cancellarius eſt locutus: Regem, quia venire  
 ipſe in Senatum, ad quem de Pontificis Maximi  
 poſtularis eſſet referendum, valetudine impeditus  
 non poſſet, legiſſe viros gentis ſuæ Principes,  
 qui ad eum ſuo, Senatûſque nomine adirent,  
 dictâque exciperent; petere, ut cum iis, in qui-  
 bus Senatûs inſtar eſſet, tanquam cum præſente  
 ſe de omnibus rebus loqui ne gravaretur. Com-  
 mendonus præſatus graviter ſe ægrè ferre Re-  
 gi minùs bene eſſe, eique celerem morbi de-  
 pulſionem, ſalutémque ominatus, ſe quidem li-  
 bentiffimè fuiſſe facturum dixit, ut Senatum per-  
 ſalutaret, atque alloqueretur vniverſum; ſed quan-  
 do id minùs commodum fuerit, in eorum viro-  
 rum dignitate, atque amplitudine, qui ad ſe  
 conveniſſent, Senatûs ſe, gentiſque totius maje-  
 ſtatem ſibi conſtituturum. Deum deinde teſta-  
 tus eſt, ſe quicquid conſilii, aut deliberatio-  
 nis iis afferret, eâ mente, animoque eſſe factu-  
 rum, ut ſi de ipſius patriæ ſuæ ſalute conſulere-  
 tur, fide, ac religione majori ſententiam non eſſet  
 dicturus; ita enim & meritos de ſe Polonos eſſe, &  
 ſuum perpetuum, ac ſingulare in eam gentem  
 ſtudium poſtulare. Hæc cum dixiſſet, ſilentio fa-  
 cto, oculi, aurêſque in eum omnium deſixi, in-

» rentique sunt, & ille ita est orsus : Exarsit, viri  
» Poloni, ingens nobiscum & Turcarum gente bel-  
» lum, & nisi Barbarorum artes, quibus singuli,  
» disjunctique appetimur, maturè intelligantur, pe-  
» riculosum Christianæ Reipublicæ ; neque enim  
» illata Venetis arma, non æquè aliis indicta Chri-  
» stianis populis esse existimari debet, cum illi  
» haud Imperio, quàm sacris, ac religionibus no-  
» stris infestiores hostes sint. Quod sentiens Pius  
» quintus Pontifex Maximus, cujus hæc est pro-  
» pria cura, publicæ incolumitati, salutique prospi-  
» cere, non solum ipse cum Philippo Rege Hispa-  
» niæ, & cum Venetis fœdus percussit, sed reli-  
» quos quoque Reges, populosque invitatum, sol-  
» licitatumque in hujus societatem fœderis misit.  
» Et vos imprimis, Poloni, gloriosi, ac pii belli so-  
» cios expetit, cum propterea quod virtuti vestræ plu-  
» rimùm fudit, tum quia vos quantò propiorem,  
» magisque expositam hosti terram incolitis, ma-  
» júsque inde salutis, ac libertati vestræ periculum  
» imminere intelligitis, tantò promptiùs cum cæte-  
» ris juncturos arma sperat, quæ sponte vestrà ob-  
» jecta semper, atque infesta Barbaris, ac sævis na-  
» tionibus pro Christiano nomine habuistis. Non  
» enim animum vobis, Poloni, profigandi bello  
» Turcas, atque hanc pestem lateri vestro adhæren-  
» tem extinguendi, non studium propagandi fidem  
» Christianæ pietatis defuisse vnquam scimus ; sed  
» tempus, ac fortunam expectatam, cum Chri-  
» stiani nominis Reges, populisque viribus, animis

que conjunctis ad opprimendum tandem com-  
munem hostem consurrexissent. Hæc nunc vo-  
bis optata occasio offertur. Selimus ingenitâ stirpi,  
ac sanguini ejus in Christianos rabie, perfidiâque  
abruptâ pace, quam paulò antè sanctissimo jure-  
jurando (si quid modò sanctum Barbaris est) cum  
Veneris renovarat, Cyprum insulam bello est ag-  
gressus; sperans scilicet Christianos propriis ut  
antea distinctos odiis nihil se commoruros, ita si-  
bi facultatem Venetos aliorum auxiliis destitutos  
opprimendi futuram. Verùm adnitente Pontifi-  
ce Maximo, Philippus cujus opes per se sustinen-  
do bello sunt pares, arma secum, & cum Veneris  
consociavit, Cæsar, Germanique idem parant,  
Sebastianus Rex Lusitaniæ ultro se socium piæ  
militiæ offert, neque Galli, quamvis longè di-  
stant à Turcis, eorûmque fœdere attingantur,  
non magnam spem sui faciunt. Ad hæc navali  
prælio attritæ hostium vires sunt, & multi Græ-  
ciæ, ac Macedoniæ populi post victoriam Chri-  
stianæ classis sustulere animos, & nisi nos ardori  
eorum defuerimus, rebellionem pollicentur; ut  
si hanc elabi è manibus occasionem Christiani  
patiamur, tum existimare sit iratum nobis Deum  
mentem eripuisse. At pax Polonis, atque amici-  
tia cum Turcis manet mutuo jurejurando firma-  
ta, à qua neutris salvâ religione discedere fas est.  
Quâ fide Turcæ amicitias colant, semperque co-  
luerint, docent domitarum ab ea gente Provin-  
ciarum annales, quas dolo, ac perfidiâ plures,

» quàm armis : subegisse satis constat : & ne vetera  
 » scrutemur, dicerem Venetos, quantum Barbaro-  
 » rum fidei credendum sit, documento nobis esse  
 » posse, nisi vos ipsi aliis esse possetis. Nec recen-  
 » sebo nunc Bialugrodum, frequens ad ostium  
 » Tyræ oppidum, vobis injuriâ, ac fraude Turca-  
 » rum ademptum, & duo item oppida in ipsâ Po-  
 » dolia contra fœdus capta, ac permunita. Antiqua  
 » hæc sunt ; præsentia, ac nota pendamus. Supe-  
 » riori anno ante navalem pugnam, causati nescio  
 » quam tributi (sic enim ipsi in nominis vestri con-  
 » tumeliam appellant) pensionem non solutam à  
 » vobis Scytharum Regi esse, Scythas ipsos in Polo-  
 » niam immiserunt. Ipsi scitis, quam vastitatem  
 » fertilissimis Russiæ, ac Poloniæ agris rapacissimæ  
 » feræ intulerint, quot captivorum millia in fœdam  
 » servitutem abduxerint. Idem facturi hoc quoque  
 » erant anno, nisi navalis victoria intercessisset ; nam  
 » quadraginta millia eorum in vltiori ripa Bory-  
 » sthenis confedisse, omnes nuper nuncii attulere,  
 » quos transitu fluminis, non hyemis expectatio, sed  
 » novum Selimi imperium nihil postamissam clas-  
 » sem in Polonia irritandum ducentis prohibuit.  
 » Scythico bello dilato, quo turbari apertè fœdus vi-  
 » deri poterat, Valachiam occupare aggressi sunt, vn-  
 » de legitimo Principe expulso, nullius criminis,  
 » præterquam nimii in Polonos studii, ac fidei reo,  
 » nequissimum servorum Tyranni, desertorem Chri-  
 » stianæ pietatis, infelici Provinciæ dominum im-  
 » posuere, Turcarum non profanos modò colentem

religionis ritus, sed crudelitatem, avaritiam, li-  
 bidinem exercentem, &, quod vestra quanti in-  
 terfit profectò vos intelligitis, illorum jussis, nu-  
 tibúsque servientem. Sigismundus pater, Rex om-  
 nibus sapiéntiæ laudibus clarissimus, magnam sem-  
 per curam habuit, ut is Valachiæ imperaret, qui  
 non modò Christianarum partium, si quando  
 hæc fortuna incidisset, futurus esset, sed qui sibi,  
 atque huic Regno certis fœderis legibus obstrin-  
 geretur; & sui fines à Turcarum finibus illâ interje-  
 ctâ Provinciâ disternerentur. Hanc Valachiam  
 qui obtinet, non addictus modò Turcis est, sed  
 prorsus inimicus, infensúsque Polonico nomini;  
 quippe quem non fugiat, Bochdanum æmulum  
 suum præsidio vestro fultum ad se oppugnandum  
 nuper Tyram trajecisse, ac vestris Nunciis, litte-  
 rísque nunc maximè Valachos in se sollicitari.  
 Hoc loco utrumque vobis pendendum est, vio-  
 laverintne Turcæ pacem, qui contra fœderum  
 pacta hominem circumcisum Valachiæ dominum  
 fecerint, ei que militare præsidium, quo se, Re-  
 gnúmque adversus vos tutaretur, miserint: an vio-  
 latæ culpam in vos rejeçturi sint, qui Bochdanum  
 vi, atque armis reducere in Regnum conati estis.  
 Labare certè jam pacem constat, cùm illi post re-  
 ductas è Valachia vestras copias, ultro in Russiæ fi-  
 nes incurrerint, captivos, prædas, incendia, aliá-  
 que hostilia fecerint. Jam vobis edendum erit, pu-  
 blicóne consilio, an privatâ necessitudine Boch-  
 dano exercitum ad recipiendam Valachiam tra-

» dideritis : si publico decreto factum fateamini ;  
» turbata pax, eversumque haud dubiè fœdus est ;  
» sin à publica fraude omnem in privatas necessi-  
» tudines culpam contuleritis, ne ipsi quidem Turcæ,  
» cùm commodum fuerit, sanctum id fœdus habi-  
» turi sunt, quod privatis turbasse noxæ non fuerit.  
» At Nuncii post id factum à Selimo ad vos missi,  
» litteræ solito etiam clementiùs scriptæ, atque om-  
» nia pro pristina amicitia facta sunt. Id verò quam  
» in partem interpretemini etiam atque etiam, Po-  
» loni, considerate. Unde enim hæc repenti Bar-  
» baris comitas ? Quò tumidis, & suprà mortalita-  
» tis modum efferre se superbiâ, ac vaniloquentiâ  
» solitis blanditiæ ? Scilicet vestrum hoc, non suum  
» esse tempus norunt, verentur, ne eo utamini,  
» avertere à vestra occasione, & ficto amicitiz no-  
» mine sopire vos volunt, & quos bello non au-  
» dent, pace oppugnare student. Quò blandiùs  
» agunt, quò magis sui dissimiles sunt, eò majorem  
» irarum molem pectoribus claudunt, suumque tem-  
» pus cauti opperiantur, vestrum vobis eripere stu-  
» dent. Interea Regni vestri claustra occupant ; ne-  
» que enim Valachiam per se peti ab illis existima-  
» re debetis ; cujus Regulos multò antè stipendiarios  
» habuerunt. Hunc in Poloniam gradum sibi fa-  
» ciunt, & ne quid auctoritatis in ea Provincia vos  
» habeatis, præcavent. Hinc illa expulsio innoxii  
» adolescentis, cui quid præter vestram amicitiam  
» objectum est ? Nolite, Poloni, expectare, dum Co-  
» thino occupato, munitoque, vos non solum Va-

Va-



Valachia spe excludant, sed Camenitio timere «  
 assidue cogant; si enim, quod vos non fugit, pro- «  
 ximis annis Alexandrum hujus Bochdani patrem «  
 ad recuperandam Poveriam sollicitarunt, quid «  
 facturos puteris, cum Valachiam ipsi in potesta- «  
 te habebunt? Et quis prohibet, si vos desides, & «  
 nihil commoventes viderint, quin Transsylvaniam «  
 quoque in eandem servitutem trahant, ac Re- «  
 gnum inde vestrum ita cingant, ut saevissimos, «  
 & cupidissimos hostes assidue in cervicibus ha- «  
 bere cogamini? Hæc cum ita sint, etsi bellum «  
 expetendum non est, sapientius tamen facere vi- «  
 dentur, qui ejus impendentem necessitatem an- «  
 te capiunt, suoque tempore utuntur, quam qui «  
 cunctando, ac prolatando suam occasionem ho- «  
 stibus tradunt; prudentium enim est imminen- «  
 tia prospicere, ut occurrant, impendensque ma- «  
 lum remediis antevertant. Data vobis occasio «  
 est, qualem majores vestri sæpè expetiverunt, eam «  
 si abire patiamini, (falsus utinam vates sim) valdè «  
 vereor, ne serò vos nimii quietis, atque otii studii «  
 poeniteat, serò me vera monuisse prædicetis. Sigis- «  
 mundum quidem patrem ultimâ senectâ dicere «  
 solitum accepi, nihil se in vita magis optasse, «  
 quam ut hunc diem videret, cum consentientes «  
 Christiani Principes Turcas bello aggrederen- «  
 tur; tum profectò se omnibus hominibus testa- «  
 tum fuisse facturum, voluntatene, an necessitate «  
 Turcarum amicitiam coluisset: huic voto illam «  
 ab amantissimo suorum Rege subiectam fuisse «

» vocem, florentissimum quidem se, atque multis  
» auctum rebus, sed immanibus Turcarum opibus  
» obnoxium, expositumque Regnum filio tradi-  
» turum. Nimirum inveteratæ prudentiæ senex in-  
» tellexit; nunquam Polonos in stabili, ac tuto li-  
» bertate futuros, dum gentem naturâ hostem,  
» tempore modò non inimicam, tam infidam, tam  
» validam, tam propinquam haberent, & versu-  
» ram aliquando in hoc Regnum Barbarorum tem-  
» pestatem, quam hæcenus varii temporum, & cu-  
» piditatum impetus aliò averterunt. Hoc peracuti  
» senis vaticinium, vel charitate optimi Regis, vel  
» auctoritatè sapientissimi viri plurimum apud vos  
» ponderis habere debet, ad oblatam divinitus fa-  
» cultatem frangendi nimias importuni Tyranni  
» opes non omittendam. Nec duci vos, fallique  
» specie falsâ societatis patiendum, quâ tantisper,  
» dum aliis bellis distinentur, illigatos habere vos  
» illi volunt. Sed ut idem sæpius repetam, secum  
» quisque geri existimare debet, quodcumque  
» cum Christianis à Turcis geritur bellum: & om-  
» nibus quidem, & vobis imprimis ipsum commu-  
» nis exitii periculum satis causæ esse videtur, cur  
» arma in communem hostem sumantur. At quid  
» vos moretur, post partam eam victoriam, quâ  
» pulsus possessione maris hostis, terrestrium copia-  
» rum robur maritimis oris, quantum Græciæ,  
» quantum Asiæ, atque Syriæ littora ambiunt, cu-  
» stodiendis, præsidis que formandis dissipaturus  
» sit? ut si qua classibus, quâ terrestribus exerciti-

bus ab Ungaria, Polonia, Dalmatia, Christiani “  
 aggrediantur, dubitare nemo possit, quin brevi “  
 exacturi Europâ Barbaros simus. Sed proponite “  
 tum vobis nullum esse inter Christianos fœdus, “  
 nullam adversus Turcas societatem, neminem vos “  
 ad eam invitare, & Regnum hoc à Turcis bello “  
 peti, quod aliquando facturos apparet; vtrum “  
 tantas esse Poloniæ vires putatis, quibus per se si- “  
 ne aliorum ope sustinere vim hostium, possit? an “  
 si soli relinquere mini, pares fore vos Turcis, non “  
 speratis? Si eæ vires vestræ sunt, vt vestris co- “  
 piis subire vos Turcicum bellum posse confidatis; “  
 quem campum parandæ gloriæ majorem expe- “  
 ctetis, quàm cum à Christiana Republica peri- “  
 culosissimum bellum vi, ac virtute vestrà propul- “  
 sare possitis, & cum singulari fama Polonici no- “  
 minis Imperii vestri terminos longissimè profer- “  
 re? Sin resistere ipsi invadentibus toto conatu “  
 belli vos Turcis non posse solos sentitis; profe- “  
 ctò ni tam vilis vobis vestra libertas esset, vt in “  
 voluntariam concedere servitutem nihil pensi ha- “  
 bituri essetis, aliorum imploranda auxilia, & sin- “  
 guli adeundi, ac rogandi Reges, & ad societa- “  
 tem belli ciendi, inflammandique forent, quos “  
 si vobis Deus iunctos inter se fœdere offerret, “  
 certè pro summa id felicitate duceretis. At non “  
 solum iuncti fœdere Principes, sed clarissimæ vi- “  
 ctoriæ fructus vltro vobis offeruntur. (nam nisi “  
 vestro tempore suscipiatis, alieno habituros ali- “  
 quando vos cum Turcis bellum dubium non est) “

Qq ij

» At cujus victoriæ ? Quâ hostes Imperio maris,  
» quo Europæ Imperium contineri omnium sæcu-  
» lorum judicio constat, depulsi sunt. Cujus si nos  
» victoriæ segni cunctatione fructum corrumpimus,  
» & hostem reficere maritimas vires, & amissam  
» maris possessionem repetere sinimus, haud pro-  
» fectò scio, an non vicisse satius fuerit. Nam ces-  
» sando brevè, & æquè validum, & multò quàm  
» antea infestiores habituri hostem sumus; nec  
» periculo propior quispiam est futurus, quàm qui  
» maximè opportunus terrestri bello fuerit. Et vos  
» salutem vestram præsentì paci ab infidelium ho-  
» stium fide pendenti creditis ? Equidem Deum  
» precor, ut vestra vos credulitas non fallat, sed ex  
» his, quæ gesta nunc in Valachia sunt, magnope-  
» rè vereor, ne aut opinione vestrà maturius trans-  
» isse Tyram Turcas accipiatis, aut motum in eo-  
» rum jam animis bellum tandiu non sentiat, donec  
» tanquam ignis cuniculo admotus, paulatim  
» serpens in magnum mox incendium, ruinamque  
» erumpat. At multa vos à suscipiendò tanti discri-  
» minis bello deterrent. At primùm nulli magno  
» negotio aggrediendo non multæ oboriuntur dif-  
» ficultates, quas ipsum postea agendæ rei studium  
» tollit: deinde cum incensa ardet domus, & vr-  
» gens constrepat flamma, nemo se ut ornet, ut  
» comparet, moratur; sed quisque vel nudus, vel  
» æger quantum potest, se periculo proripit. Hostis  
» in finibus est, intrat etiam, & populatur vestros  
» agros: sive progrediatur longius, & facere vim

pergat, prohibendus; sive inhibeat, & se Valachia contineat, timendus eò magis, quòd tantum aries, major ex ipso receptu imperus inferetur: ut vestra nunc deliberatio esse videatur, non an verum bellum cum Turcis habeatis, sed vtrum vestro, an illorum tempore geratis; vtrum impendenti de libertate, ac salute vestra certamini obviàm eatis, dum distractæ, comminutæque hostium vires haud dubiam victoriam pollicentur; an dulcedine præsentis otii capti, eventum alieni periculi spectantes, sine ullius gratia victoris præmium sitis. Habendum aliquando est vobis, Poloni, bellum, neque differendo avertitis, sed ut cum paratiore, ac validiore hoste geratis, facitis. Quò magis miror esse, qui præsentem, etsi dubiam, nec diu duraturam pacem ita anteferrant belli consiliis, ut pro hac ipsa brevis, ac solliciti temporis vsura nihil cogitent, inquantam se curarum, ac discriminum molem conjiciant. An ergo bellum, bellique curas ita, Poloni, horrebitis, ut salutem vos alienæ libidini obnoxiam ducere non sentiat, & si sentitis, non servitute gravius feratis? An verò libertatem vestram vel morte vindicandam non putatis? An id agitis, ut dum ipsi præsentipace fruamini, nihil pensi habere credamini, si omnem belli tempestatem in liberos vestros rejiciatis, quod ipsum tamen consecuturi non videmini? An in privato pater quisque familias, ut patrimonium filiis explicatum, constitutumque relinquat, & ne qualis, ne

» qua controversia eos turbet, tanto studio, operé-  
 » que sollicitus laboret? Senatus, qui patriam cu-  
 » ram omnium gerat, ut communium liberorum,  
 » ac posterorum incolumitati, salutique prospicia-  
 » tur, ac tuta iis, atque integra libertas relinqua-  
 » tur, non æquè anxius curet? Sed esto, nullum sit  
 » à Turcis præfens periculum, quod est tamen ma-  
 » ximum, certam, exploratamque Poloni habeant,  
 » habiturique sint pacem. Ipsa est Respublica ve-  
 » stra ita ad belli artes, ad militiæ studia omnis  
 » instituta, ut isto amore nimio pacis jam depravari  
 » cœpta, verendum magnoperè sit, ne diutino  
 » otio penitus corrumpatur; ut enim validum, ac  
 » robustum corpus si in ignava, ac inerti quiete  
 » habeas, contabescit, gravesque contrahit morbos:  
 » ita Respublicæ nisi in eadem disciplina, iisdem-  
 » que artibus retineantur, ad quarum usum insti-  
 » tutæ sunt, tanquam humana corpora ægrotant,  
 » & luxu, & licentiâ corruptæ graves seditionum,  
 » ac discordiarum morbos contrahunt; cujus mali  
 » magna Poloniam concepisse semina, vos ipsi sine  
 » mea commemoratione intelligitis. Horum om-  
 » nium medicinam belli, atque armorum studium  
 » diuturnâ vobis disciplinâ, ac propè naturâ infi-  
 » tum præbebit. Hoc enim Poloni vestrum est cur-  
 » riculum, hæc gloriæ materia, hæc exercitatio;  
 » his studiis convaleuistis, his robur, hoc tot Provin-  
 » ciarum in vnum Regnum, corpusque subacta-  
 » rum assumpsistis. Scilicet majores vestri à quibus  
 » parta hæc sunt, non in compensatione, & convi-

viis, sed in equis, in laboribus juventutem habuere. Non vter plus vini simul ebiberet, majoraque exhauriret pocula, sed vter cursu alios anteciret, vter arcu certius figeret, vter equis, armisque præstaret, certamen erat. Non denique domi per voluptates, sed in castris per virtutes opes, honorisque parabantur, nec aliam laudem, laudisve præmium ullum norant, quam militiæ munera impigre, fortiterque obire. His artibus ad dignitatem, ad hanc bellicæ virtutis famam majores vestri pervenere, quâ Polonicum nomen & finitimis nationibus terribile, & longinquis clarum, illustréque fecerunt. Verum si ne hæc quidem revocandi priscam disciplinam, & Rempublicam in quibus crevit, artibus retinendis satis justa causa videtur, cur in publicam Christianæ fidei causam pro communi salute non descendatis? Tum illud cum animis vestris reputate, vestræne intersit vincere, aut vinci Christianos. Nam si iis victis, subactisque, ne vos quidem salvos fore intelligitis, bellantes certè non ipsorum solum, sed vestrâ etiam causâ juvare ope, auxilióque debetis, ne cadentibus illis, unâ vestrum Regnum eodem casu impulsum ruat. Si autem victores nos hujus belli futuros creditis, cur non multò libentiùs, promptiùsque eadem arma, eundemque conatum ad victoriæ societatem conferatis, quem fulciendæ ruinæ adhibitori fuissetis? Proinde memores rerum à majoribus vestris gestarum, memores beneficiorum, quæ à Deo

» accepistis, memores salutis, dignitatísque vestrà,  
 » hæc corporum, hæc animorum robora, tantam  
 » virorum, equorum, commeatuum copiam grati  
 » Deo ipsi reddite, Deum jubentem capeßere pium  
 » bellum adversùs Christianæ pietatis hostes, vo-  
 » bísque præclaram testandæ virtutis, propugnandæ  
 » díque Imperii occasionem aperientem audite. At  
 » si deferere patriam, deferere parentes nefas duci-  
 » mus, reputemus animo, quo nos scelere obliga-  
 » turi simus, si JESU CHRISTI causam neglexerim-  
 » mus, si ejus sacra, cultum, numen oppugnantibus,  
 » feris, atque internecinis hostibus non ob-  
 » stiterimus. Ego quidem ipsum oro, atque obse-  
 » cro JESUM CHRISTUM Deum, vt vestras,  
 » Regísque mentes in tantæ rei deliberatione ita  
 » regat, vt nihil, nisi quod cum ipsius Dei majestate,  
 » cum vestra, vestríque Regni amplificatione, ac de-  
 » nique cum Christianæ Reipublicæ utilitate conjun-  
 » ctum sit, statuatis, vt aliquando non infidam, &  
 » alieno arbitrio obnoxiam pacem habeatis, sed  
 » libertate stabili, suisque nixâ viribus & ipsi frua-  
 » mini, & posteris vestris tradatis. Oratio Legati  
 » ipsis quoque qui Turcica arma, bellúmque horre-  
 » bant, pudorem, dubitationémque injecerat, & si  
 » res relata ad Senatum fuisset, rejici bellum sine ma-  
 » gnis contentionibus non poterat; adeò multi  
 » quotidianis Commendoni sermonibus imbuti  
 » Christianorum fœderi, ac societati studebant. Sed  
 » Regis morbus in dies ad tabem, periculúmque  
 » vergens omnium animos, ac ipsius quoque Com-  
 » men-



mendoni curam ab aliis rebus in se avertit, quòd neque liberi Regi, neque ex Regia stirpe certus successor, si fato Rex concessisset, ullus erat. Et eodem tempore Pii V. Pontificis Maximi mors sanè importuna Reipublicæ intercesserat. Et quamquam Romani Patres salubri festinatione Gregorium XIII. postridie quàm se conclavibus incluserant, Pontificem Maximum renunciarunt; tamen contraxerat ea res, suspenderátque novi Principis expectatione omnium animos, atque ipforum quoque Venetorum spes, ardorque ad bellum morte Pii magnoperè resederat. Sed Gregorius statim certis tabellariis per dispositos equos in Poloniam missis, Commendono scripserat, ut & causam fœderis ne defereret, & nunciato per eos dies Romam Augusti morbo, si mori eum contingeret, ut ipse novi Regis comitiis interesset, ac si Poloniâ jam decessisset, ejus rei causâ regrederetur, præceperat.

*FINIS LIBRI TERTII.*





ANTONII. MARIÆ.  
 GRATIANI  
 DE VITA  
 JOANNIS FRANCISCI  
 COMMENDONI  
 CARDINALIS  
 LIBER IV.

---

*De Sigismundi Augusti Regis ultimi Jagellonia familia morte.*

CAPUT PRIMUM.

**A**UGUSTUS captus formâ, (erat enim insignis) illecebrisque ascitâ nuper in Regiam pellicis, ad eum se abutendum ipsi, matrique permiserat, ut commoda, honores, publica, privatâque munera, nisi qui fidem

mulieribus obligassent, non acciperent, quorum assentatione ad spem usque conjugii, Regiisque nominis animos extulerant. Et Rex adeo perditus amore, ac libidine erat, ut affectum, atque ægrum corpus vix trahens, nihil tamen quotidianis amplexibus temperaret, spretis domesticorum, medicorumque precibus, monitisque vitæ suæ periculum instare ex tam assiduo veneris usu denunciantium. Cum ingravescente morbo ne tollere quidem lecto defessa membra jam posset, tamen raro, atque ægrè admissa sorore, cæteris omnibus exclusis, curam valetudinis, suique iidem mulieribus commiserat, quæ rejectis aliis consiliis, sagam anum veneficiis, cantionibusque salutem promittentem curationi ejus adhibuerunt. Igitur destitutus medicorum ope, corpore luxuriâ exhausto, confectoque, ac nugatoriis mulierum artibus nihil levatus Nonis Julii animam egit, nullis relictis, nec unquam susceptis liberis; ita cum eo Jagellonis virilis stirps omnis interiit, quæ ducentos propè annos Regnum in Polonia tenuerat. Jagello auctor generis Lithuanos imperio rexerat, quo tempore ipsi, quibus sylvestria animalia, serpentesque, quos domi innoxios alebant, præ numinibus erant, Christianorum instituta, sacræque famâ magis, quàm opinione aut cultu acceperunt. Tantæ tum simplicitatis fuisse dicuntur, ut virgines suas simul ac pati virum posse viderentur, cupientibus inire exponerent, nec illibatâ vlla nupisset, neque ipsum inde ma-

Rr ij

rimonium sanctius haberent, cùm matronis honori amatorum multitudo esset. Poloni, mortuo Ludovico eorum Rege, ad vnicam filiam ejus, nomine Heduvigim paternum Regnum detulerant cum eo, ut virum quoque cui nuberet, dotalèque Regnum ferret, ipsi eligerent. Regnum, nuptiásque Heduvigis Gulielmus Archidux Austriæ magnoperè appetivit, atque in hunc puellæ ipsius voluntas inclinavit specie juvenem, & ætate florentem, cujus etiam accitu Cracoviam venit, nec abfuit suspicio clam eos concubuisse. Sed Poloni, coacto redire domum Gulielmo, Heduvigis conjugio Jagellonem destinarunt, pacti ut Lithuania Poloniæ adjungeretur, idémque Rex utriusque gentis esset, & Jagello, & Lithuani omnes, inanium deorum abolito cultu, Christiana sacra, fidémque sacrorum susciperent. Ita Cracoviam ductus Jagello Poloniæ Rex constituitur. Ei duo filii fuere, Uladislaus, quem Turcico bello adversà ad Varnam pugná interfectum suprà attigimus, & Casimirus, qui fratri occiso in Regnum successit. Hic egregià quindecim liberorum sobole est auctus, quorum fœminis novem finitimis Germaniæ Principibus collocatis, multos populos affinitate, amicitiaque est complexus. Filiorum natu minor, Casimirus nomine, actâ innocentissimâ vitâ, magnam moriens primâ juventâ sanctitatis opinionem reliquit, quam etiam miraculis affirmatam Poloni tradidere. Federicus quoque alter filiorum sacerdos factus, Archiepi-

scopatu Gnesnensi, & Cracoviensi Episcopatu præfuit, & ab Alexandro sexto Pontifice Maximo honoris causâ in Cardinalium collegium est cooptatus. Uladissaum Bohemi primum, deinde etiam Ungari ultro Regem adsciverunt. Huic filii duo fuere, Ludovicus, & Anna: Ludovicus, cui post mortem patris Ungariæ Regnum obtigerat, admodum adolescens, temere cum Turcis congressus, fatali familiæ suæ casu victus in fuga occubuit. Anna Ferdinando Austrio Cæsari nupsit, eumque aviæ fecunditatem æmulata quindecim liberorum parentem fecit. In Polonia post Casimiri mortem, paternum Regnum Joannes Albertus maximus natu filiorum, & post eum Alexander frater suscepit. Uterque liberis caruit: His vitâ functis Regnum Sigismundus obtinuit, qui in magna filiarum copia virilis stirpis vnicum filium reliquit hunc Sigismundum Augustum, cujus mortem suprâ tradidimus, in quo genus, ac nomen Jagelloniæ familiæ defecit.

*De perpetratis à Commendono pro Regis  
Catholici electione.*

## CAPUT II.

**P**OLONI etsi Reges nisi ab se creatos non ferunt, nec hereditatis, aut nascendi legi

Rr iij

Regnum, sed sibi acceptum ferri, suumque beneficium facere, agnoscique volunt; tamen securi aliarum gentium morem, raro quemquam Regum suorum filiis prætulere, mansitque ferè in iisdem familiis Regnum, quandiu è Regio sanguine virilis stirps superfuit. Et Reges ipsi, ne filiorum dignitas in dubio, ac discrimine esset, quicumque prius iusto matrimonio eis nasceretur, (nam pellicibus orti vix agnoscuntur) eum vel infantem Regem, successorémque sibi designari haud magno negotio impetrabant, devinctis beneficio, comparatisque nobilitatis Principibus, qui rem perficiendam susciperent: ita plus gratia, & præsentis respectus Regis in comitiis, quàm libertas valebat. Extincto demum Augusto, repetitam ex longo intervallo libertatem nemini jam vllâ verecundiâ, metuque obstrictam avidè invaserunt, quæ brevè, ut nulla tenere modum multitudo novit, in pravam, periculosamque licentiam vertisset, ni seniores salubri moderatione præcipitem sustinuisent. Nam ubi Rempublicam sine imperio, sine rectore esse, & silere leges, quarum exactor nemo existeret, sensere, primum singulæ Provinciæ pro se quæque consiliis habitis publicæ pacis servandæ leges sanxerunt; deinde collatis in commune consiliis nobilitas omnis in id datâ fide conspiravit, ut pro hoste patriæ haberetur, impune occideretur, quicumque per interregni tempus vim, injuriâque alteri intulisset. Et omnes quidem

fatebantur maximè ad eam rem vsui præsentem Commendoni auctoritatem, prudentiamque fuisse, quòd cum illo plerique Principum liberius multò, quàm inter se consilia, resque omnes communicabant, atque ipse paci maximè studebat. Cujus rei vnum ipso statim initio interregni datum documentum fidem omnibus affirmaverit. Sborovii fratres Martini filii, qui tum genere, opibus, ætate, gratiâ, clientelis plurimùm in Republica pollere videbantur, ad primum extincti Regis nuncium Cracoviam armati convenerant eo animo, vt pulso Firleio Palatino, quocum summas simultates gerebant, arcem, urbemque in suam redigerent potestatem. Hi juvenes inde à paterna disciplina pravis imbuti erroribus in Calviniana hæresi omnes erant, præter Andream, qui medius ætate auctoritatem majoris natu inter eos ingenio, atque industriâ obtinebat, tribuebantque ei reliqui plurimùm. Hunc habebat Commendonus non solum consuetudine, atque vsu, sed plurimis benevolentia officii devinctum, ab vnòque maximè colebatur. Is ad Commendonum, quâ die Cracoviâ profectus fuerat, & acceptâ Regis morte apud Tegnitium decem inde millia passuum substiterat, intempestâ nocte venit, illique suum, ac fratrum consilium occupandi Cracoviæ arcem aperuit, sperans Commendonum, quia Firleius Palatinus hæreticus, caputque hæreticorum erat, rem consilio adjuturum. Sed Commendonus veritus ne ea res veluti si-

gnum omnia vi, atque armis agendi daret; & primus impetus ab egentibus, ac prædorum cupidis in templa, sacerdotésque fieret, cunctáque audacia, & temeritas, consilio, ac ratione exclusis, haberet, & Regnum inde aut pessimo cuique per malas artes pateret, aut lacerum plures occuparent, vehementer huic se consilio objecit; & cum Andræ ostendisset, quantam invidiæ flammam eorum familiæ conflaturo illo facinore essent, quantum de multitudinis gratia amissuri eo tempore, quo non retinenda solum, sed summo conatu captanda, conciliandaque omnium studia essent, quantam denique vim adversariis suis addituri, juvenem de sententia deductum eadem nocte ad continendos in officio fratres ab se dimisit. Jam inde ab ingravescenti Augusti morbo, cum timeri mors ejus cœpisset, Commendonum major jam futuri Regis, quàm societatis Turcici belli cura incesserat, cujus & præcisam eo statu rerum spem cernebat: & hæreticos, quorum neque in Senatu, neque ad multitudinem negligendæ opes erant, occultis coitionibus multa senserat contra Rempublicam moliri, & ut corporis sui aliquem ad Regnum pertruderent, agitare. Ipsa enim capita consiliorum enunciata illi ab consiliis fuerant, quorum erat primum, ut Rex non nisi hæreticus crearetur, aut certè qui omnibus liberam de divinis rebus sentiendi, disserendique, & quæ quisque probaret, sacra habendi facultatem permetteret: ac præterea, ut

quæ



quæ de Catholicis hæretici occupassent, ea repetendi jus nemini esset; utque Ministris sacrorum suorum templa toto Regno paterent, in quibus suo ritu rem divinam facere, ac de divinis rebus ad populum conciones habere liceret; aliæque item haud absimili furore: atque in hæc eos conjurasse, & egregiè consentientes esse didicerat. Quibus rebus eò magis movebatur, quò imparatiores ad omnia Catholicos esse intelligebat, qui quamquam & numero, & genere, & opibus, & causâ longè præstarent, tamen somnus ad hæc eos quidam ac torpor invaserat; & hæreticos plerique, quasi nihil aliud agerent, quàm sacerdotum potentia, quæ ferè in invidia est, adversarentur, lentè ferebant, nec eos ut eversores Christianæ pietatis, rerumque publicarum turbatores oderant; quin mixti plerique hæreticorum factionibus, consiliisque, studia quoque eorum in Republica aut sequebantur, aut trahebant: quo fiebat, ut Catholicorum vis omnis magnopere hebesceret. At Commendono utrumque cordi erat, & ut Catholicus Rex, & ut pariter per Catholicos crearetur. Id una assidue ratio erat dissipatos, ac nihil in medium consulentes reconciliare, & jungere Catholicos; hæreticorum dissidia alere: horum capita erant Joannes Firleius, & Petrus Sborovius, claris uterque familiis, uterque primos in Republica magistratus gerens. Sborovius Palatinus Sandamiriensis; Firleius ad Mareschallatum Regni (Præfecturæ id est nomen) Palati-

natum Cracoviensem quoque nuper adjecerat; eaque dissidii origo inter eos erat. Nam Sborovius hunc ipsum Palatinum sub Regis mortem summis studiis petens, cum suffragatorem Firleium sperasset, æmulum, competitorémque fuerat expertus; & Rex præterito Sborovio, honorem ad Firleium concubinæ gratiâ commendatum detulerat; quæ res Sborovium suapte ingenio vehementem, ac concitum, nec unquam animi satis potentem ad hostiles iras, odiâque in Firleium accenderat; atque hæc similitas opportunè deduxerat hæreticorum vires, maximumque ad Catholicum Regem creandum momentum attulisse satis constat. Et Commendonus eam à Republica esse palam ferens omni arte fovit, aluitque, ac Sborovium per Andream fratrem monuit, adverteret animum ad Firleii consilia; in ejus domo occultos cœtus haberi; & haud dubiè illic coqui, ac per idoneos, & callidos homines (nec erat aliter) conciliari Regnum. Hoc metu injecto, Sborovius, quò inimicum omni spe dejiceret, apertè pro Catholico Rege creando Catholicis se junxit. Inter Catholicos qui honore, divitiis, auctoritate cæteris anteibant, Episcopi à Senatu se, publicisque muneribus ad privatarum rerum curam receperant, clamoribus hæreticorum, audaciâque deterriti haud cum iis consilia miscuerant. Nam Franciscus Crasinius Episcopus Cracoviensis, qui paulò antè mortuo Padnevio successerat, se Firleio tradide-

rat; Petrus Miskonius Episcopus Plocensis, magnæ vir prudentiæ, eloquentiæque, tædio (vt ferebat) turbarum, desertâ Republicâ pecuniæ suæ incubabat; Ucangii Archiepiscopi mores, ingeniumque suprâ tradidimus: reliqui Episcopi hos ferè sequebantur, aut inopiâ, inopiæve simulatione domi attinebantur. Unus erat Stanislæus Carnovius Episcopus Chioviensis, qui neque adversâ famâ in Republica versabatur, & pro sua fide mansurus in bonorum partibus, nec pecuniæ, nec labori parsurus, vt sui specimen tempore tam necessario daret, videbatur, atque in eo, & vsus Reipublicæ, & promptus, aptusque tenendæ multitudini sermo erat prorsus, vt bono publico futurus popularis videretur, nisi videri ipse nimis cupivisset; ita enim ferri se interdum secundo favore vulgi patiebatur, vt à bonis etiam consiliis abduceretur, modumque non facilè teneret, animo nunc erecto, & confidenti, nunc fracto, ac demisso, vt flaret, reslarétque multitudinis aura; sed famæ cuiuscumque dum magnæ avido, major tamen bonæ cupiditas inerat. Is sponte suâ Commendonum reverebarur, vniqûe maximè probari actiones suas optabat, & Commendonus ita dexterè hominis ingenium tractavit, vt perstudiosum sui semper habuerit, ac sæpè gloriæ æstu abreptum continuerit. Erat & in Catholicorum Principibus clarum Alberti Laschii nomen. Is paucis antè annis privato sumptu, consiliisque comparato exercitu, tentatâ Valachiâ ex-

perientis, ac providi ducis famam tenuerat, & largè, profusèque donando, maximè militares viros trahebat, ac ne in concionibus quidem, & in conciliis infacundus haud parvam nobilium juvenum gratiam collegerat; inter primos Regno destinatus, si repudiatis externis Regibus, proceres suos Poloni respexissent. Inter hunc, & Commendonum inde à prima legatione ejus instituta amicitia, vsu, & benevolentia in omnia familiaritatis jura pervenerat. Nam Laschius & adventanti in Poloniam extra fines Regni occurrerat, & sive in Regia, sive in via præter cæteros omnibus cum officiis coluerat; nec in Republica quicquam, non consulto priùs Commendono, cœpisset. Hunc & Chioviensem Episcopum certis amicitiaæ fœderibus ita conjunxit, ut vterque daret coram ipso dexteris, fidem jurejurando obligarent, neminem, nisi quem alter quoque probasset, Regem accepturum, arbitriumque Commendono detulerint, si ipsi de eo non convenissent. Addidere, ut consilia de Rege omnia, & inter se vterque, & cum Commendono communicarent. Qui in magno inde negotio habuit quamplurimos Catholicorum, & ante omnes Andream Sborovium huic fœderi, cujus ipse sequester esset, adjungere; quo factum est, ut è Catholicis ad hæreticorum vim, audaciàmque coërcendam duces non defuerint, & Regis non nisi Catholici creandi explicata, constitutàque consilia essent, & Commendonus ipse omnium non particeps solum, sed veluti rector, & moderator fieret.

*De consiliis ejus Regnum vni è Caesaris  
filiis conciliandi.*

### CAPUT III.

**A**TQUE hæc sic comparata, præmunitaque in Polonia Commendoni curâ, ac industriâ fuerant. At in Lithuania (pars hæc altera Regni est magis fœdere, ac legibus, quàm animis Polonia adjuncta) etiam certiora creandi Regis consilia habebant. Duæ in ea gente familiæ longè cæteras opibus, ac dignitate tum anteibant; Radgivilia, & Cotchevicia, atque hæc (quod ferè sit) æmulatione potentiæ in Republica dissidebant. Harum principes erant Nicolaus Christophorus Radgivillus, & Joannes Cotchevicius: Nicolai hujus pater Catholicæ Ecclesiæ adeò infensus, infestusque fuerat, ut opes, quibus reliquos Regni Principes longè est supergressus, ad evertendam Christianæ pietatis fidem omnes contulerit, hæcque nuper conflatas de sacrorum ratione opiniones non invexerit modò in Lithuaniam primus; sed per omnes Poloniæ provincias vnus maximè disperferit. Filii huic quatuor fuere; natu majorem Nicolaum admodum adolescentem in Germaniam, ut in Calvinî doctrinâ, quam ipse maximè sectabatur, institueretur, misit. Sed juvenis vbi sapere per se aliquid cœpit, incon-

Sf iij

stantiâ sentiendi hæreticorum offensus, averterat à paternis erroribus animum, & confusus opinionum varietate, magis tamen quid fugeret, quàm quid sequeretur inveniebat. Nam Catholicæ disciplinæ rudis planè, atque expers erat. Sic affectus, patre mortuo, cum iustrandi studio cæteras nationes in Italiam, Romamque venisset, ac subjecisset oculis, quæ longè secus tradita ab impietatis magistris acceperat, cum aliorum proborum hominum, tum maximè Commendoni confuerudine, sermonibusque commotus, adeò Catholicæ fidei placita mente amplexus est, ut in patriam reverso nihil prius fuerit, quàm sublatum à patre veræ pietatis cultum restituere; & suas sacerdotibus res, honorémque, ejectis novitatis doctoribus, reddere; fratresque inde ita imbuunt bonis opinionibus, ita in priscæ pietatis studiis educavit, ut alter eorum, Georgius nomine, sacerdos, & Episcopus Vilnensis fuerit, & mox à Gregorio Pontifice Maximo, petente Stephano Rege, in Cardinalium numerum relatus: & primus Lithuanorum cum honorem in familiam, patriamque suam intulit filius, cujus pater ad conturbanda sacrorum jura, divinasque ceremonias polluentes, pravissimarum opinionum, atque hæresum disciplinam primus importarat; atque eum honorem ita gessit, ut innocentiae, probitatis, totiusque sacerdotalis vitæ specimina egregia dederit. Corchevicius eadem hæresis labe infectam primam juventam egerat, maturior

ætas saniozem attulerat mentem, & ab eodem  
 Commendono penitus cum Ecclesiâ matre in gra-  
 tiam fuerat reductus; quibus obstrictus pietatis  
 vinculis vterque ei, vt decuit, parentis cultum;  
 atque observantiam exhibebat; inter ipsos nulla  
 propria similtas, disjuncti magis familiæ, quàm  
 suo dissidio erant. Hos, in quorum manu sita  
 Lithuanica res esset, jungere amicitia, gratiaque  
 Commendono in magno negotio fuit, assecutus-  
 que est, vt etiam diligerent inter se, & ex eo cum  
 Nicolao quoque patruo Vilnæ Palatino, à quo  
 hostiliter dissenserat, in gratiam Cotchevicius re-  
 diret. Cùm hos igitur Commendonus haberet  
 sui perstudiosos, ac nihil non tutò committi ab  
 se eorum fidei intelligeret, sæpè vivo adhuc Au-  
 gusto, sed jam graviter decumbente, cum utroque  
 separatim ab altero occultos sermones de Catho-  
 lico creando Rege, deque obviâ eundo hæreti-  
 corum conatibus, si Augustum morbus extinxisset,  
 contulerat; & cùm quærendum externum Re-  
 gem conveniret, quando neminem esse è popula-  
 ribus appareret, cui se cæteri subiecturi essent, sa-  
 tis exploratis eorum sensibus, mentionem de Ma-  
 ximiliani Cæsaris filiis intulit, eos esse adolescen-  
 tes longè nobilissimâ totius Europæ stirpe Re-  
 gum, Cæsarumque genitos, indolis probæ, atque  
 eâ ætate quam facillè ad Poloniæ mores forma-  
 turi essent. Maximiliano enim egregia soboles  
 sex filiorum erat, quos Maria mater (Philippi hæc  
 Regis soror erat) sanctissimâ disciplinâ instituere-

rat, permittente viro conjugii omnem educandorum filiorum curam, & charitatē ejus, & Philippi respectu, cui suam suspectam religionis fidem esse sciebat. Primus Radgivillus, cujus familiæ vetus erat in Austrijs studium, nudavit animum, monuitque Commendonum eodem Cotchevicium perducī posse, vel auctoritate ejus, vel metu Moscorum Principis, cum quo graves inimicitias gereret, & quem antea ab Augusti orbitate ad Poloniæ res sciret aspirare. Cum is quoque Commendono esset assensus, via, ac ratio perficiendæ rei ineunda, statuendaque erat. Dicitur dies, quā omnes simul in colloquium venirent: & quia res premenda silentio erat, ne si ad Commendonum convenissent, productus, quod necesse videbatur, in multas horas sine arbitris sermo, suspicionem præberet, proximam deligunt sylvam, in quam Commendonus per dies æstivos exire paucis comitatus animi causâ solebat. Eò vterque Princeps cum singulis servis à pedibus venit, & Commendonus ipse, me vno assumpto comite, quem solum conscium consilii habebat, rhedâ vectus ad conditum tempus adfuit. Servis traditis equis, atque opperiri cum auriga jussis, in maximè abditum sylvæ locum est secessum, datâ, acceptaque fide, & à me quoque exacto jurejurando, postquam diu collocuti omnia satis expendissent, tandem in hæc est ab omnibus consensus: ut Lithuani vnum è Cæsaris filiis, quem ipse dedisset, Magnum Ducem; sic enim suum ipsi Regem appel-



pellant, Polonis non expectatis statim crearent; procreato, si res posceret, viginti quinque millia equitum in armis haberent; (nam rudes illæ gentes ad pedestrem militiam, tantum equestri bello habiles sunt) neque enim dubium habebant, quin Poloni Lithuanorum præjudicium secuti, quod antè in Sigismundo primo, aliisque factum esset, eundem Regem & ipsi acciperent. Cupiverunt Lithuani non creare solum sibi separatim à Polonis Regem, sed etiam habere, memorantes detrimenta, quæ passa eorum Respublica ab hostibus suis esset, ex quo se Polonis junxissent; proque eo vehementer contenderunt. Sed Commendonus, si hæ gentes in duo dividerentur Regna, neutrum satis firmum fore ratus, ac veritus præterea, ne mutuis inde se bellis attererent, tenuit, ut ejus rei arbitrium Cæsari permitteretur. Privatim illi sibi nihil cautum voluerunt, publice hæc postularunt: ut Lithuanis salvæ suæ leges inviolatæque manerent; Lithuanie magistratus, præfecturæ, publicæque alia munera nemini, nisi Lithuanis mandarentur, externi omnes excluderentur: quod agri paulò antè Augustus Lithuanie ademptum Polonici juris fecisset, id Lithuanis restitueretur: Episcopos non Princeps daret, sed Canonici prisco more repetito liberis suffragiis eligerent. Id juris suaserat Commendonus adimi Regibus, expertus non optimos, & scientiâ divinarum rerum, & religione spectatos ab iis, sed quos gratia, aut ministeria aula com-

mendassent Episcopos dici solere ; unde eos non custodes legum , errantiúmque Regum monitores , quod antea fuerant , sed beneficio , speique obnoxios , plerumque Regum ipsorum nutibus , cupiditatibúsque , nihil discernentes æquæ an iniquæ essent , servire : ex quo maxima Ecclesiastica res damna , detrimentaque accepisset. Hæc omnia , sicuti acta , statutaque inter ipsos erant , rogatur Commendonus , ut in Italiam rediens ad Cæsarem , quem ex itinere conventurus erat , referret. Si Augustus mortem antè obiisset , quàm ille è Polonia decederet , tum me qui hæc eadem ad Cæsarem perferrem , Viennam statim mitterer , ipse omiſſa profectione , futuri Regis comitiain Polonia opperiretur : sive autem me , sive Commendonum ire ad Cæsarem contingeret , ipsi statim aut per eundem me , aut per litteras , quibus conventum erat , notis scriptas , ac certis hominibus , qui turò perferrent , datas de Cæsaris voluntate edocerentur. Quò dictis fides fieret , vterque chirographo suo promissa firmaret ; atque ita à colloquio est discessum. Nec multò post Augustus Varsoviâ Chnifinum ad fines Lithuaniae deferri voluit , ubi aggravante morbo , ut suprà docuimus , vitâ excessit. Et Commendonus Varsoviâ profectus lento itinere , ipsum opperiens venerat Cracoviam , ubi illi præsto Andreas Sborovius , aliique fuere amici , orantes ne imminente casu Regis , Poloniam relinqueret , cum illius maximus gravissimo Reipublicæ tempore vsus esset futurus.

Commendonus aliquot moratus dies, ne diutiùs rere frustra tempus, ac mortem Augusti captare videretur, Cracoviâ est profectus. Vix duarum horarum iter progressum nuncius excessum afferens Regis assequitur. Ergo apud Tegnitium, monasterium (id est, decem millia passuum à Cracovia) substitit, & vt constitutum cum Lithuanis habebat, eâdem nocte me ad Cæsarem proficisci iussit. Profectus magnis itineribus, septimâ die attingi Viennam, quò tamen mortui Regis fama, quâ nihil est in talibus rebus celerius, meum adventum antecefferat. Deductus ad Cæsarem, & cupidè ab eo, & perhumaniter acceptus, quæ acta, constitutâque cum Lithuanis erant, quòque modo, quâque solertiâ Commendonus & junxisset amicitia inter se, quos vetus æmulatio diductos haberet, & in eam sententiam perduxisset, & quos præterea è Polonia proceribus in idem consilium præparatos haberet, exposui. Executusque inde alia de statu rerum, quæ factiones, quæ factionum capita, quò cuiusque spectare consilia crederentur, qui certi competitores Regni, quibus cuiusque petitio niteretur, denique qui maximè Cæsari, quâque ratione conciliandi essent, disserui. Addidi postremò Commendoni verbis consilium, legationem quamprimùm quàm maximè splendidam mitteret, Legatos homines selectatos, nec nisi Catholicos deligeret; ad Catholicos enim, & per Catholicos rem motam dirigi, agique oportere: Laschium pollicentem operam,

misso statim nuncio, litterisque liberali oratione confirmaret; pecuniæ quoque aliquid ei, quâ ratione maximè militares viros cogere posset, submitteret: aut ipse Viennâ Uratislaviam (Silesiæ hæc est vrbs imminens Poloniæ finibus) transfiret, aut Ernestum filium (huic enim Regnum petebatur) cum aliquot equitum turmis mitteret: ante omnia maturaret Cotchevicio, & Radgivillo mentem aperire; si enim hinc occuparent Lithuani Regem renunciare, hinc in Polonia Lascchius cum valida factione consurgeret, & Cæsar ipse, aut filius ex propinquo arma, opemque faventibus promptam ostentarent, ante filium ejus Regem futurum, quàm alii commovere se, aut explicare sua consilia possent, & quod alterius Regni instar esset, de manu Catholicorum liberum, nullis novis pactionibus, nullâ novâ lege, contra quam hæretici molirentur, obstructum Regnum habiturum: sed cuncta prævertenda celeritate esse, dum nova, nec satis cognita libertas, & turbata, & immaturæ res opportunam intento, audentique occasionem præberent, atque in eo verti totius consilii summam credere Commendonum; si enim multitudini spatium trahendi sub arbitrium suum Rempublicam daretur, difficiliora omnia fore, à Germanorum enim nomine, Austriôque vulgò mirum in modum abhorreri. Cæsar non attentè solùm, sed avidè etiam omnia audivit, méque ad quintum Viennæ diem percontando quotidie, quærendoque de singulis de-

tinuit. Postremò cùm effusè gratias Commendonò egisset, missurum se dixit propediem in Poloniam Legatos, vt ille monuisset, iis de omnibus rebus mandata daturum, futuráque omnia cum eo communia, neque se ab ipsius consiliis sapientiæ, & fidei plenè discessurum. Cum hoc dimissus responso, non quà veneram, sed longè diversis itineribus mihi penetrandum in Poloniam, atque ad Commendonum fuit, quòd omnes jam in Regnum aditus certis militum stationibus vndique custodiebantur. Hi non arcebant modò aditu exteros, sed excutiebant etiam, ac scrutabantur omnia. Et mihi cavendum illud quoque erat, ne mea ad Cæsarem profectio vulgaretur, nequa inde incommoda de nobis suspicio multitudinem, quæ tum sola dominabatur, incesferet. Comparatis pecuniâ ducibus, maximè deviiis, ac sylvestribus viis, itinere factò, in Sirdiensem Palatinatum, quòd se Commendonum recepisse acceperam, tutus, inobservatúsque perveni.

*De legatione ad eum ab hæreticis missa.*

#### CAPUT IV.

**R**EGIS mors edita in vulgus maximè omnium concivit hæreticos, quorum vis omnis in licentia, atque impunitate est. Hi silen-

T t iij

tibus legibus, Magistratibúſque, priuſquam ſe Catholici excitarent, atque ad capeſſendam Rempublicam exurgerent, petulantíâ, atque audaciâ laſciviebant, nec vſquam plures, aut validiores, quàm circa Cracoviam erant: eam maximè partem vicinitas, & commercia corruperant Germanorum. Audito Regis caſu, partim à Firleio evocati, ne imparatus, ſi quam ſibi Sborovii fratres afferre vim tentarent, eſſet, partim à Sboroviis iſſis adducti, partim ſpontè ad conſultandum de communibus rebus frequentiffimi Cracoviam concurrerant. Semper ii acrem conatibus ſuis adverſarium Commendonum experti fuerant, ac vti magnoperè lætabantur, ſub id potiſſimum tempus, Regno eum, vt crediderant, abiſſe; ita vbi auditâ Regis morte, reſtitiffe, nec plus decem millibus paſſuum Cracoviâ abeſſe nunciatum eſt, » vehementer percuſi, fremere, ac ſi eum intereſſe » Regis comitiis paterentur, plus vnius externi hominis calliditatem valituram, quàm ſua ſuffragia » inter ſe indignari. Neminem ignorare, quàm multorum ſtudia vnus complecteretur, fore inter Equites, fore in Senatu, qui id ſenſuri, id pro » ſententia dicturi eſſent, quod edocti ab eo, » atque inſtructi fuerint. Finitum morte Regis juſ legationis ejus, datúmque ad ea, quæ Pontificis » nomine actum veniſſet, reſponſum; quid nunc » moretur? quid ſe alienæ Reipublicæ privatus immiſceat? Abeat Romam ad renunciandam legationem ſuam, atque ibi ſuâ fulgeat purpurâ, & Re-

gibus se honore æquet, ac tandem Romanis fal-  
 laciis, præstigiisque Poloniam liberet. Hæc in  
 concilio Equitum regionis ejus, quod primum  
 post mortem Regis est habitum, more suo vociferantes, quamquam Firleius ipse, cohibita illorum linguæ licentiâ, perhonorificâ Commendonum oratione sit prosecutus; tamen tenuere, ut Legati ad eum decernerentur. Missi ex Equitum Ordine sunt Dulschius, & Ossoschius. Jam Commendonus discesserat Tegnatio, pacatiora ab hæreticis loca, ac interiora Regni petiturus, ubi & conveniri ab amicis, & dimittere ipse suos, quò vsus posceret, commodiùs posset. Iter habentem eum quindecim millia passuum longè à Cracovia Legati sunt adepti, præmonitum antè ab amicis de illorum adventu. Accedentes Commendonus comiter appellatos in eundem currum, quo ipse vehebatur, recepit, ac nihil intermittens iter dicere ad quid venissent jussit. Summa eorum orationis fuit, morte Regis perturbatam eorum Rempublicam, occupatòsque omnes imminentium comitiorum esse curâ: nec Cardinali Legato colendo, habendòque pro illius dignitate vacare tum posse, nec ipsi in tam suspectis rebus facile fore multorum vitare offensiones, & in tanta rerum licentia haudquaquam tutò eum videri in Regno versaturum, periculúmque esse, ne quid ex eo tumultûs existeret. Itaque à Senatoribus, Equitibûsque, qui Cracoviæ de Republica convenissent, missos se ad eum esse rogatum, ut ex-

„ tra fines Regni aliquò se tantisper reciperet , ne  
 „ gravaretur , dum ipsi novum sibi Regem creaf-  
 „ sent. Id præterquam quòd ei ita conduceret , &  
 „ consentaneum esset eximio studio , ac voluntari,  
 „ quâ gentem Polonam complecteretur , futurum  
 „ publicè Polonis omnibus longè gratissimum. Sa-  
 „ tis mitem legationem , etiam ingenium haud dif-  
 „ par Legatorum magis lenivit. Quibus Commen-  
 „ donus subridens , ac vultu læto , placatòque ita  
 „ respondit : Et vera esse , quæ ipsi de præstanti suo ,  
 „ ac singulari erga Polonorum gentem animo nar-  
 „ rassent , & ob id sibi curam , quâ illi tam diffi-  
 „ cili tempore afficerentur Reipublicæ , gratam ac-  
 „ cidere , haud minùs quàm quòd vicem quoque  
 „ suam timerent : verùm sperare se non tutò so-  
 „ lùm , sed etiam cum dignitate in Polonia futu-  
 „ rum , ac utique præstaturum , ut non modò tu-  
 „ multûs nihil suâ causâ oriatur ; verùm ut intelli-  
 „ gant omnes , se vnum omnium maximè concor-  
 „ diæ , atque pacis auctorem esse. Cæterùm quod ad  
 „ postularum eorum attineret , si secum ea de re  
 „ Senatûs , atque Ordinum Regni nomine egissent ,  
 „ habiturum se quod responderet , cum vnius Pro-  
 „ vincix consilio separatim sibi negotii nihil esse.  
 Hoc illi rejecti responso , & haud dubio pudore  
 perfusi humaniter , ac benignè habiti discesse-  
 runt. Commendonus iter perrexit suum , ac pau-  
 cis diebus Solioviâ Siradiensis agri monaste-  
 rium , peropportunum tali tempore mansioni suæ  
 locum se recepit , atque ibi à me Viennâ redeun-  
 te est inventus.

*Quomo-*



*Quomodo Casar petitionis suæ rationem  
omnem everterit.*

## CAPUT V.

**M**AXIMILIANVS, me cum eo, quod suprà memoravimus, responso dimisso, longè aliam quàm oportuit, atque ostenderat, petitionis viam est ingressus; ab iis primò in errorem inductus, quibus mos est omnia ad voluntatem Principis loqui, quique grata, quàm vera afferre auribus malunt; tantum enim spei assentatores fecerant, ut propè expectarit, ut priores ad se Poloni Legatos mitterent, Regemque sibi ab eo dari postularent. Id adeò persuaderi sibi est passus, ut cum ego adhortans eum ad rem accelerandam plerosque dicerem alieni ab eo animi indicia dedisse, & nomina etiam quorumdam ederem, ipse simulare eos mihi responderit, quia rogari ab se, & carius æstimatam operam suam venditare vellent. Deinde si ve tantas Catholicorum opes haudquaquam esse crederet, quibus niti petitionis suæ spem veller, seu pronus in hæreticorum causam animus rebus eorum faveret, hos promissis pellicere, atque omni conatu adjungere sibi constituit. Sed totum consilium nihil æquè ac tarditas ejus, & procrastinatio turbavit; naturâ enim cunctator

Vu

rem tantam, nisi prætentatis, exploratísque omnibus, incipere non ausus, celeritatem, in qua perficiendi negotii vnica spes erat, ita omnem remisit, vt & multos dies expectando novos è Polonia nuncios, qui certiora afferrent, movere quicquam distulerit, & morantibus iis, quia clausa omnia, nec intrare fines, nec egredi vlli per custodes licebat, certos ipse homines de suis in omnes Provincias cum litteris, & mandatis ad primòres cujusque regionis tentatum, exploratúmque animos miserit. Jam antè Cracoviz in eodem concilio, à quo Legatos ad Commendatum missos ostendimus, initium nudandi animos erat factum; ausus enim Joannes Misco-vius pro sententia dicere, à Cæsare vicino, ac finitimo Principe, & Polonico nomini amico in tam dubiis rebus petendum consilium esse, adeò æversis auribus auditus, adeò à tota concione increpitus fuerat, vt parum abfuerit, quin à concilio ejiceretur. At eorum, quos Cæsar ad explorandum miserat, alii cùm in stationes militum custodiendis finibus dispositas incidissent, capti, ac proximis traditi Senatoribus sunt; alii ab iis ipsis, ad quos adiverant, callidè caventibus, ne quid proprii consilii cum externis habere crederentur, quod tum maximè invidiosum ad multitudinem erat, in concionem producti, dicere palam ad quid venissent sunt coacti. Qui enim aut accepisse litteras, aut separata colloquia cum illis habuisse dicebantur, ii in ma-

gna invidia , ac suspicione erant , vt etiam Cæsaris fautores litteras proferre , ac nunciorum verba prodere necesse habuerint , ne omni inde apud multitudinem auctoritate dejecti jacerent. Et eodem tempore Monachus Cisterciensis, Cyprianus nomine , qui multos annos apud Augustum Maximiliani Orator fuerat, cum deposito Monachi cultu in militari veste , ne noscicaretur , plerosque Principum prehensando circumiret , à Joanne Costea in Prussia comprehensus in custodiam est traditus , interceptæque cum eo litteræ, commentariæque publicè sunt recitata , quibus & pecuniarum promissiones , & aliarum pactio- nes rerum continebantur. Hi omnibus Regni partibus deprehenso nuncii, quasi manifesti corruptores, tantum invidiæ incendium in multitudinis animis adversus Cæsarem , Austriamque familiam excitarunt, vt gravi se suspicione onerasset , quicumque ejus, filiorumque mentionem fecisset ; ingentemque multitudinis gratiam Costea, aliique traxerunt, qui nec accepisse litteras, & nuncios à secreto colloquio repulisse ferebantur: hisdem pænè necessitas imponebatur rem à Cæsare spreto ab se , læsæque avertendi. Toto per hæc errata perverso , & corrupto ordine , atque consilio rei , alienatisque maximè multitudinis animis, mittendæ quoque legationi, dum præmissi redirent è Polonia nuncii, diuturnam moram interposuit ; vt cum in Regnum Legati ejus venire , jam suum cuique staret consilium , initæ-

que & inter se, & cum exteris certæ de Rege pactiones, fœderaque à plerisque essent. Legati fuere præstantes sanè viri, ac Regni Bohemiæ longè principes Gulielmus Rosembergius, & Perneſtenſis, quibus magno, ac splendido comitum numero in Poloniam adveniantibus, eadem ferè, quæ præmissis antea nunciis, fortuna occurrit: cognito enim illorum adventu, Petrus Sborovius Palatinus Sandomiriensis (is maxime averſus à Cæsare semper fuerat) ex auctoritate Senatûs obviàm ad fines fuit, ac primò eos conatus est aditu in Regnum arcere, petens vt dum gentis concilium, quod comitiorum causâ habituri essent, cogeretur, in Poloniam ne intrarent, quando ante illud tempus audiri ipsi publicè non possent. Instantibus tamen Legatis, vt Cæsaris mandata vtrisque Regnis vtilia ad Senatum, Ordinèſque afferentibus pateret in Poloniam aditus, ita Sborovius assensus est, vt Sandomiriam deductos dissimulatâ quidem, sed diligenti custodiâ habuerit, vt nec adire ad eos se incio quisquam, nec suos ipsi aliò vſpiam dimittere, nisi aut consulto, aut certè sciente se possent. Id ægrè passi Legati, vbi Sborovium senserunt infensioſorem Cæsaris rebus, quàm vt vllis promissis, conditionibûſque vinci posse sperarent, eo fortè ad conventum, qui ejus Provinciæ Equitum habebatur, profecto, ipsi nemine consulto, appellatòque, Sandomriâ ante lucem discesserunt. Quod cum nunciatum Sborovio, Equitibûſque, qui convenerant,

esset, missi properè ab iis, qui Legatos ab instituto itinere retraherent: ita vnius diei viam progressi, consistere coacti, ac præsidio Equitum appposito, datoque negotio, vt alioquin eis necessariarum rerum copia suppeteret, ac benignè in speciem, atque hospitaliter haberentur, artius etiam quàm antea custodiri sunt iussi. Quæ res eos magnis difficultatibus affecit Cæsaris iussa patrandi, cum jam nec iis inuidiosius, suspectiusque esset quidquam, & nemo ob id adire, aut alloqui eos auderet. Et quamquam summisere clam aliquot è suis ad sollicitandos maximè hæreticorum principes; tamen cum dempto libero commercio nec cum Commendono congregandi, nec colloqui cum præparatis antea amicis possent, quin omnis de Cæsare, filioque spes corrueretur, sustineri non potuit. At Radgivillus, & Corchevicius, qui conventis cum Commendono staturi, multa in id consilium in Lithuania præstruxerant, cognito Commendonum in Regno esse, ac me statim profectum magnis itineribus Viennam contendisse, diu quid Cæsar statueret, expectarunt, ac prius moram ipsam pro re omissa acceperunt: post vbi nuncios ejus pluribus locis interceptos, Cyrum captum, litteras publicè recitatas, Legatos pænè in custodiam traditos, abalienatos omnium animos, & Cæsarem ipsum, & fautores ejus in summa invidia, malaque fama esse intellexere; nec tamen sibi ab eo litteras, aut nuncios venire, & gravi ru-

more laborare rem , quòd vni ante omnes hæretici appellari , ambirique dicerentur , vnique eorum , nomine Zaffragnetio , qui repudiato Senatorio loco , ab Senatu ad Equites transferat , magnæque ob id illius in eo Ordine opes erant , triginta nummum aureorum millia oblata , remissaque ab eo dicebantur , penitus ab inito consilio recesserunt , & vt omnia sibi quàm maximè integra essent , operam dederunt. In Polonia autem cùm idem de hæreticis pererebuisset , additum iis , quæ suprà attigimus , adeò Catholicorum animos à Cæsare avertit , vt Cujaviensis , & Laschius , qui duces se præbituri Ernestum dicentibus Regem erant , spretos se , posthabitosque querentes , mutatâ voluntate cum Sboroviis pro Henrico Galliar Regis fratre societatem conjunxerint. Itaque cùm ventum ad comitia est , & copia fuit Legatis , cum quibus vellent , colloquendi , ne ipsi quidem inficiabantur exiguâ stare spe , quod Cæsar pro non dubio asseverantibus , qui assentati cupidini ejus fuerant , crediderat. Ac tum demum senserunt quàm peccatum ab eo fuisset , qui in re gravissima adulantium somniis decipi se passus , non ex Commendoni sententia omnium studia , consiliaque celeritate antevertisset. Tum serò & ipsi , & Cæsar , his cognitis , blandiri Catholicis , quos antea neglexerant , tum litteræ manu Cæsaris scriptæ veniebant , tum magnifica promissa ingerebantur , cùm facta in aliam partem inclinatio sustineri amplius nequi-

ret. Ad hæc incommoda, etiam proditi ab suis dicuntur. Nam qui ab Germanorum Principibus iis, penes quos creandi Cæsares jus manet, Legati suffragatum Ernesti petitioni venerant, dehortando privatim quod publicè orabant, contrariis orationibus haud parum offecisse Cæsaris rationibus sunt crediti. Legatos quoque ejus, ut gentis principes, magnus nobilium Bohemorum numerus secutus fuerat. Hi commercio linguæ, quæ eadem est utrique genti, crebros cum Polonis sermones miscebant, unaque convivium celebrantes, & largè vino, ut mos illis, indulgentes, invicem se amicè, ac familiariter colebant. Et Bohemi (credo, conspecta species magnæ libertatis in Polonis, arbitrii que Regem sibi deligendi, desiderium usurpati quondam ab ipsis quoque ejusdem juris, iramque adempti refricabat) memorando pristinam Bohemiæ dignitatem, spoliatisque eam se, & gravibus præterea tributis, vectigalibusque premi querendo, aliisque, quæ ferè populi indignantur, inculando, monebant Polonos, ne in idem jugum ipsi se ultro inducerent. Quæ à sollicitis, ac suspiciosiis facilè credita, haud leve momentum ad deterrendos à Cæsare multorum animos habuisse putantur.



*De competitoribus Regni.*

## CAPUT VI.

**C**OMPETITORES erant Regni permulti claro omnes genere ; neque enim læpè accidit , vt Imperium eâ amplitudine fteret , nullo certo fucceffore alienæ ambitioni expositum , ceffurum ei , quem multitudinis favor prætuliffet , quæ ne norat quidem , aut viderat vnquam eos , de quibus tantum iudicium factura , quibus summam de fe potestatem traditura erat , folam famam , vel ex vano , levibûsque auditionibus hauftam , vel callidè fictam , jactatâmque fecutura. Primus sermone vulgi Moscorum Princeps ferri est cæptus , cujus Regnum Polonis finitimum à Borysthene , quo ferè à Lithuanis dirimitur , ad vſque vltimas Septentrionis plagas , ignorâsque gentes , & glaciale Oceanum latiffimè pater , atque inde à finibus Sueciæ , & Firlandiæ finu per feras pleraſque , ac barbaras nationes ad Caſpium mare , Tanaïmque flumen extenditur , Scytharum quoque populos aliquot proximis annis domitos continens. Hunc vota magis , quàm ſtudia hominum expetebant : ſicut enim conjunctas ſub vnus imperium Regis tot gentes , nationeſque habere magnificum Polonico nomini omnes rebantur ; ita Regis ipſius ſævum , atque



que atrox ingenium, & impotenti dominatui, omnibûsque soluto legibus assuetum reformidabant. Quidam filium ejus respiciebant, dictûmque Sigismundi Regis memorabant, Polonis è Septentrione petendos Reges. Sed neque Moscus ab insita superbia Legatos, qui peterent, misit, & vtriusque mentionem Cotchevicius, cujus supra meminimus, privatis etiam odiis illis infensus auctoritate suâ discussit. Proximus huic Rex Sueciæ fuit, qui quia sororem Augusti in matrimonio; atque ex ea filios habebat, & peropportune duo Regna adversus Moscum communem hostem conjuncturus erat, haud vanâ spe in eam petitionem descendere videbatur; atque hunc jam inde à paterna defectione corruptum hæresi hæretici ferè provehebant. Idem ab eadem causa etiam Duci Prussiæ studebant adolescenti, neque ætate satis ad id ferendum onus maturâ, & valetudine mentis ne suo quidem habendo, nedum alieno quærendo Regno habili. Sed neque puerum, neque stolidi ingenii Regem Firleius, complurésque alii videbantur, dum in disciplina contemnenti Catholicæ pietatis jura institutum, & eorum beneficio obnoxium haberent. Quin hunc opportunum rationibus suis vel ob id maximè expetebant, quòd ei nomen modò Regium relicturi, regimen rerum ipsi habituri essent. Quanquam sunt, qui Firleium ex Prussi spe tantum pecuniæ aliquid captasse credunt, cujus & ipse egens tali tempore erat, & ad patranda consilia magnâ vi

opus esse sentiebat. Gentilem quoque hujus Brundeburgium, qui ab oppido Anspachio, cui dominatur, cognomen habet, hæreticorum quidam subijciebant; alii item Augustum Saxonem, magnæ Regulæ dignitatis, magnarumque apud Germanos opum: sed utrumque multitudo abhorrens à Germanis, ut ferè finitimarum gentium discrepant animi, respuebat. Injecta quoque mentio est à quibusdam Stephani Bathorii, qui paulò antè mortuo intra adolescentiam Joanne Transsylvaniæ Regulo, ad Provinciæ illius dominatum popularium studiis fuerat evectus. Sed ille vix dum firmato domi principatu, novum foris quærere Regnum maturum rebus suis non ratus, petitione in præsentia abstinit; atque hic est ille Stephanus, qui biennio post hoc ipsum Regnum est adeptus, cui tantum fortuna, quæ plerumque veræ virtutis est comes, indulgit, ut honesto quidem inter suos genere, sed fortunâ pertenui natum, & contemptum, modico amicitiae gradu, quem apud Joannem Principem ipse sibi per industriam, atque bonas artes fecerat, nec ultra spes suas proferentem, quàm ut rem domesticam sub illo augeret, & partam gratiam, dignitatēque tueretur, ad patriæ prius suæ, deinde ad Poloniæ Regnum extulerit. Joannes in fide Turcarum erat, beneficiariamque ab iis Transsylvaniam habebat, quorum fretus opibus etiam Ungariæ Regem se ferebat; unde illi crebræ cum Maximiliano Cæsare contentiones erant, & ut rarò bellis, ita mu-

tuis in fines excursionibus, latrociniiſque, quibus Ungarorum gens gaudet, ſæpè ſe infeſtabant. Per has occaſiones, vt cuique mala mens, malæque domi ſpes incidiffent, ab utroque ad alterum frequenter transfugiebant; (& ſunt Ungari fide ad omnia temporis momenta mobili) ſed & Joannes ipſe, & Tranſſylvani omnes pravīs religionibus, communi malo hujus ævi, infecti animos, à Catholicæ Eccleſiæ fide deſciverant. Stephano eximium geminæ laudis decus tribuitur, neutram, neque pietatis quam Deo, neque conſtantiæ quam Principi debebat, fidem ſefelliſſe. Adjecerunt etiam Polonorum plerique animum ad Gulielmum Roſenbergium, Bohemum Principem, Legatum Cæſaris. Hic Romano ſanguine, gente Urſinâ ortus, clarâ nobilitate apud Bohemos eminens, genus opibus, opes animo, ac virtute æquabat. Sed illi omni ſpe potior fides, quam Cæſari debebat, fuit, mentionémque ſui vllam in comitiis fieri vetuit. Verùm hos omnes longè & generis amplitudine, & Catholicæ pietatis laude, & præclaræ indolis famâ anteibant duo adoleſcentes, Erneſtus Cæſaris filius, & Henricus Regis Galliæ frater. Erneſtus, & opes patris non magnæ ſolùm, ſed propinquitate iplâ maximè opportuna Poloniæ res affectanti, & Catholicorum ſtudia antè, vt docuimus, à Commendono comparata, facilè vt cæteris præferretur, tenuiſſent, ni ceſſatum à Maximiliano primùm, deinde etiam turbatus ordo agendæ rei, & cuncta a-

liis super aliis erratis corrupta, sicuti demonstratum à nobis est, fuissent. Henricus ad Regnum, quod ei summis omnium ordinum studiis est delatum, pænè per jocum à paucis est accersitus; affirmari certè potest nemini antè cognitum, visumve eorum, à quibus expetitus, creatusque Rex fuit. Venerat fortè in Poloniam è Gallia pumilio quidam Polonus natione, ac natus etiam honestè, (Craoschio nomen fuit) qui adolescentulus rarà parvitate in Galliam abductus, dono datus Reginæ, diu inter oblectamenta Regum fuerat: scitus ipse, & ingenio solertior, callidiorque, quàm pro modo corporis, ita rem suam naviter egit, ut pecuniosus, & locuples paucis annis evaserit. Senex factus revisere patriam, suosque agnoscere, agnoscique cupiens, in Poloniam, vivo adhuc Augusto, redierat, multaque, ut fit, de Regia Galliæ, de Regni opibus, de Rege, deque Henricorum fortè Regis fratris exercitus adversus quotannis rebellantes hæreticos Galliæ secundâ bellicæ laudis famâ ductante magnificè omnibus conviviis, quibus sæpè à proceribus adhibebatur, prædicabat: & mortuo demum Augusto, cum omnibus propè sermonibus de futuro Rege quæreretur, palam ut Henricum sibi Regem allicerent, omnes sollicitabat; donec Andræ Sborovii instinctu ab aliquot nobilitatis principibus, qui consilia cum Sboroviis sociaverant, in Galliam est missus, & datis ad Regem, Henricumque litteris, quibus operam pollicebantur, ire pro-

perè, còsque ad mittendos Legatos, qui peterent Henrico Regnum, adhortari est iussus. Tantarum alienatio à Cæsaris domo fuit, ut quem in limine Regni, atque in oculis propè suis habebant, Regem Regibus natum, regiâ indole petentem, offerentémque se rejicerent; è Gallia longissimè dissitum, ignotúmque ultro accerferent. Nec homunculus defuit rei, nec Reges aut nuncium, aut nuncii auctores sprevere. Illo igitur eadem celeritate, quâ venerat, ad Polonos redire, & ad futuros in tempore Legatos renunciare iussu, haud segniter Galli negotio institerunt, æmulatione in Austrios incensi, & magnoperè ad gloriam gentis suæ rati pertinere, si bellicosissimæ nationes ab ultimis Europæ terminis Regem sibi petitum in Galliam misissent. Et Carolus Rex cum fratris potentiam & infringere parum fraternum, parúmque tutum putaret, & ferre grave sibi, Regnóque sentiret, per speciem honoris amoturus Henricum, Galliamque propè altero jam Rege exoneraturus videbatur. In Polonia serpebat quidem in dies magis per hominum ora Henrici mentio; sed locorum, interjectarúmque terrarum longinquitas consistere in illo magnoperè animos non sinebat, & eum Ernesto potiùs obijci, quàm veris studiis expeti plerique credebant. At ubi adventare è Gallia Legatos, & mox ingressos fines, est auditum, & vulgata promissa, commodáque sunt, quæ genti publicè, privatimque allaturum Henricum Legati, fautores.

que eorum studioſè diſperſerant; omnis illa animorum à Cæſare defectio vertit in favorem Henrici, & ipſi etiam Corchevicius, Radgivilus, Laſchius, aliſque qui ſe initio Cæſari obtulerant, quâ indignatione adverſus eum, quâ præmiis, promiſſiſque ingentibus Gallorum illecti multitudini ſe junxerunt; adeoque inde inclinatio voluntatum omnis in Henricum incubuit, hinc ſtudio illius, quem ſummis laudibus efferri à Principibus ſuis audiebant, hinc alienatione à Cæſare; adeoque hic ardor animorum pariter omnes Senatores, Equites Catholicos, hæreticos traxit, ut ſi tum habita comitiâ forent, ne dubitandum quidem eſſet, quin ſine vlla aliorum mentione, vnus omnium ſuffragiis Henricus Rex fieret: tanto impetu multitudo, ventri ingruentis inſtar, quò ſemel inclinavit, præceps fertur. Spatio, atque morâ (nam ipſum propè annum interregnum tenuit) ardor paulum elanguit, & Gaſparis Colini, multorumque cum eo Ugonotorum in Gallia cædes etiam pleroſque hæreticorum ab Henrico avertit. Is enim Coliniſ cum magnam Galliarum partem novâ religione, & Calvinianæ hæreſis peſtiferis erroribus oppleviſſet, cui pro diſciplina eſt legum, Magiſtratuumque omnium reverentiam exuere, impia ſacrorum jura vi, atque armis vindicare, divina, humanaque libidini ſuæ ſubjicere, ita ſe ducem Novantibus inde res, & omnia ſævis ſeditionibus, belliſque turbantibus præbuit, ut totâ civili ſanguine conſperſâ Galliâ, per fune-

itas patriæ, gentisque suæ calamitates, perque clades, & vulnera robustissimi ante illum Regni, ad eas pervenerit opes, quibus metu sui Regem terret: Regiam certè domum nemo ynquam acrius oppugnavit, nemo exitio ultimo propius adduxit. Hunc sive aliter mederi publicis malis, quàm eo sublato Galliæ vexatore, non posse Regis mater putaverit, seu ipsum parantem fraude, atque insidiis Regi, fratribusque, ac matri ipsi necem asserre occupavit, opprimere captatum fictâ gratiæ reconciliatione, Lutetiâque cum factionis principibus pellectum magna cum omnis generis Ugonotorum cæde trucidari jussit. Ea cædes Poloniæ hæreticos (nam Henrico id facinus imputabant, cujus esse insigne in Colinium, sectamque illam odium didicerant) ab eo vehementer alienavit, ut nisi lenisset paulatim rem rumor, & Catholici pro Henrico constantissimè stetissent, peragi comitiâ sine magno certamine nequivissent. Hæretici igitur deserto Henrico, rem ad Regem Sueciæ trahere conati sunt: sed ubi consentientibus Catholicis, & alium quàm Catholicum Regem ne auribus quidem admittentibus, non satis ad id opus in sese esse senserunt, aliâ viâ solve-re consensionem Catholicorum, & studia in Henricum rescindere sunt aggressi. Omnibus cætib, consiliisque monebant, hortabanturque multitudinem, ut spretis alienigenis, & externis Regibus, è sua potissimum gente Rectorem Reipublicæ darent. Tot esse inter ipsos nobilissima-

» rum familiarum procures, seu robore, ac digni-  
 » tate corporis, seu vi, atque præsentia animi cui-  
 » vis externo Regi pares, suæ certè Reipublicæ  
 » multò quàm illos peritiores. Deligerent ex his,  
 » qui vnà secum eadem disciplina, eodem more,  
 » iisdem sub legibus nutritus, altusque crevisset,  
 » qui hanc terram vt patriam, incolasejus vt cives  
 » suos coleret, non qui Poloniæ Regnum accessio-  
 » nem modò suæ potentia existimaret. Majores suos  
 » olim destitutos, vt nunc, Regum stirpe, cum haud  
 » facile propter multorum ambitionem in vnum  
 » Principem consentirent, potiùs quàm imperium  
 » in se alienigenis crederent, ad Piasum illum non  
 » humilis modò, sed etiam sordida fortunæ homi-  
 » nem è caupona abstractum, Regnum detulisse;  
 » nec ipsos illius, nec Rempublicam posterorum  
 » ejus, in quibus ad multa sæcula propagatum est  
 » Regnum, perituisse. Cur ipsi se vltro alieni fan-  
 » guinis Regi subjicerent, petito ex iis gentibus,  
 » quibus virtute nunquam concessissent? cur suis  
 » alienos præferrent, & quorum cognitam, & bel-  
 » lo, pacèque spectatam industriam haberent, iis  
 » ignotos, & vanis tantùm rumoribus commenda-  
 » tos anteponerent? cur denique Polonicum no-  
 » men eâ ignominia notarent, idque iudicium pro-  
 » pè in conspectu orbis terrarum ferrent, neminem  
 » Polonum aptum Regno esse? Advenæ ergo Re-  
 » gi, ignaro legum, ignaro patrii moris, linguæ  
 » etiam patriæ experti, dederent se veluti pecora nu-  
 » tu, ac sonitu regenda: quonam modo parituri ei,  
 &



& dicto audientes futuri sint, quem ne intelli-  
 gent quidem loquentem ? Quznam illi cura cu-  
 stodiendarum legum esse possit, qui leges ipsas  
 ignoret ? Et quid intelligerent cum peregrino  
 Rege peregrina jura, peregrinos ritus, peregrina  
 omnia accipienda esse, & patriam disciplinam,  
 majorumque instituta, quibus sterisset, in eam-  
 que amplitudinem crevisset Respublica, obliviscen-  
 da iis esse ? Hoc genere orationum hæretici distur-  
 bare consilia Catholicorum, aperire spei suæ adi-  
 tum, & munire sibi ad Regnum viam conaban-  
 tur ; & movissent haud dubiè multitudinem, nisi  
 docta à Principibus fuisset, non posse Regem Po-  
 lonici generis fieri, nullius enim ita eminere vir-  
 tutem, fortunamve, cui alii cessuri subjecturique  
 se essent, neque posse in id descendi certamen si-  
 ne gravi, ac propè certo civilis belli periculo, ne-  
 que civile bellum sine peste, ac perniciè Reipu-  
 blicæ excitari. Quæ quidem de ea re differerent,  
 magis verè dici, quàm factu facilia esse. Et eos  
 quidem aliò spectare, quorum cogitatis non pa-  
 catâ, & concordî, sed divulsâ, ac discrepante Re-  
 publicâ opus esset. Et Archiepiscopus Gnesnensis  
 apertius in eorum impotentem ambitionem, im-  
 pudentiâque invecus, qui per hæc sibi ad Re-  
 gnum, atque ad vanas, quas affectarent, spes,  
 munire viam conarentur : Quem, inquit, nostro  
 putatis alteri cessurum ? aut si cederemus in  
 præsentia, quam auctoritatem ad regendos tot  
 populos habiturum novum creditis Regem in pri-

” vata nuper fortuna conspectum? Semel feliciter  
 ” insanitum sic à majoribus nostris, qui quò aliquem  
 ” tandem finem discordiis suis invenirent, quem-  
 ” dam sibi Hultai (hæc vox Polonicè cauponem si-  
 ” gnificat) Regem fecerunt. Non tali rectore Rei-  
 ” publicæ tempora egent, sed cui regio genere or-  
 ” to, regio cultu, regiis artibus instituto, Regi ipsi  
 ” parere nemo dedignetur. Sic agi de comitiis est  
 cœptum, in quibus non tam de Rege creando in-  
 ter Principes, quàm per quos crearetur, certa-  
 men fuit, dum quisque hanc facultatem ad suam  
 potentiam trahere studet, & auctor quisque, &  
 Princeps gratiæ apud novum esse vult Regem.

---

*De impia hereticorum fraude, quam confede-  
 rationem ipsi appellarunt.*

#### CAPUT VII.

U T quisque sciret quem in locum, quòdque  
 ad tempus ad creandum Regem conventu-  
 ri essent, (nam suffragii jus vniversa ex æquo No-  
 bilitas toto fusa regno, nullo censu, aut honoris  
 discrimine habet) indicitur ad Kalen. Junii Var-  
 saviam concilium, in quo consultis ordinibus,  
 ex omnium sententia ea res statueretur. Et ad-  
 fuere frequentes Senatûs, Equitésque. Discepra-  
 rum de vtroque nonnihil est cum Lithuanis,  
 qui, & tempus in Maium mensem rejiciebant,  
 & locum Parzoviam, Lithuaniz oppidum in fini-

bus Ruffiæ fitum destinabant : de tempore concessum iis est, vt non ante Kalend. Aprilis conueniretur; locum mutari non placuit, designatîque jacentes ante Varſaviam campi, quos ab vrbe interfluens Viſtula dirimit. Hic locus præterquam quòd in ipſo propè vmbilico eſt Regni, & inter Polonos, Lithuanosque medius, Commendonus auctor amicis fuerat; vt potiſſimum eligeretur, quòd in pleniffima Catholicorum provincia eſſet; nuſquam enim Nobilitas ab hæreſum contagione, ac labe intactior, quàm in Maſovia erat. Quæ res vſu etiam quàm ſpecie vtilior evaſit. Maſovii enim propinquitate ipſa invitati, frequentiffimi comitiis interfuere, quippe quominus omnes confluerent nemini domeſtica inopia impedimento fuit, cùm ex remotoribus Regni partibus, nonniſi quibus commoda domi res eſſet, venire per ſe facile poſſent. Ita ipſo quoque numero ſuorum Catholicis animi addebantur, loco dièque habendis comitiis dictâ, aliſque quæ præſens exigere tempus eſt viſum conſtitutis, diſceſſerant Varſaviâ domum quiſque ſuam, priuſquàm dimitteretur concilium, plerique Principum. At hæretici, quibus in exigua ſpe Regis creatio ex ſuo corpore eſſet, nec dubitarent, quin ſuperantibus Catholicis, arbitratu eorum ſibi accipiendus Rex eſſet, occultiffima inter ſe conſilia habuerant, quonam modo ſibi, ſectis que, ac rationibus ſuis caverent, vt ſi novus Rex patriis legibus, quas ſeve-

rissimas adversus desertores Catholicæ pietatis Poloni habent , agere secum , & se pœnis , questionibûsque , quas eadem leges jubent , subjicere vellet , ne posset. Et cùm hæ leges ut abrogarentur , postulare ipsis quoque impudens videretur , viam quâ furtim eodem pervenirent , & legum vis sine legum mentione eluderetur , callidè excogitatam iniverunt. Primùm ipso concilii initio , ne legationes exterorum ullæ eo tempore Varfaviam accederent , quarum interventus , ambitûsque consultantibus de sua Republica moræ , atque impedimento esset , suaserunt , quando eas Aprili mense sub ipsum comitiorum tempus audire antè decretum fuisset ; idque ab omnibus est probatum , nemine subesse fraudem suspicante : sed illi eò scilicet spectarunt , ne Commendonum Varfaviæ adesset , quem occulta quoque eorum acurè odorari , ac remediis prævertere solitum scirent. Deinde abeuntibus aliis ipsi frequentiam Senatûs , & Catholicorum aptiorem dolofo consilio arbitrati , dum à Magistratibus conventus dimitteretur , de industria pœnè omnes restiterunt. Cùm ergo de publica pace custodienda actum esset , decretumque , ut publicè conspiraretur , & omnes se chirographo suo , & jurejurando obligarent pro hoste patriæ habituros quicumque alteri vim attulisset : hæretici ipsi fœderis hujus formulam conscripserunt , cæteris rebus sanè tempori accommodatam , & magnam mutæ chârîtatis , & benevolentîæ speciem , &

egregium studium concordibus animis Rempu-  
blicam administrandi præferentem. Sed vnum  
erat caput, quo illis in perpetuum cavebatur, &  
ne cui novam ascivisse religionem, ad novasque  
doctrinæ, ac sacrorum rationes animum tradu-  
xisse fraudi esset, scisccebatur, sed cuique de di-  
vinis rebus sentiendi, Deumque quibus placeret  
ritibus, ceremoniisque (dum purè, castèque)  
colendi jus, ac potestas esset. Atque hanc im-  
pietatem verbis adeò aptis occulerant, ut aliqui  
dulci pacis, & concordie nomine decepti prius  
nomen suum decreto adscripserint, quàm dolum  
animadverterint. Cùm deprehensa res esset, ægrè  
tamen Episcopis, qui in concilio aderant, postu-  
lantibus concessum est spatium ad decreti capita  
inspicienda, tanto impetu, clamorèque hæretici,  
ut perscriberetur, institerunt: vociferabantur,  
denunciabantque, nunquam passuros comitia  
creando Regi haberi, nisi prospectum foret sibi, ut  
tutò in communi patria vivere liceret; identidem  
querentes, an crederent se expectaturos, dum  
eàdem fraude, quâ nuper in Gallia Gaspar Coli-  
rius, totque cum eo præstantes viri cæsi essent,  
circumvenirentur? Atque adeò exarserunt, mi-  
nas, arma, bellum abnuentibus intentantes, ut  
haud procul à vi, atque seditione res absuerit.  
Episcopi magis se impelli ad rem nefarii exem-  
pli probandam non sunt passi, quàm pro suo  
munere fortiter tam impia audentibus obstite-  
runt, & veriti turbas, alii venire in Senatum

recusarunt , alii Varſaviâ domum diſceſſerunt. Jacobus Ucan-  
gius Archiepiſcopus Gneſnenſis , & Ordinis ſui , & Senatûs princeps , de cujus in-  
genio , moribûſque ſuprà à nobis eſt memora-  
tum , biduum dari ſibi ad deliberandum rogavit ,  
faſſus ſibi nihil ſatis liquere , & variè diſtrahi ,  
impellîque animum ſuum. Haud inviti hæretici  
morem Ucangio geſſere , ſatis ſperantes , quia is  
proni in eorum cauſam animi multa ſæpè ſigna  
dediſſet , metûque magis quàm ſponte à nudan-  
da ſententia hætenus ſe abſtinuiſſet , nactum  
tempus fauturum poſtularis ſuis ; adjutorémque  
futurum. Catholici idem magnopere timebant ;  
ſiquidem ipſam dubitationem in tali re , quid a-  
liud , quàm manifeſtam defectionem eſſe ? &  
cùm talium conſiliorum ex ſuperiori vita aucto-  
rem , ac ducem , non ſolùm approbatorem jure  
timere videbantur poſſe , & magnum erat peri-  
culum , ne ſi ille gratificatus hæreticis fuiſſet ,  
grave aliquod , atque inſanabile vulnus Reſpu-  
blica acciperet. Aderam ego tum Varſaviæ à  
Commendono miſſus , ut quoniam venturus ipſe  
ad id concilium non eſſet , ad pleroſque Princi-  
pum mandata ejus perferrem , & præſens quæ ut  
publicè ſtatuerentur , cognoscerem , aut priva-  
tim de futuro Rege quæ agitentur , explora-  
rem ; cùm ad cæteros Episcopos , Catholicôſque  
Senatores , cùm maximè ad Archiepiſcopum in  
tam ancipiti re adivi , ſimul excitans eos ad  
muneris ſui partes , ſimul quò ſcirent omnes , quod

quisque aut dixisset, aut egisset, perscripturum me omnia ad Commendonum esse, ut saltem aliquâ ejus verecundiâ continerentur. Ac Ucan-  
gius quidem mecum commodissimè est locutus. Cùm tertiâ inde die in Senatum serus, postre-  
musque omnium venisset, & alii aliter quid acturus quâque sententiam dicturus esset, opinaren-  
tur, & hæretici spe omnes, & expectatione pende-  
rent, ipse orationem habuit, nequaquam illius Ucan-  
gii, qui occasiones novandi, turbandique res captasset, qui Pontificibus Maximis obtrectas-  
set, qui nationale concilium machinatus esset, qui Fritium hæreticum domi suæ in præcipuo honore habuisset, qui capita cum hæreticis sæpè contulisset; sed veræ pietatis, atque constan-  
tiæ plenissimam, qualis ab Stanislao Cracovien-  
si Episcopo, qui mortem pro fide, ac reli-  
gione oppetiit, ac in Divorum numerum sancti-  
tate, ac miraculis referri meruit, si viveret, ex-  
pectanda fuisset. Adeò nostræ mentes in manu sitæ sunt Dei, & ubi paulum à contagione huma-  
narum cupiditatum sevocatæ, ad ipsum se Deum studio veri verterunt, nunquam non ejus sanctis-  
simo numine ad-cognitionem sui illustantur. Deliberatum à se diu, multumque esse dixit, ut  
de re tanta maturum consilium patriæ suæ affer-  
ret, sacrificatum item ab eodem se, ac preces ad  
Deum factas, sacratas Virgines, ac singula sacer-  
dotum collegia ad id appellata, omni cibo præ-  
terquam quo sustentari tenue corpus suum potue-

» rit temperatum, pecunias hujus rei causâ egenti-  
 » bus distributas, omnia denique piè ac religiose  
 » peracta, quibus placari cæleste numen, ab Deo-  
 » que impetrari posse speravit, ut quod facti opri-  
 » mum in tali re, quodque cum sua, & patria salu-  
 » te conjunctum esset, sibi divino prælato lumine  
 » demonstraret. Postremò adhibitum amicorum si-  
 » delissimum, ac prudentissimum quemque, nec  
 » denique aliud eo biduo pervolutum, agitatûm-  
 » que animo ab se esse. Tandem ita apud se statuit  
 » se salvâ fide, quam Deo homines debent, nemi-  
 » nem posse ei fœderi, decretoque assentiri, quo  
 » Dei majestas, ac numen gravissimè violaretur.  
 » Quid enim aliud esse tantum novarum, ac pra-  
 » varum religionum admittere, quàm totam fun-  
 » ditus evertere, ac tollere Christianæ pietatis ra-  
 » tionem? divina, humanaque confundere, &  
 » Christi Dei cultum, unicam salutis mortalium  
 » spem, opem, columen, sine quo constare boni,  
 » rectique ratio non potest, è vita auferre? An er-  
 » go si Mahometanus, atque adeò Epicureus, om-  
 » nisque religionis contemptor aliquis existat, qua-  
 » les gigni ab tali impunitate necesse esset, ne hos  
 » quidem coërcere legibus liceat? istis quoque sua  
 » sentiendi licentia inulta maneat? An concipe-  
 » re animo tantum impietatis virus potuit quisquam,  
 » ista ut postulentur? Multa in hanc sententiam  
 » cum dixisset, & quassisset etiam ab iis, & quid  
 » crederent stare Poloniæ Regnum, hâc permissâ,  
 » & publico decreto sancitâ licentiâ posse? & an  
 » eam



eam perdendæ communi libertati, ac Reipublicæ penitus dissolvendæ esse intelligerent? Testatus postremò est, ita hanc animo stare sententiam, ut dexteram amputari potius sibi esset passurus, quàm eam ad nomen suum huic decreto adscribendum admoturus, nec solùm dexteram, sed si res ferat caput ipsum gladiis non dubitater objecturum. Quid enim seni exactâ jam ætate, aut salutaris, aut gloriosius evenire posse quàm pro patria, pro fide sua, pro sacris, pro religione mortem occumbere? & vitam quæ naturæ propediem exolvenda esset, pro civium suorum salute, ac pro Dei cultu Deo ipsi repræsentare. Hæc dicens cùm hæreticorum clamoribus, minisque incesseretur, ad eò furori eorum violentiæque non cessit, ut in publicas tabulas referri decretum vetuerit, & quia per vim relaturi videbantur, ipse ex sua reliquorumque Episcoporum, ac totius Ecclesiastici Ordinis, & Catholicorum omnium auctoritate id decretum contra Rempublicam paucorum conspiratione, ac fraude conflatum esse edixit, edictumque in publicas referri tabulas iussit. Idem postea factum in singulis provinciarum conventibus ab Catholicis est; ita illa hæreticorum conjuratio nihil publicæ auctoritatis traxit. Ucangium cùm ego post dimissum Senatum domi convenissem, collaudarémque eum, & eximiam constantiæ, ac pietatis gloriam, quam ea die nomini suo peperisset, illi gratularer, falsus agitatum opinionibus diu animum suum

tandem in commonstrata sibi divinitus veritate conquievisse, ab illa approbanda conspiratione, visis etiam, atque in somniis se deterritum fuisse affirmavit. Hæc hæreticorum conspiratio, cui ipsi confederationis indidere nomen, incredibile dictum est, quantum diligentiae, studique à Commendono positum sit, ut antiquaretur & confutaretur, & in quantam invidiam, execrationemque id factum apud omnes, scriptis etiam, & vulgatis ea de re alieno nomine libellis, vocaverit.

---

*De adventu Commendoni Varsaviam, & consilio illi in castris dato,*

#### CAPUT VIII.

**A**PPETENTE deinde vere Commendonus Varsaviam venire maturavit, & Episcopos, & aliquot Catholicorum Principes, ut idem facerent per litteras monuit, quo spatium communicandis consiliis haberent, antequam advenirent alii, & æstu comitiorum occuparentur animi. Cum plerique in tempore adfuissent, omnes in domum suam coactos magnoperè hortatus est, ut animo, atque religione quantum magnitudo rei, & abhorrens à Christiano nomine scelus hæreticorum posceret, ad resistendum impiæ conjurationi se compararent. Acceperat enim hæreticos, nisi ei fœderi Catholici assentirentur, mori-

turos se potiùs quàm cōmitia haberi, & Catholicum Regem creari passuros, ferociter minari. Episcopi, cæterique pro se quisque polliciti sunt daturus optam, ne eorum officium in re maximè fidem Christianæ pietatis attingente desideraret. Convenit autem, vt totum negotium constanter quidem, sed leniter, amantèrque temporis causâ tractaretur, ne si in hæreticos ab ipsis pari impetu itum esset, ea contentio in periculosam aliquam seditionem erumperet, comitiâque impediret; sinendo eos incassum furere, quàm obijciendo se furentibus tutiùs conatus elisuros. Privatis inde colloquiis singulorum, de futuro Rege sensus explorans, præter admodum paucos Henrici esse omnes intellexit. Atque ipse jam antè sicuti sponte sua, dum licuit, & integrum fuit, rem ad vnum è Maximiliani filiis trahere fuerat conatus, maximè è communi re vtriusque gentis id esse existimans, ita defectione ab eo, & inclinatione in Henricum perspectâ contraxerat vela, intelligens sibi ita moderandum esse, vt neque nimium pro Cæsare tendendo, adversa studia multitudinis incurreret, neque damnando Gallorum spes refragari favori in Henricum crederetur, cujus nomen non gloria solùm bellicæ virtutis ex victis ter justa acie, profligatisque magnis hæreticorum copiis commendabat, sed Catholicæ religionis eximæ laudes illi omnium consensu tribuebantur. Et Commendono vitanda omnis animi vllis infecti partibus suspicio erat, nec vltrà quàm vt

Catholicus Rex crearetur, Pontificis Maximi communis Christianorum Regum parentis Legato curæ esse videbatur debere, & repulso Cæsare, si Henricus quoque spe deiceretur, nullus qui fieri posset, Catholicus alius è petentibus erat. Igitur ubi labefactatam, convulsamque petitionem Maximiliani sensit, quâ alienatione gentis ab eo, quâ cunctatione, atque erratis ipsius, timens jam ne hæreticis inter Ernesti, Henricique contentionem locus è suis aliquem intrudendi daretur, subsequi suo quoque studio rem ad Henricum inclinatam statuerat, eaque res Catholicis, qui jam ad Gallum flexerant animos, ac perinviti tamen Commendono non obsequebantur oppidò quàm grata fuerat, quos quidem ille dum de Cæsare non desperaret, & temerè concitatis in Henricum studiis haud satis fideret, retentare non destiterat. Cùm ergo quò multitudinis aura ferret, eò Principum studia sequerentur, nec qui inclinos retineret, ampliùs esset, quin Henricum renunciaturi Regem essent, haud sanè dubium videbatur, Venere & Cæsaris Legati Varisviam frequenti jam conventu, ac postèrà die ad Commendonum adiere, expositisque quæ mandata à Cæsare habebant, quæque post adventum suum in Poloniam egissent, & maximè tarditate excusatâ, petierunt ab eo, ut quorum antea comparaverat studia, eos in fide Cæsaris retineret, & se ad reliqua consilio, atque operâ juvaret. Commendonus neutrâ re se iis defutu-

rum pollicitus; vereri se tamen ostendit, ne ferus esset jam omnis conatus, siquidem & multitudo cuncta arbitrii sui fecisset, & Principes cum aliis alii de suis rebus transgissent, quos secuti ipse quandiu licuit hortando, monendoque, & spem ostentando variè sustinuerat, ita certis pactorum vinculis, & inter se obstrictos, & competitoribus obligatos, vix sperandum videri à decreta, constitutaque sententia eos revocari posse. Jam frequens undique toto Regno Nobilitas armata, proceresque magnis amicorum, clientumque comitatibus convenerant, positisque in campo antè habendis comitiis, delecto tabernaculis omnia castrorum similia fecerant. Nec gladiis modò succincti omnes vagabantur, sed gregatim armati cum hastis, sclopis, sagittis, aliisque telis incedebant, & quidam præter armatorum præsidia, bombardarum quoque, ac bellicorum tormentorum apparatus, quo se communirent, adduxerant, ad bellum euntium magis, quàm ad comitia, civilémque conventum venientium more; prorsus ut ad invadendum alienum, non ad suum dandum Regnum venisse viderentur. Speciem certè præbuerunt, tanquam vi, atque armis, non sententiis, ac suffragiis decreturi eventum illorum comitorum essent. Nec sanè quicquam mirabilius nobis visum, quàm quòd inter inter tot armatorum agmina, in tanta omnium rerum impunitate, cum nullum jus legum, nulla magistratum auctoritas esset, non cædes vlla facta, non

strictus gladius, non vlla vltra verborum certamen contentio, rixave sævierit ; adeò gens sui sanguinis abstinens est, & civili dissidio, quod armis decernendum sit, abhorret. Ante omnia placuit legationes audiri, contendentibus hæreticis, vt inde protinus dato responso extra fines Regni summoverentur, ne comitiarum libertati exterorum ambitus, & corruptelæ officerent. Alii, aut retinendos, Varſaviæ omnes, aut ſivtique abeſſe comitiis placeret, Legatos, qui ad petendum Regnum veniſſent, dimittendos in proximas vrbes, vbi hoſpitaliter, ac benignè habiti creationem novi Regis opperirentur, cenſebant. Atque hæc accepta ſententia eſt, quâ haud feſellit hæreticos Commendonum Varſaviæ retineri, itaque nominatim de eo retulerunt, negantes libera comitia fore, ſi vnus ille adfuisset, qui tamenſi nemini peteret palam Regnum, neminem tamen ignorare plurimum momenti allaturum, quocumque favor ejus inclinasset, ac ne reliquis quidem Reipublicæ conſultationibus, præſentiam, auctoritatémque illius non magnum pondus, quâ intendisset addituram ; & maximè Epiſcopos notantes, Gallinas ſuper inſtantem Aquilam formidantes appellabant, ejusque reſpectu nec libera ſententias dicere ſolitos, nec libera ſuffragia laturos criminabantur, ac in Senatu eorum interdum dicta reſellentes, ea non domi concepta, ſed aliunde afflata, ac tales non apud ſe naſci, ſed ab Italia flare ventos, Commendonum deſi-

gnantes, discitabant: sed Catholicis decretum tuentibus nihil est immutatum. Ad v. l. Id. Aprilis omnium primò Senatus Commendono est datus, deduxere eum domo, missi à Senatu tres Episcopi, ac totidem alterius ordinis Senatores, & multi præterea privati officii causâ principes Nobilitatis. Senatus iisdem in castris ultra Vistulam, quam sublicio ponte junxerant, habebatur, tenso ad id in mediâ planitiæ regio ingenti tabernaculo, Commendonum è curru, quo vectus erat, descendente, ante tentorium Palatinus Cracoviensis, & Corchevicius acceperunt, alter Poloniz, alter Lithuaniz Marefciillus; sic enim ipsi eum magistratum, magnâ præditum potestate appellant. Ii, quod officium vni Regi præstare consueverunt, cum baculis Commendonum antecedentes, turbam ei summovertunt; cui intranti tabernaculum, consurgens vniversus Senatus obviâ est factus. Ipse ad principem sedendi locum deductus, claudentibus latera hinc Gnesnensi Archiepiscopo, hinc Cracoviensi Episcopo, confedit; idem Senatus fecit, circumfusâ nobilium multitudine, quantam capere locus poterat. Silentio factò litteras Pontificis Maximi Senatui reddidit, quibus recitatis, ipse orationem est exorsus, in qua non solum de Rege Catholicæ fidei cultore creando disseruit, sed etiam de inita ab hæreticis adversus eam fidem societate, verba fecit, quàm ea à Christiani animi sensu, ac religione abhorreret, ostendens. Id verò adeò conspirationis

auctores pupugit, summo silentio, attentisque audi-  
 ri animis eum cernentes, ut Palatinus Sandomirien-  
 sis contineri, quin dicentem interpellaret, non po-  
 » tuerit. Quo cum honore appellato, Tu verò, inquit,  
 » Legati officium transgressus, Consiliarii, ac Sena-  
 » toris partes agere videris. Quæsumus te, ut Reipu-  
 » blicæ nostræ, quæ utilia, apudque sint judicare  
 » nos sinas, neque tu curiosius te in nostras res,  
 » quàm peregrinum decet, intrudas, sed tantùm si  
 » qua à Pontifice mandata habes ea exequare. Sub  
 eam vocem consurrexere vniversi Catholici Sena-  
 tores, fremitusque increpantium, & silere Palati-  
 num jubentium, vndique est ortus, tantæque indi-  
 gnatio circumfusa Nobilitatis fuit, ut minæ, con-  
 uiciâque jactarint in hæreticos, & prosilientes è se-  
 dibus suis Cotchevicius, & Laschius manum ad  
 gladii capulum injecerint, secutusque periculo-  
 sus aliquis tumultus foret, nisi, & ille conticuif-  
 set, & Commendonus rem minimè ad offensam,  
 injuriâque vertisset, sed manu, vultuque æquè ac  
 antea pacato, nec vllam in partem commoto con-  
 fidere, & conquiescere omnibus jussis conversus  
 » ad Sandomiriensem, Neque ego, inquit subri-  
 » dens, me ipsum, neque muneris mei officium,  
 » quale sit, ignoro, & id ipsum quod tu mones, a-  
 » go, ut Pontificis Maximi mandata exponam, ne-  
 » que enim ille magis de Rege, quàm de vobis,  
 » deque vestra Republica, ut salua, florénsque sit,  
 » laborat, neque ego ex hoc loco tecum, aut figil-  
 » latim cum illo, sed vniversè cum omnibus loquor:  
 quòd



quòd si ipse Senator non sum, ne tu quidem Senatus. Perrexit inde quæ cœperat ad eò non interrupto ordine orationis, ut ne verbum quidem vllum exciderit eorum, quæ dicturus erat, auditusque est summo omnium silentio. Nos, quo res notior esset, ipsam orationem ejus subjiceremus, nisi ea exscripta, editaque in vulgus, legere cupientibus pateret.

*De comitiis habitis, & Henrico Rege creato.*

#### CAPUT IX.

CUM hæc Commendonus petorasset, Senatûs Principes in medium tentorium cœvere, & pauca inter se collocti, ad suum quisque locum rediere. Tum confurgens Archiepiscopus Gnesnensis Senatûs nomine Pontifici Maximo, & Commendono gratias egit, quòd Poloniae salutis tantam curam gererent, daturumque operam Senatûm dixit, ut à consiliis, monitiisque ejus paternæ benevolentiae, atque officii plenius, ne discederet. Post hæc Commendonus discessit, prosequente usque ad currum vniverso Senatû, præter illum ipsum Sandomiriensem interpellatorem, & paucos hæreticos. Qui quidem Sandomiriensis, & gravissimis postea verbis est à Senatû objurgatus, & magnæ ea res invidiæ illi fuit.

A a a

Contrà Commendono moderatio animi ingentem gratiam apud omnes ordines conciliavit. Neque enim dubitabant, nisi ille rem tam lentè, lenitèrque accipiendo, sedasset, eà die turbati comitia, & cædis initium fieri, & magnam discordiarum flammam excitari potuisse. Quod periculum impotentiâ, ac temeritate Sandomiriensis contractum, vnam avertisse Commendoni gravitatem, & constantiam prædicabant. Posterâ die audiri Cæsaris Legati, à duobus Senatoribus, Palatino Lublinensi, & Castellano Gedanen. deducti. Hi antea magnoperè contenderant, ut Petrus quoque Fassardus Hispanus Philippi Regis Legatus, qui ad commendandum Ernestum venerat, vnà in Senatum introduceretur, quòd & vnà venisset, & eadem mandata afferret, nec in ea re separatim quicquam à Cæsare Philippus esset acturus: sed impetrare nequiverunt contrà tendentibus Galliarum Regis Legatis, qui se loco præstare, & Hispano præferri debere aiebant. Ita Fassardus, ne concessisse Gallis videri posset, Senatu non convento domum discessit, & post Cæsaris Legatos Galli introducti sunt, ac deinceps aliâ ordine auditæ legationes. Datâ singulis brevibus responsis, paucos post dies Senatusconsultum afferri ad eos iusserunt, quo omnes abire Varfaviâ, atque alibi comitiorum opperiri eventum jubebantur, editisque urbibus in quas cuique decedendum esset, Germani Lovitium, Galli Plo-tiam profecti sunt. Tum iterum hæretici à Sena-

tu postularunt, cum Commendono ageretur, ut extra Varſaviam aliquò & ipſe ſecederet, eòſque pateretur rem ſuam publicam ſine externis arbitris agere; nam neque comitiorum libertati cujuſquam debere auctoritatem officere, & alios Legatos inde ſummos ſe minùs ægrè eſſe laturòs, ſi ipſe quoque diſceſſiſſet: contradicentibus Catholicis. Cùm quotidie de ea re altercaretur, nec aliud æquè Senatù diſtineret, Commendonus ne quid cauſæ publicis diſſenſionibus ex ſe oriretur, Varſaviæ me relicto, ipſe Schernovitiàm bidui inde itinere ſe recepit. Poſt diſceſſum ejus cupientibus omnibus, ut omiſſis aliis habendi comitia initium fieret; hæretici, ut priùs leges comuni libertati firmandæ, ac minuendo regio imperio novæ ferrentur, veteres inſpicerentur, & ad Reipublicæ uſum, tempùſque corrigerentur, ſummâ ope nixi ſunt. Hac ſpecie publici juris ordinandi, abrogare, aut infirmare antiquas de hæreticis leges cupientes, & acceſſurum eorum licentiæ rebantur, quicquid detractum Regiæ poteſtati foret: Atque altiùs etiam cogitationem intendentes, ſi Regem ſuo jure diſpoliaſſent, exteros Principes putabant petitione abſtituturoſ, ita ipſis ſpes ſuas proceſſuras. Huic conatui Catholici repugnabant: atque hæc plures dies contentio tenuit, hæreticis id quoque ſtudio agentibus, ut tempus fruſtrâ tereretur, ſic aut diſſoluturos, quod præoptabant, ſine vllò effectu comitia ſperantes, aut Catholicorum frequentiam tæ-

dio diurnæ moræ diminutam iri. Sed Masovii, quorum numerus ingens ad comitia venerat, cœtu suorum coacto negotium dederunt vni è popularibus suis, nomine Cossobutio, homini disertio, atque industrio, hæreticos refutandi, & palam in concione, quæ fraus in eorum ficto libertatis studio lateret, aperiendi. Quod ab eo copiosè, atque accuratè pro sua fide, cùm esset factum: denunciavit inde Senatui, ni cæteris omisissis rebus de Rege creando, cujus vnus rei gratiâ id coactum concilium esset, ageretur, Equites sibi, ac Reipublicæ, quæ diutius carere rectore non posset, sine Senatûs auctoritate consulturos. Catholici Senatores, plerique Masoviorum orationi favebant. Hæretici quæsti omnia sui arbitrii facere Masovios, & Senatui etiam audere, quæ agenda, omittendæve essent præscribere, serò locum comitiorum pro se non esse senserunt. Extractis tamen hac contentione aliquot diebus, tandem clamoribus, minisque multitudinis Regem poscentis victus Senatus ad i v. Nonas Maii iri in suffragia iussit. Id hoc maxime modo, atque ordine est factum. Concessere diversi in suam quisque tribum; ( ipsi Palatinatus vocant ) his singulis ferè Episcopi præsident; iidem de vnaquaque re, cujus deliberatio sit, ad concilium referunt; iidem primi sententiam dicunt, & suffragia non tabellis, aut fabis, sed palam voce feruntur, & cuique facultas est suam sententiam oratione exequi. Episcopi in sua quis-

que tribu , antequam de Rege referrent , humi procubuerunt , & genibus nixi , quod & circumfusa concio fecit , Deum adorarunt , & solemne illud carmen , quo divini numinis præsentia imploratur , cecinere : *Veni , creator Spiritus , reple tuorum corda fidelium.* Cæptæ inde sententiæ dici , atque in omnibus ferè tribubus ab singulis Principibus , Ernesti cum magno verborum honore facta mentio est : quidam Sueciæ Regem : multi vnum è Polonia Principibus , quem Piasum appellabant : pars longè maxima Henricum Regem dixere. Ne singulorum Palatinatum sententias perenseamus , quod longum , molestumque legentibus esset , sat fuerit apud Masovios , quomodo acta res sit , retulisse. Hic comitia habebat Petrus Miscovius Episcopus Plocensis , vir gravis , & prudens , & dicendi imprimis peritus , qui cum Ernesto maximè studeret , eumque nullo suo merito , sed præjudicato quodam in Henricum studio , à multitudine respui intelligeret , sententiam ita dixit , ut Ernestum describeret , nomen reticeret. Ac primùm familiam ortum ostendit longè totius Europæ nobilissimam , quæ cum latissimè propagatum Imperium haberet , tum omnes propè Reges , ac Principes Christianos affinitatibus , & clientelis complecteretur. Deinde , quæ ex ipso commoda , utilitatésque , quas ex propinquis , & maximis suis , & familiæ opibus , res Polona captura esset , memoravit. Postremò ipsum juvenem omnibus regiis laudi-

bus cumulavit. Exigentibus inde clamore omnibus, ut nomen ederet, Faciam, inquit, si hæc à vobis probari, & vos rebus, non nominibus addictos esse intellexero. Hinc de Gallis exorsus magniloquentiam Legatorum, & vanitatem promissorum irrifit, quæ tanta, atque ejus generis esse dixit, quæ ne si velint quidem Galli præstare possint. Efflagitantibus inde omnibus, ut promeret tandem, quem tantopere oratione extulisset, Ernestum, adeò averlis omnium auribus nominavit, ut vulgus Henricum nudum, & nihil eorum; quæ Legati polliciti essent, præstantem, quàm quemvis alium aureos montes afferentem, malle se fremeret. Tum Volscius vnus Senatorum, quæ dicta ab Episcopo erant, vehementer refutavit, & multis invidiosè in Austriam familiam conjectis, illam ipsam propinquitatem, opportunitatèque paternorum Regnorum, illas ipsas opes, & affinitates, quas Miscovius in præsidio, atque ornamento Poloniæ ponebat, opprimendæ eorum libertati fore, si Ernestum sibi Regem imponi paterentur, disseruit. Henricum deinde laudibus ferens, non Regium solùm genus, sed Regiam indolem, humanitatem, liberalitatem, bellicæ rei scientiam, victorias, decoraque bello parta magnificè percensuit. Atque in hujus sententiam adeò discessum ab omnibus est, ut perseverantem Episcopum in sua, ad extremum etiam familiares, & domestici ministri deferrent. Tantùm præjudicata opinio ad mul-

titudinis animos impellendos valet, vt in Ernesto, quæ amplificando ornandóque Poloniæ Regno haud dubiè erant, patris, & familiæ opes; eas ad invidiam, suspicionémque tyrannidis verterent; de Henrico etiam, quæ ab ipsis Galliæ Legatis jactata, quæque vanus distulerat rumor, credita pro veris omnia, penitúsque accepta sint. Sic quæ allicere, ac pertrahere ad Ernestum rem debuerant propinquitas, & mutua finitimorum Regnorum opportunitas, & ipse adolescens visus, cognitúsque multis, ea maximè avertère; Henrico ipsum intervallum tot interjectarum provinciarum, quod maximè nociturum petitioni suæ ipsi crediderunt Galli, solum propè rem iuvit. Regem enim longè ab domo petitum, nec vllis propriis, quas in promptu habiturus esset, opibus, & quæ de ipsius laudibus fautores disperserant, iis vim, fidémque longinquitas addidit; natura famæ, quæ fluminum instar quo longiùs à fontibus labuntur, & maiores eundo vires colligunt, cuncta in majus ex longinquo affert. Etsi ex omnibus tribubus pars longè maxima Henricum Regem dixerat; tamen quia & Ernestum quosdam, quosdam Sueciæ Regem, haud negligendum numerum Piasum postulasse constabat, quo in vnum ab omnibus consentiretur, placuit de singulis iis ad Senatum referri. Cùm opinione plures Piaso studere compertum esset, neque is facilè refutari oratione videretur posse, hæc ad eum explodendum ratio à Catholicis est inita.

Primò postulatū , vt nomen profiteretur , palàmque peteret , quicumque idoneum se Regno putaret , quo de eo jus suffragii ferendi tribubus fieret. Audente profiteri nemine , etenim impudens videbatur eximium se , dignúmque iudicare , cui dominatus in cæteros mandaretur : & hæreticis pudore impediri homines , nec ausurum id' de se facere iudiciū quemquam , & ab ipsis deligendum , consensúque cogendum accipere Regnum è Principibus vñum dicentibus , responsum est , vt quando nemo de se profiteri auderet , ederent ipsi eorum nomina , quos maximè aptos Regno censerent. Cùm diu , ne quem nominarent , pugnassent , coacti tandem flagitantium consensu , primùm quidem quos minimè fieri volebant , Catholicorum aliquot nomina ediderunt : quibus abnuentibus omnibus , eorum „ vnus ; Ego verò , inquit , vestra isthæc in me „ stua vobis remitto , qui me haudquaquam vllâ re „ ita excellere alios puto , vt præponi omnibus de- „ beam , aut adedò velim , neque me quisquam ei „ oneri subijciat , quod ferre cuiusquam privati hu- „ meri non valent. Idem dum de se quisque prædi- „ caret , etiam quorum non ignota cupiditas , at- „ que ambitio erat , pudore deterriti , abstinere. Nam & in ludibrium adducta res est , aliis alios , & humillimi , & indignissimi cuiusque nomen per iocum , ac risum subijcientibus. Ita Piaustus Regno , hæretici suâ spe dejecti. Creati inde novem viri , qui de Henrico , & Ernesto , & Rege Sue-  
ciæ



ciz in Senatu disceptarent, ternique mandatam  
 cujusque causam agerent; Henrico Cujaviensis  
 Episcopus, Sandomiriensis Palatinus, & Castella-  
 nus, Gedanensis; Ernesto Episcopus Plocensis,  
 Palatinus Marienburgensis, & Castellanus Lu-  
 blinensis; Sueco, Cracoviensis, Ravens, & Podo-  
 liæ Palatini sunt dati. Ab his repetita eadem, quæ  
 in sua quisque dixerat tribu, & Episcopus Plocen-  
 sis gravissimâ oratione, cum lenire, ac trahere ani-  
 mos ad Ernestum, cujus etiam depictam imagi-  
 nem Senatui ostendit, tum deterere ab aliis est  
 conatus. Sed potius ipse laudem constantiæ, at-  
 que eloquentiæ tulit, quàm moverit quicquam,  
 aut Senatum, aut Equitum multitudinem, quæ  
 Senatum coronâ circumdederat; quin sæpè fremi-  
 tua aspernantium orationem ejus est interpellatus.  
 Hæreticos, & maximè Palatinum Cracoviensem  
 Regem Sueciæ commendare conantes, interfatus  
 Cochevicius adeò acribus verbis futilem spem  
 illius est infectatus, ut mentionem de eo amplius  
 facere nemini opus fuerit: at Cujaviensis Episcopi  
 pro Henrico dicentis oratio secundissimis auri-  
 bus à multitudine accipiebatur; quæ identidem  
 obstrepens aliis huic mirificum silentium præ-  
 stabat, dictaque ejus non assensu solum, & ap-  
 probatione, sed clamoribus lætis, plausuque pro-  
 sequebatur. Atque adeò illi animis, studiisque  
 favit, ut quoties reclamandum, plaudendumve  
 orantibus esset, signum ab eo acciperent, suda-  
 riolumque nunc fronti, nunc ori admoventi ob-

sequerentur. Satis igitur perspectâ multitudinis voluntate, conclamatum vndique est, ut redirent in suam quisque tribum, vnamque inde sententiam ad Senatum referrent; sic principibus Nobilitatibus pro Henrico adnitentibus, cum in Senatum reditum esset ad 14. Id. Maii, Henricum omnes Regem dixerunt, præter Cracoviensem Palatinum, & aliquot hæreticorum Principes, qui ne assentiri cogerentur, Senatu egressi in sua se tabernacula receperunt, accepturos eum Regem, quem Senatus consensu declarasset, denunciantes. Jus Regis renunciandi, more antiquitus tradito, est penes Archiepiscopum Gnesnensem, qui idem præses est publici consilii. Is quia nox disceptantes oppresserat, non videri sibi dixit Regem noctu renunciari debere, & rem in sequentem diem distulit, qui dies, quia festus Pentecostes fuit, haberi Senatus non potuit. Atque hunc Archiepiscopi errorem pænè magno malo Respublica luit. hæretici enim hoc nacti spatium coiverant, & consilia disturbandi comitia agitarunt. Ac posteriâ die vocati in Senatum venire recusarunt, privatûmque cœtum suorum apud Firleium, Palatinum Cracoviensem habuerunt. Hæc secessio in exitiosam seditionem, bellumque erupisset, si hæreticis pares turbidis, insensisque animis vires fuissent. Nam Catholici adeò illâ defectione sunt irritati, ut non jam verbis certandum, sed vi domandam contumaciam, subigendosque omnes, Senatûs au-

auctoritati parere clamantes, Senatu se ad expedienda arma proripuerint: & Cotchevicius aenea tormenta produci, quorum haud negligendam copiam adduxerat; & suos capere arma, & conscendere equos iusserat. Idem Laschius, idem alii Catholicorum Principes fecere, quibus alacer, & cupida pugnae Masoviorum egregia manus se conjunxit. Hi omnes medio in campo, instructis turmis, ac directâ acie paratam vim separantibus à Senatu consilia, & Regem consensu creatum abnuentibus, ostentavere. Hæretici quoque armati campum tenebant; sed neque numero, neque animis pares haud temerè arma, atque vim experturi videbantur. Seniores Principum, & Episcopi hinc Catholicos rogando, ut vi abstinerent, hinc monendo hæreticos, ne consilia ab aliis dissociarent, rem præcipitem sustinuerunt. Ad Catholicos, & maximè Laschium, & Cotchevicius exorandos, apud quos summa Commendoni erat auctoritas, ego quoque ab Episcopis sum adhibitus; uterque quietum expectare me exitum rei iussit, non enim ad eadem illa esse sumpta arma, sed ad metum adversariis injiciendum, quo incusso non dubitabant eos in potestate Senatûs futuros, neque eos spes fefellit. Hoc enim subacti metu hæretici, depositisque utrimque armis in concordiam reditum, & Senatu coacto, Henricus Rex ab Archiepiscopo est renunciatus. Acciti post hoc Galliæ Regis Legati, atque in Senatum introducti, in leges Poloniæ

conceptis verbis designati Regis nomine jurarunt; quod factum circumfusa multitudo plausu prosecuta latis clamoribus fausta novo Regi precatur; Palatinus Cracoviensis inter tumultum, strepitumque confusæ turbæ, quæ mixta Senatoribus tentorium impleverat, à Monluco Legatorum principe in id quoque jusjurandum exegit, nemini priscae religionis cultum deseruisse fraudi, pœnæque futurum. Id cum Archiepiscopo renunciatum esset, rediens properè, eò ubi hæc agebantur edixit, Regem nullâ nisi quæ communi consensu lata esset, lege teneri. Designati inde viginti Legati, qui ad Regem è Gallia in Poloniam deducendum mitterentur; cujus legationis principes fuere Adamus Conarchius Episcopus Parnaviensis, & Albertus Laschius Palatinus Siradiensis, & Nicolaus Radgivillus Dux Eliciensis, qui diversi omnes, quâ cuique commodum fuit, Metim nobile oppidum Lotharingiæ convenere, atque inde vno agmine Lutetiam Parisiorum petiere.

---

*De discessu Commendoni è Polonia, & de mora adventus Regis.*

## CAPUT X.

**C**OMMENDONUS creato Rege non Catholico solùm, sed propè in castris, atque armis, quæ ab ineunte ætate adversus Catholicæ

pietatis hostes induerat educato, hæreticorum conatibus egregiè semper retusis, rectè omnibus, & è Republica administratis legationis suæ munere summa cum fidei, religionis, prudentiæ gloria expleto, per litteras à Pontifice Maximo postulavit, ut sibi decedere Poloniâ, atque redire in Italiam, Romamque liceret, quando adventum novi Regis expectare longum videretur futurum, qui neque itineri se per tot feroces, & infestas Germaniæ gentes committere, nisi conciliatis prius, exploratisque Regulorum animis, per quorum fines transiturus esset, neque è Gallia movere sine magno molimine apparatusque rerum posset. Et Pontifex quamquam cupivisset, ut Commendonus Regi novum ineunti Regnum, operâ, consilioque, cujus ille indigens videbatur, futurus adesset, & Galli ipsi id eum magnopere rogarent; tamen post diuturnam biennii ipsius in ea legatione moram, negare tam bene de Republica merito, tantis laboribus, ac tam insigni opere perfuncto reditum, non est visum. Datis igitur ad eum litteris, & amplissimis verbis fide, virtutisque ejus collaudatâ, quâ effectum esse aiebar, ut in tantis opibus, audaciâque hæreticorum Catholicum sibi Regem gens imprimis nobilis delegisset, ei permisit, ut suo arbitrio vteretur, siue Romam redire, siue expectare in Polonia adventum Regis, eumque bonis, atque utilibus consiliis ad novum Regnum salubriter habendum imbuere mallet. Si decedendum sibi statuisset, tum me Pon-

rifex in Galliam ad Regem proficisci, tum de omnibus rebus edocere, & cum ipso in Poloniam redire, & initiis ejus præstò adesse jubebat. Sed Commendono satius visum morari me in Polonia, donec profectum è Gallia Regem allatum esset, vt turbidis adhuc rebus, nec hæreticis si occasio daretur satis quieturis, esset interea in Regno, qui ex Pontificis Maximi auctoritate monere, si vsus posceret, & excitare Episcopos, Catholicosque posset, ne quid per negligentiam aliorum de jure factorum, ac religione secus consuleretur. Decedentem è Polonia Commendonum, gentis Principes primùm retinere conati; deinde certatim omnibus officiis humanitatis, atque observantiæ abeuntem sunt profecuti, tantùmque ejus remansit in ea gente nomen, tanta veneratio, vt nunc quoque memoria dictorum, factorumque ejus colatur, vsurpeturque ab iis. Et nuper post Stephani Regis mortem in edicto publice proposito rem auctoritate firmantes, solitum id à Commendono dici præfati sunt. Eodem tempore Legati Polonorum Lutetiam venere, tantis ab vniversa Gallia, Regibusque accepti honoribus, quantum ad se redire gloriæ ex tam clara legatione, & legationis causa haud vanâ æstimatione rebantur. Et præbuere Legati spectaculum non numero solùm suo, comitumque, sed ipso etiam cultu, atque ornatu novo, insuetoque Gallorum oculis; cum enim ferarum pellibus, quas magno parant pretio, caput, corpusque amicti erant,

rum auro, purpurâque; & gemmis ipsi, equique fulgebant. Reddunt inde Henrico Senatusconsultum, quo ipse ad accipiendum Poloniæ Regnum vocabatur, & jusjurandum suo more in patrias leges exigunt. Quo accepto fœdum inter Legatos certamen est ortum, in quibus erant hæretici aliquot primarii, homines à fociis ad id ipsum missi, cum hi permitti sibi de Deo, ac de religionibus liberum sentiendi arbitrium, atque in id jusjurandum jurari, quod Legati ejus in Polonia jurassent, postularent; Catholici negarent aliis, quàm quæ publicè offeruntur legibus, Regem obligari debere, aut privatorum postulata eximere de publico jure quicquam posse. Cùm hæretici solito clamore, ac tumultu rem agerent, Rex ita iis morem gessit, ut se cùm in Regnum venisset staturum consensui, ac voluntati Senatûs de ea re diceret. Secundùm hæc Poloni epulis, festisque ludis armorum, equorumque, & nobilium scæminarum choreis, aliisque Regiæ Galliæ voluptatibus culti, & ipsi latabantur illo Regum, Reginarumque more sese liberali, ac benigno alloquio usque in omnia familiaritatis jura cum suis pariter, & cum hospitibus miscentium. Donna quoque Legatis regali munificentia singulis data, nec ullum in eos comitatis, & liberalitatis officium prætermissum. Agi inde de discessu Regis cœptum, Catholicis Legatis monentibus præfenti Rege indigere Poloniam, resque ibi ex recenti comitiorum, atque interregni jactatione

adhuc in motu esse, nec nisi Rege viso quieturas.  
Et Galli dum advenas tantum viæ emensos ad  
petendum è sua gente Regem, advenarumque  
cultum, ac morem mirantur, & ad Galliæ glo-  
riam vertentes rem sermonibus tollunt, læti &  
ipsi Legatos, ludosque concelebrarant. At vbi  
discedendum Henrico, appararique profectionem  
videre, tum animum ad cogitationem rerum sua-  
rum contrahunt. Et Catholici eo duce vsque à  
puero, omnibus cum infesta Ugonotorum fa-  
ctione bellis feliciter vsi, omni vi illum in Gal-  
lia retinebant. Quid enim ei amplissima fortuna,  
» opulentissimo in Regno nato, quæsito in ultimis  
» terris, ac propè alio in orbe Regno opus esse? Et  
» cui dubium videri possit, solutusne ipse in suos  
» imperium habeat, an à suis promptius, obedi-  
» tiusque illi pareatur, eò se abduci ab domo, à  
» patria, ab tot fidelissimis amicis, carissimisque  
» rebus sinat, vbi ætissimis legum vinculis obstri-  
» ctus, non Rex, sed nomen inane, ac ludibrium  
» Regis sit futurus, vbi à barbarico Senatu obsessus,  
» ac veluti captus, non publicæ pecuniæ, non pa-  
» cis, non belli, non denique sui ipsius jus, atque  
» arbitrium sit habiturus. Et quod gravius sit, vn-  
» de reditus ei liber in Galliam, si patriæ necessi-  
» tates revocent, non sit futurus. Quid si fratrem  
» carentem liberis, nec firmâ valetudine, defungi  
» fato contingat? an dum ipse longè gentium agit,  
» neminem in Gallia fore novæ spei, novæ poten-  
» tiæ inhiantem credat, qui minorem natu fratrem,  
ad



ad Regni cupiditatem sollicitet ? Cùm eum jam “  
 nunc haud obscuris discordiæ, atque æmulatio- “  
 nis seminibus ab Ugonottis imbutum constet ? “  
 Moverunt his sermonibus animum juvenis, &  
 jam segniùs iter instruebatur, morandique ac dif-  
 ferendi causæ quærebantur, jam Poloni ipsi sen-  
 serant refrixisse in Henrico studium profectio-  
 nis, ac propè sordere ei Regnum, quod sibi tantis via-  
 rum, rerumque incommodis esset habendum.  
 Sed cùm Regi fratri, matrique indignum, & in-  
 delebilem notam levitatis habiturum videretur,  
 magno studio peticum majori pænè delatum fa-  
 stidire Regnum, ac per mollitiem, atque desi-  
 diam objicere, & gentis nobilissimæ spem, ex-  
 pectationemque frustrari, auctoritate suâ evicerunt,  
 ut porro itineri instaretur, quam quidem in rem  
 immanis est pecunia insumpta, gravisque Galliæ  
 Polonica hæc actio fuit. Cùm igitur stetisset profe-  
 ctionis consilium, non tamen priùs è Parisiis mo-  
 vit Henricus, quàm eum frater in suorum Con-  
 silio Legatis Poloniæ, & matre, & proceribus  
 coram, hæredem, ac successorem Regni Galliæ, si  
 prior ipse sine liberis decessisset, declaravit. Tum  
 præmissis qui à Cæsare, ac Germaniæ Regulis fi-  
 dem acciperent, tutum per eorum fines transi-  
 tum fore, iter est ingressus. At in Polonia id mo-  
 dò nunciatum erat, venisse in Galliam Legatos,  
 magnificentissimæque acceptos à Regibus esse.  
 Expectatio inde adventûs ejus tenebat hominum  
 animos ; & res poscebat, & ex re spes erat, Re-

gem nihil sibi ad iter moræ facturum, nec quicquam discessui suo præversurum. Sic affectis, & jam intrasse Germaniam cum, & multum viæ progressum credentibus, ( nam quintus post eum renunciatum Regem mensis excefferat ) missus è Lutetia nuncius litteras ab eo attulit, quibus Senatui de Regno ad se delato gratias agebat, erantque litteræ cæteræ quidem ad tempus apertæ scriptæ, sed nulla cum mentione discessus sui. Id verò tantum toto Regno animorum motum fecit, vt incertiores tum Regem, quàm antequam crearetur, haberemus. Nam hæretici arreptâ occasione ad quam semper intentissimi excubant, effictis etiam, atque ementitis litteris rumores incommodissimos disperferant. Nunc impediri Regem novis Galliæ motibus, nunc aspernari Regnum, ad quod nisi immensus sumptibus, infestisque itineribus pervenire non posset, nunc inopiâ pecuniæ laborare, eaque à populis Galliæ corrogandâ occupari, nec nisi insequenti ætate venturum. Et adhæc ipsum, morisque ejus carpen-tes, nunc mollem, atque amoribus deditum, nunc sævum, auctoremque omnium Galliæ seditionum distrahebant, idque adeò licenter, vt in sacris, cœtibusque suis, palam hortarentur concionem, Deum precari, vt talem Poloniâ Regem averteret. Coitiones quoque ab iis cœptæ fieri, & haud dubiè novis rebus studeri: languebant ex his bonorum spes, & cum rumoribus mora Regis fidem adstrueret, nec hæreticos crederent auluros ei

tam apertè maledicere, ac malè precari, nî non venturum exploratum haberent, multi etiam Catholicorum, vt impetu animi potius, quàm certâ ratione patrata ponè pœnitentia sequitur, nova confilia respiciebant: vt nobis magnum negotium fuerit penitus diffidentes quosdam erigere, & continere; ne ex fama vanissimè orta, aut arte adversariorum dispersa, de summa Republica statuerent: nec fisti potuisset res, nisi præmissi à Rege Joannes Sborovius vnus Legatorum Poloniæ, & Rambouilletus Gallus offusas credulis animis suspicionum nubes, adventu suo dispulissent. Et Sborovio in Senatu non profectum modò Lutetiâ Regem, sed de præstantibus ejus animi, atque ingenii ornamentis multa prædicanti, eo plus fidei fuit, quòd erat ipse inter capita hæreticorum longè acerrimus Christianæ religionis hostis, etsi Andræ fratris, de quo suprâ à nobis mentio facta est, auctoritatem secutus, suffragatus Henrici Regno fuerat. Hi labantes spes Catholicorum in præsentia sustinuerunt, hæreticorum cohibuerunt. Sed penitus hos represlit, & reliquos confirmavit adventus Cracoviam Joannis Cortchievicii, qui iisdem primò rumoribus, nam in Lithuaniam quoque pervaserant, deinde meis, atque Andræ Sborovii, qui vnus omnium constantissimè pro Henrico stetit, communibus litteris excitus, quibus quàm sustulissent adversarii animos, quàm nostri dimisissent, certior fiebat, in Poloniam contenderat, & ex publica Lithuanorum auctorita-

te, suâque quæ haud minor quàm publica erat, auditum in Lithuania dixit esse novis rebus studentes quosdam infirmare, atque adeò, si possint, infringere creationem Regis conari, & non venturum eum in Poloniam multitudini persuadere. Id neque ab se, neque à Lithuanis facile creditum, quippe tam improbum civem esse quemquam existimari non debere, sed si qui essent, qui patriæ fidemque obliti talia moliri, atque ea semina discordiarum ac seditionum jacere auderent, quæ haud dubiè perdendæ Reipublicæ essent futura, hos sibi, ac Lithuanis omnibus pro communis salutis proditoribus hostibusque futuros. Regem illos ea gente, stirpèque sibi delegisse, ea ipsum specimina sui dedisse, ut sperare optimum jure possent, & hoc de illo consentientem famam polliceri, sed qualemcumque Deus dedisset, habendum, ferendumque iis esse, neque imitandi barbarorum morem pari levitate deferentium Regna, atque auferentium. Hæc periculum, ex dilato Regis adventu Poloniæ imminens, avertère, & ut quietè Rex expectaretur effecère, quamquam Februarius mensis sequentis anni, qui fuit M. D. LXXIV. antè penè effluxit, quàm ille Poloniæ fines attigerit.



*De quibusdam quæ adventantem Regem  
auctor edocuit.*

## CAPUT XI.

**E**G o cùm egressum Galliâ transisse Rhenum  
certis nunciis allatum esset, profectus Cra-  
coviâ, conventisque ex itinere Archiepiscopo  
Gnesnensi, atque aliquot Catholicorum Princi-  
pibus, & à singulis acceptis ad Regem manda-  
tis, ad sexcenta millia passuum obviam progres-  
sus, in Saxonia illi occurri. Cum eo præter Po-  
loniæ Legatos, quorum suæ quisque privatim  
rei intendebat, nemo erat, qui Poloniæ rerum,  
sed minimè qui hominum gnarus esset; nam è  
tribus Legatis, qui ad petendum Regnum ve-  
nerant, Lillius per Russiam, ac Valachiam per-  
rexerat in Thraciam, ut Constantinopoli apud  
Regem Turcarum moraretur: Lansachius cùm  
navim apud Gedanum conscendisset, sperans  
maturiùs per Balticum mare, si venti aspirassent,  
in Galliam se perventurum, à Rege Daniæ re-  
tentus Copinagii fuerat: Monlucus (is princeps  
legationis fuit) tam multis in Polonia se ingenti-  
bus promissis obstrinxerat, ut cùm omnes non elu-  
sisset solùm reversus in Galliam; sed quò suâ v-  
nius operâ, industriâque cariùs æstimaretur à  
Regibus, omnium reliquorum studia, meritâ-

Ccc iij

que malignè verbis elevasset , adeò in se Polonorum accenderat iras , vt Rex tutius , consultiusque esse statuerit cum in Gallia relinquere : gratior ob id adventus meus Regi , hisque , qui Regi in consilio erant , fuit ; quippe ab experti odii , amorisque , nec privatim ulli , aut parti , aut homini addicto , certa omnia , atque ex vero hausta audituri aliquando videbantur , apud quos præsente , ac iubente Rege plenissime , quantum tenuitas nostra tulit , de tota illius Reipublicæ forma , statusque disserui ; & , quod juvenis ipsius auribus jucundum imprimis accidit , haudquaquam Regis vim , potestatemque tam mutilam , comminutamque esse ostendi , quàm jactaretur à quibusdam , neque idem in cohibendo , moderandoque Rege jus , ditionemque , quod in creando Polonorum esse ; quin permissa Regi rerum omnium arbitria , omniumque vitæ , ac necis potestatem. Ab omnibus enim tam civitatum , quàm provinciarum Magistratibus , Judicibusque provocationem ad Regem esse , legumque eundem , & publici juris vnicum interpretem , & Senatum consulere , non præscribere Regi , neque ipsum stare , sed vti Senatorum sententiis , quò certius quid optimum factu sit , statuatur. Decreta , consultaque deliberari à Senatu , à Rege fieri. Hunc rectorem , moderatoremque Reipublicæ , illum monitorem esse. Denique Senatum testem vitæ , actorumque Regis , non arbitrum esse , & ei non iusto imperio in suos , sed

iniquâ dominatione , ac violentâ interdictum. Ad hæc neminem in Polonia honoris vllum titulum , quo à privato distingui possit , nisi beneficio Regis habere , ac ne copias quidem honoribus pares , neque enim illos , aut aliam , quàm Senatoris dignitatem nosse , aut Senatorium munus faciliè , nisi ex præfecturis , & Reginum bonorum procuratione tueri , neque hæreditario iure hæc à patribus transmitti filiis , sed vnico Regis munere dari. Igitur & legum arbitrium , & cum eo rem , famam , vitam omnium in Regis sitam manu esse , & honorum , & commodorum nullam cuiquam , nisi in eo spem. Atque his frenis faciliè Regem , quò velit , totam agere , continere , flectere , ac moderari Rempublicam. Publicam item pecuniam potestati ejus traditam , neque ad Senatum rationes , sed ad Regem à Quæstoribus referri : & Quæstores , & Senatores ipsum legere. Ergo summam in magistratibus mandandis , Senatoribusque legendis curam , cautionemque Regi adhibendam : suorum , id est , Catholicorum , qui maximè sui essent , optimos quosque provehendos , ornandosque magno studio , atque delectu , quo cæteri ad promerendam paribus artibus ejus gratiam excitarentur. Illud respuendum callidorum hominum consilium , qui hæreticos suaderent leniendos , præmissisque adjungendos sibi : id enim in nullam partem fidele , aut tutum consilium esse. Nam quod iis Rex tribuisset , dupliciter nociturum :

primò adversarios suos potentiores facturum , & in seipsum confirmaturum ; deinde persuasurum eis , idque illos jactanter præseclaturos , ipsum in eos non sponte , sed metu liberalem , ac munificum esse , qui enim conscius sibi sine animi alieni , infensique , ne ipsum quidem aliter in se animatum existimatu- rum. Atque hanc esse populorum de Rege opinionem , longè importunissimam , si beneficia metu , ac necessitate extorquenda , non fide , atque obsequio promerenda crediderint. Ad id illud quoque incommodum accessurum , quòd dum communes adversarios indulgentiâ , ac honoribus pellicere studebit , alienabit suos , qui debita sibi navata operæ , atque fidei præmia deferri ad alios æquo animo latu- ri non essent. Contemnenda illi , deridendaque hæc terricula monentium , si Catholicos vnos complectatur , vnis maximè utatur , periculum ab hæreticis ei fore : quod periculum ? aut à quibus , aut quo duce ? aut quibus viribus ? quin si omnes intelligent , cum Rempubicam non nisi Catholicis commissurum , ipsi quoque hæretici Catho- lici fient , ac si se ipse indicarit , & honores , præmiâque bonorum , & dicto audientium , non seditiosorum , & contumacium fore declaraverit , brevi hos spiritus , quos Augusti negligentia priùs , deinde corrupta mens ahuit , fractos , submitten- » tesque se visurum. Hic vnus Gallorum : At tu , » inquit , hostili esse animo Regem in omnes hære- » ticos vis ! eosque tuâ sententiâ exigis Regiâ , ac torâ



totâ Republicâ expellis , quod nisi bello , & armis fieri non videtur posse ? Ego verò , inquam , nihil hostiliter censeo in eos consulendum ; neque enim vi , atque armis est opus , vbi idem lege , atque disciplinâ assequi possis , ac ne abigi quidem Regiâ quemquam volo : hoc sentio , hæreticos comiter a Rege esse habendos , atque exploratâ spe non solum gratiæ , sed quæ gratiam sequuntur , si perniciosos errores , & sectas , quibus Respublica scinditur , & infirmatur , abjecerint ; sin pertinaces esse , & in suscepta pravitate perstare voluerint , tum jaceant , & hanc salutem pœnam ferant , vt desertæ Catholicæ pietatis culpam honori sibi fore non sperent : atque hoc lenissimum , & maximè præsens hujus mali remedium esse , & in manu situm Regis. At cum omnes magistratus , honorésque melioribus , probatoribûsque mandandos , nec in Senatum , nisi spectatæ fidei viros legendos , tum summam curam , delectûmque in Episcopis Regi esse adhibendum , in quo pariter & populorum , & ipsius ageretur salus : hos enim Senatûs & dignitate , & auctoritate Principes esse : hos provincialium conventuum , & omnis publici consilii præsides : hos sacrorum , ac religionis Antistites : hos denique patres , pastoresque omnium esse , vt improbum Episcopum designare Rex non possit , ( quando deligendi eos jus usurpatione superiorum Regum ad ipsum reciderit ) quin se gravî crimine , noxâque Deo obstringat : & malos

D d d

Episcopos graves sæpè adversarios experiturum : bonis semper obsequentibus, semper sui, ac Reipublicæ studiosis vlturum. Per hos in Senatu, per hos in provinciis omnia, quæ velit, quæque vtilia Reipublicæ sint perfecturum : in summa, maximum ad omnia momentum ipsi in Episcopis fore, eoque plus curæ, studiique in iis cooptandis adhibendum esse. At cum hoc studiosè curandum, tum non negligendum illud esse. Ab singulis præfecturis, in quas est omne divisum Poloniae Regnum, Legatos ex equestri ordine ad publica concilia mitti solere, ( terrestres nuncios ipsorum linguâ appellari ) & ab Equitibus ( plebem enim servorum loco habitam in nullam Reipublicæ partem admittunt ) cujusque præfecturæ hujus rei causâ coactis creari vnum, aut plures, ut visum mittentibus fuerit, & antea quidem hos ad id modò mitti solitos, ut consulta Senatus acciperent ; & ad suos quisque renunciaret, ne qua pars Regni, quæ publicè decreta essent, ignoraret. Sub Augusto Rege tantam auctoritatem assumpsisse sibi, ut cuncta pænè sub arbitrium, ditionemque suam contraxerint, simillimique evaserint Tribunis plebis veteris Romanæ Reipublicæ, quorum potestas regendis ab injuria potentiorum civibus inventa, turbandæ, vexandæque civitati plerumque fuit. Eamdem enim viam ingressos terrestres nuncios, & præscribere Senatui, quæ decernenda sint, & decretis intercedere audere, & turbulenta inde confi-

lia sæpè prodire ; & inter hos plurimùm hæreticos audaciâ , ac seditiosis orationibus valere. Horum minuendam paulatim auctoritatem , cohibendâque licentiam Regi esse , ac in præsentia dandam operam , vt Catholici , & sui , & Reipublicæ cupidi , non turbulenti , ac novarum rerum machinatores ad concilia mitterentur ; quod vt fieret , excitandos , ac beneficiis invitandos Catholicos , ne id ipsi munus refugiant , nec vitandi causâ turbas , & contentiones cum hæreticis , domi se contineant , & publicos provinciarum conventus obire negligant ; sic enim fieri , vt Rempublicam à melioribus desertam hæretici invadant , & sapientium munera audaces præripiant. Quòd si ipse Catholicos monuerit , ne se , operamque suam inerti , aut certè indecoro orii studio subtrahant Reipublicæ , & navos inde , industriâque honoribus , ac præmiis illexerit , brevè totam in Catholicorum manus rem Polonam venturam , brevè hunc novarum opinionum amorem restinctum iri , & omnes suâ sponte obsolescentes hæreses brevè interituras , cunctâque inde auctoritati , ac nutui ejus paritura. Sed enim ita secum statuere cum debere taleni Senatui habiturum , qualem ipse fecerit , non legendo solum eum , sed exemplum ex moribus suis præbendo , neque Senatui solum , sed universam Nobilitatem ad ipsius se similitudinem , morèque formaturum ; vnos enim ex omnibus gentibus maximè Regum suorum imitatores Polonos esse. Duarum igitur

D d d ij

rerum specimina statim in ipso eluceant; primò  
 pium se, metuentémque Dei, & in Catholicæ  
 religionis cultu, divinisque ceremoniis diligen-  
 tem, observantémque præster, quâ vnâ re tan-  
 tùm ad sanandas, & ad Ecclesiæ auctoritatem  
 revocandas hæreticorum mentes profecturum se  
 speret, quantùm multi simul Doctores, & sacra-  
 rum litterarum scientiâ, & dicendi facultate ex-  
 cellentes effecturi non essent: deinde bellicarum  
 rerum studiis deditum animum præferat: de his  
 differentes & libenter audiat, & vltro sermones  
 provocet, juventutem in militaribus exercitati-  
 onibus assiduè habeat, decurrentes in equis, aliâ-  
 que militiæ simulacra edentes, quibus gens suâ  
 pte naturâ dedita, vel sub negligente talium re-  
 rum Rege exerceri est solita, & spectet libenter,  
 & edoceat, in morémque patrium aliquid insti-  
 tuat, & ipse talibus ludis, quod ejus & ferre,  
 & postulare ætas videretur, sæpè & intersit, &  
 præsit. Mirum quantum hæ parvæ res, & gratiæ  
 illi, & auctoritatis apud vniversam gentem fa-  
 cturæ sint; mirum quantum & in restituenda re-  
 ligione, & in revocanda militiæ disciplina vali-  
 turæ. Adjeci inde ex consilio Commendoni, vt  
 primo quoque tempore belli adversum Moscos  
 æternos Polonorum hostes, & exercendæ, con-  
 tinendæque in militari disciplina genti natos,  
 gerendi cogitationem susciperet: ad multa id a-  
 ptum consilium videri; primùm enim Imperia,  
 & Regna nullam rem æquè tueri, ac Regum

ipforum nomen, atque famam, maximè si bello parta fuerit. Deinde Regi novo longinquo, alienigenæ, genere, ætate, expectatione florenti, quæ res alia Regnum confirmet, nisi quæ peperit? Quam commendationem sui præsentis appetat aliam, nisi per quam absenti Regnum conciliatum sit? Bellum initio Regni susceptum non ad opinionem modò hominum gloriosum, sed muniendis domi rebus propè necessarium à peritis præsentis rerum Status Poloniæ duci, ut si quies, & pax teneat, nulla satis efficacia remedia sint, quibus sanari, ac stabiliri Regnum posse videatur. si enim illæ gentes diutiùs in eo otio, luxûque, quo marcescerent, relinquerentur, alterutrum sequi necesse fore, ut aut intestino morbo contabescerent, aut externâ aliquâ vi conciderent. Bellum omnia hæc turbulenta consilia, quibus crescere ex commota, atque inquieta Republica, quidam volunt, concocturum, discussurumque, idem erudita illa pocula, inter quæ de divinis rebus quærent, differunt, statuunt, exhausturum, ipsâsque hæresum radices, quas otio naras, licentia, intemperantia, luxus, convivia aluere, disciplinâ, atque bello excisas, funditurque extirparas iri. Id suam Reipublicæ formam, id pristinam legum, Magistratuum, Regis reverentiam pravâ consuetudine delapsam redditurum, id propagando imperio viam aperiturum; id verendam majestatem nominis sui Polonis simul, ac finitimis Regibus populisque facturum; id denique

Ddd iij

expeti vulgò poscique ab omnibus, præter eosdem illos quibus seditiosæ domi conciones, conciliâque honori, atque emolumento sint. Huic communi studio lætantium nactos se aliquando Regem, quo duce superiorum annorum incommoda Augusti ignaviâ accepta vlciscantur; nisi  
 » respondisset Rex, verendum esse, ut satis gloriæ  
 » partum in Gallia foret; si enim se iis conciliorum  
 » fluctibus, quæ alia ex aliis nascuntur, committat,  
 » si illis laqueis irretiri, ac circumveniri se patiatur;  
 » hæsurum implicatiorem, quàm ut faciliè inde se  
 » vniquam expedire, atque extricare possit. Materiam autem belli, causamque nec defuturam, & de  
 » eventu, nisi res oscitanter administrarentur, dubitandum non esse, quippe rem cum hoste viris, armis,  
 » arte militiæ longè impari fore. Hoc postea consilio usus Stephanus Rex, qui Henrico successit totâ Livoniâ expulsiis Moscis, pacatâque pernobili provinciâ, magnum nomen suum per omnem Europam fecit, atque homo novus, nec privatâ solum, sed etiam tenui fortunâ ortus, Polonos severiori imperio, quàm si natus Rex eorum esset, plures inde annos rexit. Lætus hæc differentem audivit Henricus, sed nihil libentiùs, quàm & Commendonum aggrediendi belli auctorem esse sibi, & Regiam vim non vsque adedè constrictam hebetemque esse, ut inculcatum ei à quibusdam fuisset. Percunctatio inde Regis, amicorumque de singulis pænè Principibus fuit, in qua juvenis sensus enituit sanè egregius, qualis quisque es-

set, haud aliâ re magis, quàm religionis fide distinguentis, ac nihil prius quàm Catholicus, an hæreticus quisque esset, quærentis: & nos quidem cùm ingenium vniuscujusque morésque, tum quæ inter ipsos conjunctiones, atque vnde unitæ, quæ item similitudines, quæ inimicitie, quibus ex causis; qui verum studium Regi in comitiis præstitissent, qui adversati palàm fuissent, quorum probata fides, quorum suspecta fraus esset, qui statim admovendi rebus, qui spe alendi, qui denique cavendi, quisque amplectendi viderentur, abunde disseruimus. Atque hæc nosse Regi admodum jucundum fuit, ut scripto comprehensa tradi utique sibi voluerit; nec destitit inde, ut quidquid in deliberationem venisset, à nobis quid sententiæ haberemus, exquirere.

*De adventu Regis, ac de diademate illi  
imposito, ac de fuga ejusdem.*

## CAPUT XII.

**T**RIGESIMO inde die Cracoviam est ventum ad primos Regni fines Francofordium inter, & Mieseriziam Cujaviensis Episcopus, & decem cum eo Principes à Senatu legati, advenientem acceperunt Regem frequenti, ac splendido comitatu agmine: multi enim Nobiles Poloni, alii privatim officium in Regem occupantes,

alii Legatos secuti, cum delectis quisque equitum turmis aderant. Conspecto Rege equitatus flexit ad dexteram, omnesque collium clivos, quantum patebat conspectus, & erant ad quindecim millia equitum, extensis longo ordine alis occupavere. In sinistra Germani constitere, tria millia equitum erant, Regem honoris, ac praesidii causâ profecuti, ac redituri domum perrexere, & ipsi intra suos fines aciem struxere, ostentaveréque Regi. Utrosque spectantibus nihil simile videbatur: Germanis graves equi, & in sua terra nati, ac fere nigri, nigrae ocreae, nigra vestis, brevissimae, & uniusmodi: ipsi item vultus nigri, & incultâ, ac promissa barbâ truces: unde eorum linguâ *Suarxreitri* dicuntur: arma quoque eadem omnibus, oblongus gladius, ac bini equorum ephippio pendentes sclopi, & quidem praeter hæc ferreum malleum eodem ephippio suspenderant. Apud Polonos cuncta variabant, non equi, non cultus, non armatus idem, equis ipsis nec color, nec genus vnum, & quamquam equorum nulla feracior terra, tamen tanto eorum studio gens tenetur, ut è Thracia, ex Italia adducti, ac magno comparati pretio multi viserentur, quibus nobiliores Equites infidebant, aut sine sessore in pompam loris ab agasombus ducebantur. Ornatus quoque multiplex, aliis patrius, aliis Ungaricus, aliis Scythicus, permultis Italicus, quibusdam & Gallicus: tanta genti inest libido exteros imitandi: eadem in armis dissimilitudo, his Scytharum



tharum pharetra, & arcus, & acinaces; illis Epirotica hasta, & longum, & in alæ modum scutum; alteri lorica, & galea; paucis graviora arma; ut enim variâ, ita levi omnes, & expeditâ ad cursum, agitationemque equorum armaturâ lætantur. Ne in corporis quidem cultu similes erant; quidam capite tonso, quidam raso; capillati alii, brevis aliis coma; promissa his barba, illis præter superius labrum penitus abrasa: cunctis ad eum ferè habitum sese affingentibus, quem in suos quisque fines attingentibus populis conspexissent. Sed hæc ipsa varietas hanc in cærulea veste turmam, illam in viridi, aliam in rubra, omnes variarum ferarum pellibus, & serico, & auro splendentes, totamque versicolore aciem procul spectantium oculos quâdam admiratione tenebat. Et Henricus illo aspectu militarium virorum, atque illo omni in honorem sui apparatu, & mixto tubarum cantu, ingentibus, lætisque clamoribus, quibus latè cuncta personabant, venerantium, ac veluti amplectentium advenientem Regem suum, adeò est delectatus, ut tum demum Regem se sibi visum esse fateretur. Cujavienſis Episcopus, cæterique Legati coronâ nobilium juvenum circumdati viso Rege omnes equis descenderunt, & ipse conspectis iis propius accedens exilivit equo, summittenrésque se ad genua, patre Episcopo appellato, perhumaniter singulos est amplexus. Hinc habitis mutæ gratulationis orationibus, datâque iis, qui adire volue-

E c c

¶ Tunt, dexterâ, repetitis equis, ac Germanis cum donis domum dimissis, ire perrectum est, ad eò lætis aspectu, oratione, comitate novi Regis omnibus, ut secunda illi, faustaque non sonu vocis, plausuque magis, quàm animis, & votis precarentur. Incessit inde per confertas multitudinem vias, offusis undique ex urbibus, agrisque virorum, mulierumque agminibus, passimque Nobilibus cum instructis equitum turmis occurrentibus, & Cracoviam sub finem Februarii pervenit. Atque hîc biduo post, nequicquam variâ arte rem impredientibus hæreticis, qui per speciem muniendæ libertatis, novas ei imponere leges, & Regiam vim novis arcere, constringeréque vinculis cupiebant, diadema Regi solemni ritu ab Archiepiscopo Gnesnensi est traditum; neque enim verè Rex quisquam, nisi illo accepto insigni, legibus eorum habetur. Tum de præmiis pro cuiusque merito dandis, & quæ tum præfecturæ, aut loca in Senatu vacua morte Senatorum essent, supplendis, aliisque publicis muneribus distribuendis agi est cœptum. Etenim eo biennio, quod propè ab excessu Augusti ad adventum ejus intercesserat, multi suo functi fato facultatis aliquantum remunerandi, quibus maximè delati Regni gratiam habebat, reliquerunt. Et ille quidem largè, ac munificè omnia est dilargitus. Sed cum hominum cupiditati, ac spei Respublica nihil sufficeret, & quæ dari poterant longè petentium, & pro debitis poscentium numerus supe-

raret, præter præsentis pecuniæ magnam vim, etiam de privatis suis vectigalibus Gallicis annua stipendia constituere permultis est coactus, ut hæreticorum quoque, & eorum, qui dignitati, ac Regno illius adversati fuerant, plerique ab facili, & neminem liberalitatis suæ expertem dimittere cupiente multa abstulerint. Nec tamen assequi ut cujusquam expleret spem potuit, etiam qui magna acceperunt, majora deberi sibi, ut de se quisque amplè, ac prolixè judicat, prædicantibus. Audire tum fuit graves, acerbâsque voces querentium gratiam sibi pro merito non redditam, & suis præmiis adversarios suos inflatos cerni indignantium. Et qui modò manus ad cælum tendentes gratias Deo agebant, quòd creandi eum Regem mentem Polonis dedisset, ipsùmque haud secus, quàm divinitus datum sibi, studiis, laudibusque ferentes colebant, & gloriabantur nullâ privatim spe, sed unicâ Reipublicæ charitate juvenem florentem annis, vetustâ Regum stirpe, Regiis ipsum animis, ex longè gentium dissita terra ad Regnum accersivisse; tum veluti alii repente homines facti, seque, suumque infelix studium, & data suffragia execrabantur: adeò rem publicam verbis jactamus, re fructui esse eam nobis omnes volumus. Sed ubi nihil ampliùs, quod donaret, superfuit Regi, & eum provectum studio bonitatis, ac beneficentiæ sua quoque dilargitum, magnùmque alienum æs contractum constitit, damnatis querelis suis ad novam gratiam

Ecc ij

per obsequia, & cultum Regis promerendam, & priores spes novis officiis tuendas pro se quisque animum convertit. Jam Rex dimisso concilio, quod ad diadema ei imponendum frequentissimum Cracoviam convenerat, cum iis Senatoribus, qui huic consilio maximè visi sunt idonei, de bello inferendo Moscoviæ deliberabat, videbaturque Regni sui fundamenta bene, ac firmiter posuisse, cum repente properi è Gallia nuncii alii super alios attulere, Carolum Regem tabe consumptum diem suum obiisse, & Alansonium minorem fratrem, Rege Navarræ, hæreticisque impulsoribus, res novas moliri, ægréque à matre coerceri, quæ custodibus cum firmo præsidio militum appositis utrumque apud se veluti captos asservaret: sed rem maturum reditum ejus exproscere, neque sicunctetur, aut impediatur, credi motum Galliæ sustineri diu posse; matrísque omnes literæ filium obtestabantur, ut posthabitis omnibus rebus, quâcumque ratione posset, celeriter se Poloniâ explicaret; ipsâ enim suspitione non futurum in potestate sua discessum, magnopere spem, cupiditatémque incitari Ugonotorum, & vehementer ab iis fratrem ad capeSSendam fortunam, quæ offerretur, vacuum invadendi Regnum sollicitari. Confusus re subitâ Rex noctu cum paucis Gallis, quos fidelissimos habebat, summotis aliis, quid facto opus sit consultat; & cum pro nihilo jam Poloniæ Regnum duceret, nec discessui, ac celeritati quid prævertendum

censeret, ex eorum sententia nocturnæ fugæ con-  
 silium cepit. Posteriâ die avertendæ suspitioni  
 adeuntes, solantésque luctum suum Polonos be-  
 nignè affatur, rediisse ad se jure hereditario Re-  
 gnum Galliæ, eoque statu res ibi esse, vt præsen-  
 tem se magnopere desiderent; ad eas consti-  
 tuendas currendum sibi necessariò in Galliam  
 esse: sed ita meritos de se, ac de nomine  
 suo Polonos esse, vt eos charitate æquare patriæ  
 suæ deberet, nec minorem sibi ejus, ad quod ac-  
 citus, quàm in quo natus Rex esset, curam Re-  
 gni habendam; eos ergo se, quæ ratio regendæ  
 Reipublicæ, dum ipse abfuerit, statuenda sit,  
 consulere. Qui eum creandi Regem auctores fue-  
 rant, summâsque de eo spes ceperant, mœren-  
 tes, attonitísque similes stabant; cæteri pro cu-  
 jusque habitu animi sententias variabant. Omnes  
 respondere, statui de re tanta, nisi in concilio  
 gentis nihil posse; dimittendos extemplò per  
 Provincias, qui conventum Cracoviam indice-  
 rent. Et Rex quidem ita fieri jussit. Nocte infe-  
 quenti claudi Regia cubicula, ac manè admitti  
 neminem; siqui adire velint, ægritudine, ac lu-  
 ctu fessum Regem quietem capere respondere  
 janitores Galli jubentur. Ipse cum deceni admo-  
 dùm comitibus, quo noctis tempore altior om-  
 nes somnus habet, posticâ Regiæ parte egressus  
 præparatos equos conscendit; & vbi excessere  
 vrbe, quantum ire equi poterant calcaribus  
 subditis, rapiunt iter. Pernox luna erat, & fortè  
 E e e iij .

puer in area Regiæ tranſeuntem agnoverat Regem, dominóque narraverat. Is primò dicta pueri eſt aſpernatus; ſed ubi iterare juſſo ſigna, quibus agnitum ſibi aiebat Regem, fides affirmanti fuit, metuens ne ipſe contra Rem publicam feciſſe argui poſſet, ſi rem tantam Senatores celaiſſet, vel vanæ rei auctorem eſſe, quàm veram non indicaiſſe tutius ratus, ſub lucem Tencinii comitem Principum vnum adiit. Ille domo egreſſus rem cum aliquot Senatoribus communicat: nulli quicquam credi, aut agi temerè placuit; Tencinium ipſum pergere in Regiam, & rem explorare jubent. ( & erat fortè ille cubiculo Regis præpoſitus, quamquam ei muneri exercendo nondum adhibitus ) Otto jam ſole & ipſe Regiam intravit, & totam peruaſit urbem rumor conſciſſe fugam Regem, & concurſus in Regiam cœprus eſt fieri. Janitores excitati à Tencinio, quæ præcepta erant ſibi de claudendis foribus, ne quis quieſcentem turbaret Regem, edixere. Tum haud dubia res viſa, & Tencinius Regis cubiculum irrupit, nec aliud in eo, quàm binas ſuper menſa litteras, ad Senatum alteram, alteram ad Cujavienſem Episcopum ſcriptas invenit, quibus cauſam conſilii ſui Rex reddebat, negans aliter vtriuſque Regni rationibus conſuli potuiſſe. Tum re vulgata diſcurſus per urbem, ac trepidatio ingens fuit, & pro ſe quiſque arreptis equis, fugientem perſequi Regem Poloni, vt retinerent, Galli, vt ſequerentur. Sed ille ſpatium nactus multum

antecefferat viæ, nec eum antè adeptus est quisquam, quàm extra Poloniæ fines in Slesiam evassisset; nam Cracovia paulò plus vnius dici itinere ab iis finibus abest. Polonos suppliciter ut maneret deprecantes redire Cracoviam, ac renunciare Senatui iussit, se nisi summis patriæ necessitatibus ad id consilium non descendisse, sed brevè constitutis Galliæ rebus in Poloniam rediturum, ac benignè omnes appellatos, stentes plerosque, ac suam fortunam incusantes dimisit. Poloni in priores revoluti difficultates, cùm stare diu Rempublicam eorum non posse sine Rege sentirent, legatione ad eum in Galliam missâ, renunciatâque, vbi reditum ejus desperarunt, habitis iterum comitiis, sed nequaquam concordia pari peractis, duos Reges crearunt. Pars maxima Senatûs litteris, legationibus, donis conciliata Maximilianum Cæsarem, Nobilitas reliqua Stephanum Bathoræum Transsylvaniæ Principem Regem dixit. Is cunctantem Cæsarem, & tantùm vanas spes sui ostendantem consilio, ac celeritate antevertit, & Poloni eum vel modico popularium præsidio Poloniam ingressum, relicto Cæsare, quem nihil ausurum sperabant, Regem omnes acceperunt. Henricus Gallis, quos Cracoviæ reliquerat, se subinde assequentibus, & ipsis quoque Regulis, quorum per agrum iter habebat, sese officii caulâ associantibus, haud indecorum jam Regi agmen trahens, Viennam petebat ad eò contento cur-

fu, seu cura Galliæ vrgeret, seu spatium de se hostiliter quicquam consulendi Germanis præripiens, vt ad Maximilianum simul & excessisse Poloniâ, & appropinquare Viennam cum allatum sit. Lætè vtrumque Maximilianus audivit, ac ausos è suis quosdam suadere, æmulum familiæ, Regnîque comprehendendum, custodiendumque, nec antè dimittendum, quàm Poloniæ, Galliæque res arbitrio suo constituisset, non repulit modò violandi communem gentium fidem, & fœderum, & hospitii jura fallendi auctores, sed acribus verbis castigatos etiam impudentiæ redarguit, abeunti in Galliam, Poloniâque relinquenti Henrico vel 'aureos pontes faciendos esse ferens. Itaque missis extemplò, qui Rodolphum, & Ernestum majores natu filiorum ex Ungaria accirent, ipse curru vectus ( erat enim pedibus æger ) obviàm Henrico processit, eumque transmittentem Danubium in citeriori ripa opperiens accepit tantâ comitate, vt contentio Regum alterius alterum præferre sibi honore cupientium fuerit. Et Maximiliano quidem in obeundis omnibus humanitatis officiis mira inerat dexteritas, mira in omni sermone comitas. Cultus ergo splendide, ac liberaliter ab eo Henricus per Styriam, Carinthiâque in Forum-Julii, atque in Italiam magnis itineribus transcendit, nec antè de instituto cursu remisit, quàm Venetias venit. Hîc, concurrentibus vndique ad eum Italiæ Regulis, legationibûsque, aliquot substitit dies,



dies, tantis à civitate omnis benignitatis, atque munificentiz cultrice honoribus, tantisque omnium ordinum studiis acceptus, habitusque, ut cum nullum neque in ipsum venerationis, & obsequii, neque in comites ejus humanitatis, atque hospitii prætermitteretur genus, unius humani, & comis amici, atque hospitis animum induisse univèrsa illa civitas videri potuerit; atque hinc profectus Henricus in Galliam est reversus.

---

*De eodem Commendono.*

### CAPUT XIII.

**S**ED ut & ipsi aliquando revertamur, unde nos Poloniz res abstulerunt, de Commendoni fide, ac sapientia tanta apud hunc Regem opinio fuit, & fama, quæ de illo in Galliam pervaserat, accepta, & Polonorum prædicatione confirmata, ut neque nomen ejus, nisi magno cum honore usurparet unquam, & omnia sibi Regnum intranti, accipientique è sententia evenisse memorans, unum exciperet Commendoni è Polonia discessum; cujus studio eò provectus est, ut Pontificem Maximum per litteras rogare, ac summis contendere precibus non dubitaret, ut nomine legationis eum ad se in Poloniam remitteret, cujus operam, & consilium univèrso regimini rerum adhiberet. Et mecum de eadem

F ff

re sæpè agens, nomine Legatum, re participem, & moderatorem rerum omnium futurum apud se, & parentis majestatem, sanctitatémque obtenturum aiebat, nec se in Republica quicquam, nisi ex consilio, & auctoritate ejus acturum, nec alium, si proficiscendum sibi ad Moscicum bellum, quod meditaretur, foret, regendo pro se Regno in Polonia relicturum. Atque hæc postulatio, & cogitatio de se Regis Commendono quidem, ut erat, honesta, ac decora nomini suo est visa: sed sicuti ab tam remoto Rege Regni, ac rerum moderatorem expeti amplum, ac magnificum videbatur; ita ad experiendum ancipitem, ac minimè optabilem rem esse ipse aiebat, haud ignarus quantis se invidiæ æstibus esset commissurus, si homo externus in alieno Regno tantum simul gratiæ, ac potentiæ onus subiisset. Itaque & ipse apud Gregorium Pontificem rem variè distulit, & mors inde Caroli Regis, & reditus in Galliam Henrici penitus discussit. Atque hic finis Commendono per claras actiones, legationesque splendendi fuit. Reliquum vitæ obscurius orium, & dempra ingenio materia fecit. Et Gregorius Pontifex etsi advenientem palàm benignè, & honorâ oratione suscepit; tamen & inferri ei ab Alexandro Farnesio Cardinali, homine potentissimo, litem est passus, cum prohibere & posset, & videretur debere: & Maximiliano Cæsare querente cum in petitione Regni Poloniae Henrico prioniorem, quàm filio suo fuisse,

& in magnam ob id apud plerosque factionis ejusdem invidiam conjectum destituit; seu subire ipse malam cum Maximiliano gratiam noluit, seu labefactato ejus animo ab iis, qui Commendoni dignitati invidentes, apud Gregorium artium regendæ Reipublicæ ut in novo principatu non peritissimum, illum quasi correctorem, obrectatoremque actorum ejus criminabantur. Sed utramque ipse injuriam magno animo tulit, & adversarium, à quo petitus lite fuerat, constantissime sustinuit: & quod vnum de Republica ei restabat Senatorium munus gravitate morum, prudentiæ laude, atque usu maximarum rerum, & exterarum nationum notitiâ ita implebat, ut nemo eum in civitate aut opinione virtutis, aut famâ vitæ perhonestâ, ac decora actâ anteiret; nullius sententia, sive in privatis Cardinalium cœtibus, cum de mandatis à Pontifice rebus consultaretur, sive in Senatu gravior, liberiôrque haberetur. Et quibus rebus diminuturos se quidam dignitatem ejus, validum ei adversarium excitando, sperarunt, iisdem, quod sæpè fit, auxerunt, clarisque, ac fidelibus amicitiiis munierunt. Nam duo nobilissimi, & in Senatu longè cæteros claritudine, atque opibus suis, suorumque eminentes viri, Aloysius Estius Ferrariensis, & Ferdinandus Medices Florentinus Cardinales, quorum fratres in sua quisque civitate Regnum obtinebant, æmulatione potentiæ à Farnesio dissidentes, ita se junxerunt Commendono, ut de eo Pontifice

Fff ij

Maximo creando consenserint, ad stipulatoresque consilii sui Alexandrum Sfortiam, & Flavium Ursinum, & Marcum Altempsium Cardinales, quorum magnæ erant in Senatu opes, haberent. Et Estius quidem, qui Regiâ liberalitate, ac Regio vitæ cultu, & blandis, & ad insinuandum se in hominum animos compositis moribus maximè & civitatem omnem, & Patrum partem maximam devinctam sibi officiis, beneficiisque habebat, cum sponte suâ, & præcipuo erga Commendonum studio, tum Henrici Galliæ Regis jussu (erat enim Estius Gallicæ factionis Romæ princeps) in id consilium penitus incubuerat. Et cum ægrotare aliquando Gregorium, & inde periculose laborare emanasset, ita eodem circumcunte, & summâ opè adnitante Estio rem composuerant, ut si concessisset tum fato Gregorius, non dubitaretur, quin eum Pontificem Maximum renunciaturi fuerint. Sed & Gregorius convaleuit, & Commendonum paucos post annos morbus oppressit, de quo antequam dicamus, pauca de quibusdam moribus ejus differere operæpretium fuerit.



*De quibusdam moribus ejus.*

CAPUT XIV.

**V**ITÆ, ac morum gravitatem à puero susceptam, atque adeo insitam ingenio ejus perpetuò retinuit: imbecillâ adhuc ætate neque cum æqualibus ludere, neque puerilia facere unquam sultinuit. Adultior non conviviis, non spectaculis, aut ullis juvenilibus studiis deditus, majoribus natu, atque his probatoribus applicare sese in more habuit. Vir & risûs, & joci parvus, salibus, & aculeis promptior, maximè ironiis, quibus jucundè exagitare familiares, & interdum figere irritantes solebat; in quo vel intemperans interdum est visus, dum parato, ac celeri ad respondendum ingenio parum moderatur, ut sæpè multos acumine dictorum perstrictos acrius offenderit, ab seque alienaverit. Humanitatis, & mansuetudinis laudem magis meruit, quàm tulit: nam sicuti inexpertis æquo plus gravis, ac severus videbatur, ita tractantibus commodus, affabilisque fuit, & in eo, ne quod humanitatis officium, quod ulli deberi videretur, prætermitteret, diligens, ac propè nimius. In sacrorum disciplina, atque institutis Christianæ religionis pietatem diligenter, ac studiosè, non purè solùm, & castè coluit. Rem di-

Fff iij

vinam & frequenter, & summa cum religione, ac ceremonia faciebat, & à suis pro domestica disciplina inviolatè exigebat, ut sæpius per annum confessione delictorum, pœnitentiâque expiati divinam fumerent hostiam, quam ipse singulis suis manibus peracto sacro porrigebat: iisdem ægotantibus ipse afferebat; omnesque sumptus, omniâque Christianæ charitatis officia præstabat. Sed qui innocentiam morum, & totius vitæ sanctitatem propè singularem per omnem ætatem præstitit; quique divinarum rerum studiis deditos, piissque, & religiosis juvenes institutis peramanter amplecteretur, usu, benevolentia, obsequio tueretur; nec ullam in hominum vita laudem honestati, ac pudori anteferebat: idem respuebat ostentatores quosdam pietatis, qui specie rei, quàm ipsâ re magis delectati, opinionem modò hominum, existimationemque venantur, & videri, quàm esse pii, probisque malunt; & hoc artificio, ac simulatione religionis, ac modestiæ, cujus imaginem ore tantum, atque habitu exprimere conantur, ad opes sese, atque honores callidè sæpè insinuant, quibus in ipsis ita se gerunt, ut rei maximè augendæ intendunt, sumptibusque, ac splendidiori cultui, non modestiâ, sed cupiditate parcant, & sordes animi, atque avaritiam falsis frugalitatis, & parsimoniæ vocabulis tegant; & plerumque tenaces, ac restricti moderatos se, ac paucis contentos ferri volunt. Hos ille & aspernabatur, & arguebat, religio-

nis laudem non fictis pietatis studiis, nec inani ostentatione sanctitatis, sed mentem Deo puram, castam, piam præbendo, & externæ ceremoniæ, externo cultui, externis actibus habitum animi æquando haberi ferens. Volupratum omnium ultra fidem abstinentissimum ne malevoli quidem, & obrectatores ejus negabant: ut id ipsum ei vitio verterent quidam, quod ne concessis quidem oblectamentis, veluti sensibus alienatus, reficeret animum, continentiam, & meliorum studia rerum stuporem, tristitiâque appellantes. Nos quod diuturno, & domestico vsu perspectum habemus, verè possumus de illo affirmare, siue hoc naturæ fuerit paulò austerioris, siue pertinax studium suscepti instituti perpetuò retinendi; remittentem quidem animum, hilaréque, & jucundè cum amicis, & familiaribus suis jocantem, agentemque persæpè; ad vllum genus voluptatis, quod non modò turpitudinis, sed vel mollitiæ, vel levitatis suspensionem haberet, descendentem vidimus sanè numquam; ne ad ea quidem, quæ concessu ejus capere suis liceret. Verùm qui non aucupio, non venatu vllò vñquam tempore fuerit delectatus, obequitare sylvas, saltusque, altissimos conscendere montes, nullâ viarum asperitate retardante, atque omnes vbique captare prospectus ad fastidium vsque comitantium solebat, à quibus laboris rædio sæpè relictus, neque ferebat ægrè, & porrò pergebat nihilominus, quò lustrandi cuncta studium rapuisset. Gaude-

bat etiam, si quando agasones ipsos, ac servos à pedibus ipse anteiens fatigasset; atque huic generi voluptatis per omnem ætatem intemperanter indulgit. Naturâ ad iram pronus, ac si frænum laxasset, præceps fuit; sed ejus laudem haud postrema hæc fuerit, quòd impetum animi effervescentis ita comprimere, ac domare assueverat, ut, quod paucis contigit, iram in potestate haberet. Inimicitias, ac similitates, quamvis laceffitus, ac læsus, sustinuit magis, quàm exercuit; collegas in publicis muneribus, legationibusque clam invidentes, atque obrectantes sibi vitro laudibus apud Pontifices Maximos, ac testimoniis prosequeretur; eaque moderatione sapè communis industriz gratiam solus tulit. Asperior adversantibus, pervicaciôrque est habitus: nam contra voluntatem ejus acrius tendendo vel ad iniqua pepulisses potius, quàm per vim ab invito, ac repugnante nejus quidem extorqueres, inque eo non ratio, non utilitas, non auctoritas, non respectus cujusquam valuisset; unde parvas ob res, & quas ipse aliòquin stoccificisset, gravia certamina, & in quibus de summis rebus periclitaretur, aliquando subivit. Idem cedentibus adeo facilis, placabilisque, ut vel vitro plurimum de suo jure, si prece aggredieris, remitteret.



*De constantia ejus adversus potentiores.*

CAPUT XV.

**Q**UO tempore Germaniam Episcopus obiit, ut eam gentem ad Concilium exciret, diverſante eo apud Joachimum Brandenburgium, vnum è Germaniæ ſeptemviris, qui Cæſarem eligunt, magiſtri ſacrorum ex Lutheri diſciplina, in quam ipſe traductus ab iis Regulus erat, cœnantibus ex conſuetudine adſtabant, ſeu juſſi ut ſermones de divinis rebus ſererent, ſeu ſponte, ne quid Joachimi animum Commendonì oratio permo- veret. Horum vnus, nomine Abdias, ex uſu aliquot jam dierum audacior factus (& eſt omne illud genus mirè confidens) effutierat temerè quædam de Romana Eccleſia, eamque adverſam ſemper, inſenſamque Germanis fuiſſe, gravibuſque incommodis gentem affeciſſe memorabat. Tum enimverò Commendonus, quamquam in hæretici Principis domo; in hæreticorùmque po- teſtate eſſet, tamen hominem ſeverè increpuit, nec petulantiam modò ejus caſtigando retudit; ſed multis repetitis ex annalium memoria bene- ficiis, quibus auctam, ornatamque Germaniam à Pontificibus Maximis oſtendit, poſtremò verſus ad Regulum ipſum; Quid multa, inquit, quòd « familia tua, ac tu ipſe ſeptemvirali illo honore «

Ggg

» inter cæteros Principes Germaniæ emineas, an  
 » alteri, quàm Romanæ Ecclesiæ referre acceptum  
 » debes? Commotus eâ oratione Joachimus, vt erat  
 » vir perhumanus, ac mitis, consurgens, ac detra-  
 » cto pileo caput aperiens, qui maximè veneran-  
 » tium mos est, Id quidem, inquit, ego & fateor,  
 » & præ me fero, maneréque apud me, filios, poste-  
 » rorúque meos memoriam hujus beneficii, hono-  
 » risque familiæ nostræ haberi sempiternam cupio:  
 » & conversus ad Lutheranum illum Germanicè,  
 » Hic te, inquit, egregiè, & sanè jure, vt mihi  
 » quidem videtur, corripuit; nam hospites ne in-  
 » clementiori quidem verbo violare decet. Sed an  
 » vides animi vim nihil pro sua ratione, ac pro di-  
 » gnitate Romanæ Ecclesiæ formidantis? quid pu-  
 » tas facturum, si dicere ista Romæ ausus esses, qui  
 » ne in nostro quidem Regno, domoque dici im-  
 » punè patiatur? Iter ad Maximilianum Cæsarem  
 » Pii V. missu habens, Oenipontem cùm advenisset,  
 » Ferdinandus Cæsaris frater, cujus imperio qui  
 » Rhetias Alpes incolunt, populi parent, sive occu-  
 » patus hospitum aliorum adventu; nam aliqui tum  
 » forè apud eum Reguli Germanorum erant, læta  
 » pro more gentis convivia celebrantes, sive per in-  
 » curiam, non obviàm itione, non hospitii, non de-  
 » nique vllius officii honore, quod & mos, & di-  
 » gnitas ejus postulabat, aut advenientem affecit,  
 » aut abeuntem est profecurus. Post paucos inde  
 » menses actâ, vt docuimus, legatione rediens  
 » Viennâ in Italiam, cùm flectere aliò, aut decli-

nare Onipontem nequireret, quamquam Ferdinandum intellexerat correcturum, quæ prius prætermiserat; tamen ad oppidum manè summo, antequam lucefceret, cum sequenti die venturus putaretur, accessit, transgressusque milliare vnum ad monasterium quoddam divertit. Presto fuere à Regulo missi, qui hospitaliter in Regiam invitarent, excusarentque inopinato adventu ejus factum, ut honor illi, qui deberetur, advenienti habitus non fuerit. Commendonus suo se vsurum hospitio respondit, & pransum iter porro persecuturum, & gratias Ferdinando, & salutem ab se referre eos jussit. Veritus Ferdinandus, ne & inofficiosus in Pontificem Maximum, & alienior à viro commendatione virtutum imprimis claro haberetur, & qui se ab elato animo cuius Regum honore, atque amplitudine æquari veller, ne agrestis atque illiberalis notam subiret, si nullo cultum officio, ac ne visum quidem virum talem abire pateretur; ipse consensit equis magno comitatu in monasterium ad Commendonum venit, fuitque plures cum illo horas, atque humanitate animum permulcere est conatus. Tum demum certavit officiis cum eo Commendonus, ita ut & Ferdinandum prioris negligentia pœniteret, & uterque renovatâ gratiâ lætari videretur. Sed cum dignitatis suæ retinens, tum verò ut eâ decederet, nullius aut gratiâ, aut meru adigi se patiebatur. Henrico Polonorum Rege creato, ut ostendimus, & Ernesto præterito Maximiliani

Cæsaris filio, Commendoni adversarii, & Maximiliani ipsius Legati, quo à se averterent, culpam omnem ejus repulsæ in Commendonum contulerunt, propensio-rem eum in Galliam fuisse, atque illi omnibus suis studiis favisse criminantes, dictis eorum facile exitu rei fidem astruente. Hæc Cæsar seu credidit, seu causam hanc erratis suis, suorumque obtenderet, graviter, atque acerbè de Commendono, tamquam ab eo filius honore dejectus esset, querebatur: còque iræ processit, ut redituro è Polonia per Joannem Delphinum Episcopum Torcellanum, Pontificis apud se Nuncium denunciari jusserit, non modò ut Viennam ex itinere non attingeret, ubi Regiam ipse habebat, sed Austriæ quoque finibus abstineret. Eterant Commendono alia æquè commoda, nec longiora itinera, quibus in Italiam rediret, & qui cum illo erant, precibus eum hortabantur, ut per Bohemiam in Bavariam ad amicissimum sui Regulum, & perhumaniter invitantem diverteret; Austriam omitteret vel benevolo Cæsare, Pontificum Legatis defectione à Christianis sacris satis infensam. Sed ille neque dignitatis suæ esse Cæsari in eo parere, & culpæ, aut certè timoris confessionem habiturum aliò deflexum iter ferens, non Viennam modò recto itinere perrexit; sed etiam triduum in suburbano monasterio sacrificii causa, quod Kal. Novembris solemne incidit omnibus Divis, est immoratus, quò ad eum visendum multi præstantes viri, & omnes, qui Viennæ e-

rant, Regum Legati convenire. Et ipse, ne quid ab se de pristino instituto, aut animo commutatum videri posset, per eundem Delphinum interrogari Cæsarem jussit, an ab se adiri, ac salutari vellet. Quo congressum declinante, ipse incolumnis inde, nullo aut dicto, aut facto violatus, nihil dignitate suâ indignum unquam passus in Italiam transiit. Ab eadem legatione redeuntem Romanam gravis cum potentissimo homine controversia excepit, quam ipse animo haud quaquam ab se discrepante & subiit, & gessit. Abbatiam Veronæ vberissimi vectigalis vacuum fortè Andreæ Cornelii morte Commendono Pius V. tradiderat. Eam Alexander Farnesius Cardinalis ad se rediisse certo jure contendebat: sed sub Pio severitatem judicii, quod ei de manifesta fraude, quam confidentiam vocant, intendebatur, veritus, juratus cesserat causæ. Mortuo demum Pio, non tam jus, quod nullum erat, quàm dolorem, atque iram prioris judicii lite prosequeretur, Gregorio novo Pontifice permittente. Et Commendonus injuriam illam, & imparem cum homine tantis fortunis, copiisque circumfluente contentionem à Gregorio, quem esse in adversarium proniorem, ac sibi minùs æquum senserat, ut deprecaretur adduci non potuit, diligentia se, ac bonitate causæ adversarii potentiam æquaturum sperans; quin vehementer pro se litteras Regis Galliæ manu ea de re ad Pontificem scriptas reddi vetuit. Is erat Farnesius nepos Pauli III.

Ggg iij

Pontificis Maximi, summi viri, & cui summæ laudes consilii, & sapientiæ deberentur, si eas publico bono habere, quàm in filii, nepotumque augendis opibus pessimo publico omnes impendere maluisset. Quo in studio adeo nimius fuit, ut qui Reipublicæ præclare gestæ famam ferre potuerit, lacerata, atque distractæ invidiâ gravissimè laborarit. Nam Petrum Loysium filium inde ante Cardinalatum concubinâ susceptum, primò Camertibus dominum imposuit invitis, & in pristino jure, quo in fidem, ac ditionem Romanæ Ecclesiæ redierant, manere cupientibus. Eidem castrum, aliquotque præterea oppida haud longè ab vrbe sita contribuit: postremò Placentiam quoque, & Parmam, valentissimas vrbes summâ virtute à Julio II. Pontifice Maximo. Regibus, à quibus occupabantur, ereptas, & adversus descendentes ab Alpibus barbaras nationes pro muro objectas tradidit: inque ea re adeo Rempublicam ludibrio habuit, *vecum* pro iis Camerinum reddi sibi voluisset, Senatusconsultum fieri cum ea perscriptione jussit, eam permutationem vtilem Reipublicæ videri. Quo in loco nos præterire nolumus Marini Grimani Cardinalis contumax quidem adversus Pontificem, ac defectioni proximum, sed vtile pro Republica fortè consilium, si perductum ad effectum fuisset. Istum iis vrbibus Legatus cum imperio præerat, atque adeo rem non probavit, ut jussuseas Petro Loysio tradere, nec statim par-

erit, & palam juraverit, si prompta sibi decem aureorum millia militibus ad oppidorum custodiam scribendis fuissent, audientem se Pontificis dicto non futurum: sed sublato edita in turricum geminis clavibus insigni Romanæ Ecclesiæ vexillo, vrbes in potestate sua, & futuri Pontificis habiturum. At Paulus ad eam denique magnitudinem extulit filium, vt nec Carolus V. nec Henricus II. summi Christiani nominis Reges infra fortunæ suæ fastigium duxerint socerum eum filiarum suarum videre. In Pontificis enim gratiam Octavio Petri Loyfii filio Margarita Caroli Cæsaris, Horatio Octavii fratri Diana Henrici Regis Galliæ filia, sed neutra iusto matrimonio genita, nupsere; in quibus ornandis, Regiôque cultu pro sua, parentumque amplitudine habendis Paulus ingentes pecunias effudit, atque eò inde spes, & cupiditates suas extulit, vt Mediolanensium Imperium, de quo internecino bello inter Gallos, Cæsaremque certabatur, transferre in domum suam appetierit, deque eò tentare Cæsaris animum non sit veritus, cum illo apud Cremonam congressus. At statim Pontificatu inito, Alexandrum Petri Loyfii item filium, & Afcanium Sfortiam Constantiâ ejusdem Petri Loyfii sorore ortum, ac paulò post Ranurium quoque Alexandri fratrem, pueros omnes, quorum nemo xv. annum attigerat, Cardinales creavit, opulentissque beneficiis, ac sacerdotiis ornatos, amplissimis Romanæ Ecclesiæ muneribus præpo-

fuit. Nam Alexandrum, in quem fuisse proclivior est visus, Vicecancellarium, Ascanium Camera-  
rium, Ranutium Pœnitentiarium fecit; & maxi-  
mè Alexandrum tantis adauxit, & cumulavit di-  
vitiis, tantis circumsepsit præfidiis, ut cum ne-  
que honores nisi per eum impetrari ab se pate-  
retur, ac sacerdotiorum ditissimum quodque aut  
differret ad eum, aut in alios conferens eam adjun-  
geret conditionem, ut iis fato perfunctis, qui ab  
se accepissent, ad Alexandrum inde ea redirent,  
vnus omnem propè civitatem beneficiis obstri-  
ctam, latissimèque propagatas clientelas, amici-  
tiisque haberet, ac in eo ordine potentiorum  
hominem ætas nostra non videt. Cum hoc igitur  
controversia, atque his Commendono inter-  
cessit, tenuitque ultra biennium; irritati enim  
animi utrinque erant, quòd sub Pio Farnesius  
cum Commendono congressus, non debere quem-  
quam adeo præsentibus rebus, gratiæque confi-  
dere, quin cogitaret mutari cum Pontificibus  
tempora solere dixerat: Commendonus, & ita id  
quidem esse responderat, & optimè omnium sci-  
ri ab his, qui aliquando propinqui Pontificis, &  
potiti rerum fuissent. Id Farnesii animum elatum,  
tumidumque altè penetravit, eoque magis vre-  
batur, quòd appeti, ambiri, rogari suetus Com-  
mendonus ne ad colloquium quidem ea de re se-  
cum vnquam se demississet. Itaque Farnesius a-  
mico agenti cum eo, ut ne pergeret indecoro ju-  
dicio seque, ac virum magnæ in civitate existi-  
matio-



mationis conficere, responderat, Ita tractor ab illo, ut si ipse Farnesius esset. Commendonus quoque cum familiarium, & amicorum intimis consiliis stimularetur, ut aliquem finem tam impari dimicationi imponeret, quod haud difficile esset futurum, si modò imperare ipse sibi posset, ut Farnesium comiter appellaret, tumque domi conventum prece, & commodâ oratione aggrediretur, ille moriturum se prius, quàm id faceret, affirmavit; quippe nec à Pio illud se petiisse sacerdotium, & ultro traditum nemini alteri acceptum laturum: ipsum Gregorium se Pontificem Maximum, qui eam sibi injuriam patiendo fieri fecisse dici posset, deprecari noluisse; supplicem Farnesio iturum? Judices aut per suos quæ in rem essent edocebat, aut per amicos, magnæ viros auctoritatis, officii admonebat, continebaturque, ut causæ, non gratiæ essent. Ipse eos aut blandius appellare, aut prehensandi, & conciliandi causâ domi convenire numquam sustinuit: quod Farnesius, tanti viri fastigii, factitare curru circumvectus non est veritus; adeo elatos hominis spiritus sibi ira, & cupiditas submiserant. At Commendonus hunc tenuit semper modum, ut neque dicto, factove villo adversarium læderet, quod & vitæ institutis, & personâ illâ alienum duceret, vllas inimicitias, aut simultates exercere, & jus, atque causam adeo intento studio, constantique decreto defenderet suam, ut quantum opibus adversarius excelleret, tantum supera-

Hhh

ri industriâ videretur. Initium agendi de compositione tandem à Farnesio est ortum Commendoni perseverantiâ fesso, & diffidente jam etiam causâ, & maximè invidiâ commoto, quam inde excitatam sibi inter Patres senserat. Igitur interpretibus Alexandro Sfortia, & Nicolao Caetano Cardinalibus, ex auctoritate Gregorii reconciliata inter eos concordia est, magnopere confirmata opinione, quæ de Commendoni animo excello, & adversus aspera obfirmato antea quoque erat.

---

*De more ejus numquam se purgandi, de quo  
consciis sibi non esset.*

#### CAPUT XVI.

**S**IQUEM alienatum à se suspicione aliquâ, aut malevolorum artificio, non vlllo suo merito comperiisset, ei ut errorem eximeret, aut se, de quo offensum illum sensisset, purgaret numquam adduxisset. Paulo I V. Pontifici Maximo inter paucos è familiaribus carus, acceptusque fuit prorsus, ut ferri in sinu videretur. Initio scribendis epistolis ascitus, mox ad Cæsarem, ad Italiz Principes, ad Venetos missus; crebris Pauli testimoniis fides, industria, sanctitas est juvenis celebrata, ut jam non dubitarent homines eum ad Cardinalatum usque proferre. Itaque bello inter Pontificem, & Hispanos exorto, ad concitandos in societatem armorum

Venetos mittitur. At qui ejus spei invidebant, facilè Carolo Carafæ perſuaſerant, vt juvenem acrem, & ſi Cardinalis fieret, nequaquam ei obno-  
xium futurum, & magnâ Pauli gratiâ, ejusque itineribus euntem vltrâ creſcere ne pateretur; & ipſi jam Carolo inquinatiſſimè, ac perditè viven-  
ti ſuſpecti graves, atque ſintegri Commendoni mores erant. Ab eo igitur inſimulatus apud Pon-  
tificem eſt, quaſi in Hiſpanorum cauſam incli-  
natione voluntatis propenderet. Reverſus Ro-  
mam, cùm & quo mendacio offenſus, & aliena-  
tus ab ſe Paulus ſciret, & criminis ipſius faci-  
lis ei inſiciatio, ac depulſio eſſet futura, nec clauſus, ſi niti voluiſſet, ad ſe purgandum adi-  
tus, & amici hortarentur adire Pontificis ipſius aures, pertinaciter abnuìt innocentiz fiduciâ,  
& conſcientiâ tutus, & Paulum obſeſſum à ſuis alienâ jam voluntate regi, agique intelli-  
gens. Quo tempore in Polonia Nuncii Apoſtoli-  
ci munere fungebatur, apud Auguſtum Regem magno in honore, ac dignatione fuit. Nam non aditus modò ad eum patuit quoties, & quo tem-  
pore voluit: ſed vltro ſæpè accerſebatur, atque de omnibus privatis, ac publicis rebus cum eo Rex communicabat, & frequenti, & perquam familiari conſuetudine ejus delectari, & conſilio, prudentiæque ejus tribuere plurimùm videbatur, multique ſtudio, & commendatione illius ad ho-  
nores, magnâque fortunam ſunt provecti. Ar-  
repta hinc malevolis quibuſdam obtreſcendi anſa,

H h h ij

& cùm Augustus repudiare vxorem flagrantissimè cuperet, consiliâque illa agitaret, de quibus à nobis suprà commemoratum est, rumorem distulere, à Commendono Regis conatum adjuvari; eâque suspicio ita est apud Reginam, Cæsaremque fratrem illorum obtrectatione, artificioque confirmata, vt Cæsar Andreæ Duclitio Episcopo Quinque-Ecclesiensi, & Cerzbachio Slesio, claris viris, quos Legatos de sororis rebus ad Augustum misit, mandarit vt nullius rei, quæ ad Reginam pertineret, Commendonum participem haberent. Legati cum eo sæpè congressi de aliis rebus satis pro consuetudine, & more inter se Legatorum, de Regina, cujus de causâ venerant, nullum vquam verbum. Sensit Commendonus eâdem opinione imbutos, quam ei confessa de se Regina fuerat: & quamquam vnus jam tempestatem non sustinuerat modò, sed etiam excusserat, cùm Regis impetum remorando, cohibendoque, rum deterrendis iis, qui altores cupiditatis ejus putabantur; tamen neque Legatis se, neque per eos Cæsari purgare sustinuit, nec omnino mentionem vllam Reginz apud eos facere: donec Legati ipsi, per se compertâ re, ac perspectâ, ad Commendonum venerunt, litterasque ei Cæsaris manuscriptas reddiderunt, quibus fide, pietate, industriâque ejus collaudatâ, multis & honorificis verbis gratias ei agebat, testabatúrque quàm grata sibi ejus in sororem, sèque, & Austriam omnem familiam officia fuissent, quamquam sciret ea

magis ex religione, ac fide sua, quàm gratiæ causa cujusque suscepisse. Exinde Legati nihil nisi de sententia, & consilio ejus egerunt. Ab vltima legatione Romam reverso cum idem Maximilianus Cæsar ei haud minùs gravi ex causa vehementius succenseret, quòd in petitione Regni Poloniæ, vt antè memoravimus, favisse Henrico Galliæ Regis fratri, filiúmque suum dejecisse insimularetur, Gregorius Pontifex, qui tueri fidem Legati probatam, perspectámque sibi debuerat, destituit, & quantum in ipso fuit, à se rei invidiam in Commendonum derivavit. Eo non Maximilianus solùm, sed Hispani etiam, & Philippus, cujus Romæ magnæ, ac propè nimix sunt opes, offensiores in eum esse videbantur: quod negligendum Commendono nemini amicorum videbatur, auctoresque erant, vt Gregorium, quando tam ingratus in se fuisset, vlcisceretur, & vtri-  
que Regi mandata, quæ ab ipso accepisset, proderet. Nullius nec precibus, nec auctoritate vinci potuit vmquam, vt se vlli eorum, quod ei facile, explicatúmque futurum fuit, de Polonicis comitiis purgaret, non Regum se, sed Pontificis Legatum fuisse ferens, ei quidem satis fidem probasse suam, cæteri quid opinarentur non ad se magnopere pertinere. Præterquàm quòd non debere se aiebat malo publico persequi privatam injuriam, & Pontificem Maximum, quamquam sibi parum æquum, cum Christianis Regibus committere, quin ambitionis, aut cupiditatis opinio-

H h h iij

nem subiturum, siquos non læferit, iis satisfacere, eorum affectare gratiam videretur: nec ullam excusationem aliquâ culpæ suspitione vacare, & culpam qui præstant, excusari non debere. Nec cum constantis, ac rectæ mentis fiducia fefellit; vterque enim Rex, ut veritatem ferè dies aperit, fide ejus perspectâ, & litteras ad eum reconciliatæ gratiæ pignus postea dedit, & Rex Hispaniæ Apostoli Philippi in Phrygia pro fide erga Christum Deum interfecti os brachii, ad templum, quod ei Divo ædificabat, ornandum, sanctiûsque eâ reliquiâ corporis ejus reddendum, dono dari sibi à Commendono postulavit. Eam ipse è Germania ex æde Matthæi apud Treviros de sacerdotum, qui fano præerant, voluntate detractam in Italiam cum aliis multis attulerat, & petenti Regi argenteâ inclusam thecâ in Hispaniam perlibenter misit, à quo quidem ritè, atque castè suscepta suo in templo reposita est.

*De abstinentia ejus.*

CAPUT XVII.

UT sui minimè profusus, ita alieni abstinentissimus fuit. In frequentibus legationibus, quas, uti docuimus, pro Republica obivit, cum veras innocentiae, atque integritatis laudes externis nationibus, quas infatigabili cursu peragra-

vit, ostendit, cum maximè abstinenssem in omni re non se solùm, sed suos etiam præstitit. Cùm ampla illi, latæque multarum rerum potestas, & major quàm pro more propter spectatam ejus fidem, & diligentiam ferè permitteretur, hujus vsus potestatis ita ab omni semper quæstu abfuit, vt nullus à quoquam teruncius cujusvis rei diploma auferente insumptus vñquam sit, ne pro scriptura quidem, atque opera. Ac si quando res cogere videbatur, ne neglectæ legis multa remitteretur, eam ipse multam aut templis, aut egentibus esse jubebat. Siquem suorum accepisse quicquam ab vñlo provincialium quamcumque ob rem comperiisset, statim cum ignominia domo exigebat; nec minùs iis irascebatur, qui dedissent: magnam verò ab eo gratiam inibat, qui delatum ad se donum rejecisset, idque ipse pro suis facultatibus remunerabat. Quà disciplinâ est consecutus, vt & amarent eum sui, & vèrerentur, & existimationi ejus perinde, ac suæ studerent. Cujus rei experimentum, fructumque perjucundum aliquando cepit. Provinciâ decedens vsus in itinere hospicio est Archiepiscopi cuiusdam, fortunæ viri amplissimæ, & copiis, & opibus magnis præditi, sed qui senserat se Commendono suspectum, quòd parum sincerâ fide Catholicæ religionis partes tueri, conjunctiùs, & amantiùs cum hæreticis vivere, quàm Archiepiscopum deceret, diceretur. Eò impensius huic tegendæ, aut abluendæ famæ, hospitem eum magni-

ficè, ac splendide acceptum omnibus humanitatis, & comitatus officiis percoluit. Abeunti cum non solum ipsi argentea vasa magni ponderis obtulisset cum pertinaci obtestatione ut acciperet, sed familiaribus quoque ejus singulis pro cujusque fortuna munera eodem tempore dari jussisset, nemo inventus est qui acciperet, ne coeci quidem, aut ultimi ministrorum. Haec res Commendono oppidò perquam grata accidit læto respondisse institutis suis mores omnium suorum, nec ambitiosi hospitis largitioni cujusquam cupiditatem patuisse. Atque hujus ipse continentiae per multa, & magna documenta dedit, & qui locupletare se nec injusto, nec insueto aliis compendio potuit, gloriam, quam divitias ferre è publico ministerio satius habuit. Ego ne, quod longum esset, singula enumerem, duo tantum exempla subjiciam. Cum in Germanica legatione, in quam Episcopus ad Concilium indicendum est missus, ad Joachimum Brandenburgensem Regulum, unum è septemviris, qui suffragiis suis Cæsarem creant, & ipsum Lutheranâ doctrinâ, factioneque imbutum venisset, ut supra docuimus, summoque apud eum in honore fuisset, discedentem ille regiâ munificentiam prosequi cupivit. Nam equos eximios quatuor, varii usus argentea vasa, atque in his ex argento item, sed auro superinducto pateras binas notabilis magnitudinis, ac ponderis, Germanico factas opere, quibus illi solemnibus potant dapibus, horologium  
sum-



summi artificii, quo magnopere Germanorum ingenia gaudent, excelluntque, adjecit, & aureos nummos quingentos, præfatus haud ignarum se quantis sumptibus qui procul ab domo peregrinantur, hauriri necesse sit. Ex his Commendonus nihil accepit, atque contendenti Regulo, & pudori sibi sua spreta munera fore querenti non cessit, professus rem modò ab se remitti, gratiam rei perlibenter accipi. Cùm item è Polonia novo Cardinalatûs honore insignis in Italiam proficisceretur, Augustus Rex indecorum sibi existimans, si virum eâ dignitate è Regno suo decedere nullâ suâ liberalitate vsum pateretur, per Petrum Miscovium Episcopum Plocensium, vnum è Poloniæ proceribus, ac tum principem apud eum gratiæ locum obtinentem, diploma ad eum Regiis signis, atque chiographo consignatum misit, quo ei annum vestigal duorum millium Ungaricorum duabus solvendum pensionibus constituebat. Quo quidem diplomate testabatur Rex id quod res erat, non sibi ante eum diem studium bene, ac largiter merendi de viro tali defuisse, sed ipsum obtituisse voluntati suæ omnia repudiando. Quod tum quoque contigit. Nam Commendonus, quamquam ei pro novæ dignitatis splendore pertenuis, atque angusta res esset, tamen gratias simul, & diploma ad Augustum referre Miscovium iussit, pulchrè quidem mereri, sed pulchrius contemni Regum dona existimans. Sed Rex de eo litteras ad Pontificem Maximum de-

dit, nec destitit, donec Pontificis adactus imperio Commendonus munus Regium recepit. Ita factum, ut & liberalitas Regis, & Legati abstinentia egregiè constiterit. Hæc, atque alia hujusmodi multa abstinentis, atque integri animi documenta eò majori admiratione accepta, celebratæque sunt, quò nos antea gravius. & cupiditatis infamiâ apud exterarum nationes premebamur. Nec parva in iis alienatarum gentium culpa residere creditur, qui ad eas in fide, atque in antiquæ sanctitatis officiis continendas missi, ita se turpium quæstum, atque avaritiæ sordibus contaminarunt, ut Romanum nomen in magna inde acerbitate, atque invidia externis gentibus posuerint. Quæ maximè vnius virtute, atque abstinentiâ deleta macula est,

---

*De habitu corporis, & valetudine,  
& morte ejus.*

#### CAPUT XVIII.

**S**TATURA fuit justâ, erectâque, & minimè tardoincessu, facie decorâ, magnâque gravitatem, ac dignitatem præferente, colore subfusco, sed florido, & ferè rubentibus genis, barbâ, capillôque denso, & admodum nigro; nigris item oculis, vegetisque, & acutâ, ac celeri acie; naso paulò eminentiore, & qui subridenti spontè, ut notari posset, moveretur: aures item mo-

biles habuit, & parvas, dentes raros, & minutos, adeo ut ultimâ ætate ab inferiori gingiva vix extarent: reliquis membris teretibus, & validis fuit, & toto corpore optimè constituto, ac firmo. Vini, cibique juxta modici, sed quem avidè, ac properè sumeret, neque in eo vlla lenocinia quærebat, vulgari, ac parabili contentus; somni adeò potens, ut & statim caperet cum vellet, & quacumque destinasset horâ abrumperet. Valetudine per omnem vitam est usus prosperrimâ: quippe cum omnes Europæ provincias durissimis sæpè anni temporibus peragrasset, omnes itinerum labores, omnia peregrinantium incommoda perculisset, languentem de via, aut vlllo labore fatigatum nemo vnquam vidit; sed nec febrim vnquam sensit, nec vlllo decubuit, aut omnino magnopere laboravit morbo, nisi quòd interdum animo linqui ad breve spatium solet: quod tum ferè fiebat, cum aut missum sanguinem, aut recens aspexisset vulnus, aut etiam cum acrior cura animum ejus versaret; sed si vel paulum modò quateretur sopitus, vel frigidâ aspergeretur, statim excitabatur, nihilo pristini vigoris deperdito: vnde neglectum ab ipso, ac ne indicatum quidem medicis est malum; adeò in nulla suspitione comitalis, aut omnino vllius gravioris morbi habuit. Ingravescente ætate vires sumpsit, & cum antè vix quinto aut sexto quoque anno semel sentiretur, jam frequentius, graviusque infestabat, nec tamen lædere vlla ex parte,

aut infirmare pristinum robur valetudinis videbatur. Sed insidiosum virus in occulto gliscens, animo quàm corpori infestius grassari, atque ipsam sensim corrumpere, ac labefactare mentem, magis mirantibus ingenii, morum, naturæ, vitæque mutationem, quàm satis intelligentibus causam, qui ei in domestico usu, ac familiaritate eramus. Quotidie molestior, iracundior, & sui impotentior fieri: quocumque cupido impulisset, non ipse se inhibere, non alii moderari poterant; ipsa excellentissimarum virtutum ornamenta, quarum gloriâ floruerat, elanguescere, atque adeò in contrarium verti, & ingenii vis omnis hebetari in dies videbantur, & ex diligenti medicorum consultatione adhibita remedia morbi vim, contumaciâque irritarunt; tanto enim impetu mox erupit, ut voce, spiritûque abrepto, diu pro mortuo jacuerit, nec igne, nec ferro adhibito excitari, revocarique malo obruti sensus potuerint, donec ipsa per se desæviente, ac remittente peste, revixere tandem, ac suus corpori vigor rediit. Mens exinde illi nunquam satis constitit, maximè ea pars dilapsa est animi, quæ reliquarum custos ingenii partium dicitur, ut vitiatâ, penitusque extinctâ memoriâ, quâ antea summâ, & admirabili fuerat, & sui, & aliorum oblivisceretur. Quia solitudine maximè conturbari, afficique videbatur, adhibiti assidui custodes, qui cogitationibus defixum serendo sermone variè detinerent. Et ipse sicuti suâ sponte haud facilè silentium abruptisset, ita illatum ab

alio sermonem arripiebat, protrahebátque spatian-  
do, ac loquendo longissimè, eadem assidue repe-  
tens; nec rem cœptam vnquam omisisset, nisi  
novo injecto sermone aliò de industria traductus  
fuiſſet, in eo semper insistens quod novissimè sub-  
jectum esset, priorum penitus immemor: nec ta-  
men seu narraret aliquid, seu disſereret, ordinem  
non tenebat, ac ne solito quidem acumine ora-  
tio ejus carebat, ſententiis quoque, verbisq̃ apta,  
& cohærens, & si res postulasset, etiam salibus,  
jocisque distincta, sed iisdem se semper revolvens.  
Atque in hac miseria annum ferè tranſegit, miſe-  
rantibus, & lacrymas ægrè complimentibus qui  
in colloquium ejus admittébantur, recordantibus  
gravitatis, ingenii, eloquentiæ, & variarum, &  
pulcherrimarum rerum notitiæ, quâ tenere ho-  
minum aures, & sui admirationem facere erat so-  
litus. Ne Romæ infelicitas ejus spectaculo esset,  
& quia curandi spem aliquam tamen fovebamus,  
& oculendæ rei studebamus, lecticæ impositus  
Patavium est adductus. Ibi omnibus frustra adhi-  
bitis remediis, quintum post mensem novâ erum-  
pente vi morbi extinctus est. Ad VIII. Kalendas  
Januarii, Natali die Christi, anno M. D. LXXXIV.  
ætatis suæ sexagesimo, sacris religiosè, ac piè, vt  
videbatur, cùm interfuiſſet, peractis iis capturus  
cibum confedit, & repentè collapsis omnibus  
membris supinus cecidit. Strato illatus eum diem,  
& noctem inſequentem juxtà mentis, ac ſenſuum  
expers, atrocibus motibus, & colluctationibus vo-

lutatus, postmodum ejus diei, eadem ferme hora, quâ corripuerat eum morbus, fœdè, miserabiliterque oculis, atque ore distorto, ad vitæ finem pervenit, genere mortis, quale ipse minimè optaverat. Mentione enim aliquando Juliæ Cæsaris oratâ lentum exitum damnantis, subitumque, & inopinatum præferentis obitum, ipse longè præstare aiebat sensibus, ac mente integrâ decedere; magni scilicet æstimans, animum prius morti componere, & Deum sibi per Christianæ disciplinæ sacra, piaculâque propitiare: Augustini dictum sæpè usurpans, Neminem, quamvis nullius criminis, delictique conscium sibi, committere debere, ut sine dolore offensus, aut certè non perinde, ac de humano genere mereretur, culti divini numinis è vita discederet. Elatus est nullo funeris honore, & in Capucinatorum æde (nam utrumque antè testamento ipse ita mandaverat) vulgari sepulcro est conditus.

*FINIS LIBRI IV. ET VLTIMI.*



## LECTORI.

**O**RATIONIS habitæ à Commendono in comitiis de Rege Poloniæ eligendo, cujus auctor noster meminit pag. 369. exemplar integrum nancisci non potuimus : majorem tamen ac potiore ejus partem ecce tibi producimus ex Andreæ Maximiliani Fredro historia gestorum populi Poloni, sub Henrico Valeſio pag. 43. 44. & ſeq. editionis Dantiſcanæ 1659. Sic autem habet.

**I**NTROMISSUS in plenum utriuſque ordinis conſeſſum Legatus Pontificis, Joannes Franciſcus Commendoni Cardinalis. Hic ſalutatis ordinibus litteras ſecretas à Pontifice reddidit : tum ipſe cum in modum Latino ſermone locutus ; cujus formalia ſuggero.

**Q**UÆ Pontifex Maximus in veſtra Regis eligendi deliberatione graviffima atque maxima à Deo precatur, ut veſtræ mentes atque ſententiæ divino inſtinctæ Spiritu, ſalutem vobis, & huic Regno incolumitatem & dignitatem præſtent, eandem mandatorum meorum & legationis ſummam eſſe voluit. Nam quemadmodum ſua Sanctitas indiſcretis Romæ ad omnia templa publicis ſupplicationibus, & ſuis, & populi precibus Deum placare non deſtitit, ut Regem vobis concedat, qualem & veſtræ, & univerſæ reipublicæ Chriſtianæ tempora poſtulant ; ita vos hortatur, ut in re tanta, quantâ major vobis nulla eſſe poteſt,

non tam quid in præsentia ipsi possitis ; quàm quantum momenti in eo sit, quocumque iudicia vestra inclinarint, animo reputetis, atque hac potestate sapienter utamini. Est enim res huiusmodi, ut in vnius decreti vi summum aut salutis aut exitii discrimen vertatur. Quæ intelligens Pontifex, sicut ex litteris ( quæ modò recitatae sunt ) audivistis, haud minùs quàm Christianæ reipublicæ parentem decet, sollicitus de vestra salute, comitiorum, consiliorumque vestrorum exitum spectat. Verùm ego vellem, ut ex eo templo, vnde pias ad Deum preces pro vobis mittit, quâ pace, quâ tranquillitate interregnum hoc, vna vos patriæ charitate, & legum reverentiâ conjungente, peregeritis, intueri posset: bonam profectò spem ex vestra virtute perciperet. Est enim singularis exempli res in libero regno Rege diu caruisse, & silentibus Regis morte propè omnibus legibus, omnes tamen ex lege vixisse, & suam cuique voluntatem, suum cuique in patriam studium pro lege fuisse, ut in tot nobilium, & maximè militarium hominum millibus nullus tumultus aut vis, nullæ seditionum turbæ extiterint, nullus omnino armorum sonitus auditus sit. Quod cum vobis ipsis salutare, & præclaro posteris vestris exemplo fuerit, tum certè apud omnes nationes moderati animi admirationem habebit. Quam ego gloriam & vobis ex animo gratulor, & mihi ipsi meo quodam jure gaudeo, cui in his quæ de vestris laudibus, & republica prædicare con-



confuevi, tam illustre testimonium dedistis. Quòd si quâ pietate, orbari Rege, pacem patriamque seruaſtis, eandem hoc in loco, in dicendis ſententiis ferendiſque ſuffragiis retinueritis, ſi vnâ animis Rempubicam complectemini, ſi nihil niſi ex veteri more & maiorum inſtitutis, quibus hætenus Reſpublica ſtetit ac floruit, agi patiemini, equidem non modò ſpem, ſed lætitiâ delecti concordiffimè optimi Regis, jam animo percipio. Eam verò veſtræ Reipublicæ formam conſiderans, admirari ſoleo ſapientiam maiorum veſtrorum, qui regni & libertatis modum ita temperarunt, vt inter ſupremam vnius poteſtatem, & diſſolutam multitudinis licentiâ, tam firmam tuendarum legum & propagandi imperii rationem excogitarint. Hanc illi innumerabilem Equitum multitudinem ampliffimo diſfuſam regno, paribus viventem legibus, (& æquo inter ſe jure ita viventem, vt vna aliqua videatur eſſe ingens ciuitas, quæ multas & longè diſtantes provincias ſit complexa) haud alio imperio regi poſſe, quàm Regio intellexerunt. Cùm verò hoc quemadmodum eſt præſtantiffimum, ita ſit periculofum libertati, iidem vtrumque viderunt, & Rege Rempubicam indigere, & ne Rex gravis communi libertati foret, providendum duxerunt. Cùm magiſtratus in Republica inſtitui nullus poſſet, qui Regem poteſtate anteiret. Spiritualem ordinem aſſumpſerunt, cùmque in ſpecula libertatis, & præſidio Reipublicæ collocarunt, nullumque ſi-

K k k

ne eo publicum consilium esse voluerunt. Cùm enim Episcopi instituti in populis sint, tanquam nuntii & interpretes Dei, ad eorum dignitatem per se maximam adiectere humanas opes honoresque in Republica amplissimos, quibus communiti & Regem in officio haberent, patrumque maiestatem apud eum obtinerent, atque inde custodes ac vindices libertatis existerent: quod sæpè factum esse rerum vestrarum scriptores memoria prodiderunt, ut efferentem se Regum licentiam, saluberrima Episcoporum admonitio coercuerit. Quamobrem cùm ita Respublica sit constituta, ut fundamenta libertatis, in religionis & Ecclesiæ ordinis dignitate collocaverit, nemo, ut arbitror, dubitat, quin necessarium sit ad statum Reipublicæ conservandum, ut Regem avitæ, & Catholicæ pietatis cultorem habeatis, ne si spreta fuerit, aut etiam ejecta Ecclesiastica auctoritas, tanquam evulsis iis radicibus, quibus primum fixa & confirmata est, vestra libertas evertatur ac concidat. Cujus rei exempla vti nam nulla haberetis, quæ nimis multa vobis ad cavendum horum temporum pravitas præbuit. Sed profecto videmus in quibus provinciis par tuendæ libertatis ratio instituta erat, in iis, sublatis per eorum dominatum (qui à Catholica religione desciverant) Episcopis, non solum libertatem oppressam, sed & nobilitatem extinctam esse, & omnia sub unius arbitrium voluntarèque redacta. Id ne vobis accidat, vestra imprimis prudentia, vestra

in patriam pietatis est providere. Ut Regnum hoc nobilissimum, quod semper propugnaculum habitum est Christianæ Reipublicæ, iisdem rationibus conservetis, quibus initium stabilitum esse intelligitis: Id enim, id, fortissimi Equites, est firmamentum vestræ libertatis, quod qui comminutum & labefactatum cupiunt, eodem tempore concuti totum, & dissolvi Rempublicam volunt. Multa vos quidem & magna à Deo beneficia habetis, qui Regnum vestrum à Baltico mari ad Euxinum, ab Odra flumine per immensa regionum spatia Boristhenem ultra propagatum; tantis rerum opportunitatibus auxit; sed pulcherrimum illud est, quod eligendi Regis facultatem vobis tribuerit, ut Regem habeatis, non eum quem sors ex certa hæreditatis lege dederit, sed quem vos ipsi dignum (à quo regamini) judicaveritis, quo profectò in rebus humanis nihil videtur esse præstantius. At non hoc solum munus dignitatis & amplitudinis plenum vobis elargitus est Deus, sed munus ipsum novo, & nobiliore munere cumulavit, cum id non humanis viribus aut opibus, (quanquam ne his quidem, vos non abunde instructos esse voluit) sed bonorum omnium maximo & potentissimo, Catholicâ religione fundavit. In quâ utinam omnes consentientes essetis, neque hæc novitas & varietas opinionum, quibus scinditur Christiana Respublica, in Poloniam unquam pervasisset, & in hanc gentem, quæ suis juncta & consentiens legibus, præsidio esse Chri-

stiano nomini potest, hoc malum invecum esset. Quo, ægrotare vestram Rempublicam & ipsi sensistis, qui proximo Warsavienſi conventu ei mederi cupivistis, &c.

*Hic de una religione longum admodum differuit & facundè, quàm felix Respublica futura, si vera ei contingat religio; quàm infirma & ad casum properans, si adulterata & varia. Longum foret recitare totam Legati orationem, quam prolixiùs perorabat, solum subjiciam epilogum.*

**Decernite** ergo nunc concordibus vocibus Regem eum qui maximè Reipublicæ utilis sit futurus, qui vestro beneficio ad vestram salutem vratur, qui cùm à vobis creatus & tamquam genitus Rex fuerit, evadat ipse patriæ & vestrùm omnium pater, amator Reipublicæ, conservator legum, idem erga Deum pius, fortis adversus hostes, in gubernandis, gerendisque rebus peritiam, in jure dicundo justitiam diligentiamque adhibeat, in domestica consuetudine humanitatem, in omni publica actione dignitatem majestatemque retineat, nec ipse voluptatibus occupetur, nec juventutem languescere otio patiatur, sed exemplo & præmiis, bellicæ disciplinæ laudem excitet. Sit regia domus tamquam templum pudoris, modestiæ, religionis, ut liberi vestri quos in regis ministerium traditis, ex ea velut scholâ virtutum, digni parentum honoribus evadant. Haud ego sum nescius, Regem his præditum ornamentis, oratione effingi faciliùs quàm inveniri, verùm ne-

que nobis defuturus est quærentibus, & ut talem habeatis, multum in vobis ipsis positum est, non solum deligendo illum, sed etiam instituendo. Quem enim non optimum Regem efficiatis, si quot estis Senatores, tot monitores Regum esse volueritis? Si Regis salutem quam gratiam malueritis? Si publica commoda privatis utilitatibus antetuleritis? Si denique hoc propositum habebitis, diligentissimæque operam dabitis, ut & vos ex legis præscripto Regis imperio obedientes sitis, & Rex ira obsequio utatur vestro, ut se liberis & volentibus imperare intelligat? hoc enim modo & res Polona augebitur, & libertas vestra conservabitur, nec dominatu offensa, nec corrupta licentia, quæ plerumque falso libertatis nomine exitiosam servitutem concipit, ac parit. Ad hunc statum rerum vestrarum tuendum communicandumque, vos Pontifex hortatur, atque ad eam rem mihi mandavit, ut & in præsentia vobis, & paulò post, simul vobis, simul Regi vestro summum paterni animi studium pollicear, ac deferam, ut omnia vos quæ non solum conservando, sed etiam augendo aut ornando huic regno sint, haud aliter ab se quam ab optimo Patre postulare atque expectare velit: Tum sicuti vobiscum egit de Rege (reque vestra) eligendo, vobisque auctor fuit, nihil à majorum consuetudine & rationibus discedendi; ita Regem quem elegeritis verbis suis admonere me voluit, ut memor à vobis accepti regni, parem vobis gratiam referre studeat, nihil-

K k k iij

que sibi aut ad fidem præclarius, aut ad charitatem optatius, aut ad stabilitatem firmitus, aut ad nominis sui commendationem amplius ducat, quam ut hanc Rempublicam, hoc libertatis jus, factum testumque retineat, ac defendat. Me verò ipsum commodis atque utilitatibus vestris, quantum operâ atque studio meo effici possit, diligenter sua Sanctitas inservire iussit; in quo quidem si quantum voluntatis atque animi, tantundem facultatis esset de vobis merendi, etsi pietati & amoris erga vos meo numquam satisfacturus essem, vobis certè ipsis satisfacerem. Hæc sunt de regno, de vobis, de novo Rege sanctissimi Domini nostri mandata, hæc vora Parentis Reipublicæ, hæc ut consequi possitis suis ille vos precibus Deo commendat, id maxime orans, ut actionem hanc in qua vestrum omnium salus vertitur, suo Sancto Spiritu regat, ut his comitiis, cum Regem consentientibus studiis renunciatis, sub quo florentissimi beatissimique vivatis.



---

## SUMMA PRIVILEGII.

**C**AUTUM est auctoritate Regis, ne quis in regno ipsius, aliisque locis ejus ditioni subiectis, intra septem annos proximos librum qui inscribitur: Antonii Mariae Gratiani à Burgo S. Sepulchri Episcopi Amerini, de vita Joannis Francisci Commendoni, libri quatuor: præter Sebastianum Mabro-Cramoisy, Regis Typographum, imprimat aut divendat. Qui secus fecerit, multa indulta, prout amplius in diplomate Regio continetur, coërcetur. Datum Parisiis, die 24. Februarii 1669. Sic signatum, De mandato Regis, DE SEIGNE-ROLLÉ.

# THE HISTORY OF THE CITY OF BOSTON

FROM THE FIRST SETTLEMENT TO THE PRESENT TIME.  
BY  
JOSEPH NEALE, ESQ.  
OF THE BARR.

LONDON:  
PRINTED BY J. JOHNSON, ST. PAUL'S CHURCH-YARD, 1773.

IN TWO VOLUMES.  
THE FIRST VOLUME.

THE SECOND VOLUME.

THE THIRD VOLUME.

THE FOURTH VOLUME.

THE FIFTH VOLUME.







P=

34



